




清代傳記叢刊·綜錄類⑦  
周 駿 富 輯

# 國朝耆獻類徵初編

(四)  
(五)

卷三二〇至  
卷三二九

(清)李 桓 輯



明文書局印行

W200710

國朝齋獻類徵初編卷三百二十目錄

將帥六十

蒲立勳

徐慶超

閻俊烈

多貴

富明阿

八十六

圖明阿

富亮

姜長齡

武光琳

馬金魁

蘇清阿

蘇勒當阿

福祥

張琴

唐文淑

蘇兆熊

福克精阿



國朝通志卷之三十四

--	--	--	--	--	--	--	--	--	--

國朝耆獻類徵初編卷三百二十

通奉大夫前署江西巡撫江西布政使司布政使湘陰李桓輯  
將帥六十

蒲立勳

蒲立勳福建侯官人由行伍歷拔千總嘉慶十七年署金門鎮標  
左營守備時海盜駱廬仔等在金門洋面肆劫立勳偕守備張琴  
等督領舟師分路追剿尋駛至金門外洋豫截其分竄之路奮力  
合剿槍礮齊施獲王右等十餘名餘匪落水淹斃者無數奪其船  
一並搜獲礮械火藥多件二十三年擢福甯鎮標左營外海水師  
守備道光元年超擢金門鎮標左營遊擊五年升廣東海門營參

國朝書牘類編卷三百二十一  
將尋調龍門營參將六年署澄海協副將七年升龍門協副將八年署碣石鎮總兵九年兩廣總督李鴻賓保奏立勳諳習外海情形巡緝訓練俱屬謹飭堪勝水師總兵之任尋署南澳鎮總兵十年六月以鎮標左營及銅山營兵丁貧苦請撥借庫貯穀銀每兵一名給銀一兩自行零糴並請於各兵餉內自七月起至十一月止分月扣收歸還以濟兵力而重庫款 命如所請行七月擢浙江温州鎮總兵十一年五月因母老陳請終養 允之十三年卒

右 國史館本傳

## 徐慶超

徐慶超廣東鎮平人乾隆六十年武進士授藍翎侍衛嘉慶五年選授閩浙督標右營守備六年署興化城守左營都司獲疊劫巨盜張長等五人九年回本任十年護連江營水師遊擊因艇匪蔡牽肆擾臺灣慶超隨浙江提督李長庚在浮鷹西涌等洋面剿捕殲擒甚夥匪船竄出外洋十一年九月偵知蔡逆匪船在竿塘一帶洋面復隨李長庚率舟師追剿擊斃賊目蔡添來生擒零匪百餘十一月督官兵獲洪第等十四人於奇達汛奪取器械無算乘勝追至苔茶塘洋面沈其船一擒賊目四十二年帶兵船巡哨至黃岐洋獲接濟賊匪食物奸民林開魁等三人軍政卓異十三年

補興化城守左營都司十七年調臺灣北路左營都司十八年升  
陸路提標右營遊擊二十一年獲鄰境盜犯多名送部引 見得  
旨徐慶超著發往福建以參將用二十二年補提標中軍參將道  
光三年署興化城守營副將四年升浙江紹興協副將六年調杭  
州協副將九年閩浙總督孫爾準保奏堪勝陸路總兵得 旨徐  
慶超著送部引見十一年擢福建建甯鎮總兵十三年卒子紹芬  
浙江候補縣丞

右 國史館本傳



閻俊烈

閻俊烈山東濟陽人乾隆五十四年由武舉分發本省撫標右營  
效力五十八年補兗州鎮左哨把總五十九年升沂州營大興鎮  
汛千總嘉慶元年川陝楚教匪滋事命內大臣額勒登保德楞  
泰往剿俊烈隨營效用三年擊四川首逆王三槐徐添德及林亮  
功等賊匪奮勇出力賞戴藍翎四年二月生擒首逆羅其清俊  
烈在事有功賞斐凌阿巴圖魯名號四月升武定營中軍守備  
五年正月升沙溝營都司七月隨提督七十五帶兵剿賊蔡營鄰  
水境內樊人傑股匪由七孔溪一帶竄入俊烈偕遊擊鄭啟貴等  
由山溝抄截七十五督兵直衝追剿數十里殲賊八百餘生擒樊



逆之弟樊人聰六年三月七十五師次寶塔偵知陳朝觀股匪從  
陽橋塌折屯竹園坪俊烈偕都司羅思舉等夜擣賊營賊潰散五  
月七十五率兵由一碗泉前進時藍號賊匪屯聚陝省平利縣之  
大渝河俊烈偕侍衛武隆阿先赴茅壩三斗種山後設伏賊向茅  
壩奔竄伏發立斃百餘人賊搶據山梁我兵槍石並發殲斃無算  
尋升高唐營遊擊七月藍白二號賊匪合湯劉二逆股匪分竄滋  
擾俊烈遇賊於東湖保康地界擊斃賊首王鎮賢賊潰散八月七  
十五帶俊烈等折回川東勦苟文明分股賊匪師次奉節賊眾分  
屯奉節之楊柳壩等處俊烈偕侍衛武隆阿夜擣賊巢賊退據山  
岡負嶠抗拒我兵大隊合攻賊敗走大兵向夔州進發行抵開縣

適苟樊股匪竄至譚家灣俊烈與參將鄭啟貴分路進剿於溫湯井地界突遇賊匪千餘由山梁下壓奮力擊退之旋有七里坪東壩溪一帶竄出股匪俊烈當先衝擊追殺數十里殲獲多名九月七十五追剿苟逆等股至亢河間有賊匪千餘由陝竄至首逆崔宗和胡明元在老鴉鋪壽家山等處屯紮令俊烈等領馬隊出望鄉坪捕剿賊遁老林寨內俊烈首先衝入擒斬二百餘名骸受石傷十一月俊烈隨總兵豐紳追剿高見奇股匪見奇就獲下部議敘七年五月升陝西西安城守營參將六月俊烈在二竹搜捕零匪適逆首王國賢屯踞木瓜坪卽乘夜率兵馳擊矛傷王國賢撲河淹斃疏入 諭曰聞俊烈圍剿賊匪不分畛域矛傷王國賢殲

斃樊人傑之子弟餘匪剏洗殆盡殊屬可嘉著加恩賞給參將銜  
遇缺卽補尋以俊烈業於五月升補參將復 賞加副將銜十一  
月俊烈率兵從界嶺以南沿太平邊界偵剿零匪聞黃柏扒老林  
有賊潛伏林箐深密馬不能行俊烈率遊擊湯占先等徒步前進  
昏夜遇賊身受矛傷尋黃藍線等號股匪千餘人由雲萬一帶奔  
竄經川兵偪剿緊急又思竄入陝境俊烈等帶兵星夜深捕至青  
岡坪賊占險抗拒我兵三路抄擊大敗之生擒首逆葉紹隴僞先  
鋒謝登貴十二月補貴州大定協副將九年二月平利之千家坪  
有賊滋擾俊烈偕總兵王兆夢分投截剿賊由正陽河屯西溝老  
林設伏林內俊烈追至朱橋河賊敗走我兵躡至林頂伏賊突出

俊烈連受矛傷猶能戰賊向讓河腦老林竄逸疏入 上以俊烈  
係帶兵之員身受矛傷恐其部下兵丁單弱 命西安將軍賽沖  
阿赴俊烈一路協剿尋賊於波羅河與苟朝九等零匪合夥肆擾  
上以此股賊匪輾轉奔竄人數轉增 命額勒登保詳細籌酌合  
同督剿三月賊往來馬溪客僧河一帶我兵四路夾攻殲殺首夥  
數十名賊勢愈蹙捷入 恩賞有差十年正月巴山老林零匪未  
淨俊烈偕總兵田朝貴分兵數路梭織排搜尋卽掃蕩平十二  
月升甘肅巴里坤總兵十六年調陝西西安鎮總兵十八年十月  
河南教匪李文成等在滑縣滋事 上命陝甘總督那彥成督兵  
往剿那彥成以俊烈勇往素著請 旨派往山東帶兵 諭曰此



次剿捕賊匪山東一路帶兵將領不能得力朕深爲廛念閻俊烈  
朕素知其勇往卽令其馳赴山東幫同同興帶兵奮力截剿則東  
面可免疏虞尋偕領隊大臣蘇爾慎帶滿漢兵一千名赴開州協  
辦軍務屢戰有功開州邊界肅清經欽差大臣協辦大學士戶部  
尚書托津奏入 諭曰開州邊界賊匪剿洗淨盡所辦實屬可嘉  
閻俊烈前經餽送興奎銀兩亦有應得之咎此次督兵奮勇著加  
恩免其議處仍交部議敘先是烏魯木齊領隊大臣恆傑呈控都  
統興奎收受屬員禮物 上命將軍松筠鞠之後烈餽送屬實至  
是免其議處十二月調河南河北鎮總兵十九年閏二月復調陝  
西西安鎮總兵四月丁父憂二十一年七月服闋八月擢湖北提

督二十四年以失察屬員被控劣蹟部議降三級調用上以俊  
烈前在軍營屢著勞績改爲降二級畱任道光元年以傷病舉發  
開缺旋籍五年授湖南提督六年休致十三年卒子肇琪一品廕  
生戶部主事肇雙候選衛千總

右 國史館本傳



171-016

17

171-016

多貴

多貴金佳氏滿洲鑲黃旗人烏魯木齊駐防嘉慶元年二月川陝楚教匪不靖多貴由委前鋒校隨都統永保馳往湖北剿辦三月敗賊於房縣四月進攻保康之喇叭洞劉家集曲家灣等處屢有戰績六月賊屯棗陽之蔣家壩我兵由草市進剿大破其眾尋夜攻董家岡張家壩一帶賊卡俱拔之殲賊無算多貴俱在事有功捷聞下部議敘二年正月剿賊於鮑家坂執賊劉起榮二月改攻新店生擒賊百戴有成等三十七人五月賊首李全謀等偷渡漢江官軍扼之於漢王城乘其爭渡擊敗之三年二月竄匪由楚入川我師追剿於茶尖壩花石盤白山寺等處屢有斬獲十一月

補驍騎校四年升防禦五年隨參贊大臣那彥成擊賊於甘肅之  
牛蹶鎮禮辛鎮卡狼寨黃鶯鋪連克之五月教匪漸次蕩平凱撤  
回旗十一年升佐領十五年遷古城協領道光三年軍政卓異引  
見記名五年 賞副都統銜作爲庫爾喀喇烏蘇領隊大臣六年  
逆回張格爾倡亂入卡滋擾都統英惠檄多貴帶兵往援八月抵  
庫車時賊竄渾巴什軍臺偏近阿克蘇庫車爲南五城咽喉要地  
防範綦嚴復令多貴畱駐協同防堵十一月署烏什辦事大臣七  
年三月烏什所屬奇里克部落之布魯特搶劫牲畜戕害官兵乘  
機附逆多貴帶兵往討殄賊甚眾獲賊目庫圖魯克烏什肅清奏  
入得 旨嘉獎五月奏烏什卡倫內居住之布魯特半無恆產向

在各回莊備工嗣因張逆滋事各回目疑懼止工全行逐出茲回疆蕩平請仍令各回目領回原莊照舊傭工俾資餬口從之九月補烏什辦事大臣尋以凱撤論功下部優敘八年三月奏言東西八城被兵地方應徵六七兩年糧石恩准豁免惟烏什應徵六年之糧於未經奉旨之先已行收訖應請照喀喇沙爾成例酌賞價值俾各回戶均霑實惠又奏請烏什酌畱兵一千名派員管帶以資防守俱如所請行七月調伊犁領隊大臣九年因病陳請休致十四年卒子特克升額前鋒校

右 國史館本傳





富明阿

富明阿鈕祜祿氏滿洲鑲紅旗人乾隆四十三年由馬甲承襲雲騎尉授三等侍衛洊擢頭等侍衛印務班領六十年授四川夔州協副將嘉慶元年達州東鄉等處教匪滋擾兵部右侍郎代辦總督事英善遣富明阿偕川東道李憲宜率兵進剿九月敗賊於開縣之三匯口東鄉之田家營等處擒獲甚夥尋帶兵勇赴玉皇閣防堵時賊退據麻柳場偕大竹縣知縣劉佳琦等分途夾攻交部議敘十二月賊踞張家觀茅坪等處督同都司五十六密帶屯土官兵赴普子嶺後蔣家山駐劄會賊眾直撲普子嶺爲我兵所扼竄踞馬鞍山富明阿追及之燬其卡多所斬獲 敕部議敘三年



賊因周家河一帶有官兵防堵率眾由查子峽趨盤市鋪偕總兵  
艾如文等分途迎擊復由冉家壩茅坪一路直取張家觀賊被創  
東竄以疊次勦賊功 賞戴花翎三年擊敗賊目張漢潮等於朱  
圈門尋有箕山竄出之賊龔建等以其眾與樊人傑龍紹周合富  
明阿偕參將吉林泰等於奉節巫山各隘口扼要堵截賊眾由大  
甯界竄至奉節之馬鞍山七星壩等處富明阿率兵迎擊大破之  
五年苟文明羅半年兩股賊匪由楚省羅坪竄近川境闌入巫山  
大甯境內有直趨夔關之勢我兵勦之於崔家河賊遁六年賊眾  
焚掠奉節縣之下關城率兵勦捕殪賊多名七年率署都司劉順  
等敗賊於九盤子俘獲甚眾又敗之於小曲山八年升雲南昭通

鎮總兵十二年丁母憂十三年調陝西河州鎮總兵二十五年因病乞假回旗道光十四年卒子惠英襲雲騎尉

右 國史館本傳

日本書紀卷之六十一

八十六

八十六那拉氏滿洲鑲白旗人西安駐防乾隆三十八年由馬甲隨副都統舒麟出師金川屢著戰績尋升領催四十七年薩拉爾回匪不靖隨將軍伯伍彌泰出征在事有功遷驍騎校四十九年五月檄赴隴州防堵十二月升防禦嘉慶元年二月川陝楚邪匪煽亂湖北股匪據當陽竹山保康三縣八十六隨西安將軍恆瑞往剿三月由竹山進發執賊目武明山翁明元俘馘甚眾四月取道房縣保康分路截擊遇賊於白雲寺合力攻撲焚燬賊巢五月殲首逆曾士興克復竹山保康二縣六月偵聞賊聚王家岡設伏襲之縱橫衝突槍礮齊發殲賊四百七月賊走大高頂乘勝追躡

克之九月跟剿股匪姚之富敗之於葉家店執逆屬十月進攻草店殲賊四千擒賊二百十二月賊據張家集恃險抗拒我師併力兜殲賊潰二年正月戰於彭家岡殲賊目繆玉林二月進攻劉家港誅賊首劉起榮擒賊目劉文舉四月擊賊於周家河五月追賊入陝由豬坪趨黃龍鋪斬級九百奪獲刀矛馬匹無算六月進克八角坪獲首逆高名貴殺賊三千八月賊竄川省太平屬之官壩塘我軍左右抄截破之九月竄匪復入西鄉檄赴興安一帶堵剿十月賊由西鄉走鐘子山官兵分兩翼夾擊遇於神仙溝合力鏖戰殲賊二千尋補佐領十一月白號股匪高均德直撲司渡河欲趨漢中我師三路會剿戰於沔縣甯羌交界之桑樹灣擊走之十



二月復由甯羌入川跟蹤兜剿敗賊於迴龍場斬獲甚眾三年六月藍號股匪冉文儔與巴州白號羅其清合互爲應援我兵奮勇圍攻連克龍克寨楊柳寨梁中寨各山梁七月山靜邊寺進取黃渡河四面策應奮力掩殺誅賊目禹斯珍冉文字並殲夥匪四千餘九月克箕山連奪賊卡殲擒無算十月羅其清復自箕山竄踞大鵬寨官軍從東南迎截奪卡三殲賊三百十一月取大鵬寨執賊目鄧朝陽苟彬四年正月擊賊於青石關七月攻牟家壩九月克清水溝擒賊目汪昭章十月轉戰龍王溝殲賊首張漢潮於陣八年三省漸次肅清凱撤回旗旋升協領十六年授青州副都統十九年二月奏劾驍騎校齊車佈因竅釀命請褫職審辦 命山



東巡撫同興研訊得實治如律六月以青州滿洲官兵上年調赴豫省軍營奮勉得力 上嘉其訓練妥協下部議敘二十年偕山東巡撫陳預奏請於駐防滿洲營額設馬甲一千四百六十名步甲三百二十名外挑選閒散壯丁二百四十名作爲餘兵一體訓練並懇請於司庫扣存項下酌提銀二萬四千兩與滿洲營所存馬價銀六千兩交商生息以資養贍仍以支放所存陸續歸還原款如所請行二十三年十一月擢綏遠城將軍十二月偕欽差大臣禮部尙書松筠歸化城副都統博卿阿奏請於界連大青山之蒙古安設卡倫以資巡緝並嚴定台吉佐領等承緝處分嚴飭西勒圖呼圖克圖所屬沙畢那爾僧俗人等毋許窩匿賊犯及商民

被劫呈報過遲分別責懲查無憑據者不爲准理各章程疏入下  
所司議行尋調廣州將軍二十五年十一月調江甯將軍尋召  
來京道光元年三月署正藍旗漢軍都統四月因年力衰老命  
以原品休致賞給全俸十四年卒諭曰原任廣州將軍八十  
六前在金川湖北等處軍營著有勞績洊升將軍並署理都統事  
務嗣因年老以原品休致仍賞給全俸茲聞溘逝朕心深爲軫惜  
所有應得卹典照都統例辦理其任內降罰處分悉予開復尋  
賜祭葬予諡壯僖子扎隆阿一品廕生官驍騎校哲勒京阿文  
舉人

右 國史館本傳

廣東通志卷之三十三

三

圖明阿

圖明阿杭阿塔氏吉林蒙古正黃旗人嘉慶二年十月川陝楚教匪不靖分號滋擾圖明阿由馬甲隨副都統賽沖阿赴陝協剿時襄陽黃號首逆王廷詔及藍號首逆張漢潮等竄平利之曾家壩我兵設伏峽口襲其不備槍箭齊發殲獲甚眾十二月由涼坳子鐵鎖關一帶追躡遇賊於羅村壩擊走之餘匪復由二郎壩折竄漢中我軍追剿隨進殲賊千圖明阿均在事有功三年正月敗賊於洋縣之王家山生擒劉有才等二百三十人五月襄陽白號首逆高均德竄入川境我兵偵蹤追剿疊有斬獲六月進克張家寨石橋河殲賊二百八年補驍騎校十一年升防禦十四年遷佐領

道光三年授協領十一年擢西安副都統十二年九月劾奏協領塔瑚禮於原任和闐領隊大臣德惠攜帶夷回幼孩畱家服役查報遲延請交部議處 從之十一月奏言西安滿洲營出征回疆官兵應行賠補無著駝隻請照甘肅採買駝隻價銀之數每隻賠銀二十兩分作二年由兵餉內扣還 諭曰此項駝隻因進征官兵行走迅速凱撤時沿途擁擠未能守候收管致有虧交自應著落賠補若分作二年扣還兵力未免拮据不足以示體恤著加恩分作八年陸續扣還以清原款十三年偕將軍桓格奏籌議買補倒斃馬匹章程略言西安滿洲官兵按名月給餉銀並米折銀三兩四錢外尙有津貼草豆折價銀兩每月約在六七錢不等請於



每月按名存銀三錢統計一年各應存銀三兩六錢以備隨時買  
補倒斃馬匹之需年終覈算除賠補馬價購買草豆之用所餘銀  
兩儘數分給各兵以資接濟庶於馬政兵力兩有裨益 上允之  
十四年卒子慶玉驍騎校

右 國史館本傳



富亮

富亮富察氏滿洲鑲紅旗人駐防荊州乾隆五十九年由前鋒考取繙譯六十年五月黔楚苗匪煽亂隨荊州將軍興肇帥師協剿十月由湖南辰州進發克馬腦寨殺苗坪竹子寨等處賊敗退據高多寨我軍分道夾擊獲賊渠吳半生餘匪殲擒無算嘉慶元年正月改攻吉吉寨克之八月逆苗石柳鄧據平隴我兵復由強虎哨進攻奪卡十十二月偵知賊據石隆我兵由後山抄截生擒苗匪一百餘人富亮俱在事有功二年二月川陝楚三省教匪不靖富亮復隨興肇移師湖北會剿三月襄陽股匪姚之富齊王氏分竄泌陽裕州一帶富亮設伏山坳擊敗之八月賊據小河口我兵

星夜圍攻賊勢披靡竄渡茨河官兵由楓樹埡追擊俘馘甚眾三年五月襄陽監號首逆張漢潮由楚竄入陝境我軍跟蹤追剿敗之於南漳七月賊向袁家廟一帶折竄富亮帶領兵勇繞出賊前并力截殺賊大潰九月補繙譯筆帖式四年六月張逆竄入豫境向隱峪口狂奔官軍追剿遇之於金竹溝殪其眾七月復敗賊於紅河寺九月殲張漢潮於張家坪敘功升驍騎校十一月駐兵鎮安防堵復於七里埡石泉溝等處接戰疊有斬獲五年賊氛漸息檄調回營六年升防禦十一年升佐領十九年遷協領道光三年擢福建福州副都統十年奏請於駐防旗營設立書院其八旗文舉人生童等令一體在院肄業並請於閩海關罰款生息銀兩內

每年撥銀五百兩以爲薪水膏火之資又以駐防滿洲營兵生齒日繁紅白事實借各銀不敷支用亦請於罰款內撥銀加借以示體恤均如所請十二年十一月軍政屆期得旨富亮年力衰老著以原品休致復因造冊遲延下部議處十二月諭曰富亮曾經出師殺賊捉生著賞給全俸以養餘年先是富亮在荊州協領任內於駐防滿洲營節年虧短馬匹並將馬乾銀兩那充公用未經奏明辦理部議降三級調用得旨富亮係休致之員著加恩改爲降二級頂帶卽照所降之級食俸十四年卒

右 國史館本傳





姜長齡

姜長齡鑲藍旗漢軍人嘉慶三年由監生挑補鑾儀衛整儀尉五年授十五善射七年擢治儀正十一年升雲麾使十三年授安徽遊兵營遊擊十七年襲騎都尉世職十八年河南教匪不靖毗連安徽巡撫胡克家檄長齡統領甯蕪池潛等營兵赴亳州行營防堵尋兼署潛山營遊擊十九年二月撤防回任二十一年卓異引見奉 旨姜長齡准其保薦回任候升十月署江南江甯城守營副將二十二年調奇兵營遊擊二十三年升山西老營營參將道光元年調太原城守營參將二年調署撫標中軍參將三年實授尋遷蒲州協副將經巡撫邱樹棠保舉堪勝陸路總兵之任送部

引 見得 旨記名四年擢陝西延綏鎮總兵官請 陛見 許  
之六年署固原提督七年以軍政造冊遲延交部照例議處九年  
調安徽壽春鎮總兵官再入 覲會逆回張格爾就擒有 旨馳  
遞捷音之武職員并交部議敘長齡以前任延綏鎮文報無誤  
賞加一級隨帶六月 命署狼山鎮總兵官仍 命兩江總督蔣  
攸銛詳加察看能否勝任嗣攸銛覆奏察看長齡堪以勝任十月  
奉 諭准其補授十四年卒

右 國史館本傳

武光琳

武光琳直隸正定人嘉慶元年由行伍隨直隸提督慶成出師楚北二年二月隨赴襄陽一帶兜剿逆匪疊有斬獲補龍岡營額外外委十一月調赴陝西軍營截剿逸匪累有戰績補順德營經制外委三年正月賊目羅其清勾結川匪攻撲營山我兵分路進攻內外合擊克之二月羅逆復由深山老林分竄儀隴之石板埡等處官軍併力夾擊遇之於水東寺敗其眾光琳俱在事有功升昌平營把總四年追竄匪張漢潮於蓋屋洋縣一帶躡蹤奮剿俘賊甚眾遷三屯協千總五年偵知股匪高二馬五由戴家營竄入西鄉我師合力圍截敗之七年調松棚路千總九年調大名協左營

千總十六年擢陝西延安營守備十九年檄赴喀什噶爾換防二十年九月塔什密里克逆回攷牙墩糾眾侵擾隨喀什噶爾辦事大臣永芹率兵進剿賊匪恃險抗拒光琳冒石先登奮勇鏖戰賊勢窮蹙擒其渠奏入 命以都司升用並 賞戴花翎十二月補臨洮營都司道光二年升甘肅俄卜嶺營遊擊六年逆裔張格爾不靖占據柯爾坪南北兩莊我兵分道截擊光琳偕都司李萬餘等馬步環攻賊眾大潰斬級五生擒七十三人並奪獲器械馬匹無算捷入得 旨以應升之缺升用七年三月赴烏什偏南柳樹泉地方帶兵堵禦會有奇里克部落布魯特從逆疊劫光琳帥師進討賊眾負隅我軍合力仰攻殪賊七十餘人生擒四人閏五月



擢督標右營參將六月凱撤回營九年署陝西靖遠協副將十一年署定邊協副將尋授督標中軍副將十三年二月經陝甘總督楊遇春保奏堪勝總兵送部引 見四月署甘肅肅州鎮總兵五月授貴州威甯鎮總兵十四年卒

右 國史館本傳



馬金魁

馬金魁陝西安康人寄籍長安嘉慶元年十一月由鄉勇隨巡撫秦承恩出師興安勦辦教匪盤獲安康賊目楊秉恆賊匪張啟美等四十餘人置之法尋攻安嶺賊卡疊有斬獲十二月勦賊於將軍山殲六百餘人擒其渠金魁在事有功授七品軍功頂帶二年隨攻洞河五作雲賊巢我師由大道河花犁岡兩路夾擊連克五卡殲擒殆盡四年賊匪樊人傑等自西鄉竄至紅廟塘一帶官兵由閒道追勦敗之於瓦子溝斬級百生擒三十餘人金魁以功換六品頂帶五年七月擊賊於沔縣之大安寬川等處九月復勦賊於黃官嶺十一月餘匪嘯聚一在乾溝河之唐子口一在南鄭縣

之大石堦據險窺伺勢將撲卡我軍爭先分路抄截克之金魁功  
居最升五品頂帶十二月賊匪魏棒棒李裁縫由桃園竄鐵鑪壩  
我兵敗之於瓦店子追至方巖坪山梁賊眾恃險抗拒金魁首先  
搶上不避矢石克之殪賊百餘擒賊渠李裁縫並餘賊二千餘人  
奪獲旗幟馬匹無算總督長齡上其功 賞戴花翎六年正月攻  
賊於略陽之煙墩溝金魁受矛傷十一月補陝西鞏昌營千總八  
年南山賊匪由羅家峽東竄鄖西金魁隨總兵楊芳追剿敗之於  
高橋溝九年七月隨提督楊遇春追賊於平利之平溪河擒賊目  
羅思蘭王宗福殲百六十人八月敗賊於豬草河十年署漢鳳營  
守備十一年署陝安城守營都司十三年補甘肅紅水營守備十

七年署三眼井營都司十八年七月遷陝西延綏鎮靖邊營都司  
九月直隸長垣教匪不清延及豫東陷滑縣經陝甘總督那彥成  
檄赴河南協剿十月攻賊於道口焚其巢十一月進奪司寨首逆  
李文成自焚死十二月克復滑城俘賊渠牛亮臣徐安國殪賊萬  
餘生擒二千人金魁均在事有功十九年正月調赴陝西南山剿  
辦三才峽廂匪尋追躡賊蹤殲首逆麻大旗於柏楊嶺並餘賊三  
千餘人二月線號股匪苗小一脅眾遁入老林我兵由亮風堽一  
路抄截敗之於月亮坪斬馘甚眾餘賊悉平捷入 命以遊擊升  
用先換頂帶二十年補甘肅鎮羌營遊擊二十三年赴葉爾羌換  
防二十五年八月逆匪蘇蘭奇串通逆裔張格爾糾眾入卡滋擾



金魁以精兵三百赴喀什噶爾協剿九月隨幫辦大臣色普徵額督兵進山殲擒五十餘人餘賊窮蹙追至喀浪圭卡倫外擊走之道光元年換防期滿回任二年升陝甘督標右營參將三年署西甯鎮海協副將四年署金塔寺副將五年補中衛協副將六年七月逆回張格爾復來煽亂擾及四城金魁隨欽差大臣楊遇春往討十月敗賊於巴爾楚克七年駐守牌素巴特爲策應復由伊斯克卡倫取道阿爾圖什回莊一路堵截擒張逆於喀爾鐵蓋山八年凱撤經揚威將軍長齡保奏 賞總兵銜十一年署甯夏鎮總兵旋擢雲南鶴麗鎮總兵十二月調直隸正定鎮總兵十三年調大名鎮總兵十四年卒子榮陝西畱壩營遊擊

右 國史館本傳

國史館本傳 卷三十三 將帥六十

三

RECEIVED BY THE DIRECTOR OF THE BUREAU OF INVESTIGATION

1111

171-050

蘇清阿

蘇清阿瓜爾佳氏滿洲鑲白旗人嘉慶十一年由前鋒投護軍校  
十八年九月河南教匪滋事 命直隸總督溫承惠往剿蘇清阿  
隨營效力克道口敘功十一月遷委護軍參領尋以攻拔司寨下  
部議敘十二月升二等待衛二十一年升護軍參領道光六年二  
月授河南城守尉七月 賞給頭等待衛隨參贊大臣武隆阿馳  
赴喀什噶爾剿捕逆裔張格爾十二月隨提督齊慎帶領官兵於  
卡內外要地分駐防守七年閏五月署英吉沙爾領隊大臣是年  
回疆克復四城蘇清阿協剿有功 賞加副都統銜並交部從優  
議敘 命將軍長齡畱心察看蘇清阿見署領隊大臣是否勝任

經長齡以體面謹慎歷練戎行覆奏尋擢喀什噶爾幫辦大臣十  
二月張逆竄至塔爾鐵蓋山蘇清阿偕參贊大臣楊芳等星夜追  
剿逆眾占踞半山迎面衝突我兵四路兜圍擊斬殆盡生擒張逆  
八年正月捷入 賞賜勇巴圖魯名號列四十功臣中繪像紫光  
閣 御製贊曰河南守尉命往從軍擒拏首逆克集大勲心堅力  
勇朔漠銷氛急馳恐後嘉爾宣勤六月授正藍旗蒙古副都統八  
月 召來京九年正月 命在乾清門侍衛上行走四月 命在  
御前侍衛上行走授正藍旗護軍統領十年閏四月調正紅旗滿  
洲副都統九月調鑲黃旗護軍統領充上書房讀達十月管理內  
外火器營事務十一年遷右翼前鋒統領十二年管理善撲營事



務十三年署武備院卿十四年四月授伊犁參贊大臣十月升鑲  
藍旗漢軍都統十一月 命赴回疆覆查屯田情形疏稱巴爾楚  
克屯田原屬荒地距回莊較遠與回民毫無妨礙見墾種二萬餘  
畝已於本年升科納糧開地益多報墾愈眾不惟屯糧可供兵糈  
且於邊防大有裨益所有該處屯田應請無庸裁撤至喀什噶爾  
屯田恐久後與回田不無軼轍莫若乘此興辦之始早爲裁撤其  
無力貧民的酌給口糧遣至巴爾楚克安置 上以所奏甚是從之  
十五年正月擢吉林將軍二月卒 諭曰吉林將軍蘇清阿上年  
簡授伊犁參贊大臣特命馳赴回疆查辦屯田事宜悉心籌畫諸  
臻妥協本年復簡授吉林將軍正資倚任昨據奏患病卽賞假調

理以冀速痊並著緩程來京請訓茲遽聞溘逝深爲悼惜著加恩賞廣儲司銀七百兩照將軍例賜卹並著特依順保派委員弁護送入關妥爲照料沿途地方經過一體遵例支應伊子乾清門頭等侍衛豐紳著卽馳驛前往迎護俟到京之日准其入城治喪所有任內一切處分悉予開復應得卹典該部察例具奏尋 賜祭葬 予諡剛愨七月靈柩抵京復 諭曰原任吉林將軍蘇清阿前在乾清門御前侍衛上行走有年且在軍營著有勞績本年二月間聞伊溘逝當經特予賜卹今伊靈柩業已到京著加恩派都統高克前往賜奠子豐紳庫倫辦事大臣正黃旗蒙古副都統

右 國史館本傳

蘇勒當阿

蘇勒當阿蘇木克起氏滿洲鑲白旗人嘉慶四年由黏竿處拜唐阿補藍翎侍衛八年升三等侍衛十一年補侍衛什長十三年遷二等侍衛十六年授四川漳臘營參將十九年正月陝西三才峽廂匪滋事經官兵剿敗餘黨四竄蘇克當阿隨將軍賽沖阿於白沔峽老漁壩一帶勦辦續竄漢江青號賊匪率兵深入越山步行追至木竹壩地方賊眾負隅抗拒蘇勒當阿偕參將朱承受合兵仰攻槍矢並發殺賊四百餘名生擒賊首楊榮孫應材李定興並賊日餘匪三百餘人奪獲旗幟刀矛馬匹無算二月賊眾千餘由太陽灘擾至渭門童蒙溝蘇勒當阿首先進攻大兵兩路策應擒

藍號股匪百餘人我兵乘勝渡江追躡紅號線號股匪敗之於店子河復有餘匪竄向北巖子賽家山等處蘇勒當阿由牛家溝抄賽家嶺之前向山兜擒戮甚眾捷入 賞戴花翎是時果洛克賊番滋擾蘇勒當阿帶兵查辦屢有擒獲二十一年升懋功協副將出師西藏廓爾喀有功道光元年正月升雲南開化鎮總兵三月署四川松潘鎮總兵六月實授十月果洛克賊番搶劫貢物成都將軍呢馬善四川總督蔣攸銛以蘇勒當阿熟悉夷情奏請帶兵馳剿賊賊並獲邊圉以安二年五月蘇勒當阿以西甯剿辦插帳野番防其闌入川界輒將黃勝關隘口私禁出入經將軍呢瑪善奏劾 上以辦理冒昧不勝專閫之任降爲副將十二月選廣



西慶遠協副將四年二月兩廣總督阮元保送堪勝陸路總兵赴部引見十一年調潯州協副將十二年二月授右江鎮總兵十一月以軍政造冊遲延下部議處十三年九月署廣西提督十一月因病請開缺允之十四年病痊補原官十五年閏六月升廣州將軍七月卒諭曰廣州將軍蘇勒當阿由侍衛出師川陝打仗著績洊升總兵本年閏六月簡任廣州將軍尙未到任遽聞溘逝殊堪軫惜著加恩照將軍例賜卹所有任內一切處分悉予開復應得卹典該衙門察例具奏尋賜祭葬子全壽官三等侍衛

右 國史館本傳





福祥

福祥富察氏滿洲鑲黃旗人乾隆四十六年由護軍授藍翎長五十二年遷護軍校五十六年升委護軍參領嘉慶三年轉副護軍參領七年升護軍參領十一年兼署司鑰長十九年遷司鑰長二十二年擢正藍旗漢軍副都統二十三年五月署右翼總兵九月調盛京副都統十二月奏言奉天遼陽等處被災旗民各戶有應放續賑米石倉貯不敷支放請遵照舊章一半折給銀兩一半照高粱米時價發給聽該旗民等自買雜糧俾得實濟如所請行二十四年四月究出領催周繼德等於賑災冊內添改戶口冒領賑項論罪如律九月奏養息牧廠開墾荒田試墾五年期滿請將已

墾熟地先行徵銀其未墾者仍嚴飭上緊開墾續報升科又奏奉  
天承德等處被水歉收請借給一月口糧俾資接濟均從之十  
二月調正黃旗漢軍副都統道光五年調山海關副都統六年二  
月調鑲白旗蒙古副都統十月調青州副都統七年四月直隸總  
督那彥成奏請將駐防滿洲閒散挑補綠營弁兵上命駐防省  
分各督撫將軍都統等會議福祥偕署山東巡撫程含章疏請於  
德州青州綠營馬兵缺出時卽由各該營報明副都統等酌挑閒  
散兵赴各該營與守兵一體校閱守兵缺出有閒散願赴挑者亦  
如之總不得過十分之二既挑之後駐防所出之缺仍歸駐防遞  
補以符定額至考拔訓練升轉降革及有滋事干涉地方照綠營

章程一體辦理下部議行十月擢杭州將軍十年入覲賜紫  
禁城騎馬十一年奏請於杭州乍浦滿洲營支贍牧租錢文內暫  
借錢二萬串發商生息所得息錢以一半作爲八旗閑散紅白卹  
賞之用一半歸還原款上允其請十四年召還京十五年三  
月入覲得旨福祥著以原品休致八月卒諭曰原任杭州  
將軍福祥由護軍參領副都統擢任將軍宣力中外歷任數十年  
本年春聞來京陛見因其年近八旬特予原品休致用示體恤茲  
聞溘逝殊堪軫惜著加恩照將軍例賜卹所有任內一切處分悉  
予開復應得卹典該衙門察例具奏尋賜祭葬子熙麟戶部郎

中

國史館本傳

右 國史館本傳



張琴

張琴浙江平陽人嘉慶三年洋盜蔡牽滋擾琴以義勇屢從擊賊有功十一年拔補浙江大荆營外委十二年遷平陽右營把總十三年升大荆營千總洋匪黃治者巨盜李盧之餘黨也肆掠海壇金門聞總兵徐錕率兵勦捕焚其船治登岸潛逃琴追至晉江縣屬之佛堂澳擒之並獲夥匪八名 上嘉其奮勇 命以守備升用遇缺卽補先換頂帶並 賞戴花翎旋補閩浙督標左營守備總督汪志伊以琴熟悉閩省沿海地方情形及盜匪奸民出沒處所令前往訪緝琴誘獲偷載硫磺濟匪之奸民蕭日等得 旨嘉獎尋又獲盜犯王邑盜首陳邊十七年獲匪犯紀愛盧秋等三十

七名會同縣營訪獲盜匪及漁匪奸民百餘名又於泉州訪獲匪犯蔡昂一名十八年獲盜鄭心郭行等六名蔡逆餘黨紀旋等四名知情賣賊匪犯傅辦一名又於惠安縣之蔡鄉購獲在逃要犯莊三一名汪志伊偕巡撫張師誠奏請以都司升用 允之並著先換頂帶三十年授督標中營都司二十四年升漳州鎮左營遊擊二十五年調陸路提標右營遊擊道光元年拏獲鄰境盜犯蔡樹等送部引 見旋升四川越嶲營參將二年果洛克番賊土目曲俊等數百人盤踞唐凹寨與官兵抗拒提督桂涵率漢屯官兵分三路進剿琴由左邊山梁繞出賊寨後與兩路合攻殺賊番八十餘名生擒曲俊父子並匪黨四十餘名 賞加副將銜三年總

督陳若霖偕桂涵奏准以琴升補督標中軍副將未及引見旋  
丁父憂遵例回參將本任守制五年成都將軍德英阿與督臣等  
復請以琴升署副將上以琴未服滿飭不准行六年服闋授督  
標中軍副將八年新都奸民楊守一倡立邪教妄造妖書琴偵獲  
守一並匪黨多名交部議敘十年擢雲南鶴麗鎮總兵十一年調  
四川建昌鎮總兵十二年調福建臺灣鎮總兵十五年丁母憂旋  
卒

右 國史館本傳

日本書紀卷之六十一

三

唐文淑

唐文淑貴州畢節人原籍廣西由行伍出師臺灣安南歷拔千總嘉慶元年以征黔楚苗匪功升廣西梧州協右營守備二年派隨欽差大臣額勒登保進剿教匪林之華覃加耀於長陽縣之黃柏山三年移剿陝西鎮安各股匪四年擢慶遠協左營都司五年三月升隆林營遊擊進兵商州龍駒寨擒賊目唐國元陳順璠周錫錦並男婦七百餘名五月調廣東潮州鎮中營遊擊偕副將喜明等剿伍金柱股匪斃千餘名擒賊目賈奇沙國珍等賊旋竄至大小銅錢窖哨聚文淑復擊之殲四百餘 賞戴花翎六年三月追及賊首王廷詔等於戴君嶺四月設伏於二郎壩殲獲甚夥五月



升甘肅提標中軍參將六月由松樹溝金溝嶺子等處追冉學勝  
股匪殺五百餘人乘夜追勦孫家坡與總兵張鳳等兩路夾擊餘  
匪數十人南奔文淑邀之賊悉殲焉十月偕副將陳尙德由旺倉  
壩越老土地大山赴贊家梁追擊李彬股匪多所斬獲尋又敗賊  
於劉家灣七年八月額勒登保奏花石巖殲斃苟逆功下部議敘  
九月擢陝西漢中協副將八年四月偕副將王兆夢參將哈豐阿  
搜捕龍寨頭零匪旋聞東鄉白楊廟有賊匪西竄文淑分兵三百  
名飭遊擊劉元明擊之於田灣又敗之於鐵礦坪南井關澗草溝  
半邊街等處十二月巡撫方維甸以教匪將次淨盡奏撤鄉勇派  
同陝安道德明額送回原籍九年偕陝西臬司朱勳查辦漢中所

屬之雲霧山零匪旋於火石巖八仙河一帶搜獲多名凱撤回任  
十一年三月擢四川重慶鎮總兵七月欽差大臣德楞泰檄征甯  
陝叛匪十二月隨四川總督勒保協勦長壽縣教匪黃和尚等十  
三年以峨眉馬邊夷匪滋事帶兵勦辦事平下部議敘十四年失  
察所屬遊擊楊登魁守備黃化治那移營庫存備銀兩拔去花翎  
下部嚴議尋議革職 諭曰總兵唐文淑照例革職本屬咎所應  
得姑念曾經出師著有微勞著加恩賞給千總交勒保差遣委用  
旋補茂州營千總十八年陝西漢江叛匪滋事檄勦青藍紅線四  
號股匪殲斃首逆苗小一經成都將軍賽沖阿具奏得 旨以副  
將補用仍賞還花翎十九年三月四川清溪縣屬之啞嚙崖獐匪

滋授借建昌道曹六興赴勅事竣 命以副將儘先補用旋補廣  
東肇慶協副將二十四年升貴州威甯鎮總兵道光二年調四川  
松潘鎮總兵四年調建昌鎮總兵五年以母憂去官請入貴州畢  
節籍入年服闋授福建漳州鎮總兵十二年擢貴州提督十五年  
卒子瑄二品廕生候選通判湘候選布政司經歷

右 國史館本傳

蘇兆熊

蘇兆熊江西鄱陽人由武生入饒州營嘉慶元年授廣信營貴溪汛把總檄赴九江防堵楚省教匪三年勦辦義甯州教匪兆熊在事出力下部議敘九年升撫州營千總十二年署撫標右營守備十六年查拏擔匪兆熊訪獲首從多名江西撫臣先福上其功命送部引見十七年得旨以守備用先換頂帶十八年升廣東南韶鎮右營守備十九年署南韶鎮右營都司旋署廣州城守右營都司先後拏獲會盜匪犯謝兆中等九十八名二十二年升廣州協左營都司道光元年署南韶鎮中軍遊擊擢督標後營參將二年署肇慶協副將三年署督標中軍副將旋升廣州協副將五



年兼署督標中軍副將六年五月保舉堪勝總兵之任七月授潮州鎮總兵八年三月署廣東提督赴翁源始興二縣查辦會盜各匪獲犯二百餘名事竣交部從優議敘九年三月擢廣西提督十年閏四月會同兩廣總督李鴻賓奏言廣西提標有租穀七十六石向係以穀借兵於月餉勻扣歸款秋成後買穀還倉嗣後借銀借穀參差不齊且穀價漸昂營員不敷賠墊累弁病民無所底止請更定以價銀出借停止買穀歸倉從之十二年正月湖南江華瑤人趙金隴滋事界連粵境諭兆熊飭屬嚴防嗣趙金隴潛往八排爲官兵截回復欲竄入九疑山二月命兆熊親往邊境辦理防堵時廣東連州之小衝八排逆瑤相繼蠢動奏調兆熊帶



粵西兵會勦 諭曰廣東提督著蘇兆熊暫行署理廣西尙有防堵事宜不可無大員彈壓俟余步雲接印後卽回廣西本任六月  
猺匪潛入綏猺廳之茂古峒肆行劫掠兆熊率兵兜剿擊散甚眾  
七月回任先是賀縣猺人盤均華爲楚猺句煽至是竊發適兆熊  
旋軍會同本省官軍要擊於芳林渡一戰撲滅並安撫犁頭山投  
誠猺眾得 旨蘇兆熊辦理此案調度有方甚合機宜俾該匪等  
不致蔓延著加恩交部從優議敘是年軍政 諭曰廣西提督蘇  
兆熊於廣西芳林渡督率弁兵剿捕猺匪辦理有方著交部議敘  
並 特免造冊遲延處分十三年因病奏請開缺回籍十五年卒  
子孟暘翰林院庶吉士吏部主事仲鴻候選鹽庫大使

皇朝通志卷三十三

右 國史館本傳

三十三

福克精阿

福克精阿，佟佳氏，滿洲正白旗人。嘉慶六年，由筆帖式襲一等子爵。八年，授三等侍衛。十五年，升二等侍衛。二十五年，遷頭等侍衛。道光三年，授河南城守尉。五年，擢甯夏副都統。六年二月，調山海關副都統。九月，調察哈爾副都統。七年，署察哈爾都統。八年，以軍政保舉張家口佐領塔克什布弓馬生疎下部察議。九年，補察哈爾都統。十年正月，奏參察哈爾鑲白旗總管常德不識滿洲蒙古文字於公事未能明晰。太僕寺右翼牧羣總管都噶爾牧務廢弛。上命飭常德回本營供職。降都噶爾翼長。三月，授吉林將軍。先是熱河都統裕恩請將熱河閒散移駐雙城堡。前任吉林將軍富俊

請以伯都訥新城堡圍場荒地給與熱河閒散墾種 諭令福克  
精阿酌量情形細心覈辦五月疏言檢查道光四年前任將軍富  
俊奏伯都訥屯田章程每民戶墾種三十晌至移駐京旗時撤地  
二十晌惟時民戶恐耕種年淺卽撤地移駐京旗墾地資本未獲  
反致賠累互相觀望不甚踴躍經富俊出示曉諭許二十年後始  
行移駐京旗並發給鈐印執照是以附近居民多措變產業投赴  
新城局認墾今甫經五年初屆徵租之期卽移駐熱河閒散民尙  
未霑墾種之利一旦撤地未免向隅且見移熱河閒散民不過一  
百餘戶必須豫置房屋且設官彈壓又須建蓋公廨查雙城堡動  
用修葺各項迄今尙未歸款茲以熱河閒散移駐新城局復添一



應經費誠恐虛糜帑項況雙城堡見有備駐京旗之房屋二百餘所經久曠閒易致損壞若將熱河閒散仍移駐雙城堡與前移駐京旗比戶同居統歸京旗官弁管束既省建立房間一切經費而新城局民佃藉得安堵庶幾兩有裨益得旨允行八月奏驍騎校富通阿呈控佐領富爾嵩阿請一併參處諭曰富爾嵩阿身任佐領失察鋪商將公幫銀扣抵兵欠及因公冒支牛牯銀兩且挾妓飲酒並令胞弟與遣犯夥開錢鋪實爲貪鄙富爾嵩阿著卽革職驍騎校富通阿所控富爾嵩阿各款雖未全虛惟以事不干己指姦訐告害人名節以致托拉里氏拖累病故殊屬荒謬富通阿著革職十一年六月奏吉林接濟京旗生息錢文請改收銀利



七月佐領永奎列福克精阿各款具控 上命協辦大學士富俊  
內閣侍讀學士賽尙阿前往查辦得實 諭曰此案吉林將軍福  
克精阿於致祭長白山並不敬謹親往輒遣協領代祭又私派官  
兵送其妾柩回京支領官項銀兩實屬違例妄爲且身任大員因  
修理衙署等事率准協領等稟請以致裁汰兵丁賞項學房膏火  
並攤扣俸餉種種乖謬有忝職守福克精阿著卽革職以示懲儆  
十一月因在吉林將軍任內拏獲朝鮮偷渡人犯延不具奏經協  
辦大學士富俊參劾 上命該旗都統文孚訊供具奏 諭曰朝  
鮮越境人犯一經拏獲卽應奏明解交該國乃於上年十二月拏  
獲輒行羈禁數月之久設該犯等痠斃獄中不能解至該國令該

國王查明治罪外藩未免懷疑尙復成何事體是福克精阿辦理此事不但具奏遲延且於外藩大有關係福克精阿業已另案革職著俟伊子承襲世職後罰職任俸一年以示懲儆十二月諭曰福克精阿前在吉林將軍任內種種乖謬任意妄爲經朕派富俊等前往審明具奏當經降旨革職嗣以拏獲打牲偷濫人犯延不奏辦復降旨令俟伊子承襲世職後罰職任俸一年今朕訪聞該革員在吉林時聲名甚屬狼籍若仍令伊子照例承襲世職不足以儆官邪福克精阿之子著不准承襲所遺世職著該旗另選承襲十五年故子瑞琇湖北施南協副將

右 國史館本傳



國朝書獻類徵初編卷三百二十一目錄

將帥六十一

謝得彰

長清

宗室國祥

巴哈布

阿那保

蘇蘇勒通阿

奇成額

李國棟

張仲敬

興世

樂善

常德

常德

薩隆阿

興科

湯占先

英綬

慶山

桓格

皇朝通志卷之三十三

一



國朝耆獻類徵初編卷三百二十一

通奉大夫前署江西巡撫江西布政使司布政使湘陰李桓輯  
將帥六十一

謝得彰

謝得彰福建詔安人嘉慶四年由行伍隨水師提督李長庚剿海盜蔡牽於白犬洋俘獲無算十四年授銅山營把總二十一年升水師提標後營千總道光四年遷海壇鎮標左營守備六年署臺灣協中營遊擊時臺灣匪徒糾眾械鬪乘勢焚掠得彰奉檄赴彰化縣屬許廣坪率領兵練合力搜捕擒盜渠黃斗並黨匪多名事平敘功 上嘉其奮勇 賞戴花翎七年超升金門鎮標左營遊

學十一年五月遷烽火營參將六月調水師提標中軍參將七月  
擢廣東順德協副將十二年四月署碣石鎮總兵十二月兩廣總  
督盧坤以得彰奮勇剛直嫻熟海疆疏請署理瓊州鎮總兵印務  
上從之十三年三月擒獲越南巨盜陳嘉海按治如律十二月補  
福建海壇鎮總兵十四年二月閩浙總督程祖洛奏請調温州鎮  
總兵 允之七月兩廣總督盧坤奏言廣東毗連洋夷縣互數千  
里洪濤浩渺島嶼紛羅得彰巡洋緝匪不遺餘力不特本省內外  
洋情形皆得其詳卽夷洋山島形勢亦瞭如指掌海疆重地非有  
緩急足恃之員難資得力籲請仍畱廣東以勝閩寄疏入得 旨  
海防緊要廣東瓊州鎮總兵官卽以謝得彰補授十五年卒

右 國史館本傳

國朝書款類攷切編 卷三十三十一 將帥六十一 一一

日本書紀卷之八十一

--	--	--	--	--	--	--	--	--	--

長清

長清鈕祜祿氏滿洲鑲黃旗人祖策楞內大臣父特成額副都統俱有傳長清由二品廕生捐納主事嘉慶五年分兵部行走十五年補主事十八年遷員外郎二十三年遷郎中二十四年京察一等二十五年三月帶領引見記名以道府用十一月擢廣西左江道道光二年丁母憂回旗在原衙門行走四年服闋仍補兵部郎中五年十月記名以副都統用十二月賞副都統銜授阿克蘇辦事大臣六年六月抵任時逆回張格爾滋事阿克蘇爲回疆要隘防堵機宜均關緊要上念長清甫經到任一切事宜未能諳練命都統特依順保馳赴阿克蘇督辦事務長清畱爲幫辦



大臣尋奏言以喀城回子變亂英吉沙爾葉爾羌飛咨阿克蘇調兵速往查阿克蘇新換官兵尙未到防臣一面飛飭前來一面將應撤回換防官兵一百七十六名派赴葉爾羌英吉沙爾合兵夾攻阿克蘇見存官兵爲數無幾儻再徵調不但不敷派撥抑且防守掣肘已飛咨伊犁烏魯木齊及南路各城將喀什噶爾前調官兵趕緊挑派接應又奏伊勒都軍臺臺兵被害橋道拆毀文報不通當卽飛飭派往葉爾羌進剿官兵就近相機堵禦奏入 諭以激厲兵回固守疆圉隨時稽查防範毋稍疏虞又奏言葉爾羌十臺當差回子變亂殺斃弁兵葉爾羌臺站與阿克蘇所屬之都齊特地方毗連見有派往葉爾羌等處換防進剿官兵由都齊特經

過自應確探賊勢急行進剿且葉爾羌所屬東路軍臺文報不通  
各城情形未悉惟有嚴飭該官兵等相機前進設法截剿並將銅  
廠錢局官兵內挑撥二百員名前來以資防堵疏入 上嘉之八  
月奏言賊匪已至河子湖木縛擄伯克殺害弁兵查河子湖木地  
方既有賊匪竄入都齊特相距不遠尤屬緊要將各城應撤換防  
官兵截畱以資防堵又據報賊匪已竄入渾巴什軍臺查渾巴什  
距阿克蘇八十里惟有飭派官兵在於渾巴什河沿一帶小心堵  
禦飭令存城官兵嚴加防守並咨伊犁將軍飛催烏魯木齊等處  
官兵前來以資進剿奏入 諭以督率兵丁鼓勵回眾加倍防範  
以待大兵之至隨奏言派往渾巴什河沿官兵途遇賊匪交仗殲

賊百餘賊勢退敗復探有喀什噶爾前來大阿渾竄入阿克蘇所屬南路都齊特郝紫爾等處煽惑回民附逆者甚眾臣恐其竄入東南北一帶地方煽惑卽曉諭各村莊回民各安本業不可因南路回子叛逆心生疑懼見在均極安謐又奏言烏什告急分兵五百名前往協防均得 旨嘉獎九月奏言賊匪經官兵在渾巴什河邊擊退後復自葉爾羌等處糾約回眾五六千人在渾巴什河南岸屯聚竟撲河邊思欲躡渡官兵在北岸晝夜抵禦又訪知北岸距城百餘里之波斯圖哈拉塔爾地方均係朵蘭回莊前已過河附逆與官兵接仗陸續潛回本村者有一二百人臣思該處附近東路軍臺係我兵後路必須先爲剷洗以清北岸派官兵一千



三百名分爲兩路進剿賊匪放槍抗拒經我兵全行擊斃捷聞諭曰長清辦理防堵事宜俱極妥協此次連獲勝仗爲殄賊之先聲著加恩賞戴花翎仍交部議敘先是長清官兵部郎中時經尙書玉麟保舉堪勝副都統至是上以玉麟薦舉得人並賞戴花翎爲人臣以人事君者勸是月渾巴什河南岸屯聚賊匪躡淺渡河滋擾經官兵迎剿殲擒多名有另股賊匪由托什罕過河官兵復剿戮連勝方賊眾渡河時長清探知卽將城外備防官兵三百名分派四關廂守禦並令馬隊兵三十餘人赴二十里外往來馳騁飛沙揚土使賊匪知有準備果有賊探數十遙見馬隊卽行折回官兵乘勢進剿大獲勝仗捷聞上以長清督率有方下部

優敘並賞賚焉又諭曰前因長清未歷新疆之事故以特依順保爲阿克蘇辦事大臣長清作爲幫辦大臣見在長清指揮官兵防守城卡調度皆合機宜實堪勝任特依順保毋庸赴阿克蘇長清卽爲阿克蘇辦事大臣益當始終奮勉以副委任時長清又奏言差探烏什近城並無賊匪原撥官兵五百名仍令前往防守並令將頭臺照舊安設又奏言阿克蘇城垣周圍不足一里除官廨倉廩外並無隙地見在大兵雲集軍火糧食無地堆儲是以相度地勢於關廂外開挖濠溝堆築土牆上安雉堞並設木柵作爲外郭派兵防守不特客民均可保護而各處運到糧餉火藥鉛丸皆可於城外廟宇民房存儲均奏入特命軍機大臣傳諭揚威將



軍長齡參贊大臣楊遇春曰烏什與阿克蘇唇齒相依不可因烏  
什近城並無賊匪稍存大意長清將原撥官兵五百名仍令前往  
所見甚是並令將頭臺照舊安設所辦亦好長清由兵部司員簡  
用甫經到任卽能撫馭回眾辦理周妥此次將城外備防官兵分  
派關廂守禦並令馬隊馳騁揚塵使賊匪懼有準備深得兵家虛  
實之法其開挖濠溝安設木柵頗能實心出力著長齡等再加察  
看其辦事才識究竟如何遇便覆奏尋據長齡等奏到察看長清  
辦事安詳爲守兼優報 聞十月奏阿克蘇境內肅清派兵嚴防  
並訪獲糾眾首逆阿哈雅爾七品伯克鄂斯滿等訊明正法 上  
嘉獎之又奏言進征滿漢官兵三萬數千員名阿克蘇爲總匯之

區其收支運供糧餉軍火一切事宜最關緊要臣先期設立總局  
悉心籌辦以期毋誤軍需並以文報較多添備臺馬錢價昂貴增  
鑄錢文皆 允之尋授鑲白旗蒙古副都統七年四月奏言冰嶺  
雪消河水漲發人夫躡渡難行並據回夫以耕種及時懇求回家  
力作見在阿克蘇局內糧餉足供敷用應暫停伊犁糧運又請復  
設渾巴什河洋阿里克都齊特三處軍臺皆如所請行七月以大  
功告竣 諭曰長清甫經到任卽能激厲兵回查拏奸細嬰城固  
守調度得宜並以烏什輔車相依分兵防堵鉦鼓相聞聲勢聯絡  
昇長齡等未到大營之先非長清不能力捍孤城厥功甚偉著賞  
給雲騎尉世職其子翰林院筆帖式富春以六部主事卽補八年

正月奉請增築阿克蘇城垣修建兵房 命欽差大臣那彥成到  
被悉心相度妥辦又奏言新疆效力之原任山西知府沈琮派司  
局務任勞任怨懇與開復或加錄用且稱該員到處俱著循聲誠  
實可靠 上以其曾昧 訓飭之四月奏言長齡前議於阿克蘇添  
兵一千名又於所屬之柯爾坪添兵五百名查阿克蘇爲南路適  
中之地形勢扼要必資重鎮始壯聲威柯爾坪距城三百餘里該  
處回莊二千餘戶數萬回眾之中置兵五百名無事則徒滋擾累  
有事仍寡不敵眾伏思兵分勢單合則勢壯不若歸併阿克蘇認  
眞訓練可成勁旅足以總制南北兩路再阿克蘇至伊犁捷徑訪  
有阿克蘇所屬西南巧搭爾達巴罕間有貿易回民私自度越又

查得從哩木所屬之阿爾通霍什亦通北路均可徑赴伊犁擬槩  
行封禁 從之五月以俘解逆酋張格爾來京長清護解妥協下  
部優敘九月 命圖形紫光閣 御製贊曰八城之樞曰阿克蘇  
屏障要隘賊所急圖竊彼內訌完我外郭以守爲戰孰敢覬覦九  
年二月以辦理善後全完復下部優敘十一月奏請鼓勵阿克蘇  
糧餉局出力人員爲廢員德楞額請 恩施 諭曰德楞額會  
任山西歸綏道交結書吏請託餽送經刑部審明奏請革職朕豈  
遺忘該大臣僅稱該員緣事革職殊屬有心含混長清著傳旨嚴  
行申飭所請均不准行十年九月喀什噶爾有安集延逆回入卡  
滋事長清奏言接喀什噶爾來咨賊匪入卡將及新城調兵迅速



往救已派官兵三百名前赴救援並探聞賊匪欲由樹窩子直撲阿克蘇該處昆連葉爾羌英吉沙爾等處形勢緊要已咨調伊犁烏魯木齊喀喇沙爾土爾扈特霍碩特庫車官兵前來協防奏入允之尋又以葉爾羌迤西軍臺亦屬不靖見在防範守禦迤東各臺不能兼顧奏請催調官兵前往 諭曰先後調派官兵疊經降旨飭令迅速前赴阿克蘇計可陸續到彼阿克蘇地方固屬緊要但祇酌留兵力足敷防堵不可全行畱駐此時喀什噶爾葉爾羌待援甚急當偵探情形酌量分兵進剿又 命軍機大臣傳諭甘肅提督胡超烏魯木齊提督哈豐阿等行抵阿克蘇與長清會同商酌偵探賊情相機前進無論何人先到總當可進則進斷不可



遷延觀望坐失事機又 允伊犁將軍玉麟之請添派兵勇民遣  
交參贊大臣容安帶往阿克蘇會同長清相機妥辦 上復念伊  
犁地方緊要 命容安於行抵阿克蘇後將所帶官兵統交長清  
迅卽折回伊犁長清等奏言阿克蘇回子見尙安靖一面選派妥  
當回子由草路往和闐偵探一面飭令該管阿奇木伯克等曉諭  
回眾妥爲安撫並將被難之伯克等就地安插得 旨嘉獎又奏  
言恐賊匪由樹窩子直撲阿克蘇存城兵力單弱實難周顧請將  
喀什噶爾前調官兵三百名仍畱阿克蘇防堵毋庸派往 從之  
十月偕容安奏言伊犁官兵民勇四千五百餘名已抵阿克蘇以  
之進剿則有餘以之分布烏什阿克蘇並前路進剿則不足見飛

催烏魯木齊及土爾扈特官兵請俟到齊分撥防守再行進剿  
上以喀什噶爾英吉沙爾待援甚急容安以帶兵大員任意宕延  
怯懦無能長清私心自用祇知防守阿克蘇並不催令前進亦屬  
遲誤下部議處並議降三級調用 命仍畱阿克蘇效力暫停開  
缺嗣又奏言各路官兵陸續到阿克蘇哈豐阿所帶官兵定於十  
月初十日進發並請暫令容安統領進剿 諭曰各項官兵既抵  
阿克蘇卽應迅速前進及早殲除賊匪乃見據奏到哈豐阿定於  
初十日進發其餘官兵復請旨暫令容安統領行軍之道以神速  
爲要萬里程途往返摺報動須四十餘日若事事必須候旨施行  
豈不耽延時日坐失機宜長清旣稱軍務緊急仍復如此拘泥實

屬不知輕重時長清摺內祇敘九月初十日 敕令容安折回伊犁 諭旨而於九月初六日 敕令胡超哈豐阿等相機前進 諭旨並未聲敘 特命查明因何遲延據實覆奏尋奏九月初六日 諭旨已先經奉到並非驛站遲誤 上以長清前奏有心含混 訓飭之又偕容安奏言葉爾羌急待援兵酌量派兵由和闐草路進援俟哈豐阿到和闐察看情形再向葉爾羌進發並分撥阿克蘇烏什防守以待胡超等商剿 上以容安等坐擁重兵畏葸不前 命將容安革職拏問長清及哈豐阿交部嚴加議處復命軍機大臣傳諭揚威將軍長齡將容安罪狀逐一究問從嚴定擬並將長清等分別議罪尋議將容安論斬長清減一等應革職



遣戍黑龍江 諭曰長清但知畱兵防守並不通盤籌畫催令進  
援亦屬咎所應得惟該大臣究非奉派帶兵之員而撫馭夷回尙  
爲安靜且於扎隆阿信致令將伊什罕伯克托克托呢雜爾等家  
產查封並將緣坐人犯一併拘禁均未照辦頗有識見長清著加  
恩革去副都統賞給二等侍衛仍作爲阿克蘇辦事大臣十二年  
命以提督銜作爲葉爾羌參贊大臣十三年四月奏言浩罕遣使  
求立商頭抽取行用費錢應俯順其情准令仍舊設立至所請別  
部落夷人入卡貿易亦由該商頭抽收貨稅應不允其請六月又  
奏浩罕夷使經派委章京會同阿奇木伯克前往開導反復曉諭  
該夷使自知理屈無可置辨適因交易事竣懇求出卡隨傳見當

堂宣諭察其詞色甚爲帖服已差派弁兵伯克護送出卡伏思該  
夷人見雖恭順究竟犬羊性成其心叵測不可不時加防範以絕  
其覬覦除督率操演巡查卡倫外仍通行各城一體勤操務期聲  
勢聯絡有備無患 上均是之十四年二月奏言巴爾楚克一帶  
荒地前經奏准開墾茲查明計開田二萬四千餘畝水暢土肥夏  
秋收成均在九分以上請自十四年起按畝升科酌中定則啟徵  
以供兵糈 諭曰此次開墾屯田試種業有成效所辦尙屬認真  
惟此外可墾之地尙多務飭委辦各員設法招徠妥爲經理俾認  
墾之民源源踵至庶草萊日闢田畝日增實邊儲而壯聲威以收  
寓兵於農之實效勉之又勉尋又奏回疆距口內較遠屯田當



辦之始民人到屯認墾尙無攜眷而來者若做照北路招墾成案每畝糧額八升科則稍重未免無所區別請按畝徵小麥三升俾屯民易於輸將倍加踊躍 從之三月授烏魯木齊都統十五年二月奏言古城增設稅局抽收茶稅原議一年徵銀八千兩因解徵不足額展限三年再行定額見在三年期滿每年抽稅銀自一萬一百至一萬五千餘兩不等較原定額數有贏無絀惟商販之往來售銷之贏絀難以豫定若照前奏酌中定額恐將來抽收不足既難著賠遇茶販暢銷又易啟抽多報少之弊不足以昭覈實請仍責成奇台縣儘收儘解奏入如所請行十月 召回京尋署理鑲藍旗漢軍都統十二月授福州將軍十六年十月來京 陛

見 賞加太子太保銜 賜紫禁城騎馬十七年二月卒 諭曰  
福州將軍長清由兵部司員歷任回疆辦事大臣懋著勞績前因  
辦理回疆軍需事竣疊沛恩施繪像紫光閣賞給世職由都統擢  
任福州將軍方資倚畀遠聞溘逝殊堪軫惜著加恩晉贈太子太  
傅照將軍例賜卹任內一切處分悉予開復並賞給廣儲司銀五  
百兩准其入城治喪應得卹典該衙門察例具奏尋 賜祭葬諡  
勤毅嗣子福凌阿襲雲騎尉世職

右 國史館本傳

宗室國祥

宗室國祥正藍旗人乾隆五十年由閒散襲佐領尋襲奉恩將軍五十五年授三等待衛嘉慶十五年升二等待衛十六年充宗室族長十七年升頭等待衛二十三年授金州城守尉道光四年賞副都統銜署正藍旗蒙古副都統五年授鑲白旗蒙古副都統六年二月調甯夏副都統七月署甯夏將軍七年調青州副都統八年奏言德州滿營生齒日繁閒散壯丁得缺有需時日上年直隸總督那彥成奏准駐防閒散於附近綠營挑補馬兵等缺不得過十分之二見在該營壯丁雖已挑過十有餘缺而人數過多仍不免於壅滯該壯丁弓馬均有可觀若令坐待挑補兵缺不特生

計艱難且以有用之材任其坐廢居諸亦殊可惜請照青州成案  
籌款生息挑選餘兵一百五十名俾生計益臻寬裕兵力可資造  
就 上允之十二年二月調盛京副都統十月奏錦州府屬松子  
嶺中前所二處被旱成災請借給一月口糧俾資接濟如所請行  
旋以英吉利夷船駛至城隍島奏參佐領徐士斌等巡查不力請  
下部議處得 旨佐領徐士斌驍騎校韓飛鳳總巡佐領金立綱  
協巡驍騎校徐延芝協巡防禦方珍等著交部議處仍查明夷船  
下落押令出境與鄰省海面巡查各官明白交替如再疏懈卽據  
實嚴參十三年三月奏言錦州義州兩屬上年秋收歉薄懇請各  
借給兵丁兵倉米五千石以資接濟惟兵丁續借米石若照例秋



收後同時還倉未免力有不逮請俟秋後先還陳借倉米四千石  
其餘續借之米緩至明年秋後照數還倉以紓兵力而重倉儲  
從之八月補熊岳副都統十七年卒於任子潤壽承襲奉恩將軍

右 國史館本傳



171-108

171

巴哈布

巴哈布烏忒米氏蒙古正藍旗人嘉慶元年由健銳營前鋒授藍翎長隨參贊大臣德楞泰出師湖北三年追剿股匪於川省之香衝王家坪等處奮力夾擊擒賊渠龔其位卜三聘並零匪二百七十餘人巴哈布在事有功 賞戴藍翎五年薦升前鋒校敗賊於黃茅坪六年六月升委前鋒參領十月升副前鋒參領七年以三省賊氛漸息大功將次告蒞奉檄回任十一年洋匪蔡牽擾臺灣調赴閩省撲剿十二年陝省標兵滋事出師綏定西鄉一帶疊有斬獲十五年升前鋒參領十八年滑縣教匪不靖檄赴豫省協剿受矛傷得邀 賞賚尋升右翼委翼長隨御前大臣拉旺多爾濟

帶兵前往黃村一帶搜捕餘匪十九年以失察凱撤官兵攜帶幼孩降一級畱任二十二年授右翼翼長二十五年擢鑲藍旗蒙古副都統道光元年三月 賞換花翎四月管理健銳營事務七月署鑲藍旗護軍統領二年署鑲紅旗護軍統領五年二月復署鑲藍旗護軍統領十月授喀喇沙爾辦事大臣十二月請將伊子扎爾漢隨往任所幫辦家務 上從之六年六月逆裔張格爾糾同安集延布魯特各回莊由開齊山路突來滋擾七月以阿克蘇辦事大臣蘇倫保請調土爾扈特和碩特蒙古兵馳往救援 上以蒙古兵素少訓練恐無紀律 諭令沿途探聽會合進發相機救援不可輕進八月以軍情緊急巴哈布率領所部弁兵前赴喀什

噶爾會同勦辦尋得 旨仍令折回喀喇沙爾自行防守九月阿克蘇渾巴什河南岸屯聚賊匪躡淺渡河巴哈布帶兵迎勦分布堵禦殄賊多名 上嘉其督率有方下部優敘越日賊黨復糾眾焚搶烏什阿察他克臺屯踞阿拉爾回莊巴哈布偕烏魯木齊提督達凌阿合力攻撲賊竄沙坡樹窩我兵兩路抄截撲上沙坡殲賊無算捷入 上嘉之並邀 賞賚十月奏蒙古官兵各歸游牧自請仍赴軍前聽候調遣 上以喀喇沙爾爲回疆南路咽喉命巴哈布卽回本境鎮靜撫綏一切軍火糧餉沿途照料迅速催趨以利軍行不必身在行閒乃爲報效也十一月揚威將軍長齡以巴哈布曾經行陣調赴軍營奏入 允之七年正月賊黨攻擾



和闐該城回眾縛賊迎降巴哈布統領馬步隊前赴該城撫馭邊  
圍以安二月進兵洋阿爾巴特莊賊眾排列高岡抵死抗拒我軍  
分爲三路併力兜勦巴哈布偕領隊大臣哈朗阿總兵呂天俸等  
由左抄截跟蹤追殺不避鋒刃賊大潰越日改攻沙布都爾莊大  
兵各分行伍按隊前進賊匪臨渠據險槍礮齊發我師飛身渡越  
衝入賊鋒奮勇夾擊賊披靡竄渾水河梟渡官兵躡水追撲復有  
援賊自西北林來乘勝迎勦殲擒四千餘人三月餘匪屯聚阿瓦  
巴特回莊賊勢鴟張巴哈布率領馬隊兩翼齊進復以連環槍礮  
隨風施放我兵冒煙衝壓大敗其眾四月四城克復以巴哈布之  
子扎爾漢在事出力 賞給筆帖式閏五月署葉爾羌幫辦大臣



七月大兵凱撤 諭曰上年逆裔張格爾入卡滋事攻陷城池巴  
哈布接據蘇倫保求援之信卽檄調土爾扈特和碩特蒙古兵並  
帶其子扎爾漢迅速前往奮不顧身將賊首庫爾班素皮等殲斃  
已爲殄賊之先聲是長齡未到之先非巴哈布不能痛禡賊魄保  
障東四城俾大兵進取有資厥功甚偉見當大功告竣允宜特沛  
殊恩用酬懋績巴哈布著給雲騎尉世職巴哈布之子扎爾漢前  
已賞給筆帖式著加恩以六部筆帖式卽補十月 命回喀喇沙  
爾本任十一月奏請鼓勵喀喇沙爾辦理軍需出力人員得 旨  
允行八年五月以巨憝成擒西陲蕩平繪像紫光閣 贊曰阻遏  
賊勢渾巴什河伺隙躡渡狡詐計多先聲大振莫敢誰何我戰則

克功在橫戈尋逆酋檻送京師 上以該大臣沿途支應諸臻妥協下部優敘八月調庫爾喀拉烏蘇領隊大臣九年授塔爾巴哈台參贊大臣十年十月調正藍旗滿洲副都統十一年五月奏籌款采買布匹 允之十月 召還京十二年九月署鑲藍旗蒙古副都統十一月授江甯將軍十四年劾奏辦理馬甲文明立繼案件錯謬之佐領各官請下部分別嚴議議處 從之十五年以保送佐領佛爾洪阿步射無準部議鐫秩 上加恩改爲降一級畱任十七年卒 諭曰江甯將軍巴哈布由健銳營前鋒從征川楚歷經出師陝甘滑縣等處打仗殺賊受傷屢著功績前因回疆戡定繪像紫光閣迨簡授江甯將軍五載以來頗能整飭正資倚任

茲聞溘逝殊堪悼惜著加恩照將軍例賜卹准其入城治喪所有  
任內一切處分悉予開復應得卹典該衙門察例具奏尋 賜祭  
葬諡勤勇

右 國史館本傳

臣等謹將月異名不表

卷三十三

一

阿那保

阿那保郭貝爾氏黑龍江滿洲正白旗人乾隆四十年由馬甲駐京賞上駟院司轡四十六年授藍翎侍衛五十五年升三等侍衛尋補司轡長五十六年廓爾喀賊匪擾後藏隨將軍福康安往討五十七年三月抵後藏時各路官兵未集先期進剿五月偵聞賊踞擦木官軍分隊進攻奪賊前碉賊守後碉不出我兵毀垣直入阿那保奮勇先登短兵接戰殲擒無算乘勝改攻瑪噶爾轄爾甲等處山梁直趨濟隴賊於濟隴據險立碉各寨後先策應相爲掎角之勢阿那保復領所部分道攻撲剪其旁寨適大軍雲集併力圍攻連奪要塞賊賊奔逃我軍跟蹤追剿斬級六百生擒二



百餘捷 開升二等侍衛五十八年後藏肅清阿那保護送廓爾喀進貢象隻馬匹回京六十年黔楚逆苗不靖 上命副都統額勒登保護軍統領德楞泰帶侍衛往剿阿那保與焉嘉慶元年六月官兵由納共山進攻連克廖貢坡馬鞍山渡灣溪取尖雲山遂復乾州阿那保俱在事有功 賞奮圖里巴圖魯名號十一月賊據平隴勢甚鴟張阿那保於老石崖山梁排列大礮併力轟擊克之將軍明亮上其功下部議敘二年二月苗疆蕩平適川陝楚教匪滋擾 上命明亮移師剿之阿那保隨署領侍衛內大臣子爵德楞泰前往四川剿辦五月首逆徐添德王三槐踞東鄉之重石子分股來撲李家山新卡阿那保帶兵截殺敗其眾擢頭等侍衛

時賊方北竄太平齊王氏姚之富王光祖樊人傑等爲楚省官兵所逼由豫陝竄入川境與之合遂分青黃藍白等號有掌櫃元帥總兵等僞稱八月隨德楞泰追剿襄陽黃號首逆齊王氏姚之富入楚九月遇賊於鄖陽草甸地方賊匪分路來撲阿那保由左首山梁率兵下壓賊眾直前衝突我兵槍礮齊放斬俘無算越日賊復由麻家渡保豐一帶向西南奔突意欲攻撲竹谿縣城奔入陝省阿那保帶領馬隊馳赴縣城防護官兵由南山後繼進內外夾攻殲其眾十月賊匪竄入陝境阿那保由西鄉紫陽一路兜剿賊復向平利折竄我兵繞道抄截敗之三年正月襄陽白號首逆高均德竄入川境阿那保首先衝擊受槍傷乘勝緊躡賊蹤敗之於

東西兩川十一月追剿巴州白號首逆羅其清於官山時羅其清  
觀山潰敗後分合無常阿那保偵蹤尾追之兩路夾擊殲賊五百  
餘賊竄走巴河崑水遁逸我兵乘勝追截賊勢窮蹙淹斃無算十  
二月羅逆竄老鴉城阿那保帥師由關子嶺進攻分路兜擊賊眾  
擲石抗拒我軍用礮轟擊生擒賊渠羅其清及賊弟其秀賊子泳  
幅於蔡家梁四年通江藍號首逆冉文儔由箕山竄麻壩寨阿那  
保乘夜由坳盤寨攀援而上拋擲火彈焚其柵併力殲擒賊大潰  
五年正月追躡至江油之馬蹏岡擒線號僞先鋒陳得倖三月白  
號股匪張子聰走東鄉我兵取道進攻連克龍子觀李家坪四月  
賊匪屯聚蓬溪縣之店子阿那保帶領馬步隊由右首山梁萬福

橋一帶抄截直搗賊巢賊眾驚潰獲器械無算七月偵知白號股  
匪苟文明向江北竄逸意欲搶渡我兵由望水埡龍市鎮一路兜  
剿殲偽總兵吳耀國偽先鋒鮮文炳生擒賊目苟文禮等五人八  
月藍號賊匪屯踞巴州之陡坎子山梁官兵由閣廟進取賊憑高  
放槍抗拒我軍奮力仰攻斬級三百獲賊目彭必清並餘匪一百  
四十一人奏入得旨交部議敘十二月襄陽白號股匪楊開第  
竄入川境與通江藍號股匪李彬合經官兵兩路夾擊賊敗竄向  
儀隴一帶狂奔阿那保跟蹤追剿於走馬坪及之賊眾蟻聚大埡  
拚死抗拒我兵分路進擊戮楊開第於陣生擒賊目王匡士並夥  
匪四十五人六年因病呈請回旗參贊大臣德楞泰奏入諭曰



頭等侍衛阿那保染患潮溼手足拘攣該員從征六年著有勞績見在患病未愈著照所請准其回旗調理十一年 命在乾清門行走十三年 賞穿黃馬褂十四年十一月補正紅旗蒙古副都統十二月補上駟院卿十五年充御前侍衛十六年兼公中佐領十八年四月因將私馬混入官廩餽養經吏部侍郎英和等查出奏請下部嚴議得 旨阿那保平日承襲御馬差使甚屬盡心著加恩免其嚴議革退副都統罰俸一年仍畱上駟院卿戴用三品頂帶照舊當差七月復補正紅旗蒙古副都統二十一年正月賞紫禁城騎馬五月管理善撲營十一月 上以阿那保在御前侍衛上行走多年且管理乘用馬匹亦好 特加恩授爲鑲藍旗



蒙古都統仍兼管上駟院事務二十四年八月 上乘騎調順  
賞袍褂各一襲二十四年八月 上巡幸木蘭乘馬因泥淖滑蹶  
諭曰阿那保係爲首試馬之人若不稍治其罪伊等心轉不安著  
革去都統加恩作爲副都統仍罰俸一年旋補鑲紅旗蒙古副都統  
十月文穎館不戒於火率眾撲熄下部議敘二十五年三月升正  
黃旗蒙古都統八月授內大臣尋充總諳達道光元年四月管理  
健銳營事務九月署鑲黃旗蒙古都統三年 上幸萬壽山玉瀾  
堂錫宴十五老臣 恩命入宴繪象 御製詩有奮戈疆場知勇  
冠精勤調習天閑驤之句 褒阿那保也五年因病陳請開缺得  
旨阿那保在乾清門行走多年前在軍營屢著勞績賞給巴圖魯

名號游擢內大臣都統今年老奏請離任著以都統銜休致回籍  
賞給全體以養餘年仍動支廣儲司銀五百兩賞給以示朕軫念  
勤舊之至意十四年 上以阿那保年逾八旬在家無人侍養  
命伊孫鑿儀衛雲麾使巴凌阿回籍交黑龍江將軍對品補用以  
便侍養十七年卒奏入 諭曰阿那保見在病故著照都統例賜  
卹任內一切處分悉予開復賞給廣儲司銀二百兩交伊子博多  
歡辦理喪事尋 賜祭葬諡勤勇子博多歡見官右翼前鋒統領  
正紅旗滿洲副都統

右 國史館本傳

蘇蘇勒通阿

蘇蘇勒通阿額哲忒氏蒙古正黃旗人由火器營鳥槍長於嘉慶十三年補藍翎侍衛十七年升三等侍衛二十二年升二等侍衛二十三年扈駕往盛京失儀降三等侍衛二十四年補十五善射道光元年二月復升二等侍衛六月授察哈爾正紅旗總管尋調正白旗總管八年以開墾禮親王游牧察罕蘇巴爾罕地畝未經呈報都統輒派員指交地界鐫一級十一年擢察哈爾副都統十二年以察哈爾每年春秋祭祀廟宇及歲修萬壽宮並駐防官兵出差張家口駐防生員鄉試盤費等項辦公乏資擬將察哈爾八旗初次借項生息銀下積存息銀動借一萬兩交口北道發

商生以一半歸款一半辦公報。聞又以依瑪霍羅地距察哈爾游牧八百餘里駐紮人丁戶口已至二千之多僅護軍校一人稽查難周擬於該處領催前鋒護軍內選一人賞給八品頂帶作為委署驍騎校協同稽查彈壓並選兵丁四人為鄉長分管各村稽查如其所請十四年二月署察哈爾都統六月坐失察已故驍騎校郝冬冬私以他姓之子為嗣冒食錢糧部議奪俸十五年察哈爾總管倭什洪額等控都統揀選總管遺缺不公語涉副都統隨帶司員瑞麟於蘇蘇勒通阿娶子婦時擅用印封遞信鑲白等旗求幫。上命都統恩銘副都統賽尙阿訊明將瑞麟遣戍軍臺蘇蘇勒通阿鑄級畱任十七年以兵部題參軍政造冊遲延下部



議處十八年閏四月瑞麟控稱上年蘇蘇勒通阿遞信求幫一節  
經倭什洪額上控本擬將央求實情供出緣查訊時蘇蘇勒通阿  
復許幫繳空費求爲隱飾是以未會實供詎料事後許給之銀堅  
不如數等語經賽尙阿據情入奏得旨著解任押解來京交刑  
部審訊尋鞫得實諭曰此案已革副都統蘇蘇勒通阿身任二  
品大員乃因爲子娶媳轉託瑞麟致信各旗圖得資助已玷官箴  
復因規避處分央求瑞麟一人承認事後指給銀五百兩尤屬卑  
鄙著卽發往伊犁效力贖罪以爲大員不能潔己率屬者戒五月  
故子約齡貴州下江營遊擊

右 國史館本傳



四庫全書

卷一百一十八

--	--	--	--	--	--	--	--	--	--

奇成額

奇成額烏佳氏蒙古正白旗人伊犁駐防嘉慶九年哈薩克賊匪薩爾達拜偷竊察哈爾馬匹奇成額由委署前鋒校隨領隊大臣多雲泰追獲之十三年派進京呈遞馬匹馬甚茁 賞葛布一匹十四年升驍騎校十九年擢防禦道光三年升佐領自嘉慶七年至是年疊次派往塔爾巴哈臺換防六年升協領時回逆張格爾滋事阿克蘇辦事大臣長清奏稱阿克蘇爲回疆總匯之區見在調集官兵三萬數千員名需用糧餉軍火器械等項收支運供均關緊要已設立總局以期無誤軍需並經揚威將軍長齡飭派奇成額隨同經理得 旨允行十年回疆逸犯博巴克糾結浩罕入

卡滋擾奇成額奉檄隨征尋卽凱撤十一年二月 賞加副都統  
銜 命爲烏什辦事大臣先是烏什舊設滿營兵一百四十名於  
八年內奏撤上年又將新添之綠營防兵奏撤五百名僅存兵一  
千二百五十二名至是十月奇成額以烏什東界阿克蘇南界葉  
爾羌北界伊犁其西南北卡外均係布魯特遊牧路徑叢雜爲東  
西城險要之地所存防兵除派屯工及臺卡各差使共需六百餘  
名外存城兵力太單咨請酌添滿漢兵防守旋經長齡奏請復設  
滿營防兵一百四十名並將議裁之喀什噶爾綠營防兵三百二  
十五名移駐其地合新舊滿漢防兵一千七百十七名如所請行  
十二年六月奏將經理烏什收發軍需餉銀並例內節省數目造

報完竣及上屆軍需案內存贖糧料收藏以備供支報 聞十月  
調伊犁領隊大臣十二月奏審明布拉克回子巴里拉什爾殺命  
案按律定擬十五年奏訊行劫傷斃事主之回子托胡答買等治  
罪各有差十八年卒子賽尙阿防禦

右 國史館本傳



國朝詩集卷之四十五 五言古詩 四十四

--	--	--	--	--	--	--	--	--	--

李國棟

李國棟貴州威甯州人父自新原任貴州安龍鎮標右營守備從征金川陣亡國棟襲恩騎尉世職入本省撫標效用乾隆五十三年補清江協右營左哨千總六十年貴州逆苗石柳鄧湖南逆苗石三保聚眾肆擾隨雲貴總督福康安帥師往勦屢著戰績嘉慶二年三月貴州南籠狎苗王囊仙等煽亂國棟隨雲南鶴麗鎮總兵官德英額帶兵勦捕隸遊擊雙林軍關嶺爲南籠出入要路賊踞險抗拒國棟隨雙林由阿滿寨懸崖而下潛出賊後擒斬無算五月賊圍新城扼官兵進勦之路我軍縱礮遙擊陽作進攻分兵從下游躡渡潛襲其後賊潰新城圍解疾引兵進發賊踞南籠城

西之碧峯山負嶠抗守我兵分路夾擊燬賊寨二十三殲擒甚眾  
國棟敘功居最擢定廣協左營守備八月攻克洞灑首逆王囊仙  
韋朝元皆就擒狎苗平時川陝楚三省教匪不靖分號滋擾十二  
月檄赴四川軍營三年三月東鄉白號首逆王三槐等竄踞雲陽  
縣之安樂坪國棟率兵進擊斬俘甚夥四月敗賊於儀隴之孫家  
梁八月於達州寶甯順慶廣元一路追剿賊匪疊有斬獲九月巴  
州白號首逆羅其清等屯踞大鵬寨我軍由高梁寺史家壩分路  
進剿克之四年襄陽藍號首逆張漢潮竄至陝境國棟躡追入陝  
屢戰有功擢四川提標前營都司五年四月追剿白號餘匪高二  
馬五至甘境賊南竄秦州屬之文縣河邊躡淺渡河攻撲卡狼寨

土堡並扼官兵徑渡國棟豫領弁兵各攜槍礮隱伏河北登樓山  
我兵半渡賊分股來撲國棟於半山列隊連環轟擊賊卻我軍其  
濟併力夾攻敗之五月追捕黃號股匪楊開甲等至陝西之洋縣  
戲開甲及賊目龐洪勝並生擒其子龐有兒等多名經略大臣額  
勒登保上其功得旨李國棟著升補雲南撫標右營遊擊六年  
六月黃號股匪伍懷志率餘黨竄至舊縣關意圖東遁爲官軍所  
遇復西竄入秦嶺之巔藏深林密箐中國棟率精銳裹糧追躡士  
卒皆攀援直上奮勇截擊殲賊三百餘擒懷志於七十二峪捷入  
賞戴花翎十一月白號股匪高見奇竄入紫陽之三星寨半山屯  
劄我兵奮勇衝擊國棟於右首山梁伏兵以待賊至槍石並發擊



國棟帶兵迎勦至湖北竹山之大溪河俘馘多名八年大功  
戡定檄調協勦零匪由陝西南山一帶搜捕入川殲擒甚夥九年  
正月零匪屯聚盤河腦老林國棟帶領兵勇鑽林越箐直搗賊巢  
賊聞聲外撼憑高抗拒我兵奮勇仰攻賊窮蹙復據險爲南奔計  
國棟躡蹤追勦二月賊由菜子壩折向後坪東竄於百里荒十二  
庵追及之賊復抵死下撲我兵奮勇衝擊殲其眾三月賊向馬溪  
客僧河潛逃又敗之於腰磨廠蝦蟆石餘匪遁入化龍山之天工



堰嘯聚復率勁旅三千輕騎躡追賊竄于湖坪克之六月由開縣屬之紅尺壩追賊至陝西平溪河擒僞先鋒羅思蘭等多名餘賊悉平八月凱旋回營十二年署元江營參將十五年升威遠營參將二十年署楚雄協副將二十一年補維西協副將二十二年臨安江外夷匪高羅衣等謀不軌擾及元江雲貴總督伯麟檄國棟帶領兵練由西路協勦偵知賊匪屯踞水卜竜山梁我兵取道進攻北至百勝寨山腰突有賊數千分爲三股徑撲官軍國棟亦分三路迎擊槍礮齊施殲賊四百餘賊潰乘勝躡追至水卜竜山梁焚賊寨六斬級五十二並奪獲器械無算首逆高羅衣竄觀音山之宗哈寨負險踞守國棟督率弁兵由黃毛嶺進發會合遊擊方

振奎併力攻勦賊嘯聚山梁抵死抗拒我軍奮勇搶上槍礮轟擊賊勢窮蹙羅衣及其甥朱木頭悉就擒捷聞下部優敘二十三年授臨元鎮總兵官道光元年正月永北廳屬夷人與漢民構釁四川會理州夷匪梅依老十乘機煽惑招集勞步猓獯數千焚掠阿喇山舊衙坪村寨二月國棟奉檄帶兵赴大姚一路進勦三月偵聞賊踞拉古地方爲巢克之賊遁入鴿子山復帶兵搜捕斬戮百餘擒首逆陳添培賊目楊進寶馬金才等八名奪獲器械無算乘勢由他鑑山箐進攻直抵賊巢俘斬多名生擒賊目陶顯貴等雲貴總督慶保上其功下部優敘五年擢雲南提督七年查閱本標營伍劾守備楊得目雲騎尉鄧中彥把總李朝相等弓馬庸弱

降革勒休有差十六年調補浙江提督十八年卒於任遺疏入  
諭曰浙江提督李國棟久歷戎行屢經出師懋著勞績經朕擢任  
提督方資倚任茲聞溘逝殊堪軫惜著加恩照提督例賜卹任內  
一切處分悉予開復應得卹典該衙門察例具奏尋 賜祭葬諡  
襄恪子應瑞見官廣西候補府經歷

右 國史館本傳

國朝通志卷之四十一  
三十一  
三十一

--	--	--	--	--	--	--	--	--	--

張仲敬

張仲敬漢軍鑲藍旗人始祖存仁天聰閒由大凌河率眾來歸平定各處順治初以功授三等子爵世襲罔替仲敬由官學生恭逢嘉慶元年恩廕發往山西以知縣用七年補崞縣知縣十一年襲三等子爵十四年補公中佐領十八年補印務章京二十三年擢副參領道光二年軍政卓異 命交軍機處記名三年補參領七年復以軍政卓異 旨記名十一年擢正黃旗漢軍副都統旋調阿勒楚喀副都統十五年來京 陛見 命回任是年以聽信佐領額爾登布將旗民那林保等開墾地畝圈入馬廠派令出租並失察額爾登布浮收穀石剋扣錢糧一案部議降三級調用尋



奉 旨折罰世職半俸九年免其降調十六年回旗當差旋以吉林將軍宗室祥康奏參雙城堡京旗拆毀官房請將失察之該管各官分別議處 諭曰雙城堡移駐京旗予以地畝房間以裕生計茲據祥康等查明該京旗將原房拆改至一百九十四所之多實屬不安本分前任副都統張仲敬等既經查出並不認真辦理輒行捐廉修補草草完結以致該京旗罔知畏憚習爲故常將來調劑京旗一事必至有名無實著交部分別議處十九年四月卒無嗣姪廷岳襲爵

右 國史館本傳

興世

興世蘇完瓜爾佳氏漢軍正白旗人嘉慶八年由閒散補藍翎侍衛十三年升三等待衛十八年教匪林清爲變內廷警尋悉數就擒興世在事有功得旨賞加二級二十二年升二等待衛二十五年充侍衛班領道光六年升頭等待衛充辦事章京十年授廣西平樂協副將十六年正月上從署兩廣總督祁墳之請以興世升署右江鎮總兵四月兩廣總督鄧廷楨奏言右江地處邊陲所屬之鎮安協與越南交界該國底定州見有夷匪戕官密邇內地須大員督飭備弁防範稽查原署鎮之副將滿承緒辦理裕如請仍署鎮篆且平樂值鄰境湖南新甯縣苗匪滋事起滅無常前

犯未獲餘匪四散沿邊防堵不容稍懈請畱興世平樂協本任俾  
資防緝九月以夷疆綏靖楚匪剿平仍赴署任十八年鄧廷楨以  
興世營務諳練振作有爲奏保堪勝陸路總兵十九年二月升雲  
南臨元鎮總兵奉 旨送部引見中途墜馬傷臂請假調理八月  
奏請開缺 允之十二月病痊引 見得 旨仍補原缺旋復病  
劇得 旨著原品休致尋卒

右 國史館本傳

樂善

樂善博爾濟吉特氏滿洲正黃旗人一等□□侯永德子乾隆五十四年由官學生考取繙譯筆帖式嘉慶元年一品廕生四年引見授員外郎籤分刑部七年補員外郎十年五月承襲勳舊佐領十二月承襲一等侯爵 賞給二等侍衛在大門上行走二十二年二月升頭等待衛道光元年六月擢鑲白旗漢軍副都統七月授伊犁領隊大臣四年 命赴哈薩克遊牧 封汗 賜奠時愛畢勒達來迎被鄂羅斯勒索租賦中道截回樂善未能前往成禮借伊犁將軍慶祥奏入并自請議處 諭曰外夷交易起釁本屬常有疆外之事原可不問天朝亦斷無派員再往之理俟其前來



請領敕書再行發給至奏請敕諭薩訥特衙門詢問鄂羅斯之處  
竟可不必惟應嚴飭沿邊卡倫謹守疆界如有哈薩克投誠內附  
者妥速辦理毋許私入開齊以安邊徼其樂善自請議處之處著  
加恩寬免五年七月回京十二月管理左翼四旗六年五月授察  
哈爾副都統六月得旨樂善著以副都統銜賞戴花翎作爲庫  
倫辦事大臣十一月補正黃旗蒙古副都統九年七月調正白旗  
漢軍副都統十一月調鑲黃旗滿洲副都統十年擢烏里雅蘇臺  
將軍十三年調福州將軍十五年四月英吉利夷船乘潮駛入甌  
斗內洋停泊樂善會同閩浙總督程祖洛等調派文武員弁馳往  
查禁初猶藐抗不遵迨官兵齊集施以槍礮始知畏懼竄入小港



把總林朝江等駕舟追及該夷仍持刀抗拒經林朝江等曉諭出  
港夷匪復妄遞呈稟求在閩省貿易經樂善等公同給發印札曉  
以大義隨將夷船驅逐出洋奏入 諭曰夷船在洋面游奕如果  
去而復來不遵法度不服曉諭卽不能不懾以兵威總在該將軍  
察看情形認真防範固不可妄希邀功致滋事端亦不得以驅逐  
了事遂爾廢弛當嚴飭文武水陸各員弁防守口岸杜絕接濟俾  
該夷不得逞其伎倆以懲奸詐而靖海隅十二月調吉林將軍十  
六年四月入 覲 上以樂善於吉林將軍不甚相宜 命畱京  
當差署鑲藍旗漢軍都統五月補鑲藍旗蒙古都統尋授察哈爾  
都統十七年授荊州將軍尋得 旨召見荊州將軍樂善見患目

疾視物不清難勝將軍之任著開缺安心調理十九年卒年七十  
一子景亮見官巴里坤領隊大臣景祥見官頭等侍衛景和見官  
三等侍衛孫熙光承襲一等侯爵兼二等侍衛

右 國史館本傳

常德

常德索樂烏扎氏黑龍江滿洲正紅旗人乾隆五十七年廓爾喀賊匪倡亂擾後藏常德由領催隨將軍福康安剿辦敗賊於東覺山敘功 賞戴藍翎嘉慶二年川陝楚三省教匪不靖 上命副都統烏爾圖那遜帥師往討常德隸焉時襄陽黃號賊首王廷詔等與白號賊首高均德合延擾陝西漢中一帶由黃官嶺向長寨偷渡漢江我兵自東迎剿併力馳擊殲賊千餘賊潰竄東南山官軍隨剿隨進乘勝由青石關跟蹤追躡大敗之三年太平黃號賊首龍紹周等協同襄陽黃號賊首樊人傑嘯聚四川營山之郭家廟廖家碛等處常德隨領侍衛內大臣德楞泰移師入川由順水

寺進發奮力鏖戰斃賊三百生擒賊日蘇應江等二十餘人適箕  
山陡嘴子援賊先後接應我兵乘勢截擊大敗其眾四年七月線  
號首逆龔文玉由川竄至湖北竹谿之大禾田官兵分路跟剿常  
德從間道繞殺直搗賊巢斬級七十賊眾復奔虎灣山梁擲石抵  
拒我兵奮勇仰攻殲賊二百餘擒其渠並賊黨張尙國等二百八  
十人常德在事有功 賞額外驍騎校八月達州青號首逆徐添  
德等由興山之西溝竄走竹谿我兵追勦於羅漢洞敗之生擒賊  
渠張世達俘馘甚眾五年正月通江藍號首逆冉添元等由定遠  
之石板沱潛渡嘉陵江擾川西我兵復入川境偵蹤進擊二月連  
克馬蹏岡黃茅嶺新店子疊有斬獲常德受矛傷三月擊賊於火



石埡執賊首冉添元僞總兵鮮其順殄賊目唐士林並夥黨二百餘人八月賊眾屯聚閣子廟玉成寨負嶠抗拒我兵三路衝擊殲賊三百六年正月官兵躡蹤入陝追剿襄陽白號股匪高二於山陽之乾溝殄殺無算賊竄野豬坪常德由北面抄殺斬高逆於陣生擒僞先鋒王儒等八十一人十月黃號首逆龍紹周由陝奔楚我兵分路跟剿敗賊於汝溪之盤龍山殲其渠餘匪斬俘甚夥捷入賞廓爾察巴圖魯名號換戴花翎時東鄉白號股匪湯思蛟劉朝選竄入四川太平之八臺山屯聚我師復由楚入川遇賊於紅茶園殲僞元帥葛騰勝獲賊百餘十一月剿賊於馬鬣嶺生擒李大用等二十八人餘匪竄鄒家槽官兵沿途搜剿擒賊匪梁金

朝等三十二人殺賊四十餘賊大潰尋偵知劉朝選由固軍壩向  
葫蘆井奔竄大軍跟蹤追勦遇於馬鞍山敗其眾九年六月補驍  
騎校十二月升佐領十五年升副總管十八年升總管道光三年  
命在乾清門行走仍畱本職十三年正月授伯都訥副都統六月  
調三姓副都統十八年以年力就衰陳請休致 允之尋 諭曰  
休致副都統常德曾經出兵打仗殺賊受傷著賞給全俸以養餘  
年十九年卒年七十五子色衣布善官驍騎校

右 國史館本傳

常德

常德索綽羅氏滿洲正紅旗人嘉慶十年繙譯進士選補盛京戶部主事十八年調禮部主事二十一年京察一等擢員外郎充四譯館卿二十四年京察一等調戶部銀庫員外郎二十五年復帶引見奉旨記名以道府用道光元年三月補授甘肅蘭州府遺缺知府旋升直隸熱河道九月擢湖南按察使十一月調直隸按察使二年閏三月署布政使五月調山西按察使升浙江布政使三年授太常寺卿四年賞給副都統銜作爲葉爾羌辦事大臣並賞戴花翎五年署喀什噶爾參贊大臣尋以奏報到任日期擅用四百里嚴旨申飭嗣復以偵探賊匪各情由五百里奏入

上以其並無緊要情事違發急遞革去副都統銜仍交部議處尋  
議降一級畱任六年 召來京八年 賞給藍翎侍衛作爲伊犁  
領隊大臣九年 賞給三等侍衛調補烏什辦事大臣十年喀什  
噶爾有安集延回戶句結布魯特等入卡滋事並竄擾葉爾羌地  
界常德分撥兵回協辦防堵布魯特尋悔罪投誠常德查明滋事  
緣由並將見辦喀什噶爾英吉沙爾二城防守情形先後奏入報  
聞十一年二月 賞給頭等侍衛調補葉爾羌辦事大臣十月調  
補烏什辦事大臣旋 賞給副都統職銜授爲塔爾巴哈臺參贊  
大臣十二年二月調伊犁參贊大臣四月署伊犁將軍九月授正  
紅旗漢軍副都統遵 旨會同伊犁將軍玉麟覈議巡邊章程奏



言伊犁卡外特木爾圖淖爾在西南吹河在西北舊時係輪流查閱自嘉慶初年巡邊大臣在特木爾圖淖爾一帶巡查至今已閱三十餘年又查吹塔爾拉斯距伊犁卡倫約在千里之外雖係準夷舊地爲伊犁屬境惟地處窻遠久爲布魯特駐牧誠如 聖諭浩罕自以所占乃布魯特地方不知爲伊犁邊界此時南路貿易初通浩夷是否傾心向化尙須察看若必執此疆爾界之說連番赴彼巡查似非仰體 聖主懷柔遠人之意應請循照向年規制以查至特木爾圖淖爾爲斷如所請行十三年正月補伯都訥副都統六月調補三姓副都統十月調補塔爾巴哈臺參贊大臣會浩罕胡什伯克遣師懇祈將近卡倫游牧之哈薩克等驅逐出境

以便收取馬租常德會同伊犁將軍特依順保奏稱伊犁西卡外特木爾圖淖爾海迤西及吹塔爾拉斯等處游牧之哈薩克素畏浩罕強橫依附者甚多特木爾圖淖爾海迤東哈薩克公阿沁伯克所屬各愛曼之哈薩克俱知浩罕凌虐不肖依附而浩罕伯克貪黷無厭每欲收取馬租該哈薩克等卽逃避卡倫附近以爲護符今浩罕胡什伯克請將哈薩克等驅逐出境是欲易於勒取馬租此時若明言護庇哈薩克恐卽此構釁若竟置之不理儻胡什伯克前來生事該哈薩克等勢必聞風往卡內逃避彼時辦理更覺棘手莫若講明舊章以杜侵吞則哈薩克等不待護庇而自安矣上韙之十四年 命來京十五年八月署理鑲黃旗滿洲副都

統尋署理鑲紅旗護軍統領鑲黃旗護軍統領九月調補鑲紅旗  
滿洲副都統稽察七倉大臣十二月補授山海關副都統十七年  
調江甯副都統十九年卒

右 國史館本傳

國朝詩集卷三十一  
三十一



薩隆阿

薩隆阿覺爾察氏滿洲鑲藍旗人由護軍拔藍翎長嘉慶七年擢  
護軍校十三年遷委護軍參領十四年補副護軍參領十九年升  
護軍參領二十一年充司鑰長二十五年授山西太原營城守尉  
道光十二年以親老告養奏請回旗得旨俞允尋卽丁憂百日  
孝滿仍補護軍參領遷印務章京兩次軍政以卓異薦均得旨  
交軍機處記名十七年授甘肅涼州副都統先是嘉慶八年涼州  
副都統成明奏准於涼州庫存馬價銀內提出銀七千兩發商生  
息每年添補養贍孤寡之費至是歷屆除開支外積餘息銀四千  
六百餘兩十八年薩隆阿以涼州地居邊要番回雜處爲新疆之

關鍵各營器械尙屬齊全獨未設有擡礮殊不足以致遠奏請添設擡礮六尊並於涼州閒散內選三十名充額外礮手責令演習其擡礮工價由本營捐辦請免報銷仍將此項擡礮入於年終造報軍器冊內咨部查覈其每年操演鉛藥於本營撙節動用毋庸另增其礮手三十名每名月給銀一兩計歲支三百六十兩請卽於涼州養贍孤寡歷年餘存息銀內提出四千兩仍發商按年一分生息計得銀四百兩除歲支三百六十兩外尙餘四十兩留備閏月支給下部議行十九年卒子斐音布官起居注筆帖式額勒和布戶部主事三音布製造庫庫使

右 國史館本傳

興科

興科薩克達氏滿洲鑲黃旗人由監生考取筆帖式嘉慶元年補工部筆帖式四年充軍機章京五年升主事七年六月川陝楚軍營連次擒渠奏捷疊邀議敘十年升員外郎十四年升郎中十五年京察一等記名以道府用十七年正月充山海關監督十八年正月授甘肅甯夏道旋因親老呈請改用京職六月補工部郎中十九年六月調吏部郎中旋丁父憂二十三年調步軍統領衙門郎中二十四年授湖北荆宜施道道光五年擢四川按察使六年調湖北按察使七年調江西按察使八年升奉天府府尹九年四月以新民廳倉米需用較多奏請酌撥復州倉米七千石蓋平縣

倉米八千石運交新民廳倉存貯以備支放 從之五月以奉天  
府屬有積年因公那缺各款奏請分別咨追籌補 上嘉其查辦  
認真 諭令勒限嚴追照例懲處七月奏言原虧各員應飛咨任  
所旗籍及故員子孫名下勒限一年追繳其接收出結各員有代  
前任彌補過半者有曾經詳請咨追者該員等見俱有承辦要差  
應請暫緩參處仍將咨追完交不足之數著落賠補疏入如所議  
行八月 上詣盛京祇謁 祖陵以興科督辦蹕路未能一律修  
整 嚴飭之九月以承德縣知縣保定承修橋座並不實心經理署  
錦縣知縣傅鍾瑑承辦杏山大差疲玩興科未能董率妥善均下  
部議處又以 敕拏錦縣誤差要犯王四未能即時弋獲部議降



四品頂帶旋卽獲犯開復十一月失察太監兵丁差次得賄奪俸  
一年十年正月 召來京四月以前任盛京將軍奕顯演戲宴樂  
興科未經奏參降一級畱任閏四月 賞給頭等待衛作爲駐藏  
幫辦大臣十月晉副都統銜授駐藏大臣十三年正月 命來京  
授山海關副都統四月奏後藏孜定日三汛舊例每年秋季駐藏  
大臣輪班往巡本年廓爾喀噶箕等由京回藏亦在秋閒所需牛  
馬帳房俱係番民支應雖例給腳價實有不得不資民力之勢若  
兩役並舉未免拮据所有本年查邊閱伍應請暫緩一次屆時飭  
委該管將備就近校閱其例賞茶緞仍交三汛分賞旣不至有曠  
操防亦可以藉紓民力疏入如所請行先是唐古忒界外博窩生

番頭人宜瑪結布身故無後小頭人扎布汪魯分據其地互相侵掠其屬下頑夷藉勢殺斃番日出巢擾害時興科已授山海關副都統 上命暫留該處會同新授駐藏大臣隆文辦理並 命將該夷每年夏間出巢市易章程妥議具奏九月偕隆文等奏言滋事夷犯已據派往查辦之遊擊孫如藻飭令扎布導引指拏立就誅戮該頭人等均輸誠畏法繳出贓物邊界肅清至博窩延袤千里均與唐古忒連界其地少鹽茶尤少草場每年夏間必來邊界牧放就便市易應請於每年五月朔許其出巢在南路駐紮十月杪回牧屆期令扎布汪魯各遣頭人在牧處專司市易並令擦木多遊擊偕碩板多千總帶兵巡查毋許私踰界址在番人既有頭

人管束而大道又有官兵彈壓可期永遠安靜得 旨所議尙妥  
卽著照辦是月授正藍旗漢軍副都統調哈密辦事大臣旋調烏  
什辦事大臣十四年因病陳請開缺十九年卒子嵩保工部筆帖  
式岱保戶部筆帖式恆保刑部筆帖式崇保都察院筆帖式春保  
吏部筆帖式宜保理藩院筆帖式

右 國史館本傳





## 湯占先

湯占先四川人由行伍歷拔把總千總嘉慶五年陝西湖北四川三省邪匪未靖占先隨經略大臣額勒登保等勦辦於甘肅階州境內截擊伍金柱大股賊匪殲其渠敘功升甘肅廣武營守備六年復以軍營出力升四川冕山營都司七年六月陝省大股匪首苟文明等被勦窮蹙於南山一帶分竄副將張瑗帶兵抄上太白山迎勦占先等於白雲峽五里坡扼截賊由太白山梁東竄張瑗率伏兵奮擊占先一軍復從旁抄至併力合勦殲四十餘人俘二十六名餘匪下山遁九月升貴州古州鎮標右營遊擊十一月各路勦敗餘匪竄越川省占先隨副將銜閻俊烈帶領官兵探勦進

抵毋豬峽偵知相距八十里之黃柏扒老林有賊眾屯踞其地林深箐密馬不能進占先等乘夜徒步前往行三十餘里遇匪來拒兵勇於黑暗中迎頭擊殺適有草棚數間閻俊烈飭令然燒占先偕都司會連光督帶後隊望見火光疾趨而至奮力迎勦賊敗走跟追二十餘里天曙復追七八十里多所斬獲時大功將次告蕨占先仍隨額勒登保於州境追勦零匪入山搜捕八年五月至六月占先於石塘亮埡子紅石巖蕎壩嘴等處節次擒斬數十人事旋平十三年四月調四川疊溪營遊擊十一月上果羅克賊番劫掠回藏堪布多賊爲害行旅上命提督豐伸帶兵前往查辦逆番負嶠抗拒占先偕參將沈宗文等分帶漢土各兵四面齊進圍

偪賊寨痛加剋洗立將首惡殲擒並搜獲所劫贓物自是眾番懼  
伏行旅以安十五年調綏靖營遊擊十九年中果羅克番匪復滋  
擾搶劫接護堪布之蒙古玉樹番兵並肆戕殺有旨飭查懲辦  
占先奉檄偕遊擊曹興邦等帶三雜谷土兵齊抵阿壩地方會合  
官軍及土目等剿平之事竣回營二十二年二月升江南鎮江營  
參將十一月兩江總督孫玉庭查閱營伍以占先弓力出色疏  
聞二十四年調安徽撫標中軍參將道光七年升江南河標中軍  
副將八年二月調江甯城守營副將六月以催趨漕艘出力賞  
戴花翎九年三月兩江總督蔣攸銛保奏堪勝陸路總兵之任六  
月授安徽壽春鎮總兵十三年因病懇請開缺調理允之十九

國史館本傳  
卷之三十四  
三十四  
臣

年卒

右 國史館本傳



英綬

英綬費莫氏滿洲鑲紅旗人父勒保大學士一等威勤伯自有傳  
英綬由拜唐阿於乾隆五十八年授鑾儀衛整儀尉六十年遷治  
儀正嘉慶四年升雲麾使十二年遷冠軍使十八年四月 上以  
京畿雨澤稀少糧價增昂 命於五城設廠平糶 簡派二十人  
分赴各廠會同各城御史經理英綬與焉尋授正白旗漢軍副都  
統鑾儀使五月升內閣學士兼禮部侍郎銜八月 上幸避暑山  
莊英綬隨扈以父勒保因病請假 特諭回京看視九月授右翼  
總兵尋補鑲黃旗護軍統領時教匪林清謀逆分遣黨與潛入禁  
城經畱京王大臣等剿戮淨盡英綬偕步軍統領英和等密派番

四庫全書  
卷三十三  
五  
役頭目在京南宋家莊地方拏獲逆首林清並從逆習教各犯奏  
交刑部分別治罪如律十月福保以固安縣附近地方有逆匪潛  
聚知縣何貞諱匿規避等情具控英綬遵 旨前往訊辦旋經順  
天府府尹以何貞公出村民未經具報奏 聞復 命英綬就近  
確查尋奏何貞因差公出屬實請免其革職拏問仍責令隨同捕  
匪 允之十一月 命赴武清縣河西務地方訪拏河南賊目趙  
得隴之弟趙三並馬依潮各犯復遵 旨前赴宋家莊查明林清  
父母墳墓眼同掘毀尋偕英和等遵議稽查各城門弊竇章程疏  
言擬每月揀派筆帖式四員輪查內外各門其各門官廳所設兵  
丁請 敕各旗該管大臣分飭章京等不時嚴查並各稅局一體

稽查至崇文門稅務向設海巡稽查漏稅嗣添派巡捕營弁兵巡緝設有自犯需索賄縱等弊轉致無人查察請 敕下監督等仍照舊例專設員役稽查不必巡捕營兼管如海巡等有弊令巡捕營舉報究辦奏入得 旨內外城門共十餘處添文員四人安能稽查周密惟在該步軍統領等隨時查訪懲辦自可禁絕弊端餘均如所請十九年二月又奏步甲一項例由八旗戶下挑充嗣酌撥額缺歸滿洲蒙古正身閒散挑補其中不乏年力精壯堪以造就之人應教演技藝予以進身之階擬請每旗滿洲揀選四十名蒙古十名挑取健銳營出身步軍校人員統率練習如果技藝嫻熟三年後拔取一人給金頂領准再三年後於領催八名內擇尤



精者給六品頂帶再三年後拔取一人保選委步軍校此後每年  
祇保選一員其應需公費請於內務府官房租庫並廣儲司積存  
制錢內借給五萬串發長蘆鹽政生息備用分限歸還原款得

旨允行閏二月調正黃旗滿洲副都統左翼總兵旋授理藩院右  
侍郎三月轉左侍郎五月調工部右侍郎七月以父勒保患病係  
延祝由科符咒醫治於 召對時面奏 上以事干例禁恐有傳  
徒惑眾情事傳 旨查詢復飾詞推卸部議降二級調用 加恩  
改爲畱任復以部務不能諳習 命開工部侍郎缺八月綺春園  
等處迭次被竊 上以英綬專在御園駐班巡緝不能整頓捕務  
命照部議降三級以三等待衛在大門上行走十二月以保送會



經獲咎之眞武保在御前校射並挑取護軍校部議降二級畱任  
二十一年八月補鑲藍旗漢軍副都統九月管理圓明園事務二  
十二年二月復授內閣學士兼禮部侍郎銜六月復授右翼總兵  
八月以拏獲要犯緝捕認真下部議敘十月調正黃旗滿洲副都  
統十一月復以捕獲從逆要犯 賞加一級旋補鑲藍旗護軍統  
領二十三年正月以家人達罕呈出素識之直隸都司余國柄書  
信內有拏獲教匪承審官有意開脫並託向部吏關說題升遊擊  
等語偕英和等具奏請 飭查辦得 旨達罕係英綬家人當伊  
呈出書信時卽應自行具奏乃先與英和閱看商同聯銜大屬非  
是著革退內閣學士並護軍統領祇畱副都統及右翼總兵仍交

部議處四月以聽信家人閆六得賄愆憑將大興回民史鴻業炭  
廠驅逐 命革職拏問經軍機大臣會同刑部鞠實奏 聞 諭  
曰英綬從前屢獲咎愆此次聽信閆六之言驅逐炭行竟係倚恃  
總兵壞法舞弊實屬恣意妄爲著發往伊犁效力贖罪伊父勒保  
告病在家不能責處著刑部堂官當堂責處二十板此係朕代勒  
保以家法責處再行發遣二十四年以父勒保卒 特旨釋回服  
闋後 賞拜唐阿旋革退道光二十年卒

右 國史館本傳

慶山

慶山薩瑪拉氏滿洲正藍旗人嘉慶元年川陝楚三省教匪不靖慶山由健銳營前鋒隨都統巴克坦布前往剿辦著有戰績二年補藍翎長四年升前鋒校八年升委前鋒參領十二年升副前鋒參領十三年揀發福建以參將委用十四年補泉州城守營參將十五年調臺灣城守營參將十九年緝獲接濟洋盜匪犯歐奇等五名治如律二十一年升浙江平陽協副將二十三年署臺灣鎮總兵官二十四年嘉義縣盜犯蕭抱等糾眾搶掠慶山督領弁兵分途緝捕尋拿獲王鶴等百餘名均寘之法道光元年擢漳州鎮總兵官三年調雲南昭通鎮總兵官四年授荊州將軍五年六月

因佐領忠貴杖斃兵章京祿違例濫刑奏請褫職十一月奏劾領  
催依祿保兵丁西祿保開場聚賭請銷除旗檔並將失察之協領  
福多佐領特國恩等皆降補有差均從之六年二月調西安將  
軍時逆回張格爾入卡滋擾八月慶山僅據參贊大臣楊遇春調  
兵咨文未行奏明請旨率帶官兵一千名前赴軍營嚴飭之  
並令撤回九月調甯夏將軍七年偕署陝甘總督鄂山奏言西安  
撫標城守營及鎮標附近省會綠營馬兵缺出俱准旗員咨送閒  
散與綠營戰守兵一體比較技藝挑補俟挑足二成額數之後爲  
止駐防旗人二成馬兵缺出仍以滿洲閒散挑補其綠營八成馬  
兵缺出亦仍以綠營戰守兵挑補不得混淆增減至由馬兵考拔



額外經制各弁缺當以弓馬勞績爲定再甯夏涼州莊浪三處駐防閒散亦照西安辦理下部議行八年三月因副都統噶普唐阿與慶山意見不合挾忿互訐上命鄂山等前往查訊尋覆奏噶普唐阿所訐慶山私扣私借庫貯馬匹各款均屬誣捏惟勒休防禦富雲一節於軍政冊內捏寫考語屬實上以慶山因私互訐不休殊失大臣體制其查驗富雲患病屬實輒填註考語朦混咨部咎有應得下部嚴議並命來京聽候部議旋議降三級調用九月授二等待衛十月賞頭等待衛作爲烏里雅蘇臺參贊大臣九年偕將軍彥德等奏言烏里雅蘇臺所屬喀爾喀四部落地方遼闊天氣早寒不能種植一切食物均取給各處價值昂貴官

兵日形苦累酌議調濟章程四條一請多撥駝隻添買米麪以濟  
兵食一請循照舊例設立碾磨以資利用一請酌畱換防弁兵以  
敷差委一請頒發通鈔 諭旨以符體制均 允之十年因奏請  
將三達克多爾濟補放土爾扈特正盟長並未將副盟長應升之  
處詳細聲明部議降二級調用得 旨著照例帶所降之級仍畱  
該處效力暫停開缺七月調荊州將軍十一月偕湖廣總督盧坤  
等疏言荊州滿營兵丁生齒日繁紅白事件賞項不敷請由藩庫  
撥解銀二千五百兩以資接濟下部議行十二年調廣州將軍十  
三年正月調福州將軍四月調烏里雅蘇臺將軍十二月因前在  
荊州將軍任內失祭駐防營節年短少馬匹並將馬乾銀兩那克

公用經荊州副都統善英奏參部議降三級調用 上加恩改爲  
降四級畱任先是科布多參贊大臣孝順岱奏屯田牛隻積餘情  
形並請酌定變價章程 上命慶山妥議具奏十四年正月奏言  
科布多自興屯田以來並無貽誤道光三年遇有偏災耕牛倒斃  
多隻係屬偶然當經那彥寶奏令官兵賠補迄今積有餘牛一百  
四十八頭該參贊大臣請將每年餘牛變銀存庫以備偏災買補  
之款設若管屯官兵等恃有賠補之項自此心存懈怠於屯政諸  
多未便惟當仍照舊章實心經理以專責成至見在餘牛應請變  
銀存庫以備屯營公用嗣後餘牛至百頭時亦照此辦理並將每  
年所餘數目咨報烏里雅蘇臺衙門就近查察以歸覈實 允之



四月以參贊大臣車林多爾濟奏劾郎中景善得受餽送各款慶山未經列銜會奏降三級畱任五月疏言烏里雅蘇臺綠營弁兵見屆五年期滿例應更換請將額設換防守備千總把總外委六員內擇其年力精壯差使勤勉並通悉蒙古語言者畱駐三員由馬兵保送已得實缺把總外委六員內畱駐三員馬步兵二百四十名內畱駐一百二十名俟下屆換班時全數更換如此一轉移間不惟烏里雅蘇臺一切差委得資熟手卽於內地換防營制亦無妨礙如所請行八月因病陳請開缺 允之二十一年卒 諭曰原任烏里雅蘇臺將軍慶山著准其照例賜卹尋 賜祭葬如例子文通見官禮部員外郎文徵見官都察院筆帖式



右 國史館本傳

國史館本傳  
卷六十一  
臣

皇朝通志卷之三十一

三十一

桓格

桓格那拉氏滿洲鑲白旗人嘉慶元年由烏槍護軍隨都統巴克坦布赴湖北陝甘軍營協勦邪匪有功授藍翎長累遷護軍章京六年擢二等待衛十年以遊擊分發廣東十五年補提標右營遊擊二十年蔣攸銛飭赴廣甯等縣緝盜先後擒獲一百七十餘名經總督蔣攸銛保奏得旨桓格俟有參將缺出儘先升用二十一年署惠州協副將二十四年升督標參將二十五年七月署肇慶協副將八月總督阮元檄赴英德一帶拏獲會匪二百四十名以奏稱桓格統領緝捕勤勞下部議敘十二月遷福建福州城守營副將道光二年署福甯鎮總兵尋升漳州鎮總兵四年擢西安

將軍六年二月 召來京四月授湖南提督八年入 覲 命留  
京另候簡用九年二月授鑲黃旗蒙古副都統旋改歸化城副都  
統以親老懇請來京當差 允之十月署鑲藍旗蒙古副都統十  
一月調鑲紅旗漢軍副都統十年署密雲副都統十一年八月調  
正黃旗滿洲副都統授理藩院左侍郎九月授右翼總兵十二年  
復授西安將軍時回疆底定陝西撤回官兵短交駝馬請照甘肅  
省買補例每隻賠銀二十兩各隊分攤限二年清扣奏入 諭曰  
官兵行速凱撤時沿站擁擠未能守候收管致有短少若分二年  
扣還兵力未免拮据著加恩分作八年陸續扣交以清原款十三  
年正月西安駐防候補四品京堂舒靈阿呈遞封章列款揭前將



軍徐錕 命左都御史昇寅等查辦尋查出西安八旗馬匹額外倒斃者由兵餉內坐扣買補又領草料餘贖者變價除買補倒斃馬匹外於年終散給兵丁度歲 上以買補額外馬匹由兵餉內坐扣兵力未逮且年終所分餘錢由來已久 命桓格妥爲籌畫尋奏西安兵丁實拴養馬五千匹每年倒斃較多除倒斃十分之一照例領價買補外其額外倒斃者勢難卽時買補至年終分給兵丁錢文由來已久未便裁革查有乾隆五十一年由部題准津貼兵丁草豆銀兩每月約一兩六七錢不等此項非正額可比應請在此項內每月每兵扣銀三錢一年可存銀三兩六錢以備隨時買補額外倒斃馬匹之需年底合算餘銀及買草贖銀分給各

兵度歲於馬政兵丁兩有裨益下部議行十二月調杭州將軍十  
六年正月奏乍浦協領缺出請不論滿蒙通行揀選 諭曰乍浦  
駐防原設蒙古協領一員佐領三員防禦三員協領缺出由佐領  
內揀選佐領缺出由防禦內揀選其應行揀選者若久病不痊及  
弓馬輒弱應隨時甄別何得任聽戀棧以致缺出不敷揀選嗣後  
蒙古官遞有病呈者該將軍隨時咨明部旗遇有蒙古缺出先儘  
蒙古人員揀選儻必須滿洲通選卽聲明緣由覈實辦理九月丁  
母艱回旗十二月百日孝滿仍 命赴杭州將軍任十七年九月  
乍浦副都統善英奏參桓格定期看操因參將姜希佩稟請改期  
遽爾回省且戰船損壞該參將等借用同安船頂補桓格匿不奏

參 上命閩浙總督鍾祥閱兵時詳查十八年五月鍾祥覆奏桓格看水操時參將稟報風勢不順是以未演時值省城鄉試並滿營軍政故先回省又據桓格稱善英兩次函復先稱親驗戰船五隻俱已損壞後稱祇有一隻損壞先後兩歧 諭曰桓格閱兵該參將稟報海面風霧何難親往察看輒卽回省殊屬非是善英函覆兩歧亦係該將軍失查致誤桓格著交部議處善英明知戰船頂補當時並不舉發事後輒以究出爲詞有心朦混著開缺回旗聽候部議尋議善英革職桓格降一級畱任先是善英劾桓格揀選佐領不擬正陪並令防禦勒爾經阿等遞呈告病 上命桓格明白回奏尋奏考驗防禦勒爾經阿定興慶玉三員弓馬軟弱本



應會參因念年歲尚健是以從寬令其呈退俾知警懼練習詎意善英誤會欲倒填月日辦理與例不符故再給咨限兩月習練諭曰該防禦如果弓馬軟弱自應據實奏參似此勒令告病開缺難保必無私弊桓格卽著來京候 旨九月又 諭據值年旗奏該處防禦五員除慶王業經病故其穆精額勒爾經阿定興貴順等四員已遵旨來京著派潘世恩奕紀文慶將該四員弓馬覈實考驗秉公覆奏卽傳到桓格善英在旁看視旋據大學士潘世恩等覆奏該四員弓馬雖不出色亦尙不生疎桓格因出佐領一缺畱俟擬陪之防禦穆精額坐補與例相符迨善英商令倒填月日該將軍咨駁並限兩月練習亦無不合惟考驗時旣因該員弓馬



輒弱卽應奏參乃飭令告病究屬非是 諭曰本日又據鍾祥將  
關過浙江旗營中箭數目開單呈覽該防禦勒爾經阿定與馬步  
各中箭二枝尙不致廢棄何以率令具呈告退桓格著交部嚴加  
議處部議降四級調用 上加恩改爲降二級調用二十一年卒

右 國史館本傳

171-192

171-192

國朝耆獻類徵初編卷三百二十二目錄

將帥六十二

趙其楨

托隆武

興倫

劉允孝

段永福

祝廷彪

西郎阿

徐錕

陳朝良

邵永福

勒福

誠端

奇明保

如柏

曾大觀

張作功





國朝耆獻類徵初編卷三百二十二

通奉大夫前署江西巡撫江西布政使司布政使湘陰李桓輯  
將帥六十二

趙其楨

趙其楨甘肅甯夏人六世祖良棟官勇略將軍雲貴總督康熙三十  
十四年以平雲南功授一等子爵乾隆四十一年 晉封一等伯  
世襲罔替自有傳其楨於嘉慶十五年襲世爵二十一年引 見  
奉 旨仍發陝甘督標就近學習二十四年署甘肅安西協副將  
二十五年署陝西大同協副將道光元年學習期滿引 見命以  
頭等侍衛在大門上行走四年閏七月授浙江嚴州協副將十年

丁祖母憂十一年接丁母憂十四年服闋補江西南昌城守營副將十五年署南贛鎮總兵十六年軍政列一等兩江總督陶澍以其積安詳穩練營伍整飭奏保堪勝陸路總兵之任旋擢河南河北鎮總兵十七年五月遵 旨入 覲 召見七月抵任自十七年至二十一年疊次循例陳請借給兵丁銀兩略言本標左右營及衛輝河南開封彰德陝州嵩縣王祿店九營每年於青黃不接之時酌量借給兵丁穀價銀七千七百七十八兩自行零糴食用秋後徵還遵例造具細數清冊及並無捏飾虧短情弊印結送戶兵二部查覈疏入均奉 俞旨二十一年卒子延烺襲世爵

右 國史館本傳

托隆武

托隆武墨爾哲呼氏黑龍江滿洲正紅旗人由閒散於嘉慶五年襲世管佐領並以父扎拉豐阿參領任內勦陝西教匪陣亡兼襲雲騎尉世職十八年河南教匪李文成等陷滑縣城經大兵圍勦文成先期竄踞輝縣司砦山托隆武隨副都統色爾滾等進勦先於白土岡豫伏馬步隊分兵赴司砦誘敵賊匪三千餘人恃眾前迎至白土岡伏發殪五六百人追殲千三四百人直抵司砦賊猶負隅固守我兵奮力攻克之文成自焚死餘匪搜戮殆盡托隆武在事有功旋又攻克滑城將附近餘匪悉殲之奏入 賞戴花翎十九年陝西南山廂匪滋事托隆武復隨色爾滾等協勦於寶雞

縣隴州一帶將首逆夥匪以次翦除旋即凱撤歸營二十四年授副總管道光三年升協領尋以巡查鄂羅斯邊界未能將越境之犯拏獲奪協領仍畱世管佐領七年復協領十三年俸滿得旨交軍機處記名十九年俸再滿亦如之二十一年五月擢盛京副都統時英夷滋擾海疆上以盛京防堵喫緊托隆武曾經出師諳悉軍務諭將軍耆英酌量情形如海口有警即將調防官兵令托隆武統帥防勦以期得力九月偕耆英等奏酌擬防堵軍需章程又奏遼陽等州縣廳屬田畝被淹民房衝塌旗民生計拮据請將無地民戶及地畝被災之旗民站丁照例賑卹並額賦分別蠲緩均得旨允行二十二年四月偕將軍禧恩等奏朝鮮接壤



地方民人越邊私蓋房屋開墾地畝見飭嚴密查拏并將私蓋房屋及私墾之田全行毀除 上是之六月卒子慶祿襲世管佐領兼雲騎尉世職

右 國史館本傳

皇朝通志卷之三十一

三

興倫

興倫薩克達氏滿洲鑲黃旗人成都駐防嘉慶元年隨成都副都統勒禮善出師四川達州十八年陝西岐山縣三才峽廂匪滋事興倫隨成都將軍賽沖阿帶兵赴陝中途偵知匪眾竄西鄉縣之黃池堰口卽由老漁壩木竹壩碾子溝太陽灘店子河北巖子等處追剿青藍紅線四號股匪殲斃首逆苗小一前後二十六戰興倫均在事有功 賞給額外驍騎校先換頂帶二十年三月補正黃旗滿洲驍騎校八月調正藍旗滿洲驍騎校二十四年升鑲白旗滿洲防禦道光三年擢正藍旗滿洲佐領十二年遷鑲黃正白滿洲二旗協領兼管鑲白旗滿洲佐領十七年卓異引 見奉

旨回任交軍機處記名二十年擢京口副都統旋調江甯副都統  
二十一年英夷犯浙江 命率江甯官兵赴京口防堵奏言自抵  
京口連日沿江察看形勢將官兵四百名分置各處要隘妥爲協  
防伏思京口兵丁尙有副都統協領副將及帶兵之江甯協領等  
官層層管轄足資防剿惟前由江甯調赴浙江官兵見在曹娥江  
防堵僅有協領管帶並無大員統率懇請前赴浙江帶領前調江  
甯官兵協同剿辦 諭曰見已有旨將前調江甯之兵撤回該副  
都統毋庸前赴浙江京口地方緊要必應加意防守仍著會同海  
齡將堵剿各事宜悉行熟籌妥辦布置毋得少有疎虞二十二年  
以病請開缺七月卒



右 國史館本傳

國史館本傳 卷六十一 五

The image depicts a table with a thick black border and several vertical lines dividing it into columns. The table is mostly empty, with some faint, illegible markings along the right edge, possibly representing text or data that is obscured by the high-contrast processing. The overall appearance is that of a scanned document page.

劉允孝

劉允孝甘肅肅州人由武舉入營效力嘉慶四年隨征川陝楚三  
目教匪屢著戰功拔補甘肅鎮海協標永安營千總五年升永固  
協標平川堡守備十八年九月直隸長垣教匪煽亂延及河南陷  
滑縣城允孝隨固原提督楊遇春帥師往勦十月馳抵衛輝偵知  
賊眾分屯丁樂集我兵合力兜擊斬馘六百越日進攻道口克之  
毀其巢殲賊萬餘十二月克復滑城擒首逆牛亮臣徐安國匪黨  
盡殲捷入命以應升之缺升用先換頂帶適陝省南山匪徒滋  
事延擾隴州香泉等處十九年正月復隨楊遇春進勦桃花坪大  
敗其眾追躡至柏陽嶺其地兩山夾峙倚傍老林我師分路仰攻

殲賊首麻大旗斃賊千七百餘奪獲器械無算二月勦沔縣股匪龔貴等於三元壩允孝首先迎擊槍箭齊施賊潰走塘子口我兵據山下壓首從悉就斬獲論功 賞戴花翎十月補永昌協標張義營都司道光四年擢湖北荆門營遊擊五年調漢陽城守營遊擊十年升提標中軍參將十二年二月湖南江華縣獠匪趙金隴糾眾倡亂隨湖北提督羅思舉馳往協勦三月趙逆竄新田之楊家鋪賊黨趙文鳳與之合夜犯桂陽意圖北竄大軍截殺於羊泉允孝由東南面進擊晝夜圍攻燬其巢殪賊三千餘殲趙逆於陣生擒逆子趙幅金幅銀及賊黨五十餘人捷 聞 賞志勇巴圖魯名號并以副將儘先升用先換頂帶尋凱撤回營十三年升直



赫督標中軍副將十五年擢天津鎮總兵官十八年帶兵搜獲洋  
船夾帶鴉片煙土十餘萬兩 上嘉其辦理認真下部優敘二十  
年授湖北提督二十一年崇陽逆匪鍾人杰等聚眾戕官建立偽  
號連陷崇陽通城二縣并遣匪黨肆擾通山各縣城允孝偕湖廣  
總督裕泰督兵會剿二十二年正月由西泗橋進兵遇賊於西嶺  
槍礮齊發併力窮追乘勢抵薄刀嶺賊驚竄遂奪其卡并連克小  
嶺界頭卡捷入 上以允孝調度有方下部議敘旋由石盤山五  
路進發接戰於黑橋殲賊三百餘匪眾屯白蟻橋拒守我兵奮勇  
衝殺斬級五十生擒首逆鍾人杰等並夥匪就殲 上嘉其調兵  
防剿謀勇兼施 賞換雙眼花翎三月鍾人杰等檻送京師治如

律允孝子耀武隨同勦賊總督裕泰上其功得旨劉耀武以營  
千總發往原籍補用並戴藍翎五月以英吉利夷船攻犯寶山  
命允孝調署江南提督防禦江省六月英吉利夷入犯京口允孝  
帶兵往救嗣因鎮江府城失守自請從重治罪上加恩令戴罪  
立功以觀後效旋因病陳請開缺允之八月卒年六十七諭  
曰前任湖北提督劉允孝由武舉出師川陝等省經朕擢任提督  
本年勦辦崇陽匪徒戴功迅速賞戴雙眼花翎旋因派令防堵江  
省積勞成疾已有旨准其開缺回籍調理遽聞溘逝悼惜殊深著  
加恩照提督例賜卹任內一切處分悉予開復應得卹典該衙門  
察例具奏伊長子把總劉揚武著以千總升用次子候補千總劉

耀武著以干總卽補用示朕推恩延賞至意尋 賜祭葬如例諡  
果恪子揚武耀武均候補干總

右 國史館本傳





段永福

段永福陝西長安人原籍四川嘉慶二年三省教匪不靖由鄉勇隨征出力拔補外委八年隨總兵楊芳勦辦三省餘匪四月行至神凹老林分路窮搜斃賊數人五月探知賊在房麻子一帶永福首先搶上山梁立斃十餘人十二月至龍窩梁頂永福以搜捕出力賞戴藍翎旋拔千總十八年直隸教匪滋擾永福隨陝甘提督楊遇春馳赴大名府勦辦探得賊匪分屯附近各村前往追捕連獲勝仗餘匪竄歸道口復分東西兩路而來官兵迎頭勦殺斃賊一千四百餘名生擒一百四十餘名永福以在事有功得旨賞換花翎十一月探知賊眾屯聚輝縣山內司砦我兵併力攻擊

追殺數里十二月進攻滑城用地雷轟擊南門共斃九千餘人生擒二千餘人並擒賊目牛亮臣徐安國等奏入得旨以應升之缺升用先換頂帶時陝西郿縣等處饑民滋事永福復隨楊遇春先赴隴州棧西勦辦十九年正月訊知賊匪李大旗楊小一與麻大旗劉二合股我兵追至柏楊嶺賊恃眾抗拒永福等分帶馬隊兩路進攻擊斃麻大旗劉二賊眾驚潰捷入上以永福升補陝安鎮左營守備二十三年因失察西洋人在境潛住部議降調上加恩改爲降二級畱任道光四年五月擢甘肅張義營都司六年八月逆回張格爾滋事永福隨陝甘提督楊芳馳赴協勦七年二月進攻洋阿爾巴特賊匪占據沙岡我兵三路迎擊斃賊萬餘

奪獲器械無算復追勦於沙布都爾莊大破之旋偵知賊眾十餘萬人在阿式巴特回莊負嵎抗拒官兵前後兜勦乘勝直上沙岡分投追殺至洋達瑪河一帶搜勦殆盡三月由渾河北岸進攻賊躡淺潛渡我兵連夜追擊取道喀城四面圍勦喀城克復奏入賞給利勇巴圖魯名號時張逆乘閒逃逸十二月我軍跟蹤追捕勦至喀爾鐵蓋山賊勢窮蹙永福帶兵擁上山巔生擒首逆捷聞賞給雲騎尉世職以參將卽行升用並賞給翎管扳指荷包等物繪像紫光閣九年補甘肅烏魯木齊提標中軍參將旋調陝西撫標中軍參將十一年授甘肅永固城守營副將十四年四月丁母艱十五年九月陝西巡撫楊名勳據呈奏請以永福情願在陝

入籍下部議准十月服闋陝甘總督瑚松額以永福在甘日久熟悉邊情奏請將永福畱甘肅委用 諭曰前任甘肅永固協副將段永福准其仍赴甘肅委用候有副將缺出卽行奏請補用十七年補陝西靜甯協副將十八年署甯夏鎮總兵十九年補貴州安義鎮總兵二十年二月入 覲來京十二月英夷滋事調赴廣東因轟擊夷船得力奉 旨從優議敘二十一年 上命永福馳驛前往浙江隨同揚威將軍奕經辦理夷務二十二年擢廣西提督旋調浙江提督九月病卒 諭曰浙江提督段永福由鄉勇出身累次出兵著有勞績前因從征回疆生擒逆裔張格爾克戴大功特加升擢本年由廣西提督調任浙江提督方資倚畀遽聞溢逝



深堪惋惜著加恩照提督例賜卹任內一切處分悉予開復並賞銀三百兩發給伊家屬祇領治喪所有應得卹典該衙門照例具奏尋 賜祭葬如例 予諡勇毅

右 國史館本傳

廣東通志卷之二十一

十一

祝廷彪

道光二十二年九月二日原任浙江提督毅齋祝公以疾卒於成都卜以二十三年四月十二日葬於雙流縣郭之南原其孤昌奎奉行狀來乞銘按狀公諱廷彪字虎臣號毅齋先世湖北麻城縣人明初入川占籍夾江曾祖考諱仲文始遷雙流祖考諱欽命考諱萬安三代俱 贈振威將軍如公公倜儻有遠略年十九卽應募入伍乾隆五十五年從征廓爾喀以功授額外外委五十九年從征黔苗以功授懋功營經制外委 賞戴藍翎嘉慶元年苗疆凱撤而白蓮教之亂作教匪熾於湖北蔓於川陝自襄鄖以內巴渝以外延袤數千里深山邃谷盡爲賊巢蜂屯蟻聚旋撲旋起合

之不下數十萬人分之亦各數萬其中自爲頭目若湖北之覃加  
耀張正朝陝西之王廷詔王國用王士虎四川之冷天祿羅其清  
苟文明皆渠魁也公馳驅於三省之間前後生擒賊渠十二殲斃  
者六十餘賊之受降者無算嘉慶五年 賞戴花翎七年洊升甘  
肅提標中軍參將是時大難雖平而餘孽未淨十一年七月甯陝  
兵變兵故賊之乞降而分隸於各鎮者公於四月擢漢中城守營  
副將七月甫至漢中聞變卽馳赴南山沿途截勦至十月而事定  
十二年正月復有瓦石平之變公於陽平擒首逆周士貴等五人  
並其黨一百餘人 睿皇帝嘉公迅勇 錫公迅勇巴圖魯名號  
賞銀二百兩十四年擢甯夏鎮總兵特調陝安鎮總兵十八年擒岐



山賊尹朝貴 賞四喜玉扳指一箇玉翎管一枝玉櫛小刀一具  
黃鏢大荷包一對小荷包一對是年河北賊李文成牛亮臣據滑  
縣大兵雲集公獨未與益 睿皇帝以陝安不可無公故也□□  
年擢湖南提督 諭令入覲 獎勞備至 今上卽位 賞公頭  
等侍衛大門上行走謂陝安非公不可道光四年仍以公鎮焉十  
四年轉貴州提督十八年調浙江提督十九年英夷內犯二十年  
六月夷船駛入定海縣陷其城公馳赴招寶山圍攻取目不交睫  
者六十餘日 上以公身經百戰年踰七旬思所以安全而休息  
之 諭令致仕公遵 旨於二十一年回籍踰年而公卒公素未  
學書剖機應敵往往暗與古合而其果敢尤絕人自入伍以後每

戰必以身先雖矢石如雨屹不爲動初攻苗寨時數被礮傷其丸  
深入左額剔之出其入右股者未出也在甯陝爲賊所偏矛逗於  
顯隄深溝中踏不能起血涔涔漬胷臆裂戰袍裹其創計其創去  
咽喉一指耳人以是服公之勇賊之乞降而分隸於各鎮者率皆  
桀驁難馴反側無定而公麾下所錄數百人究帖然不變兼能得  
其死力人又以是服公之智且服公之誠任湖南提督者七年復  
任陝安總兵者十年時海寓清謐四陲息警然所莅之處修明武  
備未嘗少衰其自浙歸也猶以定海未復爲恨嗚呼公之遺憾在  
是而公平生忠盡之忱亦於是乎可見矣公生於乾隆三十五年  
九月一日享年七十有三元配徐夫人繼配余夫人帥夫人子男

四人長昌奎蔭生兵部候補主事次崧奎理番廳增生次昭奎監  
生次耀奎孫男四人玉祿玉福玉堂玉佩銘曰  
功成身退古所難受之歸之惟其全三樊舊地新墓田高松大柏  
盈長阡福子孫兮世縣縣

右墓誌銘李惺撰





西郎阿

西郎阿多金氏滿洲鑲白旗人黑龍江駐防嘉慶二十年由前鋒賞給藍翎侍衛爾京當差二十二年二月授三等待衛五月上親閱侍衛校射西郎阿中箭五枝得旨賞給紗一匹在乾清門行走道光元年擢乾清門頭等侍衛補圍場總管七年賞副都統銜補呼倫貝爾總管九年仍帶副都統銜充伊犁領隊大臣十一年投鑲紅旗漢軍副都統十二年西郎阿管帶官兵出巡布魯特邊界令駝隻行李資夜出行猝被搶劫下部議處部議降一級留任上改爲降二級調用不准抵銷俟差竣回京照例辦理十三年充喀什噶爾領隊大臣十五年三月諭曰上年據蘇清阿等

覆奏喀什噶爾屯田地畝係入官叛產換易回田與開荒者有聞見雖依界耕種恐久後不無輻輳應乘興辦之始早爲裁撤見在屯民俱已播種請自麥收後陸續遣散等語業經降旨遵行惟念喀什噶爾屯田甫經招徠墾種旋即遣散將地畝撥給回子認種該屯民未免向隅或以遣散失業轉致滋擾回民亦未可定其無力貧民酌給口糧遣至巴爾楚克撥給地畝並屯民撤竣後再將屯地給還原莊回子辦理有無窒礙著興德等體察情形據實具奏要在辦理妥協使屯民不致失業回民亦無滋擾方爲妥善該大臣等接奉此旨卽體察該處情形或可無庸更張之處據實妥議具奏候旨遵行不得拘泥前旨遷就奉行致有窒礙也旋據西

郎阿奏喀什噶爾新城周圍一帶之喀拉赫依同地二百二頃六十二畝零招集屯民五百六戶開佃上年屆升科之歲該屯民等已將道光十四年分應徵小麥六百七石零全數交倉嗣經蘇清阿與德等會同履勘請將喀什噶爾屯田全行裁撤此次糧石係未裁屯田以前交倉應收入十四年分常年奏銷冊內造報奉上諭西郎阿尙未接奉前旨故有此奏著與德仍遵前降諭旨體察情形悉心妥議奏明辦理不可拘泥前奏稍事遷就以副委任閏六月授正藍旗護軍統領十六年兼鑲藍旗滿洲副都統旋以喀什噶爾換防總兵劉允中肆意拆毀民房乘夜開城斫伐樹株事發西郎阿前在領隊大臣任內未能據實奏參經部議降三級

調用又失察糧餉章京福奎那移銀兩議以革職畱任十七年得  
旨西郎阿著卽革職十九年 賞給藍翎侍衛二十年 賞三等  
侍衛在乾清門行走二十二年卒

右 國史館本傳



徐錕

徐錕漢軍正藍旗人工部左侍郎徐績子績自有傳錕由鑿儀衛  
整儀尉歷升雲麾使乾隆五十六年遷陝西延安營參將五十七  
年調甘肅督標右營參將五十八年九月擢湖南衡州協副將尋  
丁母憂嘉慶四年揀發福建以副將差遣委用五年補浙江平陽  
協副將時閩省海盜蔡牽糾眾滋擾定海鎮總兵李長庚率舟師  
勦之錕帶兵堵截獲夥匪多名六年護理處州鎮總兵官十年八  
月連獲洋匪張成富等一百餘名十一月升福建建甯鎮總兵官  
十二月生擒盜夥鄭月等五十餘人尋兼署福甯鎮總兵官十二  
年以巡防海口督率認真下部議敘十三年獲私通洋盜之董十



萬力二名實之法十四年署陸路提督十六年三月擒盜首黃治  
並夥盜陳賴等九名 上嘉其奮勇下部議敘 賞給提督銜並  
戴花翎閏三月入 覲四月以父徐績年踰八旬陳請終養 上  
允其請績以精力尙健願就養任所錕復據情具奏 諭曰徐績  
勉勵伊子辦公不令終養尙屬能知大義但念徐績年逾八旬南  
方炎熱風土不宜徐錕著調補直隸正定鎮總兵俾得就近迎養  
七月丁父憂十八年十月服闋會河南教匪李文成等滋事陷滑  
城錕懇請隨營效力 命帶領健銳營官兵協剿尋署河北鎮總  
兵官十一月復授直隸正定鎮總兵官十二月以攻克滑城下部  
優敘十九年二月擢古北口提督三月搜捕東明等縣餘匪獲土

戮兵大士等一百九十餘名復擒助逆賊渠王進道奏入 賞加  
一級七月有喜峰口營擅扣兵餉一案刑部奏請交錕就近查訊  
尋訊明都司哲克東額等因公那用餉銀辦理錯誤尙無侵蝕情  
事並究出匿名揭告之兵丁柏漢琦請 敕部議罪 上以錕辦  
案無能飭之十二月訪獲偷竊鉛礦拒捕傷官之劉仁麟等並劾  
匿不揭報之都司任昌壽請革職訊辦 從之二十年三月奏添  
改兵丁下軍機大臣等議行七月隨 扈熱河以督建南天門古  
北口橋座完固 賜文綺八月 上駐蹕兩閒房時山水驟發前  
途橋座被衝 命督率修辦越日工竣復督修喀拉河屯橋悉臻  
完固 上嘉其辦理妥速 賞穿黃馬褂二十一年二月兼署馬

蘭鎮總兵官尋於朝陽洞獲傳授符咒之道士雙陽劾失於覺察  
各員弁並自請議處 上以錕自行拏獲恩予寬免三月奏次子  
達興阿訪獲邪教崔煥等解部訊辦得 旨達興阿著賞給筆帖  
式二十三年二月奏參都司雙祿玩視捕務請革職 從之八月  
隨 扈盛京以修整深河清龍河橋座穩固 賞加一級子江西  
九江通判達冲阿 賞加同知銜十月 萬壽聖節得 旨開復  
降二級畱任處分二十四年八月 上閱視古北口官兵操演整  
齊技藝嫻熟得 旨獎賚二十五年二月劾十八里汰驛站外委  
施作霖擅將喀喇沁王公文駁回請褫職示懲 從之 上自熱  
河恭奉 仁宗睿皇帝梓宮回京以錕督辦橋梁道路一律妥善



開復任內罰俸處分十八案道光元年五月偕總督方受疇奏裁  
撤天津水師各事宜七條一裁撤員弁應咨回原省候補一兵丁  
馬匹分別裁減一戰船宜裁減卽委裁撤員弁管解回閩一解船  
員弁未經開行仍照常支食廉俸一解船員弁應給盤川一解船  
兵丁水手應給行糧工食一生息銀兩應分別裁存下部議行旋  
擢西安將軍十二月奏劾年老之防禦德靈請勒令休致 從之  
二年二月奏西安滿營歷年赴歸化城買補馬匹每致疲瘦倒斃  
缺額請酌量變通照嘉慶年間節次向甯夏購買路程較近官兵  
節省路費卽可抵作在途餵養之資馬匹可期騰壯得 旨允行  
五月奏請籌款酌添西安養育兵丁經部議駁 上以駐防兵丁



糧餉原有缺額銀率行演奏下部察議尋以前在古北口提督任  
內失察盜所風水樹株下部嚴議奪職 賞藍翎侍衛作爲烏什  
辦事大臣九月調喀什噶爾協辦大臣十二月調喀喇沙爾辦事  
大臣先是大臣永芹奏參糧員慶恩虧短倉糧八百餘石 詔錕  
按審鞠實治罪如律四年奏言請以普爾錢抵銀支放 從之五  
年 召回京六年發往福建以參將差遣委用八年三月授福州  
副將七月升湖南綏靖鎮總兵官九年擢荊州將軍十年調西安  
將軍十二年八月調福州將軍九月以協領塔圖禮於和闐領隊  
大臣德惠役使夷回稟報遲延奏請交部議處 從之十三年正  
月西安駐防候補四品京堂舒靈阿以錕剋扣兵餉餽送朋分等

情列款奏揭 上命尙書昇寅等往按之尋審明並無實據惟託協領轉借盤費收受營馬實屬不知檢束奏請革職 諭曰徐錕年未衰老若令其回京轉得安然自逸著賞給藍翎侍衛作爲駐藏大臣九月辦理生番事宜會奏出巢市易章程十二月以前在荊州任內駐防營短少馬匹並馬乾銀兩那充公用下部議處議降三級調用 上加恩改爲降四級畱任十四年 召回京供職十六年以前在直隸提督任內失察黃崖關營兵習教降三級畱任十七年 上以錕年已七旬精力漸衰 命以二品頂帶休致尋復 諭曰徐錕曾經出師著有勞績著加恩照武職二品賞給全俸二十二年卒子達昌阿前官甘肅平涼府知府

國朝通志卷三十三

右 國史館本傳

陳朝良

陳朝良福建同安縣人由行伍歷拔外委嘉慶十二年八月臺灣艇匪朱濱滋事竄擾鹿港湄洲一帶朝良隨南澳鎮總兵王得祿進剿擊賊於大雞籠洋面奪賊船五十一月隨署參將林承昌追賊於鶯壳澳斃賊多名敘功升提標左營把總道光二年擢右營千總四年逸盜陳政等在洋滋擾朝良督帶外委林文輝追捕獲之置陳政等於法經閩浙總督孫爾準奏 聞九年升督標水師營守備十五年正月升海壇鎮標右營遊擊閏六月升廣東平海營參將十八年升署龍門協副將尋實授二十年調崖州協副將例赴部引 見會英吉利逆夷滋事兩廣總督林則徐奏言朝良



向在閩洋熟悉水戰見當需人之際飭委該副將分帶弁兵壯勇  
駕船出洋懇請暫緩北上俟夷務事竣給咨進京 從之二十一  
年三月到京 召見一次八月兩廣總督祁墳奏保朝良巡緝奮  
勇著有勞績性情誠樸熟悉洋務堪勝水師總兵之任值夷務初  
定辦理需人請免其引 見得 旨交軍機處記名以水師總兵  
升用尋擢蘇松鎮總兵二十二年卒

右 國史館本傳

邵永福

邵永福江蘇江陰人由武舉隸水師行伍補京口右營千總嘉慶二十年升狼山鎮標中軍守備二十四年升右營都司道光元年升廟灣營遊擊四年升浙江乍浦營參將五年署温州鎮總兵六年六月升福建閩安協副將時漳泉郡屬與粵籍民人械鬪匪徒乘機焚掠擾及嘉義彰化所屬村莊永福隨閩浙總督孫爾準馳赴廈門勦辦並檄往淡水屬之艋舺噶瑪蘭等處彈壓曉諭勢遂解以功下部議敘十二月署金門鎮總兵七年七月署海壇鎮總兵十二月孫爾準遵旨奏保永福堪勝水師總兵八年升浙江温州鎮總兵鳳凰山四嶼等洋温州鎮所轄也永福莅任一年報

劫者三九年孫爾準奏劾之奉 旨著先行議處十年限滿無獲  
孫爾準參其難勝專閫之任以水師人材難得請降補參將如其  
所請十一年補浙江玉環營參將十四年二月升福建崗安協副  
將尋經總督程祖洛奏稱永福守潔才優幹練老成自奉降後頗  
知愧奮請升署福甯鎮總兵 從之十二月調補浙江温州鎮總  
兵先是洋匪陳沅於瑞安營所轄之南麂山外洋停泊銷贓十六  
年二月復裝載米石往來洋面永福偵知賊蹤擊沈其舟八月以  
督緝出洋施放號礮適副將葛雲飛等駕船前來稟事風利不及  
避誤傷兵丁二名永福下部議尋議降一級畱任十月署總督魏  
元烺奏參永福督緝不力得 旨交部議處十二月總督鍾祥奏

稱溫州爲由閩入浙門戶永福於外洋水務未能嚴加整頓致有同日連劫之案犯久未獲請撤任開缺並從嚴勒限半年畱於洋面緝匪 允之十七年以被參後於疏防各案僅獲犯一名本轄各犯未獲較多功過未能相抵復經鍾祥劾奏得 旨著降爲參將畱閩候補十九年因病休致二十二年卒

右 國史館本傳



--	--	--	--	--	--	--	--	--	--	--

勒福

勒福初名勒善哩那氏蒙古鑲藍旗人吐魯番駐防由委前鋒校於乾隆五十八年派赴葉爾羌戍守一次嘉慶十六年補驍騎校二十年三月升防禦十二月以緝獲鄰境脫逃要犯紀功二十一年升佐領道光三年升協領六年回部逆裔張格爾滋事大兵進剿勒善以照料征兵解運糧餉出力經吐魯番領隊大臣賚音岱保奏得旨交部議敘給軍功加一級八年張逆就擒檻送京師陝甘總督楊遇春以勒善接解逆犯過境無誤咨部敘功旋舉軍政卓異十年賚音岱丁憂在任守制經烏魯木齊都統成格疏請暫委幫辦領隊大臣事務允之是年逆回餘黨復滋擾事竣成

格以勒善承辦軍需接應兵差尤爲出力奏請 恩獎復下部議  
敘九月再舉軍政卓異十五年二次俸滿經烏魯木齊都統長清  
保薦由兵部帶領引 見得 旨勒善著更名勒福交軍機處記  
名十七年 賞副都統銜充伊犁領隊大臣十八年七月帶兵巡  
邊獲布魯特私進開齊偷竊駝隻匪徒圖魯都等審明懲辦十月  
復有布魯特賊結夥盜馬拒傷捕兵經伊犁將軍宗室奕山等疏  
請交勒福於巡邊時就便相機查辦十九年獲哈薩克賊匪塔斯  
瑪拜等入卡行竊防兵馬匹借署伊犁將軍關福等會同訊明分  
別辦理奏入報 聞二十年以年力就衰 命原品休致二十三  
年卒子祥泰驍騎校

右 國史館本傳

國史館本傳





誠端

誠端富察氏滿洲鑲黃旗人由官學生於嘉慶六年考取內閣中書十年補中書十三年充軍機章京十五年三月京察一等記名以理事同知通判用十二月升內閣侍讀十八年三月京察一等記名以道府用八月授直隸霸昌道九月以失察逆匪林清糾眾滋事部議降二級調用得旨誠端到任未及一月而且其時正在差次著加恩改爲降三級畱任二十年調雲南糧儲道二十二年臨安夷匪不靖委辦軍需事務誠端首先馳赴軍營協同勦辦事平捷入賞戴花翎仍下部優敘二十三年復以辦理臨安軍務事竣下部優敘二十四年三月署按察使十月遷江西按察使

十二月調甘肅按察使道光元年正月署布政使旋調湖南按察使二月調江蘇按察使八月調陝西按察使十一月署布政使二年六月升江西布政使尋調雲南布政使十月調福建布政使三年十二月丁母憂四年二月得旨江蘇布政使員缺著誠端於百日孝滿後前往署理閏七月護理巡撫五年三月調湖南布政使八月護理巡撫時因澧州安鄉被水垸田濱臨河湖地處低窪勘明收成歉薄奏請展緩錢糧及籽種銀兩以紓民力從之六年正月丁父憂四月署大理寺卿尋以逆回張格爾入卡滋擾上命揚威將軍長齡帥師討之九月命誠端馳往阿克蘇交長齡酌量差遣委用十二月授都察院左副都御史七年二月委辦

阿克蘇後路軍需事務六月赴喀什噶爾幫辦善後事宜七月授喀什噶爾幫辦大臣旋凱撤竣功 賞二品頂帶仍下部優敘十月偕長齡等奏言喀什噶爾遠處邊隅地方遼闊內則回眾殷繁外則羣夷環布查回城迤南之喀喇哈依地方地勢高曠枕渠臨河兼有湖草便於牧馬請於該處另築新城建蓋兵房衙署以資守禦 從之旋又奏請試墾大河拐屯田并裁撤卡倫侍衛改設綠營備弁略曰喀什噶爾大河拐一帶有空地百餘里來春令原設回兵先行試墾如有成效陸續添設屯兵以歲穫糧石供支兵餉至額設守卡侍衛俱由京營派往遠道更換於回疆情形俱未熟悉所帶各兵非所素轄難資約束請將額設侍衛裁汰卽於畱



防官兵內遴選員弁分駐防守並於大小卡倫酌加兵額以期周密巡防疏入 上命那彥成於到彼後籌議辦理尋經奏請如所議行十二月 召回京八年正月授盛京工部侍郎五月因押解首逆張格爾抵京下部優敘九月兼管奉天府府尹事務十月查明旗人承種地畝被淹成災奏請緩徵以紓民力如所請行旋

命協辦內務府大臣兼管移駐宗室營宗室覺羅學九年三月以前任盛京兵部侍郎惠端前往遼陽等八城點驗軍器其隨帶家人書吏藉端需索 詔誠端研訊鞫實僅將家人錢昇書吏崔永祥等擬以杖徒有差 上以情浮於法有意從寬嚴飭之四月以新民廳倉米需用較多奏請酌撥復州倉米七千石葢平縣倉米

入千石運交新民廳倉存貯以備支放 從之五月以奉天府屬  
有積年因公那缺各款奏請分別咨追籌補 上嘉其查辦認真  
諭令勒限嚴追照例懲處七月奏言原虧各員應飛咨任所旗籍  
及故員子孫名下勒限追繳其接收出結各員有代前任彌補過  
半者有曾經詳請咨追者該員等俱有承辦要差應請暫緩參處  
仍將追交不足之數著落賠補疏入如所議行九月以 敕擊錦  
縣誤差要犯王四未能即時弋獲降三品頂帶旋卽獲犯開復十  
一月失察太監兵丁差次受賄奪俸一年十二月 召來京十年  
三月 賞副都統銜作爲和闐辦事大臣尋因前在盛京工部侍  
郎任內以前任盛京將軍奕顯演戲宴樂未經奏參降二級畱任

八月行抵葉爾羌時有喀城賊匪竄入回莊誠端偕葉爾羌辦事大臣璧昌等督兵會剿斃賊無數事 聞得 旨遇有副都統缺出卽行補放仍下部優敘十一月以回疆逸犯博巴克糾結浩罕入卡滋事 命馳赴阿克蘇辦理軍需事務旋補鑲藍旗蒙古副都統十二月奏言大營官兵到齊急須糧運接濟擬設法由樹窩子直運至喀什噶爾務期有盈無絀但阿克蘇牛馬駝隻供應兩路赴援官兵並先運軍糧全數用罄而內地協濟駝隻尙未撥至應一面選派委員於各回莊極力搜雇先行趕運仍恐不敷供用不得不先其所急通融辦理查阿克蘇見存糧麩一百八十餘萬斤足敷轉運擬將後路烏魯木齊運糧到日卽以原來駝隻運至



大營彼時內地協濟駝隻亦可撥到再行按段分設糧臺滾運如此輾轉變通則存糧不致積壓兵精亦可無誤十一年正月奏請於察巴克臺地方設立大糧臺一處沿途安設小糧臺雇覓回子牛羸輪流轉輸按站道之長短計駝運之多寡以期迅速而免疲乏又查烏魯木齊軍糧四百餘萬斤除已抵阿克蘇外尙有三百餘萬斤非一次長運所能報竣擬俟阿克蘇所積之糧運送過半後仍將駝隻分撥後路接運庶前後不致遲滯而大營兵食亦可充盈至陝甘先後撥給駝隻計已出關五千餘隻通盤覈算已可敷用所有內地撥給卽應停止以節糜費均從之十一月授葉爾羌幫辦大臣兼管和闐十二年調阿克蘇辦事大臣十三年因



皇朝通志卷三十三

病陳請開缺 允之二十三年卒

右 國史館本傳

奇明保

奇明保烏扎拉氏滿洲正白旗人熱河駐防嘉慶十年由藍翎長  
升前鋒校十一年補驍騎校十五年遷防禦十六年擢佐領二十  
一年以襄理刑名有年經都統和英保奏二十二年軍政卓異二  
十三年升協領道光元年都統松筠以審案奮勉保奏送部引  
見得 旨交軍機處記名二年遷保定府城守尉四年擢錦州副  
都統六年七月喀什噶爾逆回滋擾 命富俊祿成遴選吉林黑  
龍江馬隊兵各一千名馳赴回疆會剿並 敕各派副都統一員  
及帶兵各員分起前進 諭令奇明保等挑備騰壯馬二千匹在  
大凌河豫備更換尋奏親赴馬廠選擇驍馬一千五百匹驟馬五

百匹俟官兵抵大凌河更換以利進行報 聞七年六月奏錦州  
水災 上命確勘奏聞七月奏言上月十二日小凌河上游水發  
向錦州城西北建瓴直注平地水深丈餘轉繞東南由螞蟻屯入  
海壞旗民廬舍九千二百餘間溺斃二百二十八人請給一月口  
糧撫恤貧民 從之九年 上巡幸盛京 賞奇明保緞四卷荷  
包二對銀四百兩十五年二月署黑龍江將軍四月齊齊哈爾副  
都統文溥患病奇明保代表奏懇請開缺回旗調理 上以奇明保  
代表奏不合飭之九月奏鄂羅斯邊界卡倫甚關緊要總管沙克都  
爾策楞副總管策楞多爾濟疏忽派出卡倫官員以致曠誤值班  
請交部議處十二月奏黑龍江永遠鎖禁之宗室圖克坦以在外

滋事被人毆斃請將任意疎縱驗訊失實之刑司協領拉克桑阿等解任質審均如所請行十七年以違例奏請將伊子福祿堪揀發近省下部議處議降三級調用上改爲降五級畱任又以兼管大凌河牧羣馬匹倒斃較多下部察議十九年授杭州將軍二十年六月英夷擾定海奇明保奏杭州鼉子疊爲江海要衝見議屯兵潮神廟以防窺伺又奏搜查漢奸諸事宜報聞尋有夷船一隻竄入乍浦礮傷官兵乍浦副都統長喜由驛馳報諭曰乍浦兵力單少亟須撥兵赴援惟見在杭州省城不可無大員彈壓著奇明保遴委將弁選派兵丁星夜赴乍浦接應相機堵遏時奇明保聞乍浦寇警已親率將弁馳往應援奏入上命奇明保回



杭城守禦更換副都統恆興帶兵前往會同長喜協守七月奏夷船被擊後退竄外洋哨探無蹤見已厚集兵力修繕戰具卽有匪船續至足資防堵 諭曰見在匪船雖退守禦仍宜嚴固奇明保著仍遵前旨折回杭州省城恆興著暫駐乍浦會同長喜妥爲防守是月奇明保馳回省城尋奏防禦事宜及乍浦設備情形十一月奏言見蒙欽差大臣往粵查辦該夷必赴粵聽候定海夷船亦必漸撤此後乍浦祇宜加意防範不可擅動該處駐防滿兵以及水師有長喜督率足資守禦恆興應回杭州本任前調赴援官兵及防守潮神廟屯兵均請撤回 允之二十一年八月英夷陷廈門分擾浙洋 敕奇明保等防守乍浦海口夷匪旋犯甯波 上

以杭州省城尤關緊要 諭巡撫劉韻珂會同奇明保恆興相機設法竭力保守以待大兵之至十一月夷匪犯餘姚奇明保偕劉韻珂恆興奏請畱江甯旗兵防守曹娥江調壽春鎮兵保衛省城如所請行二十二年二月 諭曰奇明保年逾七旬精力就衰著來京候旨七月至京以原品休致 恩准住京畱旗二十三年卒子福祿堪候補通判孫恩聯八品筆帖式

右 國史館本傳

NAME	RESIDENCE	AGE	SEX	RACE	EDUCATION	OCCUPATION

如柏

如柏錫克特里氏滿洲正黃旗人由世襲佐領三等輕車都尉補  
二等侍衛嘉慶十年授福建提標後營遊擊十一年臺灣北路逸  
匪未靖經福州將軍賽沖阿檄往勦辦先後擊獲首犯李洸高貂  
二名餘匪何奇等三十九名十四年因病回旗十五年病痊補湖  
北鄖陽城守營遊擊二十三年軍政卓異二十四年升陝西慶陽  
營參將道光二年青海賊番滋擾陝甘總督長齡檄隨西甯鎮總  
兵穆爾岱進勦四月抵克克烏蘇分兩路進攻抵賊巢夾擊破之  
殲三百餘人生擒二十六人奪獲牛羊一萬三千餘隻馬四十五  
匹長齡等上其功 賞戴花翎四年升陝甘督標中軍副將六年



二月署河州鎮總兵四月總督楊遇春遵 旨保舉堪勝總兵之  
副將以如柏年富才明操防認真入奏得 旨送部引見八月補  
伊犁鎮總兵十一年以病開缺回旗十五年病痊 賞給頭等待  
衛在大門上行走二十三年卒子懷塔布世襲三等輕車都尉兼  
世管佐領揀發廣東參將尙阿布見官刑部主事

右 國史館本傳

曾大觀

曾大觀湖北黃陂人嘉慶四年中一甲二名武進士授二等侍衛  
八年期滿由兵部帶領引見得旨以遊擊用十年選浙江楓  
嶺營遊擊十二年護理嚴州協副將十三年升署金華協副將十  
六年授太平營參將十八年三月調撫標中軍參將十一月升署  
杭州協副將二十一年補嘉興協副將道光元年署閩浙總督顏  
檢奏保大觀曉暢營務訓練有方堪勝陸路總兵之任上諭其  
請二年二月署衢州鎮總兵三月丁父憂四年服闋補兩江督標  
中軍副將六年正月升浙江衢州鎮總兵十一年升署提督十二  
年嚴州營外委張名彪呈控把總陸殿彪發給兵米違例折錢希

圖剋扣大觀令均撤任移府審訊嚴州協副將富昌都司劉殷鼈  
既不參揭於前又不追繳張名彪外委鈐記致名彪擅用鈐記官  
封呈控巡撫富呢揚阿衙門並囑令兵丁童日升等乘閩浙總督  
程祖洛路過嚴州以該府審斷不公爲詞聚眾喊冤釀大觀稟  
揭富昌等貽誤營務請歸案備贖經程祖洛奏 聞十四年丁母  
憂十六年五月服闋十一月授直隸正定鎮總兵十七年調福建  
建甯鎮總兵十八年升署陸路提督尋回任二十年七月英吉利  
逆夷滋擾廈門泉州及臺灣澎湖等處辦理防堵時提督余步雲  
帶兵赴浙江定海勦夷閩浙總督鄧廷楨請以大觀代辦提督事  
務奏奉 俞旨九月以建甯界連浙省兵差駱驛仍回本任以資

彈歷二十二年七月以精力就衰經閩浙總督怡良奏請休致  
允之十月值新授建甯鎮總兵兆麟到任需時各鎮將皆巡防海  
口委署乏員仍以大觀暫行管理是任二十三年回籍卒子傳翰  
廕生候選通判鑑衡候補廣東鹽運司經歷傳鼎武舉人候補廣  
東千總傳甲武舉人兵部差官

右 國史館本傳



171-264

張作功

張作功甘肅皋蘭人由行伍拔補督標後營把總嘉慶七年川陝楚三省教匪不靖作功隨總督惠齡帥師搜剿擊陝省股匪張士熊等於黃柏園大敗之追剿於熊岔生擒首逆張士熊及偽總兵孟廷楨等六名餘匪竄秦嶺老林作功率領兵勇冒雪進攻直入賊隊賊大潰八年正月躡剿至玉筍溝生擒僞先鋒胡登鼇殲賊二百餘尋剿賊於蘇家溝大樹壩等處疊有斬獲三月擊賊於月亮坪克之四月偵知南山賊匪由羅家峽東竄鄖西作功復合力進剿敗之於高橋溝南山零匪悉平尋聞嶺北賊匪遁入太白山大梁等處復分兵五路窮搜殲擒殆盡總督惠齡上其功 賞戴

藍翎尋升督標左營千總十八年九月直隸長垣教匪不靖延及豫東陷滑縣分據桃源集道口作功隨提督楊遇春赴豫剿辦十月抵道口作功等奮力截擊焚其巢賊圍入滑城城內賊亦羣出接應我軍從中堵截敗之十一月桃源賊復謀入城作功率所部直前衝殺斃賊千餘人生擒二百餘人桃源股匪悉數殲除捷入得 旨張作功著遇有應升缺出先行升用並先換頂帶旋升陝西提標石峰堡守備尋偵知首逆李文成與賊目劉國明等竄屯輝縣之司寨作功隨總兵楊芳等跟蹤往剿越濠毀牆直搗其巢賊敗據礮樓抵命抗拒我兵乘風縱火且焚且攻槍斃國明文成自焚死殲賊入百餘生擒二百餘人奏入 賞換花翎十二月

攻滑城豫於西南隅掘地道密置地雷乘機轟擊城裂冒煙衝入  
執賊渠徐安國牛亮臣餘匪盡殲論克復滑城功得旨交部優  
敘十九年陝省南山匪徒萬五等因木廠停工乏食糾眾煽亂賊  
首麻大旗劉二橫行隴竇李大旗股匪又與之合作功復隨楊遇  
春赴陝勦辦師抵桃花坪分路衝擊克之躡勦至柏楊嶺賊分屯  
嶺上官軍張左右翼擊之立殲麻大旗劉二賊驚潰復乘勝追勦  
大敗其眾首逆萬五等悉就殲擒事平下部優敘二十四年升甘  
肅涼州鎮標新城營都司道光二年三月青海口外野番滋事隨  
總督長齡帥師往勦作功隸焉四月偵知賊番由庫什圖向南奔  
竄分路追勦遇斫敦納木賊眾登山抗拒作功身先士卒奮力仰



攻殲賊三百餘生擒烏勒等三十餘名賊番一律殲除捷聞  
命以應升之缺升用尋升陝西延綏鎮標中軍遊擊十年升固原  
提標中軍參將旋調西安城守營參將十四年擢四川督標中軍  
副將十六年正月授福建汀州鎮總兵官五月調四川松潘鎮總  
兵官十七年調重慶鎮總兵官十八年貴州仁懷縣匪徒謝法眞  
等聚眾肆擾僞立名號作功帶兵三百赴黔協勦作功由右手進  
攻斃賊二百餘乘勝直逼賊卡燬其巢生擒賊首謝法眞賊目穆  
繼賢餘匪殲擒淨盡雲貴總督伊里布上其功賞加三級仍下  
部優敘二十三年卒

右 國史館本傳

國朝耆獻類徵初編卷三百二十二目錄

將帥六十三

唐際盛

宗室祥康

張元直

那彥寶

陳階平

周悅勝

白文治

陳琴

都勒豐阿

海亮

馬驥

趙光璧



國朝耆獻類徵初編卷三百二十三

通奉大夫前署江西巡撫江西布政使司布政使湘陰李桓輯

將帥六十三

唐際盛

唐際盛原名心舜貴州丹江廳人由行伍拔補丹江營外委遷黃平營把總乾隆六十年正月貴州逆苗滋事焚掠松桃廳正大營湖南永綏苗匪應之唐心舜隨總兵珠隆阿援正大營連戰城下二月圍解隨參將劉廷奇迎饗運遇賊於馬脛塘豹子場擊走之復由正大營截擊長坪賊解嗅腦圍又隨總督福康安解松桃圍四月破黃瓜砦進擊大小蜡耳山梁燬賊卡四復攻克蘇麻等寨



六月攻克老旺砦換千總頂帶七月攻老西砦長哨營及猿猴狗  
腦等砦克之九月破高多砦擒首逆吳半生補古州鎮中營千總  
駐馬鞍山防堵嘉慶元年九月思州府清溪縣教匪不靖隨提督  
花連布赴小竹山進剿擊賊於墮河坡山梁獲賊目楊通建等奉  
旨千總唐心舜首先殺賊著以應升之缺升補進攻榔木坳毀石  
城數座遂由黃家地後山梁攀崖越嶺乘夜攻賊穴拋擲火彈心  
舜首先躍登大鬼壘擊殺數賊官兵繼之賊大敗擒首逆高承義  
及姚世高等盡獲其黨十月以功進貴州撫標左營中軍守備  
賞戴藍翎 賜翎管扳指十二月隨雲貴總督勒保赴湖北剿辦  
教匪二年正月擊賊於長陽黃柏山旋因貴州南籠狝苗不靖回

師赴剿三月由鎮甯進攻關嶺連戰兩晝夜抵大坡嶺心舜同遊擊宋延清雙林分兵繞出關嶺後與大軍夾擊殲賊無算遂克關嶺換都司頂帶別攻巴隴壘下之冒雨攻克下山塘四月解新城圍趨南籠襲望城坡破碧峯山擒賊目梁廷松等七名及漢奸李茂梁五月克水煙坪擒賊目黃阿固黃昌雲六月連克阿魯溝卡子河進解南籠圍 賞換花翎閏六月隨貴州按察使常明副將施縉攻克九頭山七月克安有山梁八月同都司田朝貴帶兵潛赴樓下河圍燒西固大砦擒首逆楊明乘勝直擣賊巢破洞灑當丈兩處賊砦擒首逆韋七縉鬚進攻北鄉巴林四面兜圍賊殊死戰心舜馳入賊陣斫賊砦大紅龍旗仆賊驚潰官兵乘之擒首逆

王抱羊分兵搜勦馬乃聖等處餘匪狎苗平奉 旨交部議敘尋  
賜奮勇巴圖魯名號三年正月心舜隨總統勦保勦萬縣邪匪擒  
賊目梁雲松伍一凱旋 賜喜字玉扳指時川賊白號首逆王三  
槐冷添祿與青號徐添德屯聚開縣臨江市分擾新甯心舜隨勦  
保擊敗之於安豐砦賊走達州與藍號冉文儔合二月授貴州平  
遠協中軍都司擊賊達州獲賊目田在朝冉文諤三月賊走儀隴  
四月追敗之於茨頂王三槐遁據安樂坪冷添祿據祖師觀連月  
圍攻中槍傷七月同貢生劉星渠設伏安樂坪巖洞門之右各路  
兵既合伏兵起以火箭燒賊砦王三槐遂出就縛而冷添祿仍據  
祖師觀圍攻不下十二月授雲南督標左營遊擊冷添祿圍急竄



新甯心舜隨總兵百祥追擊中石傷四年正月勒保爲經略心舜  
從擊黃號賊王光祖於新甯敗之是月都統德楞泰擒貴文儔於  
通江三月冷添祿爲參贊額勒登保所殲五月擊敗白號賊張金  
魁於太平羅文壩九月心舜隨提督七十五擊賊於雲陽開萬等  
處連有斬獲五年正月藍號冉添元合白號黃子聰黃號徐萬富  
等五萬人渡嘉陵江西犯心舜帶兵由梁山入竹赴縣州截擊二  
月與參贊德楞泰軍合三月隨德楞泰破賊於梓潼馬蹏岡擒冉  
添元復敗賊於新子店斬白號賊雷世旺 賜玉煙壺閏四月隨  
德楞泰連敗白號賊於忠州梁山五月追擊於達州劉家溝中槍  
傷七月藍號賊屯聚南江蒼溪界之九龍場襲擊之生擒三百餘



九月擊青號賊王珊於水田並擒其師李思槐十一月隨四川總督勒保擊白號賊楊開第於儀隴斬之六年正月徐萬富與其黨樊人傑合藍號賊冉添士犯廣元欲渡嘉陵江心舜隨翼長散大烈邀擊於儀隴斬徐萬富奉旨議敘三月隨總兵張志林勦楊開第餘黨追擊於南江趕溪場獲僞總兵馬大勇七月敗青號賊於東鄉擒添德弟添壽八月敗藍號賊於通江擒冉學勝賜水晶煙壺十月敗白號賊湯思蛟劉朝選於乾溪十一月同遊擊夏雲龍勦王珊餘黨於大竹觀音橋斬僞總兵宋國品牌頭孫大礮復敗青號賊於忠州白石鋪擒僞元帥何贊十二月追賊至長壽江北廳界之桶井賊遁古路坪距桶井四十餘里兩山對峙地勢

險隘心舜同張志林乘夜踰山進擊賊驚竄殲獲二百餘擒賊首  
張長德僞總兵何祖明疊奉 旨議敘是年以命名不協 諭令  
改名遂改名際盛七年正月際盛勦青號王登廷餘黨於達州莫  
家溝擒賊首王得僞總兵王梁松二月勦徐添德餘黨於檀木場  
追至觀音山擒旗手張文明復殲青號旗手李士賢於開縣黃土  
壩旋隨提督豐仲赴川北勦白號張添倫魏學勝餘黨四月殲賊  
於廣甯界之五郎溝五月殲藍號楊步青餘黨於石灰窰時川中  
餘匪分竄老林或百餘人或二三十人不復成股際盛同夏雲龍  
在川北搜勦十二月授雲南東川營參將八年二月殲賊於鐵船  
山四月殲功回雲南九年九月署曲靖協副將十年六月授甘肅

瑪納斯協副將十六年六月擢巴里坤鎮總兵官十七年際盛遣  
守備朝哈泰同千總白璽貴領饗蘭州以所得養廉易金三十兩  
屬朝哈泰寄其母適總督那彥成母生日際盛送蠟燭鳩杖爲壽  
後朝哈泰爲提督劉芬參革朝哈泰疑際盛所爲因訐際盛私用  
兵釀買黃金二百兩餽總督那彥成二十年五月奉 旨巴里坤  
總兵唐際盛著解任交高杞嚴審尋訊明定讞朝哈泰坐誣遣戍  
伊犁際盛以違例革職道光二十三年卒子定魁見官凱里營額  
外外委

右 國史館本傳

宗室祥康

宗室祥康正藍旗人由 玉牒館議敘於嘉慶四年補宗人府效力筆帖式十四年補七品筆帖式十九年署主事道光四年補副理事官五年升理事官六年充殺虎口監督八年京察一等奉

旨記名遇缺題奏九年五月遷光祿寺少卿九月授歸化城副都統十年署綏遠城將軍十二年正月調盛京副都統二月授盛京刑部侍郎八月偕將軍奕灝等會奏盛京五部暨將軍衙門司員每逢京察甄劾甚少卽保列一等亦不甚爲輕重緣京員一等調京後不准隨帶本處一等司員升至郎中卽少升途遇有四五品京堂缺出雖准夾單開列而名次最後似此進轉無階殊不足以



資策勵擬請嗣後保列一等者無論京員本處人員照在京各衙門例咨送吏部帶領引見以備簡用下部議行十四年五月調刑部右侍郎授鑲白旗蒙古副都統九月充繙譯副考官十月以密雲縣駐防馬甲樂海胡克什布呈控副都統佈勒亨剋餉蓋房各款上命祥康馳驛前往查辦尋奏馬甲樂海胡克什布所控各款或事出有因或無誣可坐惟該副都統於公送扁額並不退還又不將衰老之員隨時參劾請交部議處十二月調鑲黃旗滿洲副都統十五年二月遷黑龍江將軍閏六月調吉林將軍先是盛京將軍奕經等會奏奉天圍場查禁鳥槍並沿邊防範各章程經軍機大臣議准因諭祥康將吉林圍場一律查禁十一月

奏言吉林旗人素多打牲爲業除嚴禁私槍並私造外恐不肖旗人或將本身鑿字鳥槍租與雜項丁民則偷打之弊仍不能盡絕應飭各該管官查察吉林圍牆原設卡倫十四道傳遞籌隻而派差查圍官兵與坐卡弁兵並不互相呈報應遵此次章程覈辦至嚴禁借給奸匪口米一條吉林圍場北邊係通京大路農民稠密如有偷打牲畜者本家即可密備口米雖有腰牌並無邊隘查驗惟有曉諭挨近圍場旗民人等凡攜帶鳥槍斧鋸形跡可疑者不准賣給口米再奉天圍場與吉林圍場毘連處所以伊通河爲界西岸奉天設那丹保卡倫東岸係吉林伊通卡倫其間止隔一河巡查自無疏脫毋庸另議防範上允之是年祥康偕副都統哈

朗阿奉 命查閱山西陝西營伍劾參將守備等員分別降調畱任奉 諭云本年山西省輪應較閱之期哈朗阿祥康皆係朕親信大臣特派前往宜如何實心甄別不避嫌怨今省城滿漢營伍若此各營似此者尙不知凡幾是其較閱時搪塞了事殊失朕整飭營伍之至意哈朗阿祥康均著交部嚴加議處尋奪職以四品頂帶補盛京副都統十六年四月署吉林將軍 上以雙城堡地方有錦州等城旗丁私赴耕作 命祥康等查明具奏旋偕會奏雙城堡京旗房地分定準數均有界址錦州等城旗丁私行來堡謀食其充丁者係頂任地丁並無占礙擬請嗣後每年由熊岳副都統飭諭錦州等城該管官造具細冊咨各該衙門隨時稽查分



別咨覆以杜牽混 諭日行之既久難保無內地民人潛往該堡影射牽混應嚴查禁止七月覆奏雙城堡地方該旗丁漸招有眷民人甚多如不早爲查禁必礙旗人生計應請照道光二年奏定章程旗屯界內除雇覓隻身民人不禁外如有攜眷居住者立即驅逐其內地隻身民人亦必查係實在雇與旗人傭工者方准畱住 從之十七年仍授吉林將軍十八年三月奏請嗣後將雙城堡協領一缺挑爲滿洲額缺不宜以蒙古漢軍人員充補庶免窒礙其佐領以下等官仍照原定章程 允之又奏言松花江新設漂河渡馬河卡倫添派官兵防守若口糧不足難重責成請於吉林貯庫賚銀生息閒款項下撥銀二萬兩發商生息分別動用



上如其請閏四月奏防護濩山應將漂河卡倫移於漂河沿封堆  
旁渡馬河卡倫改設於法必拉再於木欽河沿蜂蜜營添設卡倫  
以資稽查又奏烏拉墾地以西有二道河卡倫請移於蜂蜜場花  
園山北莖草頂子安設以資防範至饅頭頂子卡倫與固山卡倫  
相距七十里稽查難周請將烏拉墾地以北古井子卡倫移於拉  
林河沿兩河口地方安設以期嚴密均得 旨允行八月以保送  
吉林官兵弓馬不堪交部議處嗣經部議降二級調用 上加恩  
改降級畱任十九年奏涼水泉封禁官荒內見經派員往查有窩  
棚二十六所各有開成熟地一晌半晌不等其人早經逃匿無憑  
查緝已將窩棚地畝槩行燒燬並查涼水泉莖草頂子兩河口三

處均無坐卡員弁請將失察之烏拉總管德楞額協領果興阿並曠班各員交部嚴議 諭曰涼水泉官地久經封禁近有奸民潛入私墾可見該員往查不嚴著該將軍嚴查妥議章程具奏二十年伯都訥副都統巴雅爾劾祥康於進京當差官兵十名私令闖省官兵攤銀幫貼每名歲給二百兩 上命祥康明白回奏尋奏前據十旗協領等稟稱吉林官兵進京當差之員人地生疏度日拮据擬每年按名接濟銀二百兩俟二三年安居得所卽行裁撤所需銀兩於通省官兵按照俸餉多寡捐貲幫助恭查 聖駕巡幸盛京吉林官兵隨營當差皆係通省官兵捐攤幫助而見在挑選官兵又係伊等桑梓骨肉且每人所費無幾遂咨行各副都統

衙門亦皆願照辦理 諭曰在京當差人員自有應領俸餉不當  
由本省地方捐貲幫貼且挑選駐京之員與巡幸隨營者不同何  
得妄行援引辦理實屬荒謬祥康著交部嚴加議處旋議褫職  
上加恩賞給藍翎侍衛作爲庫倫辦事大臣 諭云兵丁例得餉  
銀皆關生計若濫行攤扣不免苦累著署將軍祿普副都統輯瑞  
查明所扣餉銀實數於庫貯項下按名給還所墊銀兩著於祥康  
名下追賠還款二十二年以足疾請開缺回旗調理 許之二十  
三年九月卒

右 國史館本傳

張元直

張元直雲南安甯州人由乾隆五十七年武舉充駐京提塘期滿  
經兵部考驗引見以營缺用嘉慶二十三年選漕運督標右營  
守備時南河十三堡決口災民蟻聚淮安元直奉檄撫綏彈壓道  
光五年經漕運總督顏檢疏保送部引見六年擢湖南衡州協  
中軍都司十一年升綏靖鎮標中營遊擊十四年遷撫標中軍參  
將十六年二月鎮筓鎮兵勇以免扣借餉不允聚眾鼓譟燬總兵  
暨辰永沅靖道官署元直以巡撫吳榮光檄偕衡永郴桂道張晉  
熙前往查辦旋以鎮道稟報情節輕重懸殊恐有消弭諱飾復奉  
札確查得實尋經湖廣總督訥爾經額以鎮筓鎮總兵向尊化辰



沅永靖道常慶平日駕馭無方致兵勇聚眾挾制事後復捏飾稟  
報奏劾褫職按治如律三月訥爾經額覈辦副參等第以元直列  
一等十八年題升沅州協副將十九年赴部引 見得 旨准升  
並 賜召對二十年署鎮筵鎮總兵二十一年閏三月調永綏協  
副將十二月復經總督裕泰保列一等二十二年六月裕泰以元  
直穩練老成曉暢營務遵 旨保奏堪勝陸路總兵 諭送部引  
見七月 簡授福建漳州鎮總兵十二月入 覲疊次 召見二  
十三年二月赴任行次江蘇因病請假調理五月請開缺回籍十  
月卒子琴道光三年進士官湖南岳常澧道璠道光十二年舉人

右 國史館本傳

那彥寶

那彥寶滿洲正白旗人大學士阿桂孫乾隆五十年由文生員擢三等侍衛嘉慶四年二月升二等侍衛五月襲騎都尉升頭等侍衛補奉宸苑卿七月補尙茶正充崇文門副監督八月兼公中佐領九月投鑲藍旗漢軍副都統十月因天壇上班遲誤降頭等侍衛五年五月上念阿桂舊勳以阿迪斯那彥成均被譴謫特擢那彥寶正黃旗漢軍副都統時蒙古請將老河南北兩岸指地遷換作爲公中牧廠命那彥寶往勘同索特納木多爾慶會奏曰蒙古所欲遷換者因其地距水相近牧廠生計攸關固屬緊要但老河兩岸種地之民戶口過多遷移未便惟老河對岸順坡斯

板囊金哈擡兩處戶口尙屬稀疎擬將此處槩令撩荒作爲牧廠  
並令三座塔稅員及該旗扎薩克等將所指都沁他拉之地按畝  
加三公同撥換實屬兩有裨益 允之十月調鑲藍旗滿洲副都  
統授內閣學士兼禮部侍郎銜旋補上駟院卿十一月擢兵部右  
侍郎十二月襲一等輕車都尉六年正月署理藩院右侍郎四月  
調兵部左侍郎六月永定河決 命偕武備院卿巴甯阿前往駐  
劄東岸侍郎高杞莫瞻棻駐劄西岸分投督辦嗣因高杞等同京  
那彥寶與巴甯阿專事堵築計石工三百餘丈灰土工一千一百  
餘丈埽土工三千二百餘丈被淹九十餘州縣奏請照乾隆年間  
江賑等例新開永定例下部議行七月調工部左侍郎仍畱工次

時盧溝橋水勢陡長二尺有餘擬於南北兩岸漫溢處先築土隄  
請發帑一百萬以備購料其附近地方百物昂貴例價不敷請暫  
照市價購辦 從之復奏長新店一帶散賑情形 諭曰南路災  
民業已無虞乏食惟長新店盧溝橋等處待賑者多著於京倉再  
撥米二千四百石交那彥寶等酌量情形設廠賑濟又 諭曰本  
日那彥寶遞到奏報水勢陡長自當駐工籌辦見在天將廟土隄  
業已辦竣此外漫口各工可以堵築且使災民傭工藉此以工代  
賑此時京城分廠賑濟災民漸聚漸多京中白木便久住見已賞  
撥米石於長新店一帶設廠賑濟著那彥寶妥爲辦理總須實惠  
及民九月以二十三號壩工口門愈窄濶勢湍悍隨飭晝夜堵築



將壩身增高一面安鑲大埽十月奏大工合龍奉 上諭本年盧溝橋一帶決口四處派令那彥寶等上緊堵築並將下游淤塞設法疏濬雇集人夫五萬有餘以工代賑興工後天氣放晴水勢漸退辦理兩月餘漫口全行合龍河復故道那彥寶遇事虛心籌畫盡善不愧爲阿桂之孫著加恩挑爲御前侍衛仍交部議敘時莫鵬萊查勘姜晟所挑牝牛河等工甫及一載盡屬沙淤奏請暫緩題銷奉 旨交那彥寶查奏助得牝牛河長一百四十七里自金門關至米各莊二十里淤成平陸緣金門關口寬二十餘丈牝牛河寬止五六丈分洩不及加以盛漲沙停遂致淤塞承辦各員雖無草率情弊但木便遽請奏銷應飭仍按原挑尺寸妥爲疏濬奏

入 允之十二月署倉場侍郎七年二月奏言永定河南北兩岸及三角淀等處自從前督臣劉綎加培後十餘年來日形卑薄且經上年異漲衝決殘缺尤多擇其必不可緩者計長二萬七千餘丈當飭永定河道妥爲辦理惟石景山及兩岸附近盡是沙礫必須數里外取用好土其蓋頂鑿幫仍須膠土封護方足以資鞏固且此次加培後尤須豫定章程隨時修理因飭令製單輪土車一千輛計一車所運可抵三夫肩挑之數將來按工段之險平定車數之多寡分畱各汛遇有殘缺隨時補築又言上年工次需人較多曾招集災民傭工代賑盧溝橋一帶需用匠役居多所雇人夫祇可挑水挖土見有二萬餘人已足敷用 上以多用一夫卽少

一饑民如可增添仍當悉心籌畫四月奏請加增永定河歲修銀五萬六千兩五月工竣六月調兵部左侍郎十月南河唐家灣漫口 詔往查看十一月偕費瀉吳璈築挑水大壩復於壩尾接築護隄四十丈退住全溜隨即堵塞十二月初彭齡奏參滇省維西軍務動用司庫銀兩藩司陳孝昇迤西道薩榮安通同舞弊 命偕大理寺卿章煦前往查辦兼署雲南巡撫八年二月抵任 諭以實心辦理勉法汝祖三月查明陳孝昇經辦黔省興義軍需濫銷那補於例不合薩榮安支放軍需所扣平餘爲報銷彌補之計殊屬錯謬保山縣知縣楊躍麟精運軍糧派累滋擾俱應論罪如律又奏雲南各縣交代遲延踰限者四十六案例應革職者四十

九員降調者二十四員槩行參劾則滇省幾至一空奏懇姑予畱任勒限嚴催又奏甯臺廠未經揭煎之紫板銅原定六九成色撥給各省採買各省委員以銅質厚黑屢請改撥陳孝昇遂將尖山廠銅斤私行換給所存甯臺廠低銅五百餘萬煎驗僅六三成色俱由承辦官員短扣工本所致應著分別追賠至煎淨尙須時日委員未便久稽請仍以尖山廠銅先行撥給奏入俱 允之七月兼署戶部右侍郎管理錢法堂事務九月豫省衡家樓漫口 命偕尙書劉權之馳往查勘值上游秦家廠險工疊出趕緊搶築截住橫流隨即相度壩基展往迤南並酌挑引河俾得汲川之勢九年二月啟放引河東壩塌工陷蟄塌去三十餘丈旋即搶鑿平穩



三月奏報合龍 諭曰那彥寶虛衷集議不辭勞瘁實屬可嘉伊  
本襲有一等輕車都尉世職著加恩給又一雲騎尉世職仍交部  
議敘七月調戶部右侍郎十年三月 詔以成親王敬書 聖製  
文並墨刻四種 賜之六月永定河北岸二工漫溢三十餘丈又  
下頭工河隄蟄陷二十餘丈 詔往查辦奏言閏六月十七二十  
七等日將北下頭工及北二工先後合龍其旱口七處見已全行  
完竣所有工次採辦物料堵築水口旱口用銀六萬三千九百六  
十九兩零著落各官分賠 允之尋轉戶部左侍郎十月 命查  
看葦子峪山路情形先是豐紳緒倫奏稱葦子峪山路窄狹必須  
鑿鑿方能行走十一月覆奏峪內那移樹枝鑿鑿山石恐於 陵

寢風水有礙得 旨著不必辦理十一年正月調工部左侍郎尋  
授秦甯鎮總兵兼內務府大臣三月 西陵白椿界內閒有居民  
改建房屋查於風水無關奏准將紅白椿分別那進十三年六月  
因失察 西陵總管盛住貪冒侵欺降頭等侍衛派往哈密換班  
十月授阿克蘇辦事大臣十四年奏言回疆生齒既繁案牘日多  
請將伊犁廢員撥歸烏什阿克蘇各一名幫辦刑名事務奉 旨  
允行十五年七月調葉爾羌辦事大臣八月授鑲白旗漢軍副都  
統仍畱葉爾羌任十六年二月調塔爾巴哈臺參贊大臣十一月  
授鑲藍旗滿洲副都統十二月兼鑲白旗護軍統領十七年三月  
鐵保等奏喀什噶爾錢局舞弊那彥寶家人得受陋規部議降調

九月 賞給二等侍衛在大門上行走十二月授正紅旗蒙古副都統十八年正月兼正紅旗護軍統領二月授泰甯鎮總兵官兼內務府大臣值 泰陵寶城牆身膨裂 命卽日前往詳細估勘會同蘇楞額敬謹承修先是凱音布哈甯阿奏稱開工後復加詳勘應修者尙多那彥寶查明凱音布等所報不實奏請議處 從之並以將事敬謹 賞戴花翎十九年授理藩院右侍郎兼正藍旗滿洲副都統閏二月調工部右侍郎進六大班三月署倉場侍郎授總管內務府大臣兼管上駟院圓明園事務充對引大臣五月調刑部右侍郎六月轉左侍郎 命偕章煦前往運河查勘水勢兼察金鄉匪徒滋事七月奏參山東吏治廢弛地方凋敝實因



撫臣同興不能整頓相率因循藩司朱錫爵徇私廢公濟南府知府擬圖聲名狼籍一味姑容金鄉匪徒李義等挾捕役訪拏之嫌糾眾拒捕照律問擬先是十八年九月睢汛二壩漫溢值滑縣用兵工程暫緩至是帶同司員溫承□等赴工堵築九月由西壩斜向東北建立壩基東壩則自磨盤壩起鑲長五十丈並安鑲大壩復於上邊壩內澆築夾土壩下邊壩外添設護壩層層進占旋以水凍停工二十年正月興工堵截並將積冰鑿開大溜掣動形勢頗利惟因引河草率奏參督催抽溝之員熊方受等奉 旨革去頂帶責令賠挑二月竣工三月偕吳璫李鴻賓方受疇奏言睢工自合龍以後可慶安恬惟查大壩係柴土新工日久不免平墊尙



須多加重土量爲培高壩後應趕澆土戩始有後靠並於大壩南  
首接築柴土二壩以作重門保障東壩下首尙須趕築挑壩二道  
以防潛近隄身其南北大隄經料車往來碾壓多有低窪亦宜修  
築平整奏入 尤之七月署戶部右侍郎兼管錢法堂事務署正  
白旗護軍統領八月山西雁平道福海朔州知州明祥互相稟揭  
九月 命偕帥承瀛前往審辦查出福海於差役得贓實係失察  
惟倒填革役日期究屬含糊應請革職明祥辦理門牌草率考取  
武童事後受財不知潔己請發往烏魯木齊效力贖罪是年山西  
蒲解二州連日地震傷人至多 命卽於山西藩庫支銀五萬兩  
帶往災區酌量賞給二十一年署鑲黃旗護軍統領六月調戶部

右侍郎授左翼總兵二十二年三月 命帶御船處印鑰管理圓  
明園兼軍政大臣六月御史宗山以所獲聚眾斂錢石渠糾約太  
監人等入會具奏 諭曰步軍統領等於所轄地方漫無覺察均  
屬咎無可辭那彥寶人尙明白仍畱左翼總兵之任交部議處七  
月署 行在刑部侍郎補鑲黃旗護軍統領二十三年訪拏奸商  
運米私宰馬匹傳徒習教造賣賭具等案又拏獲隨營詐差勒索  
人犯得 旨以緝捕認真任內處分加恩開復二十四年七月永  
定河北二南四二工同時漫溢 命偕吏部尙書吳璫分工專辦  
因北岸上頭工漫口三百餘丈掣動上溜北二漫口匯歸一處南  
四工已水淺挂淤 諭令吳璫卽會同督辦北上頭工請發銀十

萬兩以備工用 允之八月東河漫口 命吳璫前往所有永定河工程專交那彥寶同總督方受疇督辦九月合龍交部從優議敘十月奉 旨偕尙書戴均元前往河南武陟查看壩工那彥寶畱駐馬營壩會同吳璫督辦十一月奏言臣等馳抵工次前赴王家溝口門察看大溜水勢尙屬平緩惟引河工段縣長挑挖亦需時日且進占以集料爲先而兩處運貯稽料僅有一千餘垛近處及三百里外俱已購盡必須於更遠地方採買計料一垛須車二十五輛往返卽須半月見在多方設法俟聚至二萬垛方足應用查前次各工本處料物不敷俱由鄰省接濟請於直隸山東江南之與豫省連界者採辦各千垛委員交武陟工次 從之二十五

年三月引河挑工如式啟放清水暢流奏報合龍 諭曰上年馬營漫口當派那彥寶吳璥會同葉觀朝琦善籌辦該處土性沙鬆水深至十二丈餘尺引河至八百餘里之長購料至二萬數千垛發帑至一千二百餘萬之多自十一月興工至本年三月金門斷流那彥寶實心辦理尙爲迅速著補授鑲藍旗漢軍都統卽取道山東回京覆命旋因南岸儀封三堡復刷成漫口續塌一百三十餘丈 上以那彥寶於北岸合龍後遲延十餘日並不迅赴南岸速爲籌辦革去都統降補內閣學士署理河南巡撫四月授正紅旗滿洲副都統五月卸巡撫任因保奏議敘人員濫用超等特等字樣並請以守制道員嚴烺預補徐州道俱屬違例部議降調改



降留七月署鑲白旗護軍統領八月仍赴豫辦工十一月遷刑部  
左侍郎奏言大壩口門逐漸收窄儀封大工東西兩壩將屆垂成  
以天塞冰凝添雇人夫盡力開鑿旋即同時進占鑲築堅穩十二  
月 命充經筵講官道光元年調吏部左侍郎署左翼前鋒統領  
二年正月以先後辦理河工不知潔己聲名平常奉 旨降頭等  
侍衛派往吐魯番換班五月調科布多參贊大臣三年三月署喀  
喇沙爾辦事大臣奏定民人與蒙古交易章程 諭曰蒙民交易  
由來已久茲據查明蒙古負欠商民者爲數過多勒限竟不能歸  
還凡糧菸茶布爲蒙古養命之源著准其撥給商民部票與蒙古  
公平交易舊欠亦令陸續歸還惟科布多所屬蒙古部落七處除

土爾扈特霍罕向不通商外餘俱詢明令其交易至烏梁海與哈薩克接界往往因緣爲奸著卽禁止十一月奏定商人所領貨物須用將軍參贊印票註明方許在城售賣 從之四年四月 命來京以前在刑部時擬流官犯候際清呈請贖罪失察官吏得贓率行畫諾降四級調用七月 賞藍翎侍衛六年三月授通政司參議七月庫車回匪滋事 賞給頭等待衛爲庫車辦事大臣十二月奏言臣前過甘肅察看內地州縣應付車駝頗形拮据肅州前起官兵因出關後無車馬更換全行越站至後路官兵踵至趕辦不及積聚至四千餘人臣籌辦糧運自當悉心經畫惟恐新疆車駝糧石一時趕辦無多容俟到任後具奏 上命與喀喇沙爾

大臣商同籌辦七年正月揚威將軍長齡請以那彥寶調烏什辦事大臣 上以庫車有催趨後路糧運事宜亦屬緊要仍著在彼經理三月暫署烏什事務奏曰烏什西南一帶直徧喀什噶爾等處爲大軍後路西北一帶俱係布魯特游牧自張格爾滋事後從逆者多均須加意防範西南要隘已知會提督齊慎防堵其偏南柳樹泉並西北一帶亦飭分兵彈壓其餘山路小徑俱酌量分布卡倫多設偵探四月又奏烏什所屬奇里克部落布魯特距城切近去秋疊次搶劫臣到任後分兵防守拏獲布魯特搶馬賊犯詰以庫魯圖克逃往何處據供有餘匪藏匿山內謀搶烏什等語隨飭副將等進山勦辦見賊百餘人踞險抗拒我兵悉力仰攻復抄



上山梁合擊全行殲斃又偕齊慎奏言烏什西南爲賊匪藏匿之所三月內分兵兩路兜擊殺賊四五百人 上以兩次進剿情形並無逆跡著恆敬密加訪察五月恆敬奏查明布魯特確有搶掠實情附逆之庫魯圖克見已訪獲時大兵克復喀什噶爾 上恐張逆竄入烏什一帶地方 諭令嚴密訪查五月仍回庫車任十月大兵凱旋奉 上諭所留之兵可由該城支辦兵糈無須再運其在途者仍運至阿克蘇及庫車二處存貯旋以阿克蘇存貯六成庫車存貯四成奏 聞授喀什噶爾參贊大臣十二月調塔爾巴哈臺參贊大臣奏言六年軍興以來所有應付腳價俱應造冊呈報至內地各委員接辦糧臺自三月至今用銀八萬餘兩存銀



應卽解還惟庫車每年額調經費銀五千兩俱係兵餉遇有應行  
支放無項通融請將餘銀扣畱五千兩以備應用八年二月復偕  
長清奏言阿克蘇庫車存貯之糧原爲暫畱防兵接濟今首逆就  
擒所需口糧無須運往查所存粟米不堪久貯且本年豁免之糧  
見應買補請將所餘之米卽照應買之數劃出以備支放俱從  
之十一月授綏遠城將軍十年調成都將軍十二月甯遠府界曲  
曲烏高石等支生夷出巢焚劫清溪縣屬松坪土司馬林因改土  
歸流主使夷人滋事其黨馬應明等分投馬烈場唐家壩等處焚  
搶那彥寶偕總督鄂由提督桂涵剿賊於羊腦山追至老瓦巖殺  
賊甚眾馬應明復與馬林糾集四千餘人齊集几子山奔撲大營

麾兵追逐賊漸遁去十三年二月督兵在義邊堵截又飭建昌鎮  
堅守大樹堡聞山後香樹頂有賊屯聚移兵往剿賊匪踞山擲石  
我兵左右兜擊其阿吾一支千餘人前來攻撲官兵三路並攻餘  
匪逃竄清溪一帶漸卽肅清三月桂涵卒於軍那彥寶署提督事  
務進兵馬梁山等處賊蜂擁撲營我兵槍礮齊施轟斃無算賊勢  
漸窘逆首羅木則等始行投出隨將馬林所屬夷堡十一處燒燬  
時 上已授楊芳四川提督前往接辦 命那彥寶來京四月移  
營大樹堡駐劄獅子山梁擒獲馬林於黑嗎溪餘匪抵死抗拒調  
兵進剿屢有克捷奏入 上命楊芳趕赴大營迅速蕝事七月來  
京署正黃旗蒙古都統九月奉 旨那彥寶年踰七十著以原品

休致十八年六月因前管理奉宸苑失察那移挂欠錢糧交部議處革職二十三年十一月卒

右 國史館本傳

陳階平

公本名安魁字階平號雨峯於海州參將任內更以字行雨峯遂爲字別號鹿岑泗州陳氏源太邱居臨淮關其世次不可考至公何祖乃由臨淮遷泗販茶來往淮揚間六安蛟患蕩其業遂僑寓清江浦迨封翁益貧隻挈公負販浦市遇鹽城相士潘瑞堂驚曰此子軀長而色青眞甲木行人武貴當極品公之從外祖遊擊王肅時已官河標千總諱勸入營公乃以乾隆丙午投河標中營年二十有一派河庫道當差歲餘保送河督轅戈什哈差使勤慎值南河多故兩三年間裏河廳之小舟莊揚糧廳之邵伯南塘桃源廳之師家莊山安廳之湯家莊相繼漫口公皆與堵築之役公生



形辨水性尤有心得辛亥拔補額外外委次年得經制乙卯拔把  
總嘉慶丙辰升中營右哨千總戊午己未連舉毛城鋪邵家橋大  
工邵工將次合龍公以引河頭之攔黃壩爲土料車馬所經歷研  
堅實倉猝放除難淨盡擊溜不暢大壩每喫重建議傍攔黃壩前  
用浮土澆替壩以便淨放攔壩替壩本鬆土又新澆放溜時如湯  
沃雪主者以爲然邵工應手堵合嗣後東南兩河大工皆循以爲  
例旋擢滄右營守備壬戌從欽差侍郎那彥寶堵合唐家灣之減  
水壩工甫竣而安徽甯州之匪民王朝名滋事公奉派帶蕭營兵  
三百名馳赴甯城北之符離集防堵無一賊闖入徐境者癸亥東

河衛家樓漫口那公奉 命移節督堵公隨往次年春合龍保奏  
尤爲出力 賞戴藍翎乙丑又調堵睢南廳之郭家房而安徽之  
宿毫蒙三州縣匪民余連樊牛兒等滋事公奉派帶兵防堵會同  
各路將弁戰於郝家集生擒余連等並頭目二百餘而皖豫交界  
居民平日多持素諷經恐株累洵懼不可止公密陳兩江總督鐵  
保曰小民持素諷經本爲向善祈福非惡逆比儻不肖弁兵藉端  
訛索必致以擾累激變鐵公卽出示嚴切曉諭云擾累良民有狀  
者行軍法人心始定初賊勢甚張值大雪封路賊眷皆坐牛車不  
能行進退牽掣得速蕙事而善後實賴公策是年公捐升遊擊在  
守備任候選次年調堵王營滅壩賊事大吏知公疊次出力保奏

以遊擊留省儘先補用旋補松江府城守遊擊仍留工差遣己巳  
調揚州營遊擊而王淑人棄養請假治喪葬畢乃莅任揚州醴賈  
所集華膺成俗梟匪出沒擾害閭閻公實心巡緝城廂安枕士民  
以爲自名宦白雲上之後未之見也王申奉調引見以緝捕有  
成效賞換花翎癸酉推升海州營參將海州依山負海素爲逋  
逃藪梟匪設窠口立馬頭者相望窠口則掠婦女搶牛頭勒三日  
內半價往贖稍遲則婦女轉賣牛頭剝殺視爲故常馬頭則爭奪  
慘殺不可究公莅任簡標下悉其材技挑三十人爲內班皆善偵  
探能格捕隨宜任使各當其器梟匪皆通州役營員有舉動州役  
輒先時送信得走避公偵知各匪所在定更後卽親歷各門視管

鎗信不得出城俟人定乃集兵入署以私財具蒸饒火酒飽啖當  
行者督至匪巢匪尙酣睡無不擒獲有積梟江興遠挾仇窆八人  
眼一人心公廉知之訪獲一被窆目者詢悉始末分投追捕江興  
遠等四十餘人皆就擒置之法州境大憇悉遠遁有劉廷彥等十  
五人投首歸農繳架槍六座其制作輕重高下旋轉如意指公備  
詢其盤鍊槍筒配煮火藥之法乃資而遣之公依法製造督士卒  
演習爲江省營伍之冠公所挑內班多積勞至專營有與公同任  
封圻者丁丑遷漕標副將丁封翁憂服闋當赴部奏畱江南補用  
辛巳署狼山鎮總兵官壬午補江甯城守副將署徐州鎮總兵官  
癸未署蘇松鎮總兵官甲申擢湖南鎮筵鎮總兵官卽之任丁亥



陸見回任己丑奉 旨充祭告南嶽炎帝虞帝二陵使壬辰兼署  
湖南提督癸巳擢廣西提督戊戌調松江提督提屬三鎮皆公所  
舊歷水陸操防駕輕就熟不勞而治己亥以夷氛驕蹇調廈門提  
督公年已踰七十兩足習勞久時腫痛艱於馳驟然部署形勢精  
治火器島嶼防禦無不周庚子夷再入廈港公督兵拒戰連殲其  
目夷船遠竄制督閩者以公年老有疾奏請休致公歸田後夷人  
知公已去廈辛丑秋遠長驅直入督部駐廈不能禦遂致失守而  
定海鎮海甯波相繼陷 上怒褫閩督職而復以提督起公於家  
公赴浙尚揚威將軍防勒公分防曹娥江入閩月夷人無敢窺伺  
江濱者十稟秋夷人就撫於江甯各防盡撤公欲入 覲而兩足

不良於行請假調治至甲辰二月二日卒於寶應僑第距生於乾隆丙戌五月九日年七十有九夫人清河錢氏子晉康側室生皆前卒孫蘭尙幼女子子長適甯波衛屯牧季光弼次適六品蔭生候選通判雲中璽亦早逝女歸侍公少小食貧未能就外傳入伍後乘暇隙從人問字義講文法洎登仕版遂能自具稟牘彙壯強以後讀書益多封圻奏議皆已出千餘言立就委縵有條理老書記不能及也公雖出身行伍然河轅止重走差且派辦多河營修防事及專營揚州以將事首重練兵而練兵非身先不爲功時公年已四十餘晝從馳射夜習擊刺又以筋骨素脆弱聞徐州有石子功師延至署學引經卷簾諸術經歲強壯健舉營弁莫能先揚

營士卒感公之意爭練習竟成勁旅在海州見鈔本泝泝百金方  
卽捐廉付梓昕夕玩味求製器結陣之故必慊於心試諸事以歸  
實用其鎮鎮算也適果勇侯楊公爲湖南提督侯身經百戰剪刈  
蓬蒿至夥爲名將公師事之受其疊戰梅花新陣公就侯五隊舊  
法推出五星分布爲二十五隊以宜苗疆地勢緣山絕澗形散而  
氣合苗民震懼侯巡閱見之歎爲精奇變幻兩湖督嵩孚善其疊  
進抽退便捷渾成奏請湖南北兩省各營一體遵行公又增損古  
法爲連弩五矢齊發命中洞堅又挑健卒授以鉛瓦紮毬縱跳上  
高羣以爲無益及逆苗趙金隴據羊泉算兵從平地縱步登屋前  
隊受傷而後隊繼登趙逆得以殲除算兵受 賞勇號大小翎枝

拔升者至五十六員甲於各省及夷氛偪廣東各省兵齊集唯公所舊練湖南兵至死不奔北陣亡獨多然後知公爲深得南塘練心之教也夷氛日亟公由松江調廈門公見夷礮能破堅度其不能制柔因用麻袋裝沙高厚各八尺周護港沿伏弁兵於沙城後以逸待勞夷舶至皆失利閩督旣劾去公易沙袋爲石城夷礮一轟石城陷文武皆跳渡易石城時拆沙袋中多有礮子至深者不過四尺然後服公之用心精到也公參古今法煉火藥煮一次者遠百二十步二次則百八十三次則二百四十在廈試准以入告奉旨通飭依式配煉雖軍事小節然他省卒無及者予以嘉慶乙丑始識公於袁浦嗣在揚州乃相善在海州予就食州署共事



且一年在淮安在江甯亦時時過從及開府鎮筭後相距遠建牙  
松江則予已薄宦豫章中間相失廿年然公書必歲一再至道契  
闊並示結隊製械各圖說及訓兵諭民諸刻本予皆未具覆在廈  
門復以職思圖屬爲記予時方待辨所欲言者至大至急而舍公  
則更無可與言者乃撰記作荅書而荅書至廈公已罷歸及公復  
起襄浙軍先是裕靖節受幕客愚謂大江沙多水淺夷船必不能  
達而調狼山鎮防鎮海之奏予見其槩竊意夷情旣捷血廈門必  
復震定海以及乍浦上海撼狼福入大江截運道爲 國家深憂  
而長江唯圖山天險可截夷船覓急遞致書靖節諷其移重鎮守  
圖山書達不數日而定海復陷靖節旋與難嗣見邸鈔知公復起

卽致書申前說並錄寄職思圖記橐本公得書卽函致揚威及江南當路莫有然其說者遂致京口失守白門辱及城下事權不屬徒歎手柯傷已公性尤坦易有容在海州捕梟匪獲鹽三百車皆臨輿場產其場大使韓姓者平日謠詠公無不至公幾被陷至是韓於法當革職枷示五十日惟懼計無所出知予最善公徑走予齋跪求緩頰不得已偕詣公予先入及其事公曰韓之於我深矣然藉公事以洩私忿非君子所爲出示稟橐則已列韓家丁差役名爲協獲例得免議予出語韓韓愧悔無以自容欲卽執贄居門下公峻拒卒不見之生平於友朋中受一言之益終身不忘而已樹德於人及戚鄰負公絕不一挂齒賴實人情所難公病旣亟持

蘭手命其監奴曰汝俟我氣絕卽殯奉蘭赴白門吾有兩友在彼  
一爲正藍旗協領奎君一爲包君汝請奎君爲我乞包君爲我狀  
包君習我治行其言可以信天下後世語畢遂暝協領名奎光字  
異之諳練旗務爲江甯駐防所歸心於友朋間重信義辛丑壬寅  
與公同守曹娥江相需有成善士也來致公末命予不獲辭謹具  
狀於右以告當代大人先生錫之銘誅並牒 國史館請垂編錄

右行狀包世臣撰



周悅勝

周悅勝甘肅皋蘭人嘉慶元年由行伍隨陝甘總督宜縣赴川楚  
剿賊屢立戰功二年補督標右營額外外委三年升中營經制外  
委五年遷右營把總六年升陝西河州鎮標左營千總十三年升  
甘肅提標後營守備十八年八月引見適河南教匪滋事陷滑  
縣直隸總督溫承惠奉命剿賊奏請以悅勝隨營效力得旨  
周悅勝著發往軍前交溫承惠差遣委用十二月克復滑城教匪  
平悅勝以功擢赤金營都司二十五年遷肅州鎮標右營遊擊道  
光元年調補鎮夷營遊擊四年十月逆裔張格爾擾英吉沙爾所  
屬卡倫旋竄卡外喀什噶爾參贊大臣永芹等督兵追剿悅勝防



守英吉沙爾接運口糧六年署金塔協副將七年二月隨揚威將軍長齡等勦賊於洋阿爾巴特賊潰進戰於沙布都爾莊復克之賊糾合餘燼擁眾十餘萬迎拒於阿瓦巴特回莊我兵分馬隊千名潛由左右抄往而以大兵攻其前賊排列岡上如雁翅形悅勝偕副將分兵進擊賊稍卻乃令勁卒虎衣虎帽持籐牌躍舞賊馬驚陣亂伏兵又發夾擊之賊大潰殲萬餘人擒二千餘奪獲器械馬匹無算長齡上其功 賞戴花翎進克喀什噶爾張逆旋遁收復英吉沙爾酌留官兵五百名令悅勝駐守八年二月升陝西延綏鎮波羅營參將十二月以修建回疆各城經欽差大臣那彥成奏人請以副將升用先換頂帶 上如其請九年補甘肅涼州協

副將十年九月安集延句結浩罕回眾滋擾卡倫悅勝奉檄赴喀什噶爾救援遇賊於木蘇里克督兵擊之斬馘甚多餘匪逃匿薩漢莊我軍分三路進剿悅勝率將弁從右翼衝殺殲賊六七百人  
生擒五百人奪獲牛羊器械十一年正月調四川綏定協副將尋賞加總兵銜署理喀什噶爾換防總兵回疆之初平也那彥成請以涼州鎮總兵改駐喀什噶爾而以莊浪協副將移駐涼州十二年二月楊遇春奏請改復舊制仍設涼州鎮總兵以悅勝補授允之 命仍畱喀什噶爾換防十月以修城通商出力下部議敘尋 命管喀什噶爾訓練事宜十四年二月換防期滿悅勝受代入關赴涼州任七月調直隸大名鎮總兵十五年正月擢直隸提

督十月以前在喀什噶爾換防任內失察軍械虧短及擅用房租  
公項賞給兵丁下部議處十六年調甘肅提督先是 上以歸馬  
川地方與大通河迤南邊外野番較近防守宜嚴命陝甘總督瑚  
松額會同副悅勝商辦十七年六月瑚松額偕悅勝奏請於河北  
設岸立柵並於山崖設立墩卡將各營廠馬歸併一處使兵丁互  
相聯絡以一半專司經牧以一半隨地護羣庶層層設隘賊匪不  
致闖入如所議行十二月以軍政造冊遲延下部議處十九年復  
調直隸提督二十年七月英夷求通市海疆戒嚴悅勝赴天津防  
守疏陳防堵海口情形尋以古北口地方緊要 命悅勝無庸前  
赴天津二十一年 上謁 西陵悅勝奉 旨隨扈二十二年二



月 命酌帶弁兵往天津防堵駐劄南岸尋奏在葛沽地方接應  
報 聞九月以防堵出力下部議敘並 賜大緞二匹十月奉  
旨 在乾清門侍衛上行走尋復任甘肅提督時西甯野番滋擾盤  
踞河北一帶陝甘總督富呢揚阿會同悅勝派署總兵徐華清等  
統兵分勦二十三年三月野番竄青海悅勝進擊富呢揚阿疏陳  
諸將領戰功七月富呢揚阿疏稱悅勝等督率弁兵搜捕野番賊  
勢窮蹙河北肅清其竄匿瑪慶雪山之賊亦經攻捕殲斃河南番  
族畏法獻賊請撤各路官兵奏入 賞悅勝太子太保銜仍交部  
議敘二十四年七月富呢揚阿奏番賊劫掠牧馬戕害官兵 諭  
曰該番經大創之後自當畏威斂迹何以撤兵未久且該提鎮甫



經會哨卽至有牧馬被搶弁兵傷亡之事周悅勝未能先事督防著交部嚴加議處仍令設法偵緝十月奉 旨周悅勝著降三級畱任不准抵銷十二月卒遺疏入 諭曰甘肅提督周悅勝久歷戎行著有勞績遽聞溘逝軫惜殊深著加恩照提督例賜卹任內一切處分悉予開復所有應得卹典該衙門查例具奏尋 賜諡壯敏二十五年六月甘肅野番復滋事御史田潤疏劾前歲西甯會期番賊富呢揚阿及悅勝等諱飾不實 上命陝甘總督惠吉陝西巡撫鄧廷楨密查覆奏十一月奏入 諭曰富呢揚阿前奏接仗情形雖非盡屬虛無究不免於鋪張粉飾周悅勝以統兵大員並未接仗輒行捏飾入奏若使其人尙在均當重治其罪富呢

揚阿周悅勝見皆身故所有節終之典著一併撤銷周悅勝厥咎  
尤重著將前賞太子太保銜及賜予諡號槩行追奪以爲欺罔冒  
功者戒子俊候選同知

三 國史館本傳

171-330

171-330

白文治

白文治漢軍正紅旗人由印務筆帖式於嘉慶二十年補驍騎校道光二年遷印務章京三年升副參領六年管理槍營參領事務七年四月舉軍政卓異得旨記名五月擢參領十月充左翼稅務監督委員十一年經都統郡王載銓等保奏堪勝副都統之任由兵部帶領引見命記名以副都統用十四年升印務參領十五年以正紅旗馬甲張天壽案發脫逃文治等未能緝獲詔下部議處自十二年至十七年復兩舉軍政卓異均得旨交軍機處記名十八年授鑲白旗蒙古副都統十九年署鑲白旗護軍統領二十年五月署正紅旗滿洲副都統九月命管理左翼幼



官學事務十月復署鑲白旗護軍統領十二月署正藍旗蒙古副都統二十一年三月署正黃旗護軍統領五月調廣州副都統旋命置京仍授鑲白旗蒙古副都統兼署正藍旗蒙古副都統以帶領引 見遲誤部議奪俸十二月充入旗值年大臣二十二年通政使司參議恆壽以圓明園入旗兵丁及入旗前鋒護軍各營均經改添鳥槍演習成技奏請將入旗滿洲蒙古各領催馬甲等亦倣照添習以壯兵威而裕武備文治偕軍機大臣大學士穆彰阿及各旗都統副都統宗室善燾等遵 旨會議以各項馬甲差使既多且操演向有定期不至間曠若再令添習鳥槍恐該兵丁勢難兼顧轉致有名無實徒爲具文所請實屬窒礙難行奏寢之二

十三年 命克巴里坤領隊大臣仍兼鑲白旗蒙古副都統二十四年卒

右 國史館本傳

皇清同治元年正月

三十三

陳琴

陳琴福建惠安人由投誠義勇在洋出力歷拔把總千總嘉慶十一年升聞安協左營守備時海匪蔡牽等賊船數十在三沙口浮鵝洋面肆擾圍劫琉球國夷船琴帶兵護送賊不敢偏總督阿林保以聞得旨優獎十三年五月奉檄進剿蔡逆盜夥俘二百餘名奪獲匪船多隻器械無算下部議敘尋偵知逆夥小仁幫等匪任小窄洋面屯聚截擊之燬其船一餘匪向東竄駛琴追躡至回頭外洋拋擲火器轟斃甚眾閏五月擢福甯鎮標右營遊擊七月匪船竄入湄洲外洋一帶我師偵蹤進剿追至東峇洋面分隊兜擊琴乘勢躍過賊艇獲其船一擒三百餘匪是役也兵船在洋



遭風琴被賊船圍擊截傷右股仍冒險前進擊退之功爲多經阿  
林保奏請優獎得旨著加恩以水師參將用遇缺卽補並賞  
戴花翎十一月補浙江乍浦營參將十四年二月賊竄入浙被官  
兵擊燬船隻勢蹙甚上命阿林保飛飭琴等卽日出洋探剿四  
月匪由外洋南竄琴帶兵船薄之於崇武洋面擒斬無數九月隨  
水師提督王得祿等進兵於定海之魚山轉戰至黑水深洋見逆  
船數十隻在洋面游駛我師專注蔡逆本船合力兜擊賊不能遁  
殊死戰琴駕大船衝過拋擲火彈燬其尾樓得祿復以巨艇衝斷  
其舵賊船覆蔡逆及逆屬投海死琴亦受傷落水遇救得生捷  
聞得旨著加恩遇有閩浙副將缺出儘先升補十五年正月署

黃巖鎮總兵三月護金門鎮總兵時閩洋尚有餘匪在圍頭外洋駛  
泊琴偕溫州鎮總兵李光顯金壇鎮總兵孫大剛等督率兵船追  
至訓保洋連環攻擊獲匪船一四月補定海鎮總兵又追賊至東  
涌洋面疊遇颶風壞船幾不免琴梟水得脫先是小仁幫匪船竄  
據崇武獺窟琴帶兵船駛抵圍頭距獺窟甚邇乃不跟蹤追剿輒  
帶商船由外洋隨潮北上到處停泊至是總督方維甸參其玩誤  
並恐有商船請屬情事奏請革訊 從之七月署總督張師誠奏  
查琴平日在洋捕盜尙爲奮勇此次帶兵出洋順便護帶商船偶  
因風浪停泊實非受賄營私請降爲水師把總令其立功自贖如  
所請行尋擢千總十六年官軍搜剿海盜黃治琴偵知匪船被火

藥轟破遂選認識黃治綫勇趕至佛堂澳地方獲之並生擒黨匪  
八名二十年五月拔浙江玉環右營外海水師守備二十二年九  
月擢黃巖鎮標中營遊擊二十四年代理黃巖鎮總兵道光元年  
署黃巖鎮守備世職雲騎尉池佐清夾帶米石尙未出洋被揭潛  
逃總督董教增奏參琴不將佐清押送收審任其遁匿非尋常疏  
忽可比請下部嚴議得 旨著卽革職交該督嚴審如訊有知情  
同謀情事卽行按律治罪嗣據署總督顏檢讞知琴意存消弭及  
申揭倒填日期等情奏入得 旨著發往新疆效力贖罪不准援  
免二十四年故

右 國史館本傳

都勒豐阿

都勒豐阿莫勒哲勒氏滿洲鑲黃旗人由監生充清字經館膳錄官於嘉慶二十一年補鑾儀衛整儀尉二十四年升治儀正二十五年擢雲麾使道光元年授河南衛輝營參將三年調署撫標中軍參將四年實授六年舉軍政卓異七年升荊子關協副將九年巡撫楊國楨奏保都勒豐阿曉暢營務訓練有方堪膺專閫之寄得旨到任未及兩年資格較淺不准送部引見十一年十月楊國楨復申請前奏於十二月送部引見奉旨交軍機處記名旋升署河北鎮總兵十二年授貴州威甯鎮總兵十三年調河南南陽鎮總兵兩次查閱所屬營伍並巡查與楚接壤之新設營汛



甄別衰庸員弁降革有差疏入均得 旨允行十五年 命往告  
祭中嶽等處二十一年祥符汎黃河漫口堵築興工都勒豐阿奉  
派赴工次帶兵彈壓二十二年工竣經欽差大學士王鼎署理藩  
院侍郎慧成保奏出力得 旨交部優敘六月英吉利夷船闖入  
長江江防緊要 命管帶素練親兵馳往清江浦會同南河總督  
麟慶協力守禦尋帶兵一千名駐紮揚州迤東之宜陵鎮扼要巡  
防九月夷人就撫淮陽地方安靜遵 旨撤兵回任十二月經會  
辦防堵之署太常寺少卿李湘棻奏請應否量加鼓勵得 旨交  
部優敘二十三年興築中牟黃河漫口又調赴工次帶兵彈壓二  
十四年因病奏請開缺 允之二十五年卒子長青長庚長亨均

筆帖式

右 國史館本傳

國史館本傳 卷六十三

三

國朝詩林類集卷三十一  
三十一

三十一

海亮

海亮他塔拉氏蒙古鑲白旗人由領催兼印務筆帖式道光七年  
隨揚威將軍長齡征勦回逆張格爾以阿瓦巴特之捷在事出力  
賞戴藍翎歷授驍騎校印務章京公中佐領副參領參領十一年  
擢鑲藍旗漢軍副都統十五年充喀喇沙爾辦事大臣十六年六  
月奏請豫調十八年官兵經費銀一萬四千三百七兩以資支放  
允之十二月以上爾扈特蒙古鄂奇爾功拜白晝強劫毆傷事主  
審明入奏復以上爾扈特台吉策凌揀羅普孛獲賊犯功拜認真  
出力奏請獎勵 旨如所請十七年奏捐辦開都河添築河隄及  
修理火藥局軍器庫監獄等工奉 旨准行並免造冊報銷十八



年換防遊擊伊林保控揭海亮借工爲名那用公項並於忌辰期  
內狎邪宴會等款 上命鑲黃旗蒙古都統恩特亨額馳往查辦  
旋經訊明那用公項一節係勸建公館及辦理過往差使通那動  
用並無侵蝕之事惟挾優挾妓供認屬實應請革職治罪得 旨  
解京審訊尋經軍機大臣會同刑部鞠得實 諭曰已革喀喇沙  
爾辦事大臣海亮有表率一方之責乃於本營地方屢與屬員挾  
優宴會已屬卑鄙無恥復於忌辰期內前赴所屬糧員署內挾妓  
飲酒情節實屬可惡著解回喀喇沙爾地方枷號三箇月滿日再  
行發往新疆效力贖罪嗣以伊犁開墾地畝承辦出力 命釋回

二十五年故

右 國史館本傳

國史館本傳  
卷三十三  
將帥六十三  
三

臣等謹將所請開列

三

馬驥

馬驥陝西咸甯人乾隆五十五年武進士以營守備用五十六年  
選雲南廣西營中軍守備六十年貴州逆苗石柳鄧等竄擾正大  
營嗅腦松桃營廳等處總督福康安督師進剿驥屬焉敗賊於銅  
仁之盤塘坳正大圍解復檄赴馬家營屬之苗頭山鳳凰營屬之  
高雲峒斬獲苗匪多名嘉慶元年正月至三月迭戰地洛灣巖峒  
灣貴道嶺等山梁均出力五月擢永昌協中營都司二年二月隨  
提督珠隆阿進征興義狎苗連克樓下河鑼鍋背諸隘解永甯州  
盤江橋之圍總督勒保上其功 賞戴花翎時川楚陝三省教匪  
日熾驥奉檄赴四川協剿三年三月賊首王三槐等屯聚東鄉之



安樂坪諸要隘七月驥隨提督七十五攻賊於將軍梁克之進攻  
祖師觀山梁破其壘驥身受重傷裹創力戰殺賊數百人遂奪廣  
木山五年七十五以大甯界連三省令總兵德英額率驥等畫地  
設防驥偕守備薛升以八百五十人駐黃草坪尋移駐水子溪以  
百人扼其隘會德英額失利賊走八石坪竄入楚境驥追及之先  
是勒保劾驥不知奮勉褫翎頂至是湖北巡撫托渾布以驥入楚  
後累戰皆奮奏復之七年正月青藍白各號殘匪竄匿房竹山中  
老林驥隨總兵德昌由生長溝抄上元嶺斃賊多名又截擊於紅  
巖溝獲青號賊張得貴燬之二月襄陽黃號股首樊人傑等由興  
山巴東一帶竄徧霧渡河驥隨總兵王懋賞擊賊馬鬣嶺由中路

奪險而進賊潰擒僞先鋒鄧文華等時賊勢窮蹙參贊德楞泰等  
議撤各省兵歸伍驥請畱軍中靖餘匪尋調補湖北宜昌營都司  
十年升安徽池州營遊擊時潁川增兵議以池州遊擊駐潁改驥  
潁州營遊擊十四年二月舉軍政卓異三月擢山西汾州營參將  
十八年河南逆匪李文成聚眾陷滑縣尋竄輝縣山西巡撫銜齡  
以澤潞界連豫境檄驥率大同兵出山設卡防堵道光元年升廣  
東南雄協副將未抵任擢貴州安義鎮總兵五年丁母憂六年逆  
回張格爾叛驥在籍呈請從征 旨不准行七年服闋十一月補  
廣東高州鎮總兵九年兩廣總督李鴻賓以驥年力就衰奏請休  
致得 旨以曾經出師受傷賞食半俸二十五年卒

右 國史館本傳

## 趙光璧

趙光璧安徽阜陽人由武舉人揀選二等以營千總用嘉慶十五年捐升都司十六年授直隸宣化鎮懷來路都司道光二年升廣西提標後營遊擊六年擢撫標中軍參將十二年六月廣西徭匪盤均華在賀縣地方糾眾二千餘人豎旗執械由龍井村擾及道石墟一帶光璧以署提督文哲璋檄借署慶遠協副將馬廷凱等前往剿辦先後馳抵芳林渡賊已渡河踞岸抗拒光璧分隊督戰官兵鼓勇爭先蟻附土阜施放連環槍殪匪百餘賊仍恃眾不退夜半以大礮疊次轟擊殲二百餘人翌日渡河奮攻賊勢不支乘勝追擊多有斬馘俘三百餘人各路餘匪搜剿殆盡首逆盤均華



並爲追兵所殪十一月兩廣總督盧坤等上其功 賞加副將銜  
卽行升用並 賞戴花翎十五年遷廣東惠州協副將十八年三月  
調督標中軍副將九月東莞懷德縣民構釁械鬪互相讐殺光璧  
以總督鄧廷楨檄會同營縣擒獲兇犯鄧亞善等六十餘名經鄧  
廷楨疏 聞 賞加總兵銜時鴉片煙土例禁綦嚴廣東設立總  
巡口稽查商販十九年二月光璧督帶兵役出洋巡緝截獲煙土  
多包並將私駕船隻代商販運之巡役李新等拏獲懲辦四月署  
高州鎮總兵十二月調署南韶鎮總兵二十年授山東兗州鎮總  
兵二十三年以親老懇請回籍侍養 允之二十六年卒

右 國史館本傳

國朝耆獻類徵初編卷三百二十四目錄

將帥六十四

楊芳

羅思舉

補錄

楊芳



國朝耆獻類徵初編卷三百二十四

通奉大夫前署江西巡撫江西布政使司布政使湘陰李桓輯

將帥六十四

楊芳

楊芳貴州松桃應人由行伍歷拔鎮遠鎮標千總嘉慶二年黔楚苗疆平以功升台拱營守備時川陝楚三省教匪不靖分股滋擾三年隨副都統銜額勒登保敗藍號股匪張漢潮於南漳在事有功賞戴花翎隨入四川值巴州白號賊羅其清敗匿於濛子灘洞我兵直搗其巢擒其清四年擢平遠協都司旋擢下江營遊擊是年額勒登保爲經略大臣五年正月移師入甘三月升兩廣督



標後營參將四月白號賊楊開甲張添倫等東趨雒南芳隨提督楊遇春出龍駒寨扼之中途截擊斬級六百張添倫等懼而遁芳追之賊還戰芳躍馬射其前隊賊大潰不敢復東捷入 賞誠勇巴圖魯名號六月黃號賊伍懷志等犯甘肅成縣提督穆克登布督芳等擊之七月芳遷廣西新泰協副將八月連敗賊於成縣階州賊渡白水河窺四川龍安旁入老林芳冒雨追賊及之於磨刀石灣手刃十餘賊矛傷足墜馬仍徒步殺賊復傷臂官軍乘之大敗賊眾射傷伍懷志 上聞而嘉之 詔問受傷狀並下部優敘六年四月官軍擊襄陽藍號僞帥冉學勝失利賊趨甘肅額勒登保檄芳合進賊掠秦安清水擾隴川芳與護軍統領扎克塔爾以

騎兵追擊賊東走靈臺不果還走華亭我兵馳至固原南向待之賊反奔芳輕騎摧其後隊賊渡渭而南官兵西防棧道東截江口賊布營於漢江南岸芳渡江轉戰斬級三百賊由平利突湖北不得入走洵陽洵陽高唐嶺張添倫在焉六月芳與副都統銜格布舍等破高唐嶺餘賊與冉學勝合東出楊柏坡芳等先至設伏以待殺賊七百餘時四川賊藍號李彬白號苟文明襄城賊白號高見奇姚馨佐等先後竄至平利既而李彬走歸南江張添倫隨之高見奇姚馨佐由川入甯羌額勒登保援甯羌屬芳等以南江之賊十月張添倫僞帥張良祖馬德清劉奇以千人東竄芳等遇於通江大破之俘三僞帥適高姚二賊亦折回南江芳與接戰於桂

門關賊勢窮蹙殺馬塞道以走追及於黑洞溝擒賊目辛斗得  
旨嘉獎旋擢陝西甯陝鎮總兵十一月李彬東向太平芳出其前  
彬敗潛回通江分隊走巴州芳南追賊棄老弱而逸獲彬妻冉添  
璜者通江賊首冉添泗弟以眾附李彬既敗相失率矛手百人夜  
就彬於通江芳知之待於鎮龍關獲添璜矛手百人皆就擒 上  
嘉其能下部議敘七年巴州白號賊苟文明渡漢江偏甯陝賊目  
劉永受宋應伏分布秦嶺北芳由五郎口西向進兵殲宋應伏之  
眾過半劉永受遁芳追之賊東出孝義廳芳遣將遮其前而自截  
其後賊被勦狂奔永受僅以身免旋爲寨民所殺七月苟文明授  
首額勒登保入楚檄芳搜勦陝西餘賊先後俘擒夥匪郭士嘉苟



文學等賊黨潰散八年三月總督惠齡檄芳還搜南山芳由洵陽  
壩深入冒霧雨捫崖攀葛獮薙無遺惠齡奏入 命軍機處記名  
俟蒞功加提督銜五月又分兵爲五大搜嶺南北七月經略參贊  
騰章告肅清是月芳復殺賊於月亮坪陝西賊垂盡忽有李彪者  
自太白山突出糾合餘賊苟文潤復擾洋縣芳以專剿山內餘匪  
未淨 命將存記升銜註銷芳尋進兵剿賊於鼇山賊南竄城固  
芳繞出其前賊乘夜入黃柏園我兵窮追之九月賊出景峪復由  
勞谷踰嶺而南芳率眾邀截弗及 上以芳任賊出入自如嚴旨  
切責褫花翎額勒登保復劾其玩寇 命摘去頂帶十月賊至洵  
陽芳迎勦於高橋溝賊竄漢南芳帥諸將馳追千五六百里莫能



及上並責諸將剋期破賊時賊已徧川境會成都將軍德楞泰至陝白請追賊令芳歸防山內許之苟文明之死其黨苟朝九等逃於湖北九年三月復自竹谿入陝芳嚴兵爲備賊將易服來關擒之遂於沿江設守密布竹籤茨捆於淺處以防潛渡積數月破賊賊走開縣終不得越漢江上加恩復其翎頂九月三省悉平罷兵軍興以來各路以鄉勇隨征多立功而習成獷悍賊勢旣凋奏請資遣之願入伍者聽而無業者轉爲盜李彪等所由復起也其入伍者留陝鎮標兵皆鄉勇充之是爲新兵芳以主帥馭之寬十一年正月芳署同原提督副將楊之震代芳時新兵因月加照米銀不以時給鼓譟之震督治之於是營卒陳達順陳先倫煽

眾作亂戕之震其黨蒲大芳先送楊芳家屬出城而復從賊芳聞  
變馳赴石泉 上以德楞泰爲欽差大臣督楊遇春等討賊芳坐  
所管兵丁叛逆革去翎頂八月賊大掠洋縣畱壩脅眾萬計九月  
賊推蒲大芳爲魁攻孝義廳窺子午谷 詔趣諸將進師楊遇春  
等由洋縣進發賊西圍鄠縣急芳馳救鏖戰終夜矛貫其臂旦日  
賊辨爲芳軍自引去鄠縣獲全 賞還頂帶楊遇春督諸軍擊賊  
於方紫關官兵與賊多舊相識隔河而語戰甫合西安河州固原  
兵皆潰扎克塔爾被圍數重賊勢張甚將分突秦隴楚蜀踵邪匪  
故智芳單騎至賊壘宣 朝廷威德說以利害萬眾錯愕芳故得  
蒲大芳心大芳感悔縛陳達順陳先倫乞降芳遂率大芳擊諸賊

之不降者斬朱先貴千人於江口 賞還花翎十二月以方紫關  
之敗固原河州兵皆芳所轄 詔治馭兵姑息罪褫職遣戍德楞  
泰奏以芳接仗勇往顛懇 聖恩准予釋回畱於邊界營分效力  
行閒疏 聞 諭曰楊芳由字識出身不十年擢至總兵勞績出  
眾卽朕亦素稔其名德楞泰此奏自係爲愛惜人才起見俟過一  
二年後再行酌量加恩可也十二年五月 上加恩釋回交固原  
提督辭大烈差遣以守備千總酌量補用十月呈請回籍省親  
諭曰該員呈稱母老懇賞假省親楊芳見以守備千總補用之員  
毋庸迴避本省著加恩准其回至貴州交該督撫以守備千總酌  
量補用十三年補松桃協千總十五年三月 特賜三品頂帶補



廣東右翼鎮總兵入 覲 賞還花翎十月調陝西西安鎮總兵  
十六年丁母憂十八年十月服闋入都道出河南值天理教匪李  
文成據滑縣倡亂芳請效力經欽差大臣那彥成奏畱補河南河  
北鎮總兵隨那彥成楊遇春等敗賊道口 賞還二品頂帶十一  
月進圍滑縣賊目劉國明挾李文成以出將西走太行芳與副都  
統特依順保以精騎邀擊之賊遁輝縣據司寨芳等伏騎白土岡  
麻師嘗賊賊空壁來犯伏兵突起斬二千五百級得 旨嘉賚是  
戰也賊遇伏走山上殊死圍官兵畏賊鋒有退者芳拔佩力立斫  
數人眾效死遂大捷乘勝壓賊壘益以火攻劉國明挾李文成上  
礮樓舉火自焚翌日致文成之屍於滑縣傳首山東河南軍威大



振 上慰悅加芳提督銜先換一品頂帶 賞雲騎尉世職時滑  
縣猶未下而陝西三才峽賊又起官兵急攻滑縣爲地道以入賊  
覺而先備之芳至佯掘新道而仍穴其西南深入城際實火藥賊  
不之覺十二月十日地雷發城陷滑縣平殄賊二萬餘捷 聞下  
部優敘復授西安鎮總兵十九年正月帥師入陝敗賊於沙壩賊  
目吳抓抓吳奇譚貴分竄黑河芳趨沔縣截之復走黃官嶺先以  
奇兵伏其前疾追夾擊梟吳抓抓吳奇於陣譚貴與僞帥張占鼇  
仍由沔縣還黑河追及於徐家溝占鼇執旗略陣芳揮兵立斬之  
賊大潰俘馘殆盡譚逸至黑河就擒奏入 賞還誠勇巴圖魯名  
號下部優敘閏二月賊平調漢中鎮總兵二十年擢甘肅提督道

光元年調直隸提督二年調湖南五年調固原時西陲逆回張格爾不靖張格爾者逆回博羅尼都孫薩木克子長於浩罕嘉慶年間漸引眾寇邊是年秋官兵出塞捕之失利六年六月遂連布魯特比阿坦台等及安集延之眾入犯喀什噶爾白帽回阿布都拉博巴克等附之連陷西四城 命大學士長齡爲揚威將軍署陝甘總督楊遇春山東巡撫武隆阿參贊集兵進討芳請行 許之十月諸軍會於阿克蘇阿城西去三百里曰柯爾坪當往來要道賊目伊瞞以三千眾據守長齡使芳先取以進兵一鼓破之焚其南北莊安集延賊帥約勒達什來援芳斬約勒達什及伊瞞旣克柯爾坪師行無阻 上賞其功下部優敘七年二月芳與武隆阿

進剿三戰皆捷直抵喀什噶爾渾河北賊背城阻河列陣二十里  
夜大風乃以疑兵循河而下大軍乘霧晦潛渡上游奮擊賊大潰  
長驅入城張逆以數騎遁獲其兄子及阿布都拉遂復英吉沙爾  
葉爾羌賊目玉努斯噶爾勒仍據和闐三月芳與戰於昆拉滿擒  
噶爾勒收復和闐玉努斯敗走 上指授方略謂宜以奇兵出烏  
什草地斷賊去路長齡等言兵少不可分及是渠魁果逃 上以  
責諸將和闐故霍集占巢穴是役賊守之固芳以偏師覆之昆拉  
滿之戰分軍繞賊後遂縛噶爾勒 上特褒芳調度有方下部優  
敘並 嘉賚焉六月議撤官兵之半 詔楊遇春入關以芳代之  
時張逆竄塞外芳與楊遇春方出卡掩捕賊由木吉走拉克沙復



奔達爾瓦斯楊遇春軍色勒庫爾芳軍阿賴皆邊浩罕騰檄諸部  
令獻賊七月 上賞復四城功加騎都尉世職 命在乾清門行  
走芳在阿賴以書抵長齡言賊遁愈遠軍懸絕徼道險餉艱諸夷  
貪賞妄報詞不足信九月有 詔班師而芳已於七月遇博巴克  
之眾追之入險布魯特大至眾寡不敵協領都凌阿戰歿芳斂軍  
依險步步爲營一日數戰卒拔全軍以出仍以失亡將士吏議當  
革職 上寬之芳偕長齡等善後請清叛產籌興屯田增防兵減  
商稅革陋規改築喀城裁守卡侍衛後又偕欽差大臣那彥成定  
伯克補缺章程均如議行十二月懸賞購綫密探賊蹤聲言大兵  
盡撤以覘賊眾虛實時張格爾傳食諸部久益窮蹙亦意歲除官



兵必不備也乃率布魯特五百騎以二十有七日再由開齊山路襲喀什噶爾長齡等整眾以待賊中途覺有變復奔出卡芳統師疾追一晝夜及於喀爾鐵蓋山殲其從騎殆盡餘賊擁張逆登山棄騎而走芳督所部將卒等擒之飛章告捷上宣示中外論功行賞有差封芳三等果勇侯賞用紫韁雙眼花翎御前侍衛上行走並賜其子承注爲舉人八年上御午門受俘大武告成加太子太保銜命圖功臣四十人於紫光閣芳列長齡之次楊遇春之前御製贊曰黔省之英自幼知兵戰功久著謀而後行柯坪和闐獨顯威名竭力追擒助大功成九年凱旋入覲得旨本日楊芳來京召對見其精神強健寶深嘉悅楊芳宣力邊疆

生擒巨寇茲當凱旋入覲允宜再沛恩施著加恩晉封二等果勇  
侯晉加太子太傅銜在紫禁城內騎馬並賞給人蔭四兩緙絲蟒  
袍一件大卷八絲緞袍褂料各一匹大卷江綢袍褂料各一匹大  
荷包一對小荷包四箇用示朕懋賞酬庸至意尋 賜食同樂園  
芳及長齡哈朗阿阿勒罕保俱與焉復以芳六十生辰 御書酬  
庸錫羨額並福壽字各一方 賜之十年十月以安集延流寓逆  
回博巴克等糾眾入卡倡亂復擾喀什噶爾葉爾羌等地 命芳  
爲參贊大臣協同揚威將軍長齡往勦芳奏西陲用兵難於轉餉  
宜平日豫籌之請於喀什噶爾添築子城移建阿克蘇城因山據  
險別築城於巴爾楚克以連東西聲勢輕茶稅以廣招徠藉稅入

以補軍食防兵分授地畝春耕秋斂十年生聚可省轉輸報聞  
十一月喀什噶爾參贊大臣扎隆阿以回子郡王伊薩克通賊入  
告命逮問於阿克蘇以長齡往鞠之芳與哈朗阿合疏請緩其  
獄上斥芳等偏袒扎隆阿十一年六月詔芳回固原及扎隆  
阿以誣伊薩克得罪芳亦坐草率入奏鐫級十三年二月四川清  
溪土千戶越嵩山內外戕邊河南北各夷蠢起滋事三月提督桂  
涵卒於軍以芳代涵諭以迅速妥辦毋許遷延芳至清溪及越  
嵩山外夷已平移師戕邊奏言越嵩等廳縣環涼山數千里山外  
漢夷雜處漢民佃種夷地或不與夷租或地成膏腴夷人奪地人  
知山內野夷爲患不知事起山外熟夷也宜立法以杜弊端上

是之卽任芳與按察使花杰等善後安邊河北夷叛據山峒地形  
奇險芳遣兵攻其旁嗣自按中道搗賊穴擒斬夷酋鹿齋根本雞  
子桑樹格毛喀喀只格河北夷多乞降廓清二十四地引兵渡銅  
河而南 上嘉其妥協六月奏師次河南十二姓熟夷皆降惟石  
圈子等野夷藏匿首惡俟開道催餉以進師七月奏石圈子夷目  
開風知懼縛獻首逆呈繳器械夷境廓清振旅渡河 上優賚之  
仍令道出越嶲順勒山內猓夷九月奏夷酋悔罪自投縛送起事  
首逆哂基則各支夷成就撫甯兵千五百鎮之而還 詔晉芳一  
等果勇侯從優議敘十四年七月裁邊夷雅扎等支復出肆掠有  
旨詰責芳尋擊殺夷首哈兒擒夷目雙甲等復奏十二支夷皆孽



伏願各鈐束娃子以功下部議敘九月雅扎夷又擄民人要贖雙  
甲等將軍瑚松額効芳辦理不善交部嚴議部議褫職奏入 諭  
曰此案總未妥善毫無把握鋪張妄奏本應照部議革職姑念前  
在回疆著有勞績著降爲二等侯革退御前侍衛以總兵往甘肅  
候補十五年以疾乞歸 許之十六年湖南鎮算兵變迫脅鎮道  
借銀累萬起芳爲鎮算總兵與總督訥爾經額等定善後章程一  
緩扣道標練勇借款一兵勇不准以客民充補一豫借銀穀限一  
定制一辰沅道缺以本省知府升補一拔補備弁屯長嚴絕苞苴  
皆如所請十八年遷廣西提督旋調湖南二十年英夷犯浙江定  
海復至天津投遞書詞 上命大學士琦善赴廣東查辦逆夷要

求無厭且攻奪礮臺二十一年正月 上以英夷逆天背理 詔  
數其罪授御前大臣奕山爲靖逆將軍戶部尙書隆文及芳參贊  
大臣發兵討之 諭曰計楊芳到粵當在奕山隆文之前如有可  
乘之機卽迅速進剿已而琦善奏夷人獻出礮臺並遣人赴浙繳  
還定海乞准其通商 上以夷人大逆不道不許惟 命芳等兼  
程而進二月逆夷乘大兵未集悉眾入犯虎門烏涌等地時提督  
關天培等力戰死之賊連檣進逼省城芳至奏言省城完厚可保  
無虞 諭曰見在逆船駛進內河卽屬深入重地若能斷其歸路  
前後夾攻可期聚而殲旃兵貴神速楊芳自知若稍存觀望豈不  
大負委任又 諭曰楊芳久歷戎行受恩深重應守則守可戰則

戰一切勦辦機宜朕亦不爲遙制也尋疏陳購置竹木排桐油棉花等物以備攻勦逆夷聞之不敢近偪 上以曉暢軍務先聲奪人先交部議敘仍 諭曰計日奕山隆文等抵粵大兵雲集必可分兵進勦卽令奕山等抵粵稍遲所謂官兵陸續趕到諒楊芳必能出其不意突用奇兵爭先制勝朕日夜盼望捷音以紓廬念三月總兵長春擊沈賊船二 上以調度有方下部優敘尋奏米利堅各夷商因牽累不能貿易並英吉利夷商情亦急迫乞均准其通商 諭曰英夷商船雖未助逆總係逆夷之人斷不准其通商著仍遵前旨奮力合勦朕拭目以俟捷音之至也又偕巡撫怡良疏請准令逆夷所屬之港脚商船在粵貿易 上以其有意阻撓



怠慢軍心交部嚴議並諭曰逆夷非大加懲創何以揚國威而  
除後患見在徵兵一萬六千有餘楊芳何以不痛加勦洗乃汲汲  
以通商爲詞是復蹈琦善故轍殊不可解尋議革職得旨竟予  
罷斥轉復置身事外著改爲革職畱任閏三月奕山等師至合奏  
賊攻東西礮臺我兵擊沈賊船一焚燬一均下部優敘疊旨勉  
以出奇制勝迅奏膚功四月夷船退出虎門收復各礮臺奕山等  
奏請撤兵芳於是月以病乞休命安心調理六月諭曰楊芳  
久歷戎行懋著勞績見在病尙未愈若仍畱廣東轉恐不能靜養  
著卽回湖南提督之任務當仰體朕心加意調攝報國宣猷日正  
長也八月回湖南任二十三年以老病陳請開缺上念其勞績



令在籍支食全俸以養餘年二十六年卒芳自征三省邪匪卽荷  
恩賚所得玉鞞荷囊不可勝紀卒之日遺疏入 賞銀五百兩經  
理喪事 諭曰楊芳服官四十餘年戰功卓著茲聞溘逝軫惜殊  
深著加恩照提督例賜卹伊長孫楊恩科次孫恩桓恩桐恩檀均  
著於及歲時送部引見尋 賜祭葬如例 子諡勤勇于承注官  
至刑部主事先芳卒

右 國史館本傳

道光元年十二月誠村軍門延余課子暇則談軍中事輒隨錄之  
前後不復詮次昔歐陽公喜史遷能傳節烈奇士而怪今無如遷  
所紀者吾得軍門事記之幸甚不知後之視吾文抑何如也

滑縣之役高杞署河南巡撫那彥成爲總統公擊賊道口鞭巡撫  
吏人巡撫大怒盛氣與總統言楊某欺我公直入帳總統迎勞曰  
喜得道口矣公遜謝公知杞情故激之謂曰道口幸得然公頃誤  
甚杞曰吾何誤公曰賊勢方張公挺身前賊幾撲公而吏士不相  
救護尙不當鞭耶公死某等敢不死公輕死無益於國又累某等  
某方恨公公乃更怒耶杞笑而罷時總統有兵七千屯城東西南  
三面杞有兵六千不宵發會楊提督遇春因退縮摘參將某頂帶  
杞又怒欲以二千人往屯濬縣總統將許之公曰不可許也總統  
曰此公不曉事吾將俟其去而揭之公曰公揭杞杞亦將揭公此  
兩敗也賊將誰辦且公與某皆伊犁罪人 上幸赦而用之今又

樂往乎一身不足道如老母何總統曰杞欲去奈何公曰某能止之且收其兵但乞花翎紅頂各二乃可總統許諾公卽馳至高杞營先語其用事者二人曰汝二人禍福在吾其知之乎二人者愕然曰何也公曰高公欲去濬縣汝二人之過也構怨大臣罪當死吾能證汝吾今阻高公毋去以花翎紅頂相贈此二途者將何從二人者唯唯乃入見杞曰公欲往濬縣乎曰然人多欺蔑吾者吾故避之公曰有 上旨乎曰無有總統札乎曰無公曰賊在滑公乃去濬公今日往總統明日揭公矣杞曰然則奈何公曰何不以六千兵與某而公坐享其利杞曰汝欲奪吾兵權耶公曰公擁兵不發總統奏請公圍北門公能不往耶北門賊之衝也一朝失利

公受其禍不如以兵與某有事責不及公而有功固不能不歸之公也又何疑乎杞悅公遂領其眾

李文成之竄司寨也圍未合時潛至桃園官兵不知復往山東糾其眾至是北出乃覺之或謂賊止二百餘人總統命公以三百人追勦公一日夜馳二百數十里過輝縣西三十餘里遇賊四千餘公兵少且疲引避之令眾北走自率二十人南趨林麓中賊乘之公力戰且走賊悉眾圍之公率二十人衝圍出無一傷者久之卒稍稍集僅七十二人有桑都統者謂公已死大哭見公至乃喜曰顧今將安往公曰離縣十五里南營有村落可舍也已至桑公請往輝縣公曰輝縣城小兵單吾來時不敢開門一相延接今兵敗



而往其官納耶吾以七十二人居城外賊大夥來身死城破矣不  
如舍此賊必疑不敢來公必欲往卽將眾去吾誓死此耳桑公乃  
不復言然懼甚公曰村後河流寬廣村前岸高作偃月形必上流  
有閘可放水也探之果然乃決閘放水環村如濠眾心乃安公請  
益新調甘肅步兵一千關東馬兵九百而自往湯陰迎之凡五日  
兵乃集公鬢爲之白而李文成適以足創劇據侯兆川司寨堡公  
未至司寨二十里時方早餐命下營駐此眾請撲賊寨公不應日  
暮又請公又不應夜五鼓眾復請曰此來爲擊賊也今賊近咫尺  
而一日夜不進律以逗遛罪公能任之吾輩不能也吾輩亦領兵  
者將獨出矣公乃命四騎往曰速召賊來吾擊之四騎相顧默然

公曰往視賊當齊隊汝則罵之彼來當令二騎還報四騎旣往密令步兵伏於隘馬隊伏於右側賊果以一千人來方度隘步兵猝起賊驚返走馬隊繞而蹙之斬獲殆盡方賊之來也別有賊千餘緣山徑出期上下夾擊公預令十人登山伏約賊至則鼓比至十人者鳴鼓大呼自上馳下賊潰竄走山谷公以八騎追之過一山梁奄遇賊數百人踵至公令騎下馬坐梁上賊近發大石下擊賊退自相壓擾亂乃上馬衝之大眾亦至又大獲是日也賊二千餘人僅有逸者日晡遂進圍司寨堡堡堅厚賊守禦嚴公慮吏士不得息又恐賊乘閒衝逸乃度堡後隱處安營帳俟暮夜令軍士更番賊不之知明早力攻不下令卒負板潛至堡下穴其牆半日而

牆壞積土如坦坡遂登其堡而以槍礮下擊賊自焚死生擒二百餘人於積尸中驗之得李文成尸送總統大營殺賊破寨凡兩日實嘉慶十八年十一月十九二十日也

嘉慶六年十一月公率鄉勇三千勦南山賊過華陽營值大雪軍士嗟怨猝然起反戈相向左右大驚公仰天笑不止軍士怪之勢稍定矛戟上指公徐召頭人謂之曰若輩何乃相戲頭人曰士寒甚鍋帳未具故欲還耳公曰軍士昨有言此乎曰未也今始行時言此乎曰未也公曰汝早以告卽不發矣吾豈不恤士卒者顧已途制軍在後烏可以返前去六十里止宿任畱數日耳眾遂行至二郎壩宿令查造意者遷延不報公已調知之明旦從容步行



至村口坐召一旗人畢至問之曰有作日造意者乎眾曰無公曰無卽去黃柏園宿已備犒人各肉一斤矣一旗畢行又召一旗問之如前至第八旗令某某二人者畱餘眾悉前行乃斬二人以首徇眾士帖然

嘉慶十八年十月二十六日公至滑縣大營二十七日奪道口十一月初三日得高公杞兵遂圍北門時桃園賊距城北三十里內外合勢公接戰數日旋掘濠植柵以困之初九日總統命追賊首李文成二十日破司寨二十五日回大營先是何副將格都統於城之西北及東面潛穿地道將至城公視之不合法請更穿之總統曰君破司寨勤苦至矣宜可少休公曰滑城堅昔人以八萬眾



攻圍四十日不下今兵才萬五千耳攻城無善策地道不如法賊將覺之徒費工力今更作之賊必不虞假令知之更爲疑道則功可成豈以勞乏辭乎固請乃許二十八日於城西南隅掘之尺許卽見水不可穿乃以布囊土成夾道上覆以板漸逼城距三丈許賊以大木支巨石擊之不能前遂於三丈內穿之比至城而前西北及東兩道爲賊所覺無所用至是賊又覺之以碑石下擊道復壞公命於南更作故令賊知備而密於北斜穿之每進以厚板支四面如屋度已達城下復轉屈橫穿二尺如門更進爲大坑實火藥其中以土囊塞門藥發而城遂崩十二月初十日也是役也何格二公爲地道四十日不成公以十二日成焉又揚言於賊吾以

地道進期初十日破城賊果於內掘濠以備之而不虞其用地雷之法也公招降者三賊不應宋某者賊首宋元成之子司寨所獲者也使招其父及牛亮臣二賊欲降而徐安國倔强不從遂已至是城破公令軍士登其城毋下擊悉令婦女童孺出城禁吏士剽掠而自坐城缺處視之三日乃盡有紳士四人自言非賊予四旗令招被脅者二百餘人悉縱之公又言地道直穿有定而斜穿難準以羅盤定之針旋轉不已或教以卷席如筒接之達口外針始定蓋氣得泄故也然數尺之口不能泄氣而數寸之筒反能泄氣斯理之不可解者

嘉慶十一年七月六日甯陝新兵變公時署固原提督獨龍夫人

在知將有變使謂署總兵參將楊之震曰米折兩月不發洵洵將  
反速借給以安其心慮有他者吾家當代償也之震曰眾兵恐我  
耳烏敢反且覺非由我何懼不聽更以威脅之眾益怒先是頭人  
陳先能陳大順等請見曰吾輩將反顧受大人恩至重願送太太  
去乃發夫人以義曉之且曰汝等造反而先免我疑知情無以白  
且我一婦人去何爲甯死此耳揮眾出外委王清山公之親隨也  
賊令入衛又分數十人守大門約餘人不得入而公前所釋教匪  
二百人爲之室家者知有變悉入守中門曰願以死報是夜賊遂  
殺參將及中軍遊擊城守營都司焚南北二城檣礮號哭之聲不  
絕婦女多從睡夢起知賊不犯鎮署多就避廊室爲之滿比曉陳



先能等又請見召之入叩頭請太太行曰吾等已反勢不能止將出糾徒眾恐後來者驚太太夫人曰旣爾可命轎來夫人憐眾婦女不忍棄令前行轎在後百姓擁之者數百人賊傳呼擺隊賊在五郎城者悉來夫人叱之始退賊凡送二十里至石泉縣縣令陳君聞警惶懼民人驚竄者眾知夫人來賊不敢偪請夫人畱而總兵王兆夢至夫人謂兆夢曰甯陝兵二千餘非盡反首事者百餘人耳速馳諭令縛頭人來事可定兆夢怯不敢往夫人畱六日乃之興安兄太守龍君署云夫人之行也署中物不暇顧後四日石泉民請往取之門洞開闕無人而一七一箬無失者十一月新兵旣就撫蒲大芳等二十人不自安白公願往接夫人公知其意欲



推誠待之卽遣往夫人方乳公子未滿百日卽抱公子乘轎行中途蒲大芳與其徒王鳳爭刀傷鳳手是日宿漢陰夫人命借廳官刑具坐中庭召蒲大芳罵曰汝反叛幸宥不死更弄刀杖又待反耶杖之百加桎梏焉從者惶懼終夕未至甯陝二十里十九人偕蒲大芳固請乃釋之葉都司自發語余曰時有廚役朱子勇者爲賊所怨夫人匿之複壁中夫人已去子勇入上房攜銅盆出遇賊將殺之子勇曰太太命取盥具汝殺我汝自齋往耳摔銅盆於地賊信之得免

余前聞龍夫人事頗參錯今乃得實夫人時年二十四使楊之震聽夫人言則亂可弭也而王兆夢又怯懦不敢前致賊橫決豈亦

有數存耶又夫人謂公曰事雖定然當有遠行公曰何至是且己革翎頂而復又何慮夫人曰朝廷事自有法度兵叛大案不容無任其咎者非君而誰已而公果譴戍伊犁後公自四川返貴州或勸帶鹽可獲利三千金已積之舟畔矣夫人曰以氣機觀之未必能享多金盍卜之公卜不吉遂辭焉行六十里過黃瓜槽險灘舟幾覆載重者皆溺嗚呼豈獨膽異人哉其才識固不可及也

南山縣互千餘里有名之峪七十二老林密菁窮巖峻谷深澗巨壑鳥道猿徑在在而是無藉流民結棚墾植其中由來舊矣川楚匪徒恃以爲藪凡經勦敗竄迹伏匿莫可究詰明中堂永總統及他鎮將以此得罪者不可勝數論者比之胡桃瓢云嘉慶四年經

略額侯奏設甯陝鎮勦入山之賊俾各帥專力於外分十營兵六千名卽以安插鄉勇爲善計規模未立而任甯陝者屢以事去六年公之鎮築城堡建室屋編營伍分汛地設官弁募士卒與勦賊並行期年草創粗定而兵糧無本色月給銀三錢謂之米折倣鄰鎮陝安例公以陝安有本色六之五祇兩月折色今南山爲賊所蹂躪食物昂貴無以爲活咨撫軍量給本色撫軍以無糧可撥乃月給四錢後年餘部駁不準並追扣所加額侯復奏四錢仍不敷乞給五錢部議姑準三年後物價平督撫再議十一年六月三年滿應另議而藩司五月始詳未奏六月遂不發米折兵丁以爲未定者所加耳原定三錢何乃扣眾始譁矣而撫軍有包穀之給先



是山北饑南山包穀大熟矣奏請採買備振五郎同知張某者領銀五萬兩春賦於民秋收之石價銀五錢凡買十萬石至收時價貴至一兩民間斛又大倍於官以故不肯交且日前領價吏強與之同知怒吏因緣爲暴眾鬪然起二千餘人圍五郎城勢將變公令中軍馳往召眾諭之更與石五錢事乃已至是撫軍以五郎餘穀接濟照石一兩扣價是時包穀賤且陳不可食兵心益不服七月六日變乃作撫軍聞變適楊提督遇春入 覲過西安偕赴甯陝率省兵一千五百名比至賊已入山於是收甯陝兵未叛者六百入西駐城固公在固原十一日得撫軍咨冒雨行以三卒自隨中途咨撫軍書略云速發米折以安未叛之心嚴堵隘口以杜遠



屬之路如能以身息事某之志也至邠州知賊西竄已破城汎數處有出盩鄠各峪之勢改道麟遊趨山徑兩甚數阻水陷泥淖中八月一日夜半抵城固而是日賊破洋縣殺令會彰泗官兵阻細水河不能救公既至撫軍出密紙呂大文等三人姓名卽遇春所收未叛者曰獲叛兵云三人欲相繼爲亂公曰叛兵欲除此三人耳此三人必不反撫軍未信明日公以甯陝兵六百屯漢王臺召呂大文三人侍左右三人知見疑故咸感泣公偵賊在龍亭欲往賊中曉以利害不許公陰遣人告賊目蒲大芳授之計賊趨右水河犯石泉公請以師援撫軍終慮新兵反側不可恃令陝安鎮王兆夢赴之後一日公又請往撫軍猶以爲言公曰甯陝兵六十叛

者數百人耳若盡疑新兵是教之叛也以甯陝兵勦甯陝賊有咎  
吾自任之乃許至石泉登城一騎迅至城下曰欲有言公識其爲  
賊目董學孔也繼之上問賊中事曰賊大眾且至公遣左右悉去  
令學孔執長刀侍頃之賊大眾至遙見公各頭人棄軍械大哭前  
跪而賊首陳先能陳大順遙立不敢近公曰汝等尙識我耶自作  
孽乃敢造反念與汝共甘苦久不忍見汝等駢戮早自爲計縛首  
逆來悉活汝否者董學孔安知非汝刺客可卽殺我伸頸以就學  
孔學孔涕泣不能視公曰旣不殺我卽自爲計來者吾待之如學  
孔決不疑目視蒲大芳王奉等示之意適別賊攻黃州會館將陷  
公呼王奉吳占先起速去解圍二人往得免賊大眾退西竄迎風

壩初公傳檄賊中令斬首逆先能大順懼不欲降蒲大芳畏其徒眾不敢發思奪其權先能自石泉而西大芳以所掠羸馬載帶創賊數十人而已徒步與返五郎眾竊議曰陳先能爲帥不恤吾等蒲大芳愛我宜爲帥三請乃許由此蒲大芳始與先能貳矣公慮賊分難制陰令合先能而漸併其眾是時德楞泰侯爲總統辦賊至漢中檄公安輯甯陝毋出勦公之鎮撫難民修城堡招餘兵得二千居鎮城七日而德侯檄公出勦初賊之起不過百數十人轉輾裹掠糾眾及遠近匪徒附從者遂至數萬知公在鎮城乃掠而東破木土坪犯孝義將出商雒公遣兵援孝義賊以爲公東來又折而西出大峪口祥都統禦之爲所敗賊乃西公率甯陝兵千人



出子午谷大雨水牛鍋帳無算知賊已西追之暮至鄠縣賊攻圍急城將陷適省中送馬八十匹公以步兵營城東而以騎隊衝擊矛觸公臂洞焉賊不知公之至以爲西安兵來分眾撲營士卒皆力戰比曉賊始見公大驚狂奔鄠縣圍解九月七日也是日奉

旨摘去翎頂德侯劾公避難就易故也軍士大譁公切諭之裹創復進至斜峪關奉德侯檄止急追是時撫軍駐城固德侯屯鳳縣楊提督遇春營方柴關十九日公至方柴關而遇春以八千人敗士氣沮喪公旣至蒲大芳遣人乞降公進至平木各大帥皆以兵會鋒甫交公出陣前賊皆下馬環跪乞降而頭人數十俯塵號泣亦有起爲公執轡依依者而後賊矛手數千倔强有欲鬪之色公



日汝等懇誠欲降可退屯數里明日吾自來受降賊捲撤勢甚整  
而爲公執轡者十數人竟隨公不去宿帳下焉是夕也各營戒嚴  
公念賊驍健經戰陣眾益多破三城十九營汎生民荼毒已甚誅  
其渠魁宥其脅從則事可甯息必期盡勦勢將奔潰四出勞師糜  
餉不可以日月計川楚匪徒其已事也而各帥多狐疑不可與深  
言黎明公出營遇提督遇春問之公曰往見賊遇春曰賊不可信  
公曰移營前進試察之遇春曰我當偕往並轡行二里許賊數騎  
來迎公遙見之止遇春而前賊曰馬步全夥皆排隊俟矣公曰蒲  
大芳何不來曰在後集眾公令賊前導行遇春止之再三又遣騎  
扣馬力阻公曰爲我謝提臺死生命也勿我惜天佑蒼生我必不

死爲國息兵死得所矣遂馳往三里許過小溪賊馬隊二千餘  
跪西岸齊唱叩接大人公馬就溪飲眾曰大人勿懼不敢傷大人  
公笑曰馬飲耳何懼飲良久眾跪不起察其意誠無他變按轡行  
眾俟公過乃上馬自後擁之進二里許蒲大芳來曰集步戰手三  
千人陳先能奪去行矣公慮先能既奪眾去或將復來乘我腹背  
受敵乃勒馬定曰陳先能不降汝等前聽吾言於是身後二千騎  
悉轉而前公諭以朝廷恩威父母妻子皆當坐罪後言與汝等  
勤勞南山五年飢寒生死情同父子今不惜一身以活汝等眾皆  
俯泣願降公曰旣降卽縛陳先能來眾曰諾三四十騎馳去公曰  
各大帥念我我去明日復來乃馳還而遇春猶立馬俟見公大哭

日爲國效命吾意與君訣矣公亦泣至營蒲大芳縛陳先能獻  
各帥稱慶遣參將何某查取賊數而大順忽反側將殺參將  
逃歸言狀各帥色變公曰蒲大芳必能縛來無慮薄暮蒲大芳果  
又縛陳大順來獻二逆並獲而各帥咸恐事中變已聯銜稟德侯  
各爲功名計公力言無他不之信明日公再至賊中蒲大芳已除  
館俟矣公謂之曰汝擒獻首逆率眾投誠厥功炳如爲我約束眾  
士給令箭解佩劍予之願歸業者悉予資給散遣是日查願散遣  
者二百餘人送大營資給之縛傲慢者一人公遂宿賊中蒲大芳  
等侍戶外夜半喊聲起槍礮齊作公念吾在賊中官兵無劫營理  
必叛民與民匪互鬪假寐俟而蒲大芳數十人慮他賊爲變拔刀



以待約日來者卽斬頃之聲漸息大芳私語曰大人睡熟幸不聞  
明日公命大芳查前隊願歸業者而昨所遣二百餘人約予資給  
者糧臺暴之奪其資裝僅不死賊中聞之前隊悉走公率賊眾追  
之三日西江口斬民匪首逆五人賊大眾悉聚公召頭人與眾  
約示三條且曰不願降者不强當各資給以明我舍生相救之意  
吾散遣降者畢卽移兵剿之必盡殺明日集大眾公登臺受之叛  
兵悉降初公陰使蒲大芳合其眾毋令散至是眾益多大芳不能  
合將四出微公推誠招之勢潰決矣公入賊中五日各帥不知公  
所在遇春憂懼或以言激之益恚怒嘔血數升德侯知事平移營  
兩河口距公營十里給路票遣散者三千八百餘名仍歸伍者二



百二十四名飭公帶回甯陝而附近南山徒眾未領票散者不計數云十月初二日以鄆縣功 賞還二品頂帶十二日以截殺匪徒功 賞還花翎是役也古北口提督辭大烈在軍中德侯令面奏情事大烈攘爲己功又奏甘肅逆回案總督李侍堯拏問提督剛達發伊犁今甯陝兵變宜有處分於是公發伊犁後撫軍以新疆換防爲名派兵千人蒲大芳等二百餘人與其中至伊犁悉爲將軍松筠所誅

右記事張琦撰

嘉慶川陝軍中二楊齊名一謂楊果勇侯芳也籍貴州松桃廳亦自苗疆從軍隸額威勇侯麾下轉戰川陝嘉慶五年授甯陝鎮總

兵三十建節功在南山始以末弁充探騎深入敢死歸則賊情地  
勢手畫口陳洞中機要經略諸大戰皆其嚮導之力其尤著者四  
年黃土場之戰芳以守備探明蕭占國張長庚二賊巢穴請大隊  
直趨城隍廟而令總兵朱射斗扼雞猴寨邀擊經略慮賊先竄而  
朱鎮兵邀截不及也及抵城隍廟賊尙未出芳登山瞰賊大隊屯  
平川前行騎賊亦蕩漾上山漸近山巔卽率所領三十騎突出壓  
擊賊驚奔回遁及我騎追下賊遙見兵無後繼勒馬殺回我兵據  
險力拒良久大軍繼至並力衝擊賊赤身狂奔尸橫道路日中遙  
聞雞猴寨礮聲眾喜曰朱鎮兵邀及矣奮驅而前上下夾攻遂成  
大捷五年石筍河之役冷天祿餘黨眾逾萬經略令朱射斗繞路

遼其前大軍尾追其後而芳以九騎前探甫行十餘里遙聞右路  
礮聲馳益近聲益急至石筍河南岸則萬賊爭渡後偏陡阜前臨  
大河左右無路芳急遣二騎回催大軍而以七騎大呼馳下連矢  
殪其前賊餘皆驚潰赴河陷淺洲者三千餘水沒及胷不能進退  
其先渡北岸者千餘無由救應五舟離岸眾賊蟻附舟重每發一  
矢卽驚覆一舟五矢五舟齊覆俄楊遇春穆克登布軍追至則已  
無一賊矣闔軍歡呼曰七騎掃盪七千軍五箭射死五百人經略  
大喜欲奏請賞巴圖魯芳以旬日連出奇計立奇功且年少恐招  
眾忌力辭特保經略益器之尋由都司遷擢遊擊參將五年渭南  
之役楊開甲辛聰張天倫等賊合趨潼關經略遣芳以千騎往掘



東路馳至渭南繞出賊前賊聞風西折黎明躡追見馬跡中積水猶潢知賊去不遠急馳之復見蹶凹泥水猶動遂轉山灣卽見步賊數萬擁塞平川騎賊千餘殿後芳率騎大呼衝入賊隊矢隨聲發賊倉卒擾亂我勁騎乘勢蹂躪賊瓦解數路潰竄禽斬歸營遂奏 賞誠勇巴圖魯旋擢副將兩當縣張湖溝之役五鼓馳溝中十餘里潛越賊宿數處時天尙未明直抵伍懷志逆巢見空寨中長矛鱗立賊方秉炬尋食時後騎無一至者卽發矢殪其一賊眾驚豕突出峽自相蹂踐俄昧爽賊見單騎無繼數十矛回刺膝穿臂折墜馬拒格倏聞叱咤聲一騎飛至橫矛力救則五品軍功吳應學也後騎繼至賊退趨山復上馬督戰賊乘高下壓一驍賊直



犯馬前吳應學挺矛刺中賊腹應聲仰跌忽蹶起逸去後禽賊訊之知卽伍懷志也疊履護胷故刃未及膚總督覺羅長麟奏聞有旨嘉獎六年巴州太平之役時經略率兩翼長往剿辛聰而分步騎三千令芳勦冉天璜張天倫旋禽冉天璜於巴州進擊張天倫四千賊於太平之小祥壩賊設伏箐內芳遣騎往來林外誘之而自率步兵潛入林襲其後夾攻殺賊七百生擒賊目李可定楊老么等二百五十餘皆少壯善戰赦令隨軍楊李二人請曰此中有斷不可赦者五十餘人以叛爲榮以死爲樂畱之必累我輩芳疑其不相能令別爲一隊次日果奪械戕兵悉誅之時敗賊星夜狂奔百餘里冒渡紫陽之權河溺死其半僅存千餘楊老么追及亦

渡河衝入賊羣賊歡呼曰楊老么歸矣芳謂李可定曰汝輩反覆若是耶對曰是必有故俄見楊老么舍騎而步往來於賊中語移時遙呼曰皆降矣惟張天倫已前竄請卽率降眾追之會張逆已遠遁追之不及乃遣散新降千餘畱其精壯四百次日營空山壩而經略所追辛聰大隊已至南江之杏兒埡相距僅三十里芳集將士謂曰張逆未獲而辛聰大隊將及能連夜進擊立奇功乎李可定曰請以降眾百人前驅必有以報壯而許之黎明賊方在桂門關集隊啟行李可定百騎掩至展紅旗大呼曰鎖兒來矣亂石擲賊鎖兒者李可定小名賊中素憚其勇火光中不知官兵多寡中石驚奔追殺二百餘生擒數十經略聞之乃以張天倫殘賊命

總兵田朝貴接勦而命芳與參將張瑗合勦辛聰追至亮風埡前  
後夾攻斬禽二千餘辛聰率千餘賊竄龍池場老林其地總兵九  
十所營也見芳至蒸羊以待芳曰俟禽辛聰會飲追奔二十里辛  
聰已入密箐料官兵不能卽至方避雨樹下解履燎衣倉卒不知  
所措斬俘過半生禽辛聰回營蒸羊甫熟皆用降賊鄉導之力時  
新設南山甯陝鎮總兵以芳補授南山袤延千餘里萬壑千巖老  
林無際兵入其中魚貫而行數十賊作千萬賊勦千萬兵作數十  
兵用各大帥如明亮永保那彥成追賊入山無不智勇俱困五年  
奏改五郎通判爲同知設甯陝鎮總兵守之鎮城去廳城十里以  
鄉勇六千爲新兵專搜老林逸匪前任總兵劉之仁韓自昌相繼

死是冬以芳任之時七年正月也山中僅甯夏兵七百及五郎城守兵百餘兵少勇多動爲挾制又有通判雒昂鄉勇千餘所至虜掠不屬總兵節制芳先收復生員伍敏鄉勇二千四百餘得其死力四月棧滅劉允受於孝義廳適經略大兵追苟文明劇賊至老林四境無跡搜捕彌月 詔書切責芳偵得賊蹤以兵六百馳剿之賊設伏箐內山高徑雜草木皆兵芳令每百兵爲一隊相距數武每隊旗首挺長矛先入扛二礮護左右銃矢刀矛繼之前隊敗竄後隊繼進魚貫迭攻人自爲戰賊始潰遁經略復遣總兵李應貴副將吳廷剛以兵三千來會追至黃官峪口賊屯峪內數里徑窄賊死鬪負嵎莫敢撓帳下某弁請護印繞他道芳曰汝恐我陣



亡耶下馬懷印挺矛先進合軍一呼入峽鏖戰至花石崖遂殲苟  
文明而賊弟苟文潤復糾餘賊一二千竄張果老洞經略奏委芳  
專勦而受成於總督惠齡芳遣楊老么李可定探之皆遇伏死乃  
徒步躡追窮其所向三越太白山六月冰雪凍死九卒失足輒陷  
積雪中山上中下有三白祠祠前各有石池積水深十餘丈上池  
爲斜峪水源下二池則黑水峪源也嘗冒暑追賊面迎日日射雪  
薄暮營山巔太白祠爨煙起寒受火偏夜半但聞呻吟聲號痛聲  
全軍目腫黎明魚貫下山憩數日始愈復追至洋縣之大棧溝搜  
山八十餘里便液解渴深夜殺賊千餘逃散數百官兵飢渴一晝  
夜始尋徑出華陽其跋涉之艱如此凡山賊勦敗所募多其羸弱

其丁壯仍以老林爲逃死蔽或五七人或三四十人或百餘人分  
合不定加以苟文明餘黨驍悍數百聚則攻寨散則掠人勒贖易  
糧遇官兵追急或敗集掩蹤或入溪行走或鳥獸四竄約會他地  
使官兵莫知所向嘗自華陽追賊數百入山薄暮少憩雪融泥瀟  
凌晨跡之五里至三岔路口見數百賊足跡在前一賊婦足跡在  
後更前則杳無去跡又無轉蹤遣卒三路探至數十里要隘皆回  
報無影合軍駭曰賊飛去耶抑化爲異物耶次日又行百里至桃  
源溝獲賊訊之則前夕賊於三岔路口退步倒行至營前足跡濶  
亂之處躍泝溪流鑽入密箐而遁其賊蹤詭譎復如此七年冬奏  
報擬定八年散遣鄉勇酌遠近各給銀二三兩以銀五錢收繳長

牙眾頗洶洶總兵李應貴鄉勇四百譟於大安驛通判雒昂鄉勇

四百譟於漢中芳皆隨機撫散而副將吳廷剛鄉勇四百挾道員

朱勳索賞每人至二十金始散於是芳麾下鄉勇三千餘伍敏所率六隊

二千四百袁華俊二隊八百亦聞風思畔一日自華陽拔營將行忽眾矛齊舉

遣弁往諭卽倒矛相向諸將皆失色芳放聲大笑不休久之眾矛

漸斂芳呼隊首笑向日何兒戲如此對曰鍋帳未至不願起營芳

曰眾誠勞苦暫憩亦無不可然山中無民舍酒食犒賞前行六十

里二郎壩可多休數日候齊鍋帳毋違軍令始整隊至二郎壩乃

遣人赴前六十里之黃柏園備牛酒犒士次日日出街坐胡牀逐傳

各旗索倡首者皆曰本旗無之於是逐旗遣去其倡亂二人爲外



委馬元魁旗下鄉勇某某芳早已訪知最後傳此旗詰之對如各旗亦如前遣行惟畱倡亂二人聽差遣俟各旗去遠然後斬之至黃柏園出二首級徇於眾眾皆警服馬元魁者卽伍敏所率鄉勇六隊之一也於是芳歸五郎城議盡散遣伍敏六隊鄉勇二十四百人並查游民捐賞回籍而馬元魁隊首三十餘人復叩轅詭詞求賞冀欲如漢中之數其餘五隊觀望俟覺芳從容開導以鎮之聽其竟日跪起飢倦以勞之及夕旣退密傳五隊首令其禽獻領功以離之繼復乘夜傳令點兵以威之未黎明眾隊首赴轅乞哀於是六隊每人加賞銀一兩卽日繳矛散遣而盡畱其頭目隨後安置月餘散鄉勇二千游民三千其資遣之難復如此初總督惠



齡據各路浮稟勦除賊數按經略原交實數屢次入告計山中止  
應餘賊十餘人而山中所至劫殺或一二百或五七十爲數尙多  
實不如所奏之數於是 廷旨嚴責惠齡惠齡嚴檄芳四月芳於  
石板溝搜斬逋賊百餘姑報大局肅清請惠齡撤官兵回任而自  
請專力搜捕 詔加提督銜分派將士十餘路每路百數人由東  
而西由南而北逐山逐箐以次排搜芳躬率大隊居中策應六月  
搜至太白山零匪復湊至三百餘竄出盤屋爲官兵截遏入山八  
月又增百餘有 詔嚴責而零匪皆積戰猾賊騰山驀淵無不一  
以當百分軍勦之則不利合軍攻之則先遁嘗偵得賊於洋縣之  
東坪一夜疾馳掩之賊夢中驚起全隊裸遁免脫隼逝無一獲者

翌日如數百赤身猿猴入山寨民無不絕倒沿途斬竹爲矛擄人  
勒贖不數日衣械畢全芳率兵追過漢江賊遁巴山與參贊德榜  
秦大軍展轉鑿拒九年冬始爲楊遇春設伏道士溝夜半殲之云  
初賊過漢江南 詔芳嚴防漢北自西鄉至洵陽千餘里上游灘  
淺冬春水涸易於揭厲前此防漢將帥無不獲罪鎮兵二千分派  
要隘每處不過數名數十名除分布外親兵僅餘二百沿江兩岸  
山巖相間更難援應乃逐灘揀石堆壩偪水歸槽又拊蒺藜刺龍  
刺窖絆索四物散布水中阻賊躡越北岸則拊轟天礮繩繫木椿  
屈其稍拴  
竹兜裝石子賊至對岸巨木透穿三孔又用圓木三疊爲萬斤弩弓安皮弦小車輪扣矢二十用繩  
斬繩發石能擊百步外  
繫木椿賊至斬繩機  
發矢出擊二三百步又以竹篾貯石北岸爲長垣順流而東工成

後沿江督兵訓練槍礮聞遠近賊不敢近九年冬以防江出力  
命復職時南山中處處黑夜殺人多歷年委員所派人役及流落  
鄉勇假賊劫掠乃請於總督那彥成盡撤委員分署州縣以便各  
人安置隨役並通省捐養廉二萬金散遣流民四千餘派兵分路  
櫛剔獲八賊於老林赦使鄉導其時楊遇春亦勦盡巴山道士溝  
之賊於是兩山皆報肅清其盪滌善後之難又如此初甯陝鎮之  
立也芳以五郎關雖南山適中山凶水惡不宜重鎮請移鎮漢中  
經略不許所轄新兵數千皆驍悍桀驁十一年固原提督楊遇春  
入 覲移芳署理而以副將楊之震護總兵七月因停扣米折遂  
有悍卒陳先倫陳達順戕官之變時遇春行抵西安卽率省標兵



千有五百馳山中芳率固原兵二百晝夜馳至邠州始知家屬畱  
鎮者已於月初爲叛卒蒲大芳等送出石泉輜重囊篋以二十  
羸運送寸縷不失遂中途草檄馳諭時大雨山潦四漲八月朔始  
晤方維甸楊遇春於漢中城是時叛兵已破洋縣官兵阻漲不能  
援又疑未叛兵皆不可信芳請率精兵六百往援而石泉告急乃  
由水路赴之時總兵王兆夢拒戰城中芳至甫登城卽有騎賊董  
學孔飛馳至伏地請死芳縋上痛撻之餘二百騎亦踰城下哭訴  
芳麾退從役以大刀給董學孔侍側然後宣諭先數其罪後許其  
降賊立撤城外關廂之攻免避難商賈二三千人後蒲大芳遣人  
密稟言眾皆願降惟二陳不願欲由五郎東奔商雒芳密令蒲大



芳速奪帥權大芳請奪帥之策芳曰先收眾心從傷病者始甘勞苦推誠信時叛兵復回甯陝鎮城連雨七日蒲大芳果奪二陳之權眾推爲首於是棄鎮城東北竄芳遂率兵六百回鎮九月初集兵千餘追賊出子午谷鄠縣告急而都統祥某總兵汪啟各率兵營斗門鎮距城四十里不敢前芳督兵赴援城中以芳所將皆叛賊同伍不敢納乃營城東三里薄暮賊攻城東將登堞芳以兵五百守營以兵五百衝入賊隊城上乘勢輒石雨下內外夾攻矛貫芳臂城始獲全而營中槍礮聲復起回騎衝入壘中以扛礮分布四面拒敵而驍騎左右赴援又令長刀五十分布專斬妄動者賊誤爲西安官兵力攻徹夜黎明見本鎮旗卽退走解圍去而德楞

秦已劾芳革職效力贖罪復進追至方柴關則楊遇春軍與護軍統領扎克塔爾四川提督豐紳等以步騎八千於先日爲賊所敗矣賊聞芳至遣人乞降復追至平磨各騎賊見芳至卽下馬伏地號哭環侍左右芳解佩囊賞二陳旋遣騎止後軍緩進而兩山步賊皆外集匪徒洶洶欲鬪蒲大芳亦不能止芳自往痛訶之時已薄暮旋令兵賊各自結營晝地拒守賊竟夕戒嚴畱舊受恩叛兵三十餘宿帳中黎明前進二里賊數騎來迎楊遇春遙呼止之芳不顧甫轉山角千騎夾道跪芳馬就溪飲良久賊長跪無慢容獨不見蒲大芳再里許復轉一山則大芳迎跪曰本集馬步隊迎公而陳先倫不降先驅馬隊全攝步隊以去芳思前賊去尙未遠後

騎降心未固乃令各轉馬首聽宣諭首示以 朝廷恩威罪干滅族開示利害千百言眾皆默然貌轉猙獰再動以積年軍中共生死歷艱苦原期共享太平乃一旦爲人倡叛復督兵相勦於心何忍會於河壩墜水臨岸燎衣卽向年與爾同受飢餓之處因籲天祐果能收降救全眾命願茹素三年我心如是恐爾父母亦不過也淚隨聲下眾始號咷芳曰旣如此獨不能爲我禽陳先倫來耶卽有四十餘騎應聲請往芳率叛目數十回營見諸將帥俄而陳先倫禽至蒲大芳白言尙有陳達順領戰手二千餘不許降須解散始可禽之初更陳達順亦禽至芳中夜念賊目雖降而賊隊尙眾前日山頭步賊蒲大芳不能鉗制已露尾大若不乘機解散恐



致潰竄乃五鼓單騎復入賊營索枕寢軒聲如雷日晡始起傳集  
叛眾問曰爾眾幾何蒲大芳曰甯陝初變思爲停扣米折集轅稟  
求被陳先倫醉戕主帥勢成騎虎焚掠西竄其百有四十人乃山  
中匪類聞風爭投不收眷屬有逐妻別母絕裾來者不收衰老有  
羸鬻復來者誰遇誰收自石泉回至五郎集隊共起事頭目百四  
十人分百四十隊每隊多者數百人少者百餘人芳曰眼見不及  
萬眾何也曰前營出屯三十里外左右相去各數十里各分地界  
以便虜糧曰如何調遣大芳曰行軍視帥旗趨向臨敵接應聽礮  
聲復出鐵鞭一曰此亦同旗祭告者犯令擊死無論芳乃索帥旗  
鐵鞭手自執之蒲大芳及眾皆色阻芳解佩劍書一令字小旗給



大芳曰跪聽吾示吾既爲主號令斬殺汝不得專吾亦不耐瑣碎有抗玩不遵散遣及飲博虜掠違軍令者悉請示懲之戲曰爾亦一小元帥也較爾眾所舉不更榮耶眾始悅服卽收願歸籍者八百餘送大營資遣有偃蹇側立眾中者芳問何人曰向貴卽眾匪徒之首也立禽送大營斬之夜半忽殺聲四起各頭目及護衛矛手齊呼曰主帥在此敢亂前者斬之芳堅臥移時殺聲漸息翌日詰之知前隊及左右兩路步賊起營分竄無請降者芳自率蒲大芳及諸頭目追之行數十里及其尾隊又半日僅截及其半翌日至西江口始截及前隊詰其故對曰官兵投降有主帥救我等恐不能生是以逃芳曰兵叛且救況爾愚民違令當斬立梟倡首五

人宣示令申約束又翌日樹紅白二旗令願降者立紅旗下不願降者立白旗下凌晨赴場則紅旗下降眾畢集白旗下無一人乃宣諭隨吾叩謝 天恩 朝廷恩各三跪九稽首再謝主帥恩三稽首禮畢回視眾面怡然消盡殺氣歎曰禮樂教化之力也乃設局給粟給費十月朔遣匪徒四千旬日間飽橐潛逸者不知凡幾率新降兵謁見參贊於兩河口奉令率之回旗而奏中不及文吏停扣米折之事亦不敘芳招降之功轉以前在鎮時驕待新兵爲其罪 詔嚴責德楞泰縱叛養奸專擅廢法並誦總督倭什布戌烏魯木齊楊芳戌伊犁 旨存甘州提督署中俟芳率換防新兵出嘉峪關回甘州始宣之蓋陝中大吏恐新兵之復變也甫至伊

犁卽奉 旨賜環芳以母老病求歸養十五年復授廣東右翼鎮  
總兵 賞還花翎旋調鎮西安十八年滑縣賊叛隨那彥成赴軍  
十月攻克道口又追禽首逆李文成於司寨具詳畿輔靖賊記時  
官兵圍滑城久不下我軍於西南隅掘地道爲賊繩石擊破灌水  
淤之復於東門西門分掘月餘未就芳周巡城壘料西東二門隧  
亦必爲賊所覺乃仍於西南隅廢隧再掘之其地卽古白馬津黃  
河故道掘地三尺及泉賊不甚防乃外樹柵壘增銃礮使賊不敢  
探首又多撐皮帳蔽柵外然後潛修廢隧旁斜趨正東四面護以  
厚板及近城地勢略高可掘深五尺賊雖繩石徧擊賴木隧堅厚  
不陷 按守城防禦地道之法或城外掘壕橫截或城中增修夾牆  
或黑夜縱城攻營掀牆探穴全在探知敵情知敵所攻則知



所以守知敵所守 又於迤西里許別樹一柵偽修夾道以愚之賊  
則知所以攻矣 日夜防我掘新道因得乘閒工作掘至二丈外隧中黑暗燈則無  
風自滅羅針旋轉不南指迨一拂袖針隨風定風過復晃动始知  
爲氣所偪乃捲席筒接出隧外吸氣外吐燈始明針始定計斜掘  
四丈二尺較廢道長丈有二尺折算已進城根五尺矣滑臺古重  
鎮滑城外輒內城上車可方軌高厚倍常芳恐隧進城淺則僅能  
轟外輒乃更掘三尺計進城根八尺適當中心又旁竅大門又進  
爲火坑皆寬深倍前滿貯火藥數十包包各數十斤囊土鑲輒塞  
火門畱孔安藥線其填出丈有八尺防火力倒衝也於十月九日  
工成而東西門他隧果皆先期爲賊所毀乃請大帥撤近城兵於



三里外立馬挺刃以待而白馳回牽藥線於穴口祝天然繩距藥線寸許較截火繩二然之倒退而出以其一馳白那彥成一送楊遇春告曰火繩燼地道發乃繩然盡而地道寂然天將明城頭賊滿或曰賊下城矣芳急急如灼遇春曰隧外有風火盡較速毋憂也壯士二人請往探之俄頃奔回忽地中濃煙噴起地震霆裂三軍奮呼冒煙衝入城陷崩十餘丈街舍一望瞭然兩面賊復死拒內外鏖鬪兵挽賊械賊格兵矛旣而我兵奮攻上城沿城驅殺四面圍城之兵望之皆蟻附而上滑縣遂平復赴陝西勦南山廂匪殲首逆張占鼇於徽縣二十年由漢中鎮授甘肅提督道光初歷督直隸湖南陝西六年秋調征回疆是冬破賊柯爾坪七年春復

喀什噶爾進復和闐十二月生禽張格爾於鐵爾蓋山 封果勇  
侯方張格爾之未禽也將軍長齡於五月檄芳與楊遇春出塞捕  
之楊遇春赴色勒庫爾芳赴阿賴皆浩罕邊界欲以兵威勒令縛  
獻其地出塞千餘里皆生布魯特部落連踰大河五道通布倫距  
浩罕城四站阿賴又偏近一站石山童礪耕芻兩缺地險糧艱深  
入無繼芳中途致將軍書極言張逆愈遁愈遠孤軍萬難深入諸  
夷騙賞探報之詞決不可信其書一致將軍一寄直隸總督那彥  
成那彥成進呈於是奉班師入塞之 旨而芳已於七月五日遇  
張格爾兵二千於塔里克嶺擊敗其眾賊誘我追入險復糾約各  
布魯特萬眾圍攻五晝夜斷我後路芳據壘嚴拒並分兵擊敗後

路以通糧運陣亡滿漢官兵百餘副都統安福中槍死步步爲營  
層層捲撤於二十二日入塞回營是役孤軍懸入敵境大戰五晝  
夜擊散賊眾全師而歸自是浩罕布魯特震懾兵威而我降弁譚  
祿之爲賊奸細者復被禽斬浩罕無耳目遂不助逆張格爾僅餘  
數百騎矣故是冬一戰禽諸鐵爾蓋山及十年冬安集延復入寇  
圍喀葉二城芳復以參贊偕欽差大臣長齡及都統哈朗阿赴援  
至則賊已飽颺出塞而喀什噶爾參贊大臣扎隆阿劾奏阿奇木  
貝子伊薩克通逆伊薩克故長齡所保也長齡並以圍城中兵民  
捕誅回謀爲罪欲令楊芳逮送阿克蘇質審芳覆書曰當賊圍孤  
城官員兵民同願性命事起倉卒卽守城兵民情稍可疑亦應立



斬儻彼時已剪除伊薩克保西四城今日何從過問儻使如班第  
鄂容安之於阿逆慶祥之於阿布都拉更何從追咎今伊薩克一  
家尙賴參贊容畱自應徹底窮究實則寸磔不足蔽辜虛亦止於  
免咎若並爲已誅之回追問抵償則是兵民不死於鋒鏑而死於  
逮繫罪抗守孤城之兵民以謝叵測譎張之回犯解體寒心何以  
別功過示懲勸某非爲三千六百餘人請性命實爲 國家死守  
封疆者勸將來也此皆方略所不載前記所不詳云

右記魏源撰

楊誠齋軍門芳貴州人少貧寔讀書應試未就乃充行伍藉軍糧  
以贍其家乾隆乙卯楚苗竊發毗連黔境銅仁諸苗亦乘時蠢動



攻銅仁寨時游擊爲孫總兵清元欲棄寨避賊公奮然曰芳聞尺地寸土莫非爲天子所守者奈何委之於賊孫壯其言因與賊戰乃至敗績時福文襄王督師特命諸將移寨聞兵敗怒欲置孫於法孫叩首曰非裨將之過皆楊芳一人意也王命縛公至詰曰汝何人乃敢抗吾法時兵衛森嚴堂宇深邃公大聲曰芳幼讀聖賢書惟知忠孝字今寨雖小爲天子所畀付若輕棄是違君命也故芳欲一戰以揚士氣其勝之與否自有主之者非芳之罪如使芳執殳效命早馬革裹屍矣言既終愀然長嘯王壯其言命爲親軍日見委任不數載官至專閫公與楊時齋軍門爲布衣交遂至通譜公善謀時齋善戰二公如左右手不可須臾離者其守陝

安鎮政令寬洽民感其惠公嘗入 陛見其署篆者暴虐激變營  
兵亂軍蒲大芳揭竿而起然感公舊德曰楊夫人在慎勿殺害也  
因共舁夫人輜送出南山共拜叩去其善馭士卒也如此

右錄宗室昭榘撰



羅思舉

羅思舉者嘉慶中以鄉勇殺賊四川起家至節鎮威名亞二楊思舉用兵善因險出奇以少破眾長劫營長用伏長用閒其得名蓋自豐城劫寨始豐城者達州東鄉賊王三槐巢穴屯聚數萬矛槩成林官軍莫誰何適賊三千出掠將近羅家壩時壩中團勇萬皆鄉民不習戰臨敵不及五之一餘皆遠屯數十里或十餘里思舉廁其閒獨身遇賊前鋒數百詭呼曰數十賊耳直前搏戰眾聞賊少氣倍爭奮遂敗賊乃獻俘獲於游擊羅定國定國使偵賊豐城還報請率死士夜擣其巢而伏官兵五百爲外應夾擊可一舉滅賊軍中咸狂之且謂賊閒謀思舉憤官兵養賊乃自請火藥數斤



夜獨往賊寨深入得茅火焉風烈火熾賊黑夜自相蹂殺謹譟震天奪路走顛巖踏死無算思舉乘亂跳身還以無官軍邀擊故賊得盡奔南壩場棄器械牲畜山積是役以一夫走賊數萬名震川東鄉勇從之者如歸市於是自成一隊號羅家軍屢殺賊而某弁者冒其功受賞益甚思舉譖諸官奪其器械散其旅會四川總督英善聞之給七品軍功頂帶檄隸副都統佛住於東鄉時嘉慶元年十月思舉年三十有三矣時川賊最强者川北則羅其清冉文偉川東則徐添德王三槐適徐王二賊合窺東鄉屯城河對山佛住恃烏合鄉勇數萬爲援惟扼河守思舉白佛住曰偷渡不可防也賊方張請濬濠設柵增城垣備積石以守不聽思舉策其必敗

遂赴知縣劉清軍於方山坪羅其清素德劉清清欲招降之無敢  
隨往者思舉請行遂同入賊營慷慨說賊賊諾降次日復持檄往  
賊以思舉同姓畱飲款我軍虛實思舉知賊無降意詭詞回營則  
空無一兵蓋劉清聞賊陷東鄉害都統恐二賊合攻已拔營宵遁  
矣賊亦探官軍去急遣百餘騎檠而追思舉會長大霧免於是徐  
王二賊分據石子坪香鑪坪各萬思舉復請夜襲香鑪坪賊巢  
而伏精兵外應參贊德楞泰許之梯緣絕壁而上伏火藥十餘處  
會大雨不遂翌日賊覺遂棄砦宵遁自是以藍翎千總常將鄉勇  
分道爲奇兵與川東官軍犄角賊走渡東甯河官兵阻漲七日始  
渡賊已烏合數萬及之冉家壩思舉以鄉勇爲前鋒迎戰觀音山

下呼聲震谷官軍四面乘之遂斬賊首孫士鳳思舉浴血回營眾  
瞠莫識賊趨東鄉莪城山天險復以鄉勇五百夜攀磴入與官軍  
夾攻潰斬數百奪其銅礮六時徐王賊勢已衰僅數千走雲陽與  
白崖山陳家山二賊合思舉以鄉勇繞開縣出其前途獲賊謀知  
王三槐遣約陳家山新起賊合拒官兵卽冒所獲賊白旗夜馳抵  
陳家山聲言白號賊至賊四百魚貫下山迎思舉坐壘門令能誦  
邪教者釋械入後營見老師傅悉誅之賊至死號呼稱我實白蓮  
教非紅兵蓋呼官兵爲紅兵也賊首張長庚方屯山上望覺奔遁  
出兵擒擊殲禽四千人釋其不能誦邪教者二三千雲陽新起賊  
一舉除宜縣奏補夔州左營千總思舉功上 聞始此三年勒保



誘執王三槐於雲陽餘黨冷天祿猶負嶠安樂坪大兵環攻三月不下思舉復請劫賊寨梯絕壁上守柵賊恃險酣寢盡刃之縋引死士千餘入其三柵乃縱火深巢昏黑橫突萬眾中將明殿旅出寨大呼曰吾豐城劫寨羅思舉也賊膽落潰圍走官兵邀斬無算旋爲額勒登保所殲川東賊由此不振會德楞泰圍川北羅冉二賊於大鵬寨三月不能破復檄思舉問計思舉請先相地勢三晝夜周囑畢復命曰賊各隘皆壘石嚴守惟山後懸削數十餘丈賊必恃險請緝巨竹數十爲長梯每尺閒以跣繩倚諸絕壁而兩面以人持其長維官兵日夜攻其前使不暇他顧則可乘閒擣也許之乃從死士四十各爲暗號攜火彈宵攀而上官軍望火起萬礮



齊備惟畱一路以縱賊賊夢中起昏黑相殺爭墜死無算其由一  
缺逃死者均爲伏兵所殲共殪賊五千俘七千而四十人無一傷  
者德楞泰計賊必遁回方山坪舊巢使總兵朱射斗以兵三千據  
其寨而思舉伏鄉勇千餘於隘薄暮賊果至伏兵格之賊突奔山  
上復爲官兵壓擊圍斬幾盡次日搜獲羅其清於山峒奏擢守備  
川北賊自此不東擾復追冉文儔苟文明鮮大川等於開縣苗兒  
寨賊防思舉劫營預伏爲備是夜果陷伏中幾死潛積尸下以免  
四年正月救總兵百祥於忠州重圍援絕首尾受敵大呼橫矛單  
馬馳突俄馬踣步戰三十里蔽身大樹連殪追騎竟免復救都統  
七十五於巴州矢垂盡思舉馳至大敗賊擒馘數百擢都司時川

北賊冉文儔已斃而其弟冉天元等復垂經略西行於五年正月  
奪渡嘉陵江焚掠川西眾數萬參贊德楞泰馳回川西思舉亦隨  
七十五軍赴援戰賊青龍口官兵分五隊思舉領右隊鄉勇賊據  
險鏖鬪竟日不決乃夜選壯士百人繞山後深箐壓襲其營賊大  
亂官軍急乘之大敗賊賊走江油馬蹏岡官兵數路追之思舉領  
左路先驅深入過賊七伏始獲賊謀知己陷伏中間賊各攜毛竹  
牌夾溼絮以禦矢銃乃急令兵多拾覆石未里許伏果起官軍矢  
銃不能制各路皆敗惟左路亂石雨擊賊皆棄竹牌反走絆蹶滿  
路追斬千餘而參贊正兵已爲伏兵所敗參贊率數十騎上山下  
馬引滿賊千矛競攢咫尺將及思舉率死士數十奄至大呼馳下

山石皆震摧壓崩墜賊瓦解冉天元馬蹶被禽賊數路潰竄思舉  
冒所獲賊旗以追賊復殲賊首雷士玉於新市場進攻火燒寨崖  
周環如堞賊伏堞中矢銃不入欲俟我矢稍盡而乘我乃令軍士  
皆仰空射矢雨其若賊譟亂遂蟻傳乘之賊奪隘奔潰自是不敢  
迎戰望風爭遁復渡嘉陵江而東矣時勒保復以六品領隊大臣  
來川德楞泰令思舉隨勒保屯定遠防嘉陵江鮮大川遂夜劫勒  
保營明日又截其後隊及知思舉在焉乃遁會七十五以都司桂  
涵新敗於鄰水復檄思舉至營奪桂涵所領鄉勇以予之而桂涵  
亦畏賊猖獗且患七十五死戰恆欲隨勒保自是遂與思舉分路  
思舉隨七十五夾破賊張士龍於通江兩河口復破斬王士虎於



巴州皆禽賊千計擢游擊 賜號蘇爾方阿巴圖魯會陝賊入川  
連敗薛大烈桂涵兵於開縣思舉隨七十五赴之請分兵閒道繞  
出賊後七十五以路險不許徑搏當加灣而思舉潛用鄉導趨後  
路適賊已摧提督軍恃勝不設備鄉勇乘後山突潰之逐北二十  
里當山隘有巨奔深不測左右兩巖賊被追急陷其中者千餘禽  
斬數千俘賊首向八並奪回薛大烈敗軍所失羸馬旗幟無算時  
提督七十五已劾思舉違節制至是乃大喜過望追回其劾云自  
是隨七十五轉戡川陝湖老林閒賊無定勢兵無定向其在房竹  
閒缺糧七日煮馬韉皮啗賊肉以追賊視前戰川東北時尤艱苦  
復偪賊苟文明等自湖北入川由太甯太平出山向通江巴州時



鄉勇半載未領糧餉衣狗皮躡草屨人皆呼曰勾兵及戰勝則笑曰勾兵破賊至是追賊過達州休六日補頡兵餉士氣始飽而賊苟文明已乘官兵就餉時北渡嘉陵江擾秦隴思舉隨七十五馳擊復徧賊回川北而七十五以追賊遲延被逮思舉檄赴參贊軍會川北賊張天倫魏學勝橫掠儀隴屢敗總兵田朝貴七年正月勒保檄思舉往援賊扭田朝貴易與專蹈其瑕思舉乃繞道還冒田總兵旗賊望見爭趨之爲我軍所破而他鄉勇冒思舉八卦旗者賊望輒反走後大破賊於東鄉斬張天倫魏學勝勒保奏加田朝貴提督銜而思舉復劄甚回東鄉副將褚大榮見參將周廷翰皆以軍中私婦女奪職從思舉借健卒二十以禽劉朝選反譖其

卒於勒保而械治之又破齊國點於通江總兵王兆夢先敗鍋帳  
皆被擄乃向思舉營鄉勇買賊數十報功大帥又與總兵羅聲皋  
禽張簡羅道榮於巴州勒保復以功予知順慶府趙秉淵加道銜  
賞孔雀翎八年正月擢參將 賞四喜扳指思舉受 上賞始此  
時大兵報戡定渠賊咸殲惟餘黨百十爲隊散匿川陝山箐思舉  
裹糧采入搜捕以降賊爲鄉導多造各色賊旗遇賊與合隊而禽  
之而熊八者曾害提督穆克登布於南江動以伏陷官兵奉 旨  
嚴捕解京者也至是俘諸太平之仙女寺並獲穆克登布所佩銅  
佛洋表經略額勒登保大喜設提督位而磔祭之然勒保已先奏  
參將陳弼於大甯斬熊八矣如不能復奏何是年秋奏三省肅清

而南山餘孽苟文潤數十賊復糾散遣鄉勇合隊數百渡漢南竄川陝交界老林屢敗官兵明年德楞泰額勒登保先後出都回川剿賊思舉言曰賊雖少皆百戰之餘狡猾嫖悍倚三省老林爲窟穴朝秦暮楚見兵卽竄每禽殺不過數賊十餘賊而三省不得解嚴惟有合川陝大兵四面環賊爲長圍以漸移哨步步進偪如置網獵獸乃可盡也如言蹙之各路皆斫林除道前營旣立後哨隨進矛銃相聞人自爲戰賊無可匿乃冒死突圍連敗之十里坪蔥子坪思舉手執殪三十餘賊時大霧迷箐兵賊相觸賊復乘閒由大甯北竄入陝思舉同桂涵吳廷剛祝廷彪等追躡敗其伏賊楊遇春馬瑜田朝貴三路圍賊於陝境賊復突田朝貴營而東走開



縣會賊黨趙洪周斬苟文潤以獻於是奏川陝官兵各搜各境請甯陝鎮總兵楊芳專搜漢北陝賊而思舉以太平協副將專搜川賊深窮太平太甯開縣通江各萬山中無險不緹多聞謀鄉導以賊攻賊獻賊必審真僞生禽始受購賞無濫誅故無逸賊蓋七年戡定後靖餘孽者又二載而十年七月復有陝西甯陝鎮兵之變思舉聞變欲以太平協兵千餘裹糧疾趨掩其不意而署太平同知袁詩秀以越境不冝備餉阻其行後賊破洋縣遂脅從數千德楞泰至調兵萬餘勦之及楊遇春楊芳招降其眾德楞泰盡釋歸伍不戮一人思舉諫曰兵而叛叛而殺將破城破官軍亂無大於此者反得賞焉是賞叛也人且謂作兵不如作賊是勸叛也何以



懲後請伏兵盡坑首逆二百餘以申國法已後亂德楞泰是其議  
翌日諸將皆不可反切責思舉奏上果奉 嚴旨降黜諸將自是  
川陝兵果數叛明年西鄉瓦石坪營兵變思舉念商文員必以越  
境相阻乃急選兵三百以其半扼竹峪關而自率其半三晝夜馳  
至西鄉賊偵知軍至卽大出迎拒時兵少且疲未食乃據山多張  
幟爲疑兵大罵不與戰俟二更下山襲之則賊已遁回巢黎明距  
賊五里募食而副將祝廷彪遣卒來言已赴賊營招撫約勿擊思  
舉陽諾而疾馳壓其壘賊傾壘出且罵且前我士怒乘高雨石奮  
擊每卒皆長驅數十賊遂追入巴山與陝兵合蹙之乃出山乞命  
思舉不報勒保而送德楞泰營盡誅之祝廷彪自賊營遁出伏地

請罪思舉與合詞報捷俱加總兵銜是役微思舉神速賊殘再滋  
蔓由五郎兵變姑息至此云思舉爲副將六歲十六年署川北鎮  
總兵十八年擢重慶鎮總兵二十年川西徼外中瞻對番酋洛布  
七力叛松潘鎮總兵羅聲皋討之酋詣軍請降卽釋歸巢班師

上以聲皋專擅遣戍 命思舉進勦由打箭鑪趨中瞻對河東與  
河西番寨對壘萬山夾水湍洶不可以舟其達根橋已燬於賊乃  
潛遣精兵三千由上瞻對八十里之密波橋宵濟直搗其巢分扼  
上下瞻對要礮數十處使我兵可進退而盡禽其潛出約援之賊  
官兵雲梯仰攻捍盾俯進皆爲銃石所拒思舉伺其石盡惟火銃  
能及遠不能及近乃選死士衣鱗甲執鍬鑿俯首掘砦而實硝磺

之俄煙燄蔽天四砦齊陷酋及妻子頭目燼焉瓜分其地以賞上下瞻對各出力頭目班師道光中歷任貴州雲南湖北提督十一年命勦湖南永州江華猺趙金龍別詳湖南平猺記思舉之爲總兵提督也官俸外不名一錢終日練兵如臨大敵重慶至巫山大江剽掠日聞思舉至千里肅然然奇功皆在未建節鉞時軍中號曰羅必勝言晦夜劫營必勝巖溝閒道必勝冒旗誘敵必勝也江華小捷懋賞世封天以追酬川陝百戰之勞云

魏源曰思舉忠孝人也其始軍中蓋莫知所自來及爲副將自檄川陝湖北各州縣銷積案數十云所捕劇盜羅某今已爲國宣力其毋復株連世始知其所自來云世多以思舉與四川提督桂涵

齊名謂出身功名略等源嘗以質楊果勇侯芳芳少許可願獨賢  
思舉曰涵特以鄉勇擊小賊視辭大烈田朝貴輩彼善於此耳豈  
思舉烈士夫比思舉之不屑依附總督以速貴而甘從提督血戰  
冒萬死也其生平豈桂涵比今兩江總督陶尙書澍備兵川東與  
思舉同城一日酒酣袒身相示自戰創班班外爲親割股痕七左  
股四右股三世不知思舉乃以槩馬叱咤豪思舉也

右記魏源撰

湖北提督羅思舉字天鵬四川東鄉縣人少亡賴數行竊令捕之  
杖斃棄諸野中夜而蘇甫匍匐至老嫗家周之遂改行娶妻忽患奇  
疾百方不治一道人過門曰有方可救但得錢三十千乃能配藥



羅自念貧窶安得三十千錢乃語妻曰吾病且死若亦餓死耳若苟嚮身可得三十千錢買藥則兩活矣妻不可強之再三泣而從之嚮於某氏得資治藥病果瘳白蓮教亂起投身軍營每戰爲前鋒驍勇絕倫歷功至湖北提督世襲輕車都尉其初貴爲遊擊時遭人訪其妻重金贖之爲夫婦如初以報其嚮身救夫之義也道光十三年湖南永州苗趙金龍作亂羅受命與總督盧公坤往平之賊已困將擒矣時上以尙書宗室禧恩爲大臣督軍未至諸公議待禱至羅曰聞久師忘賊必遁不聽遂一戰殲賊且盡禱爲內親信大臣督撫以下皆降屈爲禮怒其不待盛氣凌之羅獨不屈且面折之曰諸公貴人多願忌羅思舉一亡賴耳受國厚

恩至提督惟以死報不知其他禱甚怒而無如之何羅每與人言  
生平作賊事不少諱嘗使人歷敘其事亦奇男子也

右識小錄姚瑩撰

--	--	--	--	--	--	--	--	--	--

171-450

國朝典制徵初編卷三百二十四補錄

將帥六十四

楊芳

本朝既百八十有六載漢人籍而身膺世爵者公則有黃芳度岳  
鍾琪侯則有張勇施琅伯則有文臣張廷玉武臣孫思克王進寶  
趙良棟皆有功德皆以爵終於其位而今太子太傅固原提督楊  
君芳封爲二等果勇侯位在二十六等之第六等赫然與靖逆  
靖海齊名增漢人重凡宿衛之臣滿洲輒除乾清門侍衛其有異  
材重以貴戚乃擢御前侍衛漢籍輒除大門上侍衛日直不過闕  
領侍衛內大臣轄之如外弁之見將帥其有材勇擢爲乾清門而



班之崇極矣今楊侯特授國什哈轄漢國什哈轄內臣驚爲未聞漢人襲父爵者出爲弁士入爲侍衛父祖功最高入拜散秩大臣而蔭庇之榮極矣侯有子曰承注自以生員起家 賜文舉人他日當補文臣內可致九卿外可致督撫漢人襲爵者施琅孫士毅皆 詔入旗籍漢軍都統治之而楊侯官籍以貴州行伍達於兵部不改承注以貴州舉人達於禮部不改父子迴翔立外廷奉外事昔周中興威重大臣無如尹吉甫吉甫歸鎬客有張仲今大臣數楊侯楊侯朝客有徐松張琦魏源源也雅材襲自珍友之噫嘻美談並世之士躋追周雅後或繼也前莫聞也侯之入 覲何自自喀什噶爾也其年道光九年其月四月廿八日乙丑自珍既與

侯相揖於西定軍機處直房明日書是以笏侯

右書事龔自珍撰

國朝文獻通考卷三十四

國朝耆獻類徵初編卷三百二十五目錄

將帥六十五

嵩溥

富僧德

韓肇慶

保芝琳

宗室敬敷

涓慶

棍楚克策楞

那桑阿

斌良

張成龍

趙龍田

詹功顯



--	--	--	--	--	--	--	--	--	--

171-456

國朝耆獻類徵初編卷三百二十五

通奉大夫前署江西巡撫江西布政使司布政使湘陰李桓輯  
將帥六十五

嵩溥

嵩溥伊爾根覺羅氏滿洲正藍旗人父富綱雲貴總督自有傳嘉  
慶四年嵩溥由廕生引見以主事用籤分戶部八年補官九年  
升員外郎旋調禮部員外郎十一年玉牒告成嵩溥以曾與纂  
輯議敘賞加二級十二年京察一等引見記名以道府用十  
四年三月升郎中八月授陝西潼商道十九年署按察使二十五  
年升江西按察使道光元年二月調湖南按察使八月署布政使

九月遷廣西布政使二年三月護理巡撫閏三月奏審明會匪韋  
監祀等糾結拜會情事按治如律又奏請將距省較遠太平泗城  
鎮安三府所屬軍流等犯歸左江道審轉百色武緣兩處人犯歸  
右江道審轉 從之三年調江西布政使仍署廣西巡撫四年奏  
秀峯宣城兩書院經費不敷請將膏火餘存銀兩置買田畝所得  
租穀糶價藉資添補如所請行三月護理江西巡撫五年九月擢  
貴州巡撫十月查辦江西各屬倉穀奏准缺穀一萬石以上限三  
年五千石以上限二年一千石以上至數百石者限一年補足六  
年奏請籌辦苗疆保甲 上題其議七年奏嚴拏匪徒酌議辦理  
章程疏言貴州地僻山深向有紅尙黑尙兩種賊匪結黨行強民

遭擾害甚至勾結外來遊民盤踞各州縣交界出沒無常若派委員弁分往查拏勢必聞風遠遁除州縣地方偵有匪徒蹤跡迅速查拏外其遠鄉僻壤地方官耳目難周民人應責成鄉約保長苗人卽責成土弁寨頭實力稽查遇有爲匪之人窩匪之家密行報官立時拏獲究辦其各府廳州縣交界及與鄰省接壤嚴飭文武員弁會同鄰封設法協緝不使一名漏網然此等匪徒與其懲創於旣犯之後不若嚴禁於未犯之先查近年直省究辦匪徒有鎖繫鐵桿之例分別懲治嗣後黔省辦理搶竊等案如有冒頂大五小五名號除犯死罪仍從重科斷外其軍流罪無論爲首爲從均於本罪上加一等治罪若罪止枷杖著於枷責後鎖繫鐵桿一枝



定限一年如能改悔准予釋放若不悛改加等治罪 上從之三月會同雲貴總督阮元貴州學政許乃普奏請添設郎岱廳學校學額十名廩增八名將永甯州學正移駐郎岱廳學四月奏興義等處入官苗田於嘉慶三四年勘定後陸續招佃領種至嘉慶八年始收齊租穀自八年起照次年夏收中米價值變價解存藩庫以爲興義等處支撥土弁工食之用十一年奏請黔省夫役之法有驛各處所設立夫頭令民苗擇殷實勤慎者公舉充當遇有差務由地方官立定章程分別傳示將價發給夫頭承領雇募夫頭等如有濫索多派書役扶同科斂一經查出卽照蠹役嚇詐例治罪十二年會同雲貴總督阮元奏同仁府屬之盤石司巡檢係屬

開員黎平府屬之錦屏縣幅員褊小亦屬冗濫請裁汰以昭覈實  
錦屏所管地方撥歸開秦縣管理向設學額六名仍舊作爲錦屏  
鄉學歸開秦縣考試原設教職二員請裁去訓導仍畱教諭以資  
訓課錦屏地方民苗雜處稽查巡防未便乏員請將擬裁之磐石  
司巡檢移駐錦屏以資彈壓改爲錦屏鄉縣丞先後奏人均如所  
請行十三年七月以古州都江二廳上年被水較重奏請賑卹  
詔如所請九月授漕運總督十四年二月 命暫緩赴漕督任卽  
行來京陛見五月暫署兵部左侍郎六月補兵部右侍郎七月轉  
兵部左侍郎兼正藍旗漢軍副都統八月授熱河都統十五年三  
月奏散疾舉發請開缺調理 上以熱河都統事簡儘可照常辦

理不必開缺十一月奏參建昌縣知縣毓祥緝捕無能請卽革職  
允之十六年訊明翁牛特在旗鎮國公桑噶巴拉呈控扎薩克多  
羅郡王喇特那濟哩第各款究出賄囑各情請暫將翁牛特在旗  
鎮國公桑噶巴拉革去公爵徹底根究得旨允行十月奏查明  
古北口八旗夏秋二季本色兵米應採買七千石以資支放十七  
年二月奏查明圍場樹木被斫情形請將扶同弊混之翼長伍爾  
圖防禦穆棟阿一并革職以示懲儆又奏圍場章程四條一圍場  
地方遼闊請飭令附近圍場之蒙古扎薩克派員不時巡邏以昭  
慎重一圍場官兵獲犯起出木植鹿茸等物例准充賞往往有偷  
牲斫木之犯從中影射冒爲充賞公行傳賣應請將該官兵充賞

之物每月彙報該總管以備稽查一圍場附近地方每有奸民開設客店窩藏匪犯應請嚴行驅逐懲辦以清盜源一圍場被斫樹木查有根盤請責成該總管履勘查明徧加印烙不時稽查以杜偷竊匪犯以新混舊之弊 從之三月調福州將軍十九年九月召來京十月奏籌議查拏販運鴉片章程一外洋宜先設法訪查以杜偷越一口岸宜分別稽查以杜偷漏一水陸宜更相嚴禁以專責成一關口宜令委員親自查驗以杜夾帶十一月奏嚴禁內地奸民偷運煙土接濟夷船水米巡緝兵船得規買放代爲送運是奸民一日不除夷船一日不斷惟有督飭沿海員弁實力嚴拏俾夷船難以寄碇以靖海洋又福建海洋盜劫仍屬時有商船憚



於暢行於稅課大有關係應飭沿海水師各營汛弁實力截拏加重懲處庶於海洋關稅兩有裨益疏 聞 上可其奏十一月調綏遠城將軍二十年 命以原品休致二十六年卒子昆壽原任戶部員外郎昆嘉禮部筆帖式昆聯候選筆帖式昆虔兵部筆帖式

右 國史館本傳

富僧德

富僧德瓜爾佳氏滿洲鑲黃旗人由親軍擢藍翎侍衛乾隆六十年黔楚逆苗滋事陷湖南乾州隨大學士貝子福康安四川總督和琳勦賊於貴州時首逆石三保屯黃瓜寨樹柵以阻官軍四月隨福康安開道奪黃瓜山俯攻賊寨破之又敗首逆吳半生吳逆糾黑苗與石三保合大軍分路攻入富僧德與總兵達音泰以貴州兵爲一路連下木城石卡數十直抵大烏草河 特賞荷包升三等侍衛七月湖廣兵自鎮筸入台克古丈坪賊遁富僧德隨護軍統領德楞額秦采入窮追九月圍吳半生於高多寨吳逆窮蹙自縛詣軍前捷 聞下部優敘嘉慶元年六月擒石三保進克馬鞍

山規取乾州和琳上其功 賜噶爾薩巴圖魯名號並 賚銀百  
兩七月福康安和琳相繼卒於軍以德楞泰及將軍明亮等代之  
分兵進討富僧德與侍衛溫春爲右路先渡河復乾州追斬首逆  
石柳鄧苗疆平再交部敘功是年邪匪起湖北蔓延川陝二年隨  
德楞泰移師入蜀時達州首逆徐添德等陷東鄉縣總統宜縣帥  
師復之與德楞泰合屯馬耳峯四月富僧德與都司蒲尙佐等擊  
賊於馬耳峯下山溝殲擒甚眾賊北走太平襄陽首逆齊王氏等  
自楚入川與之合分號滋擾六月襄陽黃號齊王氏姚之富樊人  
傑竄至夔州窺伺巴東歸州我兵沿江而下擒賊謀於歸州之北  
還敗賊夔州解白帝城之圍富僧德功多遷二等侍衛八月齊姚

二逆自奉節入楚復入陝合襄陽白號高均德西走漢中德楞秦  
明亮追之十一月隨明亮由高臺寺與德楞秦夾擊斃賊數百十  
二月破賊於唐家壩三年三月賊擾山陽商州旋竄藍田我兵掩  
擊賊走楚境追圍之鄖西三岔河齊姚二逆投崖死 命德楞秦  
查出力將弁以聞擢富僧德頭等侍衛尋敗高均德於雒南賊入  
秦嶺越老林北趨德楞秦等統大軍扼之於華州而令富僧德以  
步兵入山追躡賊出至高塘遇大軍返走復與富僧德遇賊敗死  
者數百人遂由鎮安甯羌入廣元依通江藍號冉文儔於大神山  
適樊人傑及達州青號徐添德襄陽黃號龍紹周諸賊皆會眾數  
萬七月德楞秦尙書惠齡合兵破大神山賊欲走箕山就巴州白



號羅其清富僧德以索倫兵截諸黃渡河高均德馳馬執旗犯陣  
富僧德射其左肩傷而逸賊大敗斬冉文儔之弟文字及賊目禹  
斯珍賊尋竄箕山附羅逆環屯山下我兵佯退富僧德等設伏以  
待箕山賊出敗之斬級二千賊驚潰富僧德偕侍衛墨爾歡保掩  
擊之又斬五百級擒賊目張國治十月攻樊人傑於廖家碛箕山  
賊五千來援富僧德與墨爾歡保從山左右抄擊敗之進奪要隘  
樊人傑等皆逃遂與諸軍平箕山斬羅其清冉文儔四年樊人傑  
龍紹周復走西鄉阻漢江還趨大安邦德楞泰令富僧德擊之射  
殪賊目張士虎擒教首劉學仁冉文儔既死兒子添元代領其眾  
狡黠善用伏五年正月挾青黃線號及白號餘黨度向瑤雷世旺

等五萬眾渡嘉陵江川西震動二月隨德楞泰馳擊連敗之於江油梓潼復敗之於黃茅嶺賊保馬蹶網設伏於前我兵搜得盡殺之因大敗賊眾擒添元得 旨優敘四月白號餘匪渡潼河趨成都官兵邀斬雷世旺於蓬溪富僧德追賊至潼河渭水者七八百賊至達州又合藍號冉添泗趨涪州官軍出鄰水截之富僧德伏兵七孔溪俘賊七百磔僞軍師何上達六月賊掠南江縣峒寨富僧德偕提督賽冲阿等冒雨攻長池壩賊巢賊遺救縱擊之斃賊千計時樊人傑及白號餘黨鮮大川復竄墊江庾向瑤及青號趙麻花等分擾川東北齊王氏之黨齊國謨入巴州七月大兵擊走樊逆擒庾向瑤等富僧德功皆最十二月齊國謨走儀隴富僧德

先扼觀音河與追兵夾攻斬齊逆德榜泰上其功先後交部議敘  
四川賊勢既衰高均德餘黨高二竄甘肅六年正月入陝犯山陽  
富僧德赴援斬千八百級追至鎮安射殺高二三月龍紹周自大  
甯竄平利遇官兵折入湖北竹谿登山拒戰富僧德以精騎襲之  
賊潰走四月賊走房竹我兵邀之於山口不及富僧德急追殺賊  
千餘拔出難民無算賊至竹谿樊人傑及藍號陳朝觀等自陝來  
會旋入白河圍民寨我兵別攻黃石板賊營射陳朝觀獲之賊懼  
解圍沿洵河而東富僧德領前隊追之賊自紫陽新灘渡添德溺  
死八月隨賽冲阿追龍逆敗賊於平利賊竄興山冒雨進攻殲擒  
數百人屯九道梁以遏賊勢十月入川朝白號劉朝選於開縣劉



逆僅以身免又遮敗青號陳侍學於大竹以樊人傑等勢猶熾復入楚七年四月師次巴東偵知樊逆將就藍號蒲添寶於東湖隨德楞泰疾馳一日夜出二賊聞賊大驚解去因逐樊逆其黨王國賢還戰富僧德等擊破之東追蒲添寶於上龕山中閒道繞入賊恃險無備敗走乘勝追擊僞先鋒冉起本揮刀拒戰富僧德射中其背馬蹶墜崖得其翎帽 諭曰富僧德侯辦竣蒲逆後以應升之缺升用樊人傑趨均房提督長齡截之入竹山德楞泰分兵追蒲逆自率富僧德等攻樊逆於白鐵溝山中會大雨驅賊臨河三面蹙之首逆樊人傑溺死奏入 賞富僧德副都統銜復交部議敘七月副都統色爾滾追蒲逆入興房交界山中請濟師富僧德



借副將馬瑜以步兵往賊出入川楚邊界我師窮其所向十月至竹谿賊黨散盡首逆自殺富僧德與副將何君佐搜斬馬鹿坪等處餘匪補鑲黃旗漢軍副都統九月陳侍學與其黨熊翠分擾巫山巴東熊逆爲四川兵所敗入楚糾眾副將馬元遇賊於大甯以賊眾不敢擊德楞泰檄富僧德等合追賊北竄竹谿屯謝家坪富僧德合諸路兵於紅茶園以五鼓斫賊營乘高大呼馳下賊驚竄死傷枕藉獲熊逆妻子及僞軍師張書漢 上嘉其功會王國賢餘匪擾漢江南岸富僧德入陝藍號戴世傑等踵至竹谿復還擊之適參贊已翦戴逆進擊與山巴東之賊賊東走富僧德擊之豐玉坪殄其眾遂由歸州進勦巫山陳侍學賊營江岸上下富僧德

與色爾滾先發夜至其地獲賊謀知首逆所在引騎兵直擣黃泡池乘賊酣寢熱其營賊驚潰遂縛陳逆及僞總兵李學進斬僞總兵何從盛等餘賊北竄追之五百餘人無脫者收贏馬器械甚夥得旨嘉獎大軍駐奉節分兵搜餘匪富僧德入大甯老山擒賊數十遣參將沈洪等擊賊於王道河又剿賊於黃溪均有斬獲八年正月與蒲尙佐防陝西零匪於西鄉還由雲陽至奉節劉渣鬚子者青號餘黨也合黃號陳大貴將竄楚之房竹聞我兵至避入烏雲頂老林破民寨據之蒲尙佐乘霧雨出寨後山頂俯攻賊寨寨循當陽河竄富僧德伏騎兵自山溝衝出賊爭赴水敵陳大貴擒僞先鋒熊富劉逆引餘眾北逃富僧德率參將馬文斌追之賊

入大甯老林富僧德扼其前馬文斌躡其後賊竄出竹山之漆樹  
梁我兵圍攻劉逆挺身走追刺殺之分兵剪偽總兵劉姓於屏風  
寨捷入得 旨富僧德著交部議敘三月逐白號宋應伏於楊家  
山搜黃白號零匪於竹山隨德楞泰由奉節西行搜川楚邊界之  
賊七月至太平三省肅清大兵凱撤九月回京調鑲黃旗蒙古副  
都統十年八月調熊岳副都統 上東巡以關外文報遲延命偕  
副都統毓秀至錦州查催尋以 蹕路所經未能灑水清塵自請  
議處 上特寬之十一年正月 賜御製松山戰詩三月以洋盜  
蔡牽擾臺灣發東三省兵往剿 命富僧德等分統之會蔡逆已  
敗不果行十四年調西安左翼副都統十七年署將軍十八年九



月八卦教匪李文成起河南陷滑縣陝甘總督那彥成督師剿賊命富僧德以西安滿兵隨往十月抵滑時賊分屯道口桃園集各萬餘與滑縣相持角勢張甚我兵稍前道口賊傾巢來抗那彥成與巡撫高杞提督楊遇春合兵戰於中市所富僧德與總兵特依順保以馬隊橫衝之斬千四百級賊敗還據濠自守十一月我兵七路攻道口焚滑縣以撓賊援富僧德特依順保爲左路先驅近村伏賊躡之而入賊萬五千遽起拒戰我兵競進奮擊越濠直前遂燬賊巢殺賊萬計燒斃良卦賊首黃興相等賊勢大蹙論功得旨議敘進圍滑縣桃園賊來援城中出賊應之富僧德偕楊遇春等截擊賊不得合越日復戰桃園賊殲焉又與總兵徐錕等搜剿



石佛鋪等處匪黨賊援絕於是賊目劉國明乘圍未合夜以眾八  
百入城翼李文成出走畱離卦教首徐安國等守城富僧德與總  
兵楊芳等追文成至林縣那彥成以圍城兵少檄富僧德還攻滑  
楊芳等追及文成於輝縣殲之事具楊芳傳賊聞文成已誅益死  
守富僧德奮勇攻城傷左臂 諭曰富僧德打仗受傷滑城既克  
西安滿兵可先撤卽著富僧德管帶回營官軍攻滑凡四旬十二  
月癸卯拔之富僧德偕高杞墮東門而入俘斬二萬生擒徐安國  
教匪悉平 賞那彥成以下平賊功富僧德下部優敘先是陝西  
兵赴河南 上以南山民氣浮動慮匪徒乘閒竊發故有先撤西  
安兵之 命城未下岐山三才峽匪徒果乘閒爲變滑城已定陝

甘兵皆撤 命富僧德并將之而西相機辦理十九年二月抵陝西會總督長齡等已破賊富僧德與巡撫朱勳防蓋屋鄠縣一帶賊平以所部凱旋二十年以副都統銜充塔爾巴哈台參贊大臣二十一年改領隊大臣二十三年九月 召還京授正黃旗漢軍副都統十一月兼鑲藍旗護軍統領二十四年調盛京副都統二十五年署將軍尋 召還授正紅旗護軍統領在乾清門行走道光元年兼管健銳營二年兼正紅旗漢軍副都統三年兼虎槍營統領調正藍旗滿洲副都統四年調鑲白旗滿洲副都統十二月以護軍鍾德在隆宗門外叩 關不能彈壓革護軍統領職任罰俸五年管善撲營事六年授右翼前鋒統領八年調正黃旗蒙古

副都統九月 上謁 東陵署 行在領侍衛內大臣十月 賞  
紫禁城騎馬九年 扈 蹕盛京十年正月充總詣達三月投黑龍  
江將軍十二年奏言布特哈八旗打牲處無餉兵丁生計拮据請  
選嫻習騎射者千二百名爲定額令採貂皮其無俸世職官四十  
八員無餉牲丁千五百餘名應裁減并免交貂皮以示體卹 從  
之十四年十一月疏劾齊齊哈爾協領金寶柱署呼倫貝爾總管  
受請託濫補領催缺罪應褫職遣戍 命如所請十二月調西安  
將軍十九年以受屬員饋送爲防禦靈住所訐 命隆文往按得  
實部議革職 諭曰官僧德以一品大員不知檢束予以革職咎  
有應得姑念前在軍營著有勞績革去將軍加恩賞給頭等侍衛

在大門上行走二十一年英吉利夷船擾浙江海疆不靖九月  
命以副都統銜往山海關防堵十二月授正藍旗蒙古副都統尋  
兼正藍旗護軍統領事竣還京二十六年卒 諭曰富僧德宣力  
有年前在軍營屢著勞績一切官差均屬勤奮茲聞溘逝實堪憫  
惻著加恩賞給都統職銜應得卹典照都統例辦理任內處分悉  
予開復尋 賜祭葬如例 子諡武壯子定善見官二等待衛

右 國史館本傳





韓肇慶

韓肇慶漢軍正紅旗人嘉慶十三年由武舉人補西直門門千總十九年升廣東南韶連鎮標左營守備道光二年升廣州協左營都司八年升湖州鎮中軍遊擊時廣東盜會各匪滋事總督李鴻賓派肇慶前往截拏尋獲匪犯譚大華等李鴻賓以聞旨著下部議敘九年署南雄協副將先是肇韶連各府州交界時有土匪出沒疊次搶劫肇慶入山搜捕擒獲一百四十名先後奏入均下部議敘十一年署順德協副將帶兵馳往東莞縣協拏聚眾斃命首犯李得原等及從犯李守成等三十一名十三年擢廣東撫標中軍參將以前搜山獲盜案內得旨賞戴花翎十六年署督

標中軍副將尋派查海口於伶仃洋大嶼山急水門等處陸續擒  
拏走私快蟹多隻匪犯多名並起獲紋銀器械等件奏入得旨  
以副將畱於廣東補用十七年拏獲由暹羅國販私回粵人犯謝  
均迎等起獲金葉洋銀並金銀銅器皿玳瑁玻璃竹木等物小艇  
一隻復於急水洋拏獲運銀出洋匪犯丁亞三等十一名起獲紋  
銀番銀鴉片煙泥並槍械各件十六年十七年拏獲販運紋銀開  
設艇館走私各案凡七起總督鄧廷楨以肇慶歷次獲匪有功奏  
補廣州協副將從之九月會同南海縣知縣查辦會匪先後擒  
獲聚眾結盟匪徒黃亞有蕭亞八等十八年二月鄧廷楨奏保肇  
慶守潔才優堪勝陸路總兵之任七月送部引見仍回本任十

九年二月在白鵝潭河面擊獲私販鴉片之巡役李貴梁亞洪等旋調署南雄協副將擢湖南永州鎮總兵七月都司蔣大彪守備倫朝光等通同詐贓案發總督鄧廷楨欽差大臣林則徐會同審訊以該員皆係前督標中軍副將韓肇慶派委之員難保無知情故縱請暫行革職根究 從之二十年鄧廷楨奏言韓肇慶於蔣大彪等兩次得贓舞弊毫無覺察惟尙無知情故縱劣跡請開復革職處分仍交部議處並勒令休致 諭曰韓肇慶尙無知情故縱劣跡究屬有乖職守且精力就衰著卽革職毋庸再行交部議處二十六年故子德普安徽鳳陽府同知

右 國史館本傳





保芝琳

保芝琳貴州興義府人嘉慶十五年由世襲雲騎尉授丹江左營  
守備二十二年升山西太原鎮標右營都司道光二年調運城營  
都司四年調吉州營都司八年升福建桐山營遊擊時喀什噶爾  
軍興芝琳以山西巡撫盧坤檄解運駝隻赴肅州交納續又接解  
軍餉畱營差遣事平經盧坤奏請鼓勵得旨遇有福建省應題  
缺出酌量升用十二年調臺灣北路協右營遊擊時嘉義縣匪徒  
陳辦等滋事福建巡撫魏元烺令提督馬濟勝督兵赴剿並檄芝  
琳率連江羅源二營兵四百名由五虎門渡截賊北竄之路又彰  
化縣粵民因亂與閩人互鬪粵匪蕭水生等乘機糾眾肆擾芝琳

以閩浙總督程祖洛檄督兵往捕冒險深入俘蕭水生及其黨十  
六人訊明伏法又以勦辦臺匪張丙等渡臺遭風由八里岔登岸  
猝遇粵匪圍攻淡水芝琳親冒矢石多所俘獲尋陳辦張丙等均  
就擒捷 聞 上嘉其奮勇 賞戴花翎十六年嘉義匪徒沈和  
等復聚眾焚掠戕傷弁兵南路匪徒多響應芝琳以臺灣鎮總兵  
達洪阿檄率兵隨往剿辦事平敘功得 旨遇有參將缺出儘先  
升用十九年九月補撫標中軍參將旋以臺灣中路匪徒胡希等  
滋事復隨總兵達洪阿帶兵勦捕俘獲首從逆犯復深入內山接  
剿事竣閩浙總督顏伯焘以尤爲出力保奏得 旨以副將升用  
先換頂帶十月授延平協副將十二月署浙江台州協副將二十

二年七月閩浙總督怡良以芝琳臨敵奮勇營務諳練遵旨保  
奏堪勝陸路總兵之任八月擢廣東潮州鎮總兵怡良復以芝琳  
出洋捕盜得力奏請暫畱閩省允之先是英吉利夷船疊次在  
臺灣洋面游駛達洪阿等以計誘戰勝俘戮多人入奏嗣英夷就  
撫訴稱達洪阿等妄戮遭風難夷朦混奏報上命怡良渡臺查  
辦至是二十三年三月查實覆奏詔褫達洪阿職調芝琳臺灣  
鎮總兵並諭怡良曰臺灣民情浮動恐乘機肇衅仍著飭令保  
芝琳加意巡防毋稍疏懈五月調漳州鎮總兵二十四年六月以  
所轄各營存儲穀價銀八千餘兩奏請於四月借給兵丁以資接  
濟報聞九月調福甯鎮總兵二十六年卒



右 國史館本傳

宗室敬敷

宗室敬敷鑲白旗人和碩肅恭親王永錫子嘉慶十四年考封三等鎮國將軍旋賞給二等侍衛道光十一年擢頭等侍衛十八年十月署正白旗蒙古副都統十一月授正紅旗漢軍副都統尋調察哈爾副都統二十年署察哈爾都統二十二年四月偕都統鐵麟遊旨酌擬稽查廢員章程一定出口限期以免逗遛一責成該管官員隨時查察以杜逃逸一另令蒙古官員就近稽查以昭詳慎一進內地置買口糧及因病就醫宜予限期以便催回一鈔黏姓名年貌籍貫以備稽查一曉諭居民旅店不許容留以絕棲止疏入詔行其四六月奏捐資添設鳥槍四百桿分給兵丁

請免造冊報銷九月以察哈爾八旗鳥槍全行帶往天津防堵復  
奏捐資添設鳥槍四百桿均得 旨俞允十二月調福州副都統  
二十三年偕將軍保昌奏鳥槍擡廠火藥力薄未能致遠捐製擡  
槍一百二十桿督工購造給八旗水陸各營分日演習如所請行  
又以各省駐防改應繙譯考試請將福州八旗漢文書院裁撤  
上是之二十四年二月署福州將軍六月以雨水較多滿營閒被  
淹浸請計口給賑並借支俸餉將坍塌兵房妥爲修理得 旨允  
行十二月遷福州將軍二十五年查明駐防成丁閒散尙多奏請  
續捐擡槍四十桿以資操演報 聞二十七年二月奏各營缺額  
師船未經補造不敷巡緝請 飭下督臣趕緊籌補足數旋 命

總督劉韻珂督飭藩司趕辦六月卒子銳莊輔國將軍三等侍衛  
銳藝輔國將軍銳芬輔國將軍三等侍衛

右 國史館本傳



--	--	--	--	--	--	--	--	--	--

清慶

清慶赫舍里氏滿洲正黃旗人曾祖扎拉豐阿官都統乾隆三十三年征緬甸陣沒 恩給一等男爵世襲罔替祖春凝官歸化城將軍自有傳清慶於道光二年由廕生引 見奉 旨以文職用籤掣工部筆帖式九年襲一等男爵在本旗當差十年軍政一等引 見奉 旨賞給三等待衛在大門上行走十六年以副將揀發貴州十七年署都勻協副將十八年補實二十一年署安義鎮總兵是年雲南普洱鎮總兵員缺經雲貴總督桂良以清慶認真營務訓練有方保奏擬陪給咨引 見十二月蒙 恩召見 特旨補授雲南普洱鎮總兵二十五年署雲貴總督吳其濬奏稱普

滇爲迤南極邊要缺兼轄車里等土司界緬甸暹羅南掌等處又  
近接暹羅屬日夏於騰地方巡防控御均關緊要清慶於該處邊  
防最爲熟悉今歷俸將滿例應轉調懇 恩畱任以資辦理奏入  
允之二十七年因公馳赴臨安事竣至元江州三板橋站感疾卒  
子蘇勒芳阿囊爵

右 國史館本傳

棍楚克策楞

棍楚克策楞博爾濟吉特氏滿洲鑲黃旗人父富連散秩大臣棍楚克策楞由六品廕生於嘉慶十五年授散秩大臣十九年授正白旗蒙古副都統二十年歷署正藍旗護軍統領滿洲副都統正黃旗護軍統領鑲紅旗滿洲副都統二十一年歷署鑲紅旗護軍統領鑲白旗漢軍副都統擢察哈爾副都統向例立決人犯及秋審旬決部文行至各省適遇正六十等月停刑期內該行刑衙門均嚴密封存俟過期辦理是年察哈爾以十月內奉到部文遽將絞犯薩拉圖處決偕都統祥保奏請交部議處部議降二級畱任上改爲降三級二十二年三月以失察總管策伯克扎布等藉稱



公用攤扣弁兵俸餉下部議處先是十月都統松筠奏請將張家口三旗協領作爲委前鋒翼長加給翎枝並請添設前鋒參領前鋒校等官棍楚克策楞扶同具奏 上責其隨聲附和 命革去副都統回散秩大臣任仍罰俸三年至是十一月入 覲曉曉申辯復下部嚴議限五日議上 諭曰內外大臣代屬員乞恩經朕降旨飭駁議處從未聞敢有怨及君上者君臣之義昭於天壤卽獲罪亦不敢懷怨況尋常小事不遂所請乎棍楚克策楞於召見時曉曉剖辯並稱伊因此奏獲咎眾人代爲抱屈感伊之恩轉使怨歸於上其意總自以爲負屈而巧託其詞於屬員之口居心實不可問況痛哭流涕指天誓日實屬膽大狂妄之極著照部議革

職交該旗王大臣嚴行督束二十五年 賞藍翎侍衛守護 昭  
陵道光六年 召來京仍在藍翎侍衛上行走九年遷三等侍衛  
充喀拉沙爾辦事大臣尋調英吉沙爾領隊大臣十年八月回部  
餘匪復倡亂安集延匪徒犯英吉沙爾城棍楚克策楞收集各卡  
倫軍營及在城官兵民勇遊 旨嚴密防守十一月賊以環築礮  
臺潛穴地道俱被官兵堵禦復由西北引水灌城水深三四尺棍  
楚克策楞督率兵勇用土填護適大凍冰結迭次乘夜渡濠襲破  
賊營圍乃解十一年事平經揚威將軍大學士公長齡保奏 賞  
頭等待衛十四年九月 召來京十一月 賞加副都統銜充塔  
爾巴哈臺參贊大臣十二月授鑲白旗蒙古副都統時烏梁海潛

入居住之哈薩克被逐遷出者已二十餘戶惟依扎噶土六百餘戶藉詞不敢西去轉向東移花額爾濟斯烏蘭胡素地方已遷之哈薩克亦尙逗畱觀望十五年九月命遴委幹員迅往科布多會同該大臣等查辦並 敕下土爾扈特盟長烏梁海散秩大臣就近分兵彈壓十一月遷內閣學士兼禮部侍郎銜十六年正月以塔爾巴哈臺鋪商耕戶多係山西陝西甘肅客民與蒙古貿易及戍兵遊牧相安無事已歷七十餘年惟離本省甚遠顧家不遑奏請照回疆例凡屬開鋪種地立有產業者准令攜眷就養以順輿情而安生計如所議行五月擢鑲藍旗滿洲副都統十七年十月 召來京十二月升綏遠城將軍十九年九月調黑龍江將軍

十一月入 覲 賞紫禁城騎馬二十年以御史瑞時奏吉林地方漸染澆風官民相緣爲奸並得規包庇各款遵 旨由京赴黑龍江道經吉林明查暗訪疏言吉林商販紬緞布匹等件例於旗民衙門具有並無違禁貨物甘結始准出售其山東福建客民均係乞濫伐木及手藝謀生相安已久惟違犯句同小鋪戶開設賭局經將軍等申嚴例禁地方官及管理街道之協領等任聽兵胥朦護未能驅除淨盡且該同知辦理旗民各案本年有百餘件未經審結亦屬晏安怠玩請將協領魁福同知慶年交部分別議處允之二十二年以保升防禦引 見之驍騎校星保箭射無準下部議處二十四年以失察傳習邪教案內軍犯海康之女在配潛



逃部議降三級調用上加恩改爲革職畱任二十五年以保升  
驍騎校引見之領催明庫善箭射無準下部議處二十七年卒  
諭曰黑龍江將軍棍楚克策楞歷任將軍以來辦事勤慎見在病  
故殊堪軫惜著加恩賞加太子太保銜准其入城治喪任內一切  
處分悉予開復應得卹典該衙門查例具奏尋賜祭葬子諡  
簡愨

右 國史館本傳

那桑阿

那桑阿鈕祜祿氏吉林滿洲正白旗人嘉慶二十一年四月軍機大臣遵例保送大員子弟那桑阿係鑲藍旗滿洲副都統阿勒罕保之弟由前鋒帶領引見授藍翎侍衛在大門上行走五月上閱射布靶那桑阿中五矢授三等侍衛二十五年六月升二等侍衛七月命在乾清門行走道光元年升頭等侍衛九月授善鵠射二年授善騎射六年七月回疆逆裔張格爾入卡犯順擾及喀什噶爾英吉沙爾諸城揚威將軍長齡檄調伊犁兵赴援伊犁領隊大臣悉出征上挑選侍衛三人爲領隊大臣各給廣儲司銀一百兩馳赴伊犁那桑阿與焉九月長齡奏言伊犁領隊止有

二缺那桑阿無缺可補應令馳赴軍營與巴圖魯侍衛等帶兵進剿得旨允准七年正月官兵分三路進剿擊賊於洋阿爾巴特莊那桑阿帶健銳火器二營兵爲右翼賊突下沙岡迎拒我兵槍礮齊施斃賊數百賊還據沙岡我兵冒鋒刃驟乘之賊大潰竄三十餘里復追擊於排子巴特殲賊無算生擒賊目五名內邁曼底阿渾藏有張逆糾結賊黨之書則尤張逆所親任者奏入上命長齡察功具奏並發玉扳指玉柄小刀等物賜之二月諸軍克喀什噶爾城那桑阿由回城東北越入得其要隘閏五月長齡奏敘官弁功績奉旨候補領隊大臣那桑阿著賞加副都統銜時各城辦事大臣及幫辦領隊大臣乏員諭長齡於從征各員內有

能勝回城辦事之任者秉公保奏以備簡用尋長齡奏英吉沙爾  
領隊大臣向歸喀什噶爾節制那桑阿打仗勇往人亦謹飭堪以  
勝任七月授英吉沙爾領隊大臣循例 賞戴花翎時以四城克  
復分別論功 諭曰上年逆裔張格爾滋事朕命將出師天戈所  
指四城立克今當凱撤竣功在事人員均應敘績加恩新授英吉  
沙爾領隊大臣那桑阿著交部從優議敘八年正月帶領索倫馬  
隊及固原漢南步隊六千人會長齡於阿爾圖什追剿張逆擒之  
於喀爾鐵蓋山回疆平英吉沙爾地當衝要那桑阿以不識文字  
懼不勝領隊之任屢向欽差大臣那彥成言其情嗣經那彥成奏  
言那桑阿槍馬嫻熟打仗奮勇並非無用之材乃清漢文義俱不



通曉每遇公事須印房章京爲之講解英吉沙爾雖有參贊經理而專城之責究惟領隊大臣任之那桑阿深恐貽誤求代奏調簡情詞至誠尙非規避查烏什辦事大臣布彥泰熟悉情形而未經行陣如以那桑阿調爲烏什幫辦大臣足備緩急疏入得旨允行十二月 召來京九年隨圍 召見 命仍在乾清門行走十二年授鑲黃旗蒙古副都統十四年四月授伊犁領隊大臣調補庫爾喀拉烏蘇領隊大臣五月復改授伊犁領隊大臣十五年巡邊會哨時哈薩克有近卡竊馬之賊那桑阿飭兵擣其巢獲賊五名及所失馬匹哈薩克夷酋阿哈拉克齊聞之畏懾願賠繳馬五匹以自贖奏入報 聞十七年回京供職二十一年以失察參領

石成私拴馬匹部議罰俸二十二年三月隨圍於圍河 賞穿黃  
馬褂五月英夷擾江蘇海口直隸總督訥爾經額籌辦海防 上  
命欽差大臣賽尙阿馳往天津督辦防剿事宜復以蒙古馬隊必  
得通曉語言之人爲之帶領方可指揮如意因 命那桑阿隨同  
馳往陳奏事件一并列銜並 賞給小卷小袖袍褂各一襲八月  
撤防回京十二月隨同軍機大臣八旗都統會議滿漢馬甲改設  
烏槍章程以窒礙奏請停止 允之二十六年奉 旨那桑阿年  
逾六旬毋庸在乾清門行走仍管旗務二十七年因病請假旋卒  
子雙喜雲麾使公中佐領

右 國史館本傳

國朝三才圖會卷之三十三

三十三

斌良

斌良瓜爾佳氏滿洲正紅旗人父玉德閩浙總督自有傳斌良由廕生捐主事嘉慶十年五月補太僕寺主事十月捐升員外郎充高宗純皇帝實錄纂修官十一年選授盛京兵部員外郎 實錄館奏畱以在京各部院員外郎補用十二年補戶部員外郎十三年丁父憂十五年授公中佐領十六年遷郎中十八年河南滑縣教匪李文成等倡亂直隸長垣等縣匪徒響應斌良隨協辦大學士托津赴開州防堵事平 賞戴花翎十九年京察一等記名以道府用尋 命發往山東隨協辦大學士章煦查辦事件二十年授兗沂曹濟道二十一年以河務情形未能諳悉改發江南以地



方道員補用二十二年補蘇松常鎮太糧儲道二十五年七月擢陝西按察使九月調河南按察使道光元年 召來京以四品京堂用二年補太僕寺少卿五年 命偕左都御史松筠赴三座塔會同熱河都統那清安查訊塔布囊克什圖等聽從色楞旺楚克詐贓訐控一案尋訊明誣控屬實治罪如律又查明東土默特一旗本無應禁牧廠除各村落酌畱牧馬荒地外其餘荒地如本人無力開墾應仍准募人耕種收租以資養贍儻有典當與民人爲業者治罪 允之六年回部逆裔張格爾倡亂 命斌良以頭等侍衛赴揚威將軍長齡軍營聽候差遣既 陛辭後以有理藩院書吏包安和等稟呈所存遠年回子爲奴檔案以張格爾之叔阿

布都哈禮在京潛住恐有勾結情事斌良不卽奏陳行至保定復繕摺交直隸總督那彥成轉奏軍機大臣遵 旨傳訊包安和等所供不符 召斌良回京質訊尋訊明包安和等藉端越稟希圖提拔分別責革枷號 上以斌良當時不卽斥退又不於起程前據實奏明殊屬不合 命降爲六部郎中歸部銓選七年補刑部郎中九年兼署內務府六庫郎中十二年丁繼母憂十六年擢內閣侍讀學士十八年升太僕寺卿二十二年 命往察哈爾均齊馬羣遵 旨選取驕馬八百匹派員解送京師備用並以兩翼總管布彥德等捐輸馬五百匹奏請 恩予獎勵 允之十二月升通政使二十三年七月升都察院左副都御史閏七月遷盛京刑

部侍郎十一月旗婦德吳氏等控雙城堡旗弁剝民肥己各款由  
步軍統領入奏 命偕盛京兵部侍郎倭什訥馳往吉林查辦尋  
奏原控三十三款除十四款並無確據外如私墾招租影射肥己  
應撥官田勒指未交應領俸餉不卽給發民人濫入旗檔浮丁賄  
充正丁等款均嚴訊屬實應請將協領哈清阿等按律懲治得  
旨允行先是京旗移居雙城堡時奏定每戶領熟地三十晌生荒  
地五晌其熟地招屯丁代種每晌交租糧五斗每年每戶可得糧  
十五石嗣以該處糧價每石糶京錢三百文計每年租糧十五石  
祇易京錢七千五百文一二口之戶亦不敷終歲衣食之需殊形  
苦累至是斌良等履勘其地目擊情形並據該旗呈訴以不諳耕



作漸至困窮奏請量爲調劑得旨體察情形悉心籌畫應如何  
教養兼施俾各食其力永無凍餒之虞方爲妥善尋議請於太封  
堆外圈存荒地六萬五千餘晌內撥出三萬晌交附近納丁陳民  
開種每晌徵大租京錢六百文每年合計全租一萬八千串以見  
在京旗五百九十八戶派之每戶每年給京錢三十串並撥阿勒  
楚喀等處甲兵四十缺由京旗挑補以資接濟其原領荒地及熟  
地有未種者飭查京旗自行補種或與屯丁之餘丁夥種分糧屯  
不准再有拋荒從前所設義學二所仍責成該協領等隨時稽察  
下戶部及吉林將軍經額布議行二十四年調刑部右侍郎二十  
五年兼鑲紅旗漢軍副都統二十六年授駐藏大臣二十七年卒



二十八年 諭曰駐藏大臣斌良由司員歷任司道游陟卿貳供職克勤經朕簡放駐藏大臣到任未久遽爾溘逝殊堪軫惜著加恩照都統例賜卹子延福三品廕生光祿寺署正慶福刑部筆帖式崇福兵部筆帖式錫福吏部筆帖式

右 國史館本傳

按斌良公前錄詩人徵略任刑部侍郎授駐藏大臣抵前藏卒似未到任故據

原職列卿貳嗣得 國史始知已到駐藏大臣任卒爰將史傳編入將帥

張成龍

張成龍江蘇崇明人由行伍拔補鎮標左營外委嘉慶二十年以  
拏獲盜犯朱富林鹽犯朱興隆等多名升奇兵營把總道光二年  
疊獲盜犯吳三徐赫傳等並起獲器械無算三年升蘇松鎮標左  
營千總七年以護送海運出力議敘一等送部引 見得 旨以  
應升之缺儘先升用八年升川沙營守備是年拏獲鹽犯馬勝章  
又在七山外洋獲三桅船一鹽犯龔小發等十六名私鹽四萬九  
千斤十年擢狼山鎮標右營遊擊十二年升川沙營參將十四年  
八月署京口協水師副將十月升京口協副將經部議以成龍在  
參將任內有疏防盜案與例不符奉 旨張成龍著退回川沙營

參將本任尋據總督陶澍奏京口協轄京左京右高資三營防大江南北水陸八十三汛江海盜梟出沒在在均關緊要成龍訓練嚴明操守清潔前於閱兵案內記名獎拔在案其營務整齊守潔才長遇事不避險難爲通省參遊第一自去冬委署副將以來正值漕船阻淺該員日夜經營辦理妥協平時躡緝巡哨亦極認真額請仍以成龍升補 上允之十五年奉獲販私匪犯丁林大等三十六名十六年二月以催趲回空漕船迅速歸次 命交部從優議敘十二月陶澍保奏成龍在任一年有餘護趲漕船緝捕盜匪均能妥速堪勝水師總兵之任疏入得 旨著軍機處記名以水師總兵用十七年升浙江黃巖鎮總兵二十年三月兩廣總督

林則徐保奏成龍心端守潔勇往直前在水師中洵屬不可多得  
此時各省水師以廣東爲最要廣東各鎮又以南澳爲最要可否  
調往廣東以資差遣五月調廣東陽江鎮總兵 諭曰張成龍到  
任後由該督詳加察看如果堪勝南澳鎮總兵之任再行奏請對  
調時間浙海疆不靖署閩浙總督吳文鎔以成龍在浙年久熟悉  
洋面情事請暫畱浙省俾資防禦 詔如所請二十一年調赴鎮  
海軍營防堵二十二年調黃巖鎮總兵二十六年升浙江提督二  
十七年卒

右 國史館本傳



皇清宣統元年...

...

趙龍田

趙龍田山東平原人嘉慶十四年二甲一名武進士授三等侍衛  
期滿以都司用十九年授直隸寶坻營都司二十三年正月署天  
津鎮標中營遊擊七月調署天津城守營都司二十四年實授仍  
署鎮標中營遊擊道光四年署葛沽營都司五年二月擢廣東南  
韶連鎮標中軍遊擊經直隸總督蔣攸銛以龍田在直年久熟悉  
地方情形緝捕操防均能得力催趨漕艘亦資熟手奏請仍留直  
隸升用 允之五月兼署天津鎮標中營遊擊尋實授六月江蘇  
省漕糧改由海運派員經理閱七月而告蒞龍田以在事最爲出  
力經欽差署漕運總督穆彰阿直隸總督那彥成保列一等請獎

命以應升之缺升用七年二月丁母憂八年署昌平營參將旋調署保定城守營參將九年五月服闋六月補授保定營參將十一月署涿州參將十年署河閒協副將十三年升開州協副將十四年調三屯協副將十六年軍政保列一等十七年二月引見得旨交軍機處記名五月授陝西延綏鎮總兵二十六年陝甘總督布彥泰劾龍田營伍廢弛諭曰延綏鎮總兵趙龍田聲名平常性耽安逸營伍諸形廢弛著卽勒令休致二十七年卒

右 國史館本傳

詹功顯

詹功顯福建福清人由行伍隨剿海寇蔡牽自嘉慶元年至六年擊賊於湄洲賊仔澳大小岞小灣澳小庠等處迭有擒獲拔海壇鎮標左營經制外委七年在烏拉外洋獲盜四名升右營外委十年在浙江青龍港洋面獲蔡逆夥匪二十八名十一年在竿塘生擒巨盜蔡天來及其黨洪檄洪曲十二年赴南洋追捕鳳尾幫匪船至大小岞外洋奪盜船一隻又在永甯外洋擒匪陳角等二十八名十三年二月升左營把總三月在大小岞外洋獲匪李貫等三十五名四月在獺窟烏拉洋面先後擒獲逆黨林民陳日等八十五名六月在東峇外洋獲粵省匪船二隻賊婦五名十四年四



月在白犬外洋攻蔡逆幫船擊沈無算七月擢水師提標中營右  
哨千總十五年六月在深滬外洋擒盜首紀尾等二十三名奪船  
一隻並礮械多件七月在東庠外洋擊沈盜船一隻擒盜蘇亮等  
三名十七年二月復調右哨千總八月在壁頭洋面攻獲塘沙五  
幫盜船三隻擒匪黨林永祥等二名十八年調澎湖左營右哨千  
總二十三年擢臺灣協水師右營守備二十四年署右營都司尋  
以戍兵黃克成楊科山互鬪滋事功顯坐鈐束不歸降補海壇鎮  
右營千總道光三年扮商船密赴福清東壁搜獲洋匪俞啟啟四  
年七月署艋舺營滬尾水師守備十一月升澎湖水師右營守備  
六年在龜山外洋截擊洋匪陳潮等二名七年在馬遮山洋面

碎盜船二隻追獲盜匪黃高山等十二年升澎湖協標右營遊擊  
十七年擢臺灣艦舩營水師參將二十年遷澎湖協水師副將二  
十一年七月閩浙總督顏伯黻以功顯熟諳海疆情形可以獨當  
一面保奏堪勝水師總兵八月升金門鎮總兵以英吉利夷船駛  
擾海疆仍暫留澎湖防堵二十三年十一月事竣抵任十二月在  
東滬平海後涵頭港等處洋面巡緝洋匪竊賊船三隻獲匪林進  
等四十六名尋經閩浙總督劉韻珂密奏功顯老成練達歷任水  
師四十餘年如慶年間禁逆滋事出洋攻勦疊獲夥犯其辦理營  
務訓練兵丁亦皆認真從事不尙虛浮堪勝提督之任尋授浙江  
提督二十四年四月督兵赴定海黃巖温州三鎮屬洋面巡緝節

次獲盜多名十月偕總督劉韻珂等奏浙東善後事宜增修礮臺  
各工分別緩急籌辦 從之十二月復偕劉韻珂等奏乍浦綠營  
兵房前經兵燹亟應建復以資戍守如所請行九月奉化縣匪徒  
張名淵等因圖減糧價聚眾阻考功顯檄參將百勝等馳援匪勢  
遂解 上以功顯派兵迅速調度有方下部優敘五月在東案外  
洋巡緝擊沈匪船並獲犯洪邦等六名二十六年因病奏請開缺  
允之二十七年卒子輝布政司經歷

右 國史館本傳

國朝耆獻類徵初編卷三百二十六目錄

將帥六十六

梁勝灝

廉敬

齊克唐阿

哈興阿

懷唐阿

李棠

特依順

吉明

陳顯生

額勒錦

善祥

馬麟輝

馬殿甲

胡超

崇福

德建

林方標



171-524

171-524

國朝耆獻類徵初編卷三百二十六

通奉大夫前署江西巡撫江西布政使司布政使湘陰李桓輯  
將帥六十六

梁勝灝

梁勝灝漢軍鑲紅旗人由領催於嘉慶二十一年中武舉人二十  
二年授藍翎侍衛道光元年升三等侍衛二年兼公中佐領三年  
揀發山東以參將用九年補德州營參將十四年調撫標中軍參  
將十五年升文登協副將十八年護理曹州鎮總兵二十年五月  
經巡撫托渾布保奏堪勝總兵之任六月護理登州鎮總兵時英  
吉利夷船犯順駛入廣東內洋滋擾各省海口設兵防禦二十一

年正月托渾布以文登協所轄之榮成汛爲登州屬最要口岸奏飭勝灝統帶弁兵駐紮督辦防堵事宜並以辦事奮勉督防得力其保舉應行引見之案請俟防堵事竣再爲給咨赴部 允之八月投浙江處州鎮總兵先是英夷由粵洋駛至福建攻踞廈門至是復由閩入浙陷定海縣城經欽差大臣兩江總督裕謙疏陳情形並堵勦事宜 上以浙江軍務喫緊止勝灝來京卽兼程馳赴裕謙軍營聽候差委是年浙省湖州府屬多雨歉收十二月歸安縣民嵇祖堂等藉災倡亂拒捕戕兵二十二年勝灝以巡撫劉韻珂參贊大臣署杭州將軍特依順檄偕金衢嚴道布彥博勒格定海鎮總兵陳述祖等統兵前往辦理事平回營二十五年九月

奉化縣匪徒因徵糧肇釁聚眾抗官滋事巡撫梁寶常馳往查辦  
並請添調官兵得 旨處州鎮標等營兵著責成梁勝灝統帶馳  
往會剿十月以紳耆縛送要犯匪黨畏法自首脅從解散地方肅  
清經梁寶常奏將前調官兵分別撤退飭勝灝帶兵回營二十七  
年正月至七月兩署提督二十八年九月擢貴州提督尋卒

右 國史館本傳





廉敬

廉敬馬佳氏滿洲鑲黃旗人乾隆六十年由官學生投貼寫中書  
嘉慶八年補內閣中書十二年三月充軍機章京六月擢內閣侍  
讀十五年京察一等記名以道府用尋授直隸口北道二十年二  
月擢廣西按察使五月丁母憂百日孝滿補內閣侍讀學士二十  
一年 命署理江西按察使服闋實授二十二年調雲南按察使  
二十三年以勦辦臨安滋事土夷出力 賞戴花翎二十四年調  
廣東按察使道光元年正月調江蘇按察使二月擢湖北布政使  
七月調江蘇布政使二年五月 命來京以三四品京堂候補旋  
賞頭等侍衛充西甯辦事大臣十月授山西布政使三年復 召

來京投太常寺卿六年轉大理寺卿九年擢察哈爾副都統十年  
署都統奏言察哈爾理刑官辦事用白文不足以昭詳慎請 敕  
下禮部鑄給察哈爾入旗理刑官關防如所請行尋以前任張家  
口監督刑部郎中景福審革嫌商藉端滋擾 命偕侍郎保昌都  
統武忠額查訊得實奏辦如律十一年八月充庫倫辦事大臣十  
月調正黃旗漢軍副都統十四年升兵部右侍郎十五年二月調  
刑部右侍郎時山西趙城縣逆匪滋事御史蔡子璧奏劾文武官  
弁畏縮退避 命偕刑部侍郎趙盛奎前往查辦尋以將弁等疏  
於防範勦捕遲緩奏請分別褫職遣戍總兵台費音不親帶兵速  
往巡撫鄂順安未能查明參辦均請交部議處 允之閏六月調

正黃旗滿洲副都統七月充崇文門副監督八月兼署戶部右侍郎九月轉刑部左侍郎旋以前在山西布政使任內失察趙城縣滋事教匪降四級畱任十二月 命往綏遠城偕將軍彥德審明茂明安旗扎薩克頭等台吉達特巴扎穆蘇荒謬妄爲屬實並圖薩拉克齊齊默特多爾濟糾眾訐控均按問如律十六年五月調秦甯鎮總兵兼總管內務府大臣九月擢烏魯木齊都統以葉爾羌參贊大臣興德喀什噶爾領隊大臣壽昌換防總兵劉允忠互相奏參 命往喀什噶爾會同伊犁參贊大臣奕山查辦十七年五月奏言壽昌形蹤詭祕確有實情惟收受餽送係劉允忠誣揭已革糧餉章京福奎那移庫銀屬實與德並無徇庇情事惟未能



國朝通志卷之三十三  
先事覺察應請將各員分別嚴議議處 允之又奏喀什噶爾原  
駐參贊大臣統轄換防總兵事權歸一自道光十一年改設辦事  
領隊大臣與總兵官階相等體制非參贊可比前葉爾羌參贊大  
臣璧昌擬章程十三條咨部立案據壽昌稱一事兩歧辦理掣肘  
臣悉心覆覈其立法本有參差遂致各存成見齟齬不合似宜量  
爲變通以期久遠無弊應請 敕下伊犁將軍葉爾羌參贊大臣  
等詳議候 旨遵行七月 命署葉爾羌參贊大臣尋偕特依順  
保奏言原定章程於稽查招佃屯田事務遺領隊而屬總兵已屬  
舛錯又民間命盜詞訟歸糧餉章京城守營遊擊會同辦理仍由  
辦事領隊大臣及總兵同爲稽察是營員干預民事亦與定例不

符請照西甯辦事大臣節制鎮道之例將該城辦事領隊大臣改  
爲辦事大臣節制地方一切事務其招佃屯田詞訟案件仍由印  
房糧餉回務章京分別管理惟盜案飭營緝捕獲日仍送章京審  
辦不准營員擅行訊斷再糧餉處鑰匙請改歸辦事大臣署內收  
管其循例奏咨事件請照和闐領隊大臣改辦事大臣之例辦理  
允之先是浩罕滋事經伯克回子等出力獲賊收復色呼庫勒地  
方至是伊犁參贊大臣奕山塔爾巴哈臺參贊大臣關福會同廉  
敬奏請將色呼庫勒回子歲貢折金布匹蠲免三年本年應貢硝  
斤亦蠲免並保奏出力之伯克等請予鼓勵得 旨允行十八年  
回烏魯木齊都統任遵 旨查勘宜禾縣未經開墾地畝廣爲招

佃以實邊儲又奏言滿營向無擡廠經前任都統長清飭營籌製  
尙未練習純熟請將此項擡廠歸入各項軍器內按期操演每屆  
春秋一併校閱報 聞尋以葉爾羌參贊大臣恩特亨額奏參喀  
喇沙爾辦事大臣金和前署參贊大臣任內妄改舊章並向和闐  
伯克措借銀兩各款奉 命於十九年正月赴葉爾羌訊辦得實  
奏入得 旨奪金和職並發往烏魯木齊效力贖罪三月遷成都  
將軍八月調烏里雅蘇臺將軍以前在庫倫辦事大臣任內失察  
哈克圖部院章京向商人等取用甄茶等物部議降一級畱任二  
十年復調成都將軍二十五年 命會同兵部尙書文慶四川總  
督寶興查訊駐藏大臣孟保濫提官物各款得實議罪如律二十



六年署四川總督先是陝甘總督布彥泰奏內地民人赴回疆領地耕種由各省官逐程押送 上命各督撫妥議二十七年廉敬奏言官爲咨送多所窒礙請由該民人地方官給發印結路票令自行前往 允之時漢州等處有匪徒滋擾經都司顏朝斌等帶兵擊獲要犯一百九十餘名什邡縣知縣濮詒孫等不分畛域不避危險併力訪拏廉敬奏請分別獎勵得 旨允行又奏籌緝捕經費得 旨准其在鹽茶公存銀內暫撥銀十萬兩發商生息每年歸還司庫五千兩其餘息銀卽存司庫作爲常年緝捕經費又 遵 旨會同駐藏大臣琦善查辦乍了大小喇嘛挾嫌殘殺互控一案尋奏言該喇嘛等經派員前往按照 敕書經典嚴行查訊



咸震懾省悟願退還侵占地土將各頭目分別治罪 上嘉之二十八年丁酉 命來京另候簡用十二月卒 諭曰前任成都將軍廉敬見在溘逝著照將軍例賜卹其在內一切處分悉予開復 尋 賜祭葬如例

右 國史館本傳

齊克唐阿

齊克唐阿蘇都理氏滿洲正白旗人嘉慶二十五年由黏竿處拜唐阿游補護軍校道光七年擢乾清門三等侍衛十年以勦辦逆回上命齊克唐阿偕侍衛巴清德舒凌阿齎送揚威將軍印信參贊大臣關防交長齡哈朗阿楊芳等祇領卽畱阿克蘇軍營差遣委用十一年三月隨長齡赴喀什噶爾辦理善後事宜十二月長齡奏將齊克唐阿交哈朗阿差遣尋隨哈朗阿回京十二年九月升二等侍衛十一月福建臺灣嘉義縣匪徒滋事命隨欽差大臣瑚松額參贊大臣哈朗阿馳往勦辦未及渡臺軍務已竣仍隨哈朗阿回京十六年九月以圓明園不戒於火齊克唐阿撲救

出力 賞加三級旋升頭等待衛十一月 命充皇五子諳達二十二年五月授尙茶正十二月兼鑲藍旗蒙古副都統二十三年以失察領催勒爾金泰捏造咨文冒領賞銀下部察議罰俸半年尋 命充皇六子諳達二十六年 命侍 今上皇帝充諳達二十七年遷正黃旗護軍統領旋調鑲白旗護軍統領二十八年卒 賞治喪銀二百兩

右 國史館本傳

哈興阿

哈興阿鈞祜祿氏滿洲鑲紅旗人奉天開原駐防由領催於嘉慶四年隨勦四川湖北等省教匪殺賊多名授七品頂帶八年凱撤十年升驍騎校十二年遷防禦十五年升佐領以熱河扈上行圍 御前進蹙鹿 賞戴花翎尋升協領十九年遼陽廣甯等處河水漲發沿河低窪田禾被淹以盛京將軍和瑛檄前往勘驗二十三年八月 上東巡隨扈引 見得 旨記名以副都統用十二年二月補陝西西安左翼副都統二十四年 上六旬萬壽 詔蠲各直省逋賦並免滿漢大小官員應賠未繳官項哈興阿偕將軍成德遵查西安滿洲營四品以下官員及兵丁內有例應代賠尙



未全繳者共二百四員銀七百四十八兩有奇咨部辦理並開單具奏報 閏二十五年 宣宗成皇帝登極遵 旨祭告西嶽華山西鎮吳山及陝境歷代帝王陵寢道光元年以西安滿洲營額馬向於歸化城買補相距在二千五百里外且查甯夏府及洮岷州所產之馬尤爲結實借將軍徐錕奏請改於洮州等處就近買補其節省官兵路費即可抵作沿途餵養之資下部議行二年先是嘉慶十三年將軍德楞泰以駐防兵丁日見生聚奏挑餘兵二百二十八名每月給銀一兩作爲無米養育兵至是十餘年來生齒更繁哈興阿偕徐錕奏請添設一百二十名其每月口糧請將本營馬廠節年餘贖地租錢一萬串發商生息動用又以駐防董

生就近院試入學鄉試定有中額其生員及已冠童生應設書院  
延師督課奏請將馬廠地租尙餘銀一千四百兩再撥借庫存豫  
備馬價銀三千六百兩一併發商生息爲延師脩脯月課獎賞等  
用均下部議行三年調山海關副都統先是雍正年間喜峰口八  
旗領催兵二百名每名賞隨缺地八十畝共一百六十頃招佃  
租種照市斗收糧以資養贍嗣於嘉慶十九年佃戶劉升等以地  
畝被衝呈訴遷安縣及戶部請易倉斗納租經該縣飭令暫照市  
斗每斗六升二合五勺交旗其餘三升七合五勺俟勘丈地畝明  
確補交旋於道光二年直隸總督委員文明熱地一百三十六頃  
有奇其租斗仍未議定至是十年之久每年應補交之租積欠至

二千餘石四年二月哈興阿奏請 敕下直隸總督飭照新丈地  
畝仍按市斗交租以符舊制並將歷年逋欠如數飭追如所請行  
六月調浙江乍浦副都統八年奏言乍浦滿洲蒙古駐防兵房三  
千四百五十間年久坍塌亟須修葺計需工料銀四萬六千餘兩  
應請豫借一年錢糧辦理分作八年扣餉歸款九年五月以衙署  
亦須拆修奏請於藩庫所存旗營牧租盈餘款內借錢三千串辦  
理分作十二年扣養廉歸款均 允之十一月復因衙署修理不  
敷續請撥款 上嚴飭之十二年十月 召來京十二月以年力  
就衰 賞三品頂帶休致十三年 賞半俸二十一年在開原本  
籍以不干己之事藉端插訟經盛京戶部侍郎宗室成剛等奏劾

將軍宗室耆英遵 旨查明屬實降六品頂帶二十五年以扶同  
商夥販賣私木並訛借錢文經禧恩奏准奪職審辦欽差侍郎廣  
福等鞠實奏請將家屬一併發往熱河嚴加管束 允之二十八  
年卒子安福盛京刑部筆帖式委署主事同案革職安祿二品廕  
生三等侍衛

右 國史館本傳



سجل الطلاب في مدرسة

1

## 懷唐阿

懷唐阿博爾濟吉特氏滿洲正白旗人始祖傅哈爾以功授佐領世襲旋復授騎都尉世職懷唐阿由護軍於嘉慶元年襲世管佐領兼騎都尉十五年揀發雲南以遊擊用十六年歷署提標右營遊擊城守營參將旋補鶴麗鎮標中營遊擊十七年歷署維西協永昌協副將二十年經雲貴總督伯麟豫保堪勝參將二十二年正月升元江營參將五月署提標中軍參將兼署左營遊擊道光元年二月升督標中軍副將尋護理普洱鎮總兵十月至二年六月復兩署普洱鎮總兵四年兼攝督標右營遊擊向例普洱鎮總兵歷俸屆滿三年卽移調內地另於副將中遴選堪膺是任者二

員送部引 見 上親簡授五年屆更調期兼署雲貴總督雲南  
巡撫韓克均以懷唐阿才具老成營務認真疊經署理是鎮熟習  
邊情入奏並給咨令赴部六年四月由部帶領引 見得 旨補  
授普洱鎮總兵 賜召對八月抵任九年邊俸三年任滿應卽移  
調總督阮元等以懷唐阿在任數年於邊務至爲熟悉控馭巡防  
諸臻妥協一時更代乏員援案疏請再行畱任 詔如所請十一  
年復屆畱任期滿補騰越鎮總兵疏請入 覲 諭止之十四年  
署提督十五年因病陳請開缺回旗調理二十八年卒孫恩蘇襲  
世管佐領兼騎都尉世職

右 國史館本傳

李棠

李棠四川成都縣人胞兄端由千總隨征廓爾喀陣亡給雲騎尉世職端無嗣以胞兄寅承襲寅復出師湖北戰歿加一雲騎尉部議歸併給一騎都尉寅亦無嗣請以棠襲嘉慶五年引見命就近發標學習十八年授四川懷遠營都司二十五年擢廣元營遊擊道光元年以本官駐防西藏三年廓爾喀貢使回國駐藏大臣保昌派棠護送並循例奏請令順道校閱營伍巡查邊界四年邊俸期滿駐藏大臣松廷保昌以棠訓練有方熟悉夷情於邊防事宜俱能實力辦理上年奏派查閱營伍並護送貢使均屬妥協奏請恩獎得旨以應升之缺升用升廣西賓州營參將署鎮



安協副將十六年擢義甯協副將十七年越南國夷匪農洪仁糾眾由歸順州之王莊卡外趨赴該國牧馬地方滋擾該國駐防文村總兵程文珠聞警逸棠以文村牧馬等處與內地小鎮安歸順州邊隘毗連恐竄入內地稟請廣西巡撫梁章鉅派兵嚴防經章鉅奏入報 聞十九年署右江鎮總兵二十年實授二十一年雲南廣南府野貓洞地方有黑河人滋事拒捕並在廣西所屬之西隆州各處散布揭帖希圖搶掠棠訪查確實函商巡撫梁章鉅奏請於右江所屬之中營邏村鎮安右營之小鎮安隆林營之永靜古障上林營之入砦周馬與廣南交界處所撥兵訪拏如所請行是年冬因病開缺二十八年卒

右 國史館本傳

國史館本傳  
卷三十三 將帥六十六

三

新編 古今事類考

三

--	--	--	--	--	--	--	--	--	--

特依順

特依順他塔拉氏正藍旗滿洲人駐防福州嘉慶二十年由前鋒校補委驍騎校二十四年補驍騎校道光三年升防禦四年升佐領七年升協領十三年臺匪滋事隨將軍瑚松額渡臺協擊首匪張丙陳辨等並生擒賊目吳鯨吳鮑事竣保奏 賞戴花翎十五年四月擢荊州左翼副都統九月兼署將軍印務十月授雲南騰越鎮總兵十七年正月調密雲副都統四月奏前在福州協領任內教演擡礮施放有準遠至二百餘弓較子母礮捷速便利密雲地屬衝繁請於隘口添設二十位於操防甚爲有益再密雲操演槍礮向來均無獎賞查旗營南西二門外空隙餘地每年地租所



入京錢四百六十八千文除夏間閱箭支搭涼棚約用錢三四十千文其餘作爲操演槍箭獎賞至新添擡廠二十位每廠需兵五名請將每年領廣儲司修理弓箭鵠檔公費銀七十兩作爲操演擡廠獎賞庶隨時鼓勵操防可期得力又奏玉田三河順義昌平四州縣所設官兵僅止操演馬步箭俱未設有鳥槍擬於密雲駐防原設鳥槍四百八十桿內挑選尺寸較長打把有準者每處撥給二十桿交各防禦承領令其傳習準頭至密雲操演大陣時卽由排槍內撥入八十桿以符原數俱如所請行七月奏古北口防禦一員係由玉田三河防禦轉調之缺玉田三河防禦二員缺出係不論旗翼通行揀選委驍騎校八名俱係按翼挑取惟八旗設

有驍騎校四員每二旗一員遇有缺出應在該二旗之委驍騎校領催內揀選而委驍騎校領催之缺又係按翼挑補設不得其人驍騎校廢於成例不能越次卽本旗有應放之二三人或有事故或不相宜未便遷就查古北口八旗原設領催十二名內委驍騎校八名領催四名嗣後有驍騎校缺出請照揀選防禦之例不論旗翼於八旗委驍騎校領催內通行揀選補放從之十八年奏密雲營原設腰刀閒有白鐵無鋼無裨實用請由京招匠前赴密雲飭協領監造四百把存庫備操上允其請尋授甯夏將軍十九年八月奏甯夏滿營原設各礮位俱因年久無裨實用原設腰刀亦閒有白鐵無鋼不能鋒銛請添設擡礮四十位腰刀四百把

以資操防甯夏滿漢城內並無製造擡礮匠人其綠營擡礮俱由  
西安製造運回本營工價運費約需銀五百七十八兩添造腰刀  
每把工價銀一兩共需銀四百兩滿營見有庫存地租平餘馬價  
生息歷年積存銀三千五百八十餘兩籲懇動撥九月奏甯夏營  
領催前鋒選補驍騎校進京時向由 恩賞項下例借銀三十兩  
津貼路費該員等職微力薄往返長途每形支絀查甯夏八旗官  
兵俸餉係由藩庫支領庫平而以市平發放積存平餘銀兩正可  
藉充公用請嗣後遇有領催前鋒補放驍騎校者卽於平餘項下  
借給銀六十兩擬正者二年歸還擬陪者四年歸還文武會試借  
給四十兩鄉試借給十兩俱作二年歸還如平餘積至三千兩兵



丁遇紅白事件照依官借之數借給二年歸還俟積至一萬兩再行請交甯夏府發商生息 允之二十一年五月入 覲七月英夷犯廣東擾及浙江 賞都統銜作爲參贊大臣馳赴廣東九月改赴浙江辦理軍務二十二年二月 命欽差大臣耆英馳赴浙江省城會同特依順嚴密防守三月定海官兵焚燒夷船獲有勝仗 上以特依順駐守省城盡心防禦下部優敘四月署理杭州將軍英夷陷乍浦特依順未能先事預防應嚴議尋奉 旨特依順著加恩改爲革職畱任所有前次從優議敘之處著一併撤銷旋因定海兵勇擊斃夷人焚毀船隻揚威將軍奕經奏入特依順仍加優敘六月奏准乍浦滿營官兵眷屬統歸嘉興暫行駐紮七



月奏乍浦失陷之日滿營陣亡弁兵業由奕經奏請 恩施外今續經查出尙有殉難男婦子女五十五名請造冊送部照例旌獎以慰忠貞又奏乍浦陣亡甲兵空缺不敷挑選因該營改爲陸路原設水手兵丁五十名應行裁撤請於此項兵丁內擇其技藝可觀者挑補先後奏入均如所請行九月授杭州將軍十月定海鎮海甯波相繼失守特依順不能設法救援應嚴議 上念其到浙未經派令督兵打仗卽乍浦失守時伊亦駐紮杭州改爲革職畱任八年無過方准開復十二月奏乍浦營設有公濟銀六千兩向爲紅白賞卹之用被兵以後應行扣還者無多請籌補以供支借額設軍器見存無幾請補造齊全以資操防又查明乍浦衙署兵

房被兵以後難資棲止請將各官兵俸餉借支修理至城垣卡房等工並副都統衙署統歸善後案內勘辦 從之尋鎮海夷船全數退出特依順奏見飭招集流散安撫居民至城垣衙署礮臺等工亦分別緩急次第辦理 上以英夷見在就撫准令通商浙江各海口仍應加意防範師船礮械如何接應各處隘口如何布置種種善後事宜 命特依順等各就地勢悉心妥議章程具奏二十三年二月勘明乍浦情形並會籌善後事宜奏乍浦爲浙江之藩籬而亦江蘇吳松之保障乍浦之守若固杭州固可恃以無虞江蘇亦可借以爲衛是其緊要不亞甯波城外距大洋不過里許左則山巒聯互右則塘岸表延形勢散漫並無口門原設葫蘆城

礮臺一座已被夷礮轟毀相度地勢一遇海口竊發不惟塘岸地勢平漫處處可登其沿海一帶山形卑薄皆可攀越卽多建礮臺亦恐未能得力況塘岸則路極偏窄山巒則徑屬欹斜又有不容多爲建築之勢若不整頓兵技徒事興築仍爲無補事機此時惟訓練兵丁爲第一要務使其技藝日精膽氣日壯設遇強寇憑陵不能勝之於水者可勝之於陸至於礮臺等項則當就舊有之基址興修以爲衝鋒之用未始不可卻敵正不待紛紛添造也疏入得 旨特依順等奏乍浦無險可守多建礮臺不能得力當以訓練兵丁爲要所見甚是卽責成該將軍等將該處滿營綠營官兵竭力整頓一洗從前惡習至地利所不足當以人事補之若因



其無險可扼遂置不議設遇海上有警必致束手無策若仍於近海口處建廠設兵一遇強寇轟擊勢必如前潰散尙安望其轉戰成功也耶所稱或可勝之於陸臨敵恐亦無把握也著耆英劉韻珂會同該將軍相度形勢悉心籌畫七月奏杭州滿營額馬六百匹以供差操南方地氣潮溼本難久畜兼之路多石砌馬力難施請裁二百八十四匹留馬三百二十四匹足供差操月支草乾可摶節銀三千七百三十一兩八錢六分八釐見在杭州兵丁操演槍礮新陣並擡礮烏槍準頭自應獎賞卽在摶節馬乾銀內劃出銀七百兩勻撥杭州滿營四百兩乍浦滿營三百兩爲春秋二季獎勵之需會部議覈減各省馬乾銀兩特依順覆稱杭州滿營裁撤實



控馬匹畱存馬價其原支草乾二箇春冬二季每箇一兩三四分  
夏秋二季每箇祇有八錢三四分加之餉銀二兩每月每兵支領  
三四兩數錢除扣還修屋出差紅白事件公濟借項以及製備弓  
箭隨時添補軍器買補馬匹外每月每兵實支二三兩以至一兩  
數錢不等其各官所支馬乾亦須津貼餽養並買補馬匹製備軍  
器以及修補衙署近因調撥防堵差務殷繁且逐日操演差操較  
前倍加若卽議裁減於生計不無窒礙請照常支領以資津貼  
上可其奏十一月奏杭州營設有小紅衣礮十位演放不能得力  
請仍交軍需局收存見存廣東大礮二十位酌畱八位遞年輪流  
演放其餘十二位浙江善後章程內所有添設礮臺尙須添鑄礮

位請交浙江巡撫擇扼要處所酌量分設二十五年勘明杭州乍浦滿營官員衙署自二十一年驟遇大雪益形坍塌請借給協領防禦驍騎校筆帖式廕監各員共銀一萬四千五百六十兩及時興修就應領俸銀內分作八年坐扣均如所請行二十六年調烏里雅蘇臺將軍二十八年因病請假 賞假調理二十九年正月卒 諭曰特依順見在病故著加恩照將軍例賜卹任內一切處分悉予開復應得卹典該衙門察例具奏尋 賜祭葬如例

右 國史館本傳

日本書紀卷之六十一

--	--	--	--	--	--	--	--	--	--

吉明

吉明鄂卓氏滿洲鑲藍旗人道光三年進士以主事用籤分戶部六年隨署漕運總督穆彰阿赴天津督辦海運事竣議敘儘先補用七年二月補官十二月以督辦奏銷黃冊出力下部議敘九年回疆軍需報銷完竣戶部尙書禧恩以在事司員承辦迅速奏請量加鼓勵得旨吉明著以本部應升題選之缺儘先升用十年以失察書吏私辦假照降二級調用十三年捐升員外郎十五年選泰東陵禮部員外郎二十二年四月戶部尙書敬徵奏吉明前在戶部行走有年一切事務均能實力講求請畱部在員外郎上行走俟有選缺照例補用從之七月補戶部員外郎二十三



年三月升翰林院侍講四月轉侍讀六月充日講起居注官十月  
升國子監祭酒二十四年三月充會試同考官十二月擢詹事府  
詹事兼充日講起居注官二十五年七月升內閣學士兼禮部侍  
郎銜十二月 賞副都統銜充葉爾羌幫辦大臣二十六年補鑲  
白旗漢軍副都統時回匪犯喀什噶爾卡倫吉明偕參贊大臣賽  
什雅勒泰分遣弁兵擊退賊眾二十七年四月賊首提拉就擒卡  
外肅清偕賽什雅勒泰奏請鼓勵出力人員 上允其請八月署  
葉爾羌參贊大臣九月喀什噶爾口外安集延布魯特糾約回眾  
滋事圍英吉沙爾城吉明遣遊擊花沙布雙來毛鴻鵬等帶兵往  
剿中途遇賊敗之偵賊勢向眾復令左營遊擊菩薩保筆帖式勒

爾津多赴援時花沙布等方營於黑孜布依賊恃眾圍逼雙來連日突戰親自矢石毀賊所築礮臺菩薩保等繼至合擊賊殲斃無算餘眾繞山竄逸捷入 諭曰吉明馳奏續派接應官兵協同前派官兵中途遇賊合力攻擊大獲勝仗發勦之始卽能令回眾膽寒深堪嘉尚吉明調度有方甚合機宜著賞戴花翎仍交部從優議敘又奏賊匪疊犯英吉沙爾城領隊大臣德齡遣兵出擊連有斬獲賊退走英吉沙爾暨喀什噶爾兩城俱就肅清疏入報 聞

十月 上命吉明會同奕山舒興阿毓書酌辦一切善後事宜是月派令將備率兵前往奎里鐵列木莊搜捕餘匪行至沙梁賊眾迎拒我兵奮擊大破之復躡蹤搜緝餘黨悉平 諭曰吉明等奏

官兵搜捕餘匪回莊肅清一摺該莊均係朵蘭回戶前此屢經附  
逆此次官兵往捕仍敢抗拒實屬怙惡不悛見經悉數殲除庶足  
稍示懲儆十二月調正黃旗滿洲副都統二十八年正月奏請鼓  
勵英吉沙爾守城文武員弁兵勇 上允所請又奏巴爾楚克屯  
地自軍興以來多被蹂躪所有該民戶等欠二十七年額糧應請  
分限二年秋後帶徵並請每戶借給籽種口糧俾資耕作亦限於  
二十八九年秋後一律交收還款得 旨允行三月實授參贊  
大臣十二月復授內閣學士兼禮部侍郎銜二十九年四月奏在  
逃回子全數投回 諭曰喀什噶爾英吉沙爾二城在逃回子一  
千餘名口見經全數投回雖在一年限外所有原業田產加恩仍

准給還以示體卹並著該城大臣督飭阿奇木伯克等妥爲安置  
勿令滋生事端閏四月卒 諭曰葉爾羌參贊大臣吉明由部曹  
游陟卿貳供職克勤經朕簡放葉爾羌參贊大臣上年辦理軍務  
諸臻妥協茲聞溘逝殊堪軫惜著加恩照提督例賜卹任內一切  
處分悉予開復應得卹典該衙門察例具奏該故員靈柩回京並  
著沿途地方官妥爲照料尋 賜祭葬 予謚恭愍

右 國史館本傳



日本書紀卷之六十一

三

陳顯生

陳顯生福建同安人由行伍歷拔千總道光六年閩浙總督孫爾  
準奏捕獲在洋行劫盜匪黃菁等一案顯生擊獲脅從盜匪邱全  
夥犯謝夏一名治如律八年升閩安協左營守備十一年遷右營  
都司十二年署左營都司尋以五虎洋面有英吉利夷船漂泊銷  
售貨物顯生在壺江等洋巡緝未能預防經署閩浙總督魏元烺  
奏參摘頂勒令驅逐夷船旋即遠颺得 旨賞還頂帶十五年護  
烽火門參將奉檄總巡浙洋時黃巖鎮總兵湯攀龍擊焚洋盜陳  
沅船隻並續獲夥犯王海榮供認在臺山洋面奪取漁船復究出  
陳沅等盜船先在南麂山百畝礁等處行劫銷贓閩浙總督程祖

洛奏參顯生等協捕不力 命下部議處十六年復經程祖洛題  
補遊擊送部引 見以箭射無準 諭令撤回都司任二十年護  
銅山營參將會夷船遊泊虎嶼洋面夷匪駕坐杉板船直駛內港  
勢欲上岸顯生帶兵巡緝槍礮兼施將杉板船轟擊沈溺擒獲梟  
水近岸之黑夷二人虎嶼夷船亦追逐遠竄經閩浙總督鄧廷楨  
欽差大臣郝篤藻等先後陳奏 上命以應升之缺升用二十二  
年升海壇鎮標右營遊擊二十四年二月署福建水師提標中軍  
參將尋護理金門鎮總兵三月升署烽火門水師參將二十五年  
賈授二十六年升署臺灣水師協副將二十七年三月經閩浙總  
督劉韻珂保奏堪勝總兵十二月升南澳鎮總兵二十九年四月

因病請開缺回籍調理 允之六月卒

右 國史館本傳



皇朝通志卷之五十七

七

額勒錦

額勒錦佟佳氏滿洲正紅旗人由領催補印務筆帖式嘉慶二十三年補驍騎校二十四年升印務章京道光元年補副參領五年授本旗蒙古副都統六年署正黃旗漢軍副都統七年九月署鑲藍旗護軍統領十月授科布多參贊大臣九年以差員前赴土爾扈特烏梁海等處將茶布易換馬匹被貝勒奇默特多爾濟控告經欽差大臣兵部尙書松筠查勘奏聞下部議處降爲三等待衛十一年賞二等待衛充喀喇沙爾辦事大臣十二年四月以烏魯木齊陝甘兩省派撥葉爾羌等處換防官兵過境奏請採買防兵路糧如所請行六月以前經調赴喀什噶爾陝甘綠營官兵

凱撤過境支應後請裁撤糧臺飭令糧餉章京接辦後起凱兵事  
宜以省糜費 允之十五年 召來京 命在二等侍衛上行走  
十七年授福州副都統十八年偕福州將軍嵩溥等奏請援照成  
案借項修理旗營兵房官署如所請行二十一年英夷犯順闖入  
廈門額勒錦隨閩浙總督顏伯燾統軍迎勦擊沈火輪船數隻尋  
南風大作逆船適占上游我軍失利廈門遂陷額勒錦偕巡撫劉  
鴻翱等退保省垣二十二年英夷就撫 上以各海口仍應加意  
防範所有善後事宜著詳察地勢悉心講求妥議章程具奏旋以  
軍政屆期得 旨額勒錦年力就衰著以原品休致二十九年卒

右 國史館本傳

善祥

善祥棟鄂氏滿洲鑲紅旗人以父西齡額官二等侍衛勦匪貴州陣亡廕襲騎都尉世職嘉慶二十一年二月揀發雲貴以都司用六月署雲南開化鎮標左營都司九月署右營都司二十三年署撫標右營遊擊二十四年閏四月署提標左營遊擊九月補開化鎮標左營都司署中軍游擊道光二年調臨元鎮標左營都司四年開化鎮標雲騎尉世職張起貴因不遵約束被革撫列營弊訐告詞連善祥經雲貴總督明山雲南巡撫韓克均訊明善祥失察所屬防汛兵丁收受商船規費奏請交部議處得旨暫革頂帶五年開復六年署元江營參將七年二月署雲南城守營參將十



一月升昭通鎮標前營游擊八年四月署尋常營參將九月署鎮  
雄營參將十三年二月升提標中軍參將六月署臨元鎮標中軍  
游擊十一月兼署提標右營游擊十四年署永昌協副將十五年  
七月護理騰越鎮總兵十六年四月兼署提標左營游擊十一月  
升永昌協副將十七年署開化鎮總兵十八年以升任副將赴部  
引見蒙 賜召對二十年六月護雲貴總督顏伯燾以善祥歷  
練老成技藝純熟整飭營伍振作有爲堪任陸路總兵保奏 上  
命送部引見二十一年四月普洱鎮總兵邊要缺出雲貴總督桂  
良循例揀選副將保升疏陳善祥曉暢營務熟悉邊情堪以擬正  
方給咨赴部適 簡授貴州威甯鎮總兵十月抵京疊蒙 召見

二十八年十 旨入 親 命留京當差授鑲藍旗蒙古副  
都統十一月管理新舊營房事務二十九年卒子瑛麟襲騎都尉  
世職

右 國史館本傳

竹書紀年

三

馬麟輝

馬麟輝漢軍鑲白旗人由武生充領催於嘉慶十二年三月拔驍騎校七月升步軍校十九年授四川重慶右營都司二十五年調維州左營都司道光二年以換防巴塘臺站期滿經總督蔣攸銛奏保送部引見得旨著回任候升四年擢福建甯中營遊擊八年升泉州城守營參將十二年臺灣嘉義縣匪徒張丙等滋事轉掠茅港尾二南溝等處提督馬濟勝督師進勦檄麟輝帶兵由蚶江廈門等處配渡前進尋隨大軍擊賊累戰皆捷賊又集萬餘人悉數南趨欲圖報復馬濟勝見賊氛方銳令謹守營柵不爲動逾久賊漸懈乃傳令兵勇四路齊出將大礮連環施放轟斃無



數餘賊奔潰我軍乘勝追勦斃賊三百餘人俘十九人復連日跟蹤勦捕追至安溪蔡地方生擒股首詹通獲礮械馬匹無算燬其巢府城一帶肅清是役也麟輝馭兵有術累次打仗出力馬濟勝以 聞十三年正月 賞戴花翎七月凱撤回營九月擢興化協副將十五年洋盜蕭圖陳沅出沒內洋與積盜曾武遙爲聲援官兵疊次追捕首匪均次第就擒麟輝偕海壇鎮總兵程恩高署陸路提標遊擊雙保先後獲夥賊蕭烏烏及陳烏陳蚊十六年四月護理汀州鎮總兵六月總督程祖洛奏保麟輝勤實認真韜略熟嫻堪勝陸路專閩之選十二月升甘肅西甯鎮總兵二十一年因病奏請開缺得 旨著原品休致二十九年卒子慶泰湖北漢陽

齊遊琴

右 國史館本傳

國史館藏書  
卷三十三  
齊遊琴六十六

三



馬殿甲

馬殿甲河南鄧州人嘉慶十六年一甲第一名武進士投頭等待  
衛充乾清門行走十八年九月逆匪林清煽亂遣其黨數十人潛  
入紫禁城內盡數就獲殿甲與有功 賞加二級二十一年選陝  
西黃浦營遊擊二十五年升署波羅營參將道光二年護理神木  
協副將三年軍政屆期陝甘總督長齡奏稱殿甲才具敏捷訓練  
克勤送部引 見得 旨准卓異加一級回任候升四年擢延安  
營參將尋升署定邊協副將六年七月護理延綏鎮總兵時逆裔  
張格爾滋事殿甲赴喀什噶爾軍營帶兵進剿七年以催趨軍餉  
出力經揚威將軍長齡奏調烏魯木齊濟木薩營參將 從之十



年八月安集延賊匪句結浩罕擾喀什噶爾地方帶兵往援十一月在葉爾羌迤南玉河殲獲多匪賊順河奔竄復由東南跟蹤邀擊大敗之尋接仗馘五百餘級獲馬匹器械無算賊竄入回莊踞險抗拒我軍用火環攻賊傾巢潰追至黑色爾迤南山隅殪賊甚多擒其目巴拉特又在英吉沙爾附近接捕餘匪斬獲七八百名喀什噶爾一律肅清十一月事 聞得 旨賞戴藍翎尋 賞換花翎十二年以邊俸期滿引 見得 旨准註冊候升尋經直隸總督琦善請改調直隸補用如其所請十三年補保定營參將十五年正月升署河間協副將六月調提標中營參將十六年五月兼署右營遊擊十月升浙江金華協副將十七年來京 召見一

次 諭曰馬殿甲係由直隸提標中營參將揀放著仍留直隸遇有副將缺出卽行補用十八年二月補河間協副將十九年以直隸總督琦善奏保殿甲堪勝陸路總兵得 旨交軍機處記名尋升廣東南韶連鎮總兵二十年值英夷滋事沿海戒嚴殿甲督飭官兵在海口防堵二十一年升署陸路提督二十二年軍務告蒞靖逆將軍奕山奏保殿甲訓練水陸壯勇防禦出力 賞加提督銜二十四年升廣西提督二十五年三月來京 召見四次六月抵任二十七年六月以所轄營兵爲盜拒斃事主殿甲坐紀律不嚴下部議處九月巡視轄屬營伍行次慶遠偵知湖南新甯縣猺匪雷在浩勾結粵匪李世得等竄入全州之咸水口焚劫村落殿

甲卽督兵進攻斬李世得於陣擒其子加邦並其家屬餘賊潰復  
追捕無遺時雷在浩已於湖南就俘殿甲復偵知灌陽平樂陽湖  
等縣復有匪徒乘間竊發移師勦之殲擒淨盡事平 上嘉其功  
下部優敘二十八年因病籲請開缺 允之二十九年卒子步衢  
山東臨清衛守備捐升都司

右 國史館本傳

胡超

胡超四川長壽人由行伍於乾隆六十年隨重慶鎮總兵袁國璜協勦苗匪在秀山縣黃泥垭等處殪匪多名給七品頂帶尋隨成都將軍觀成協勦湖北教匪克鳳山縣集鼓寨嘉慶元年由楚入川勦達州教匪以陳崇德踞大甯縣老木園官兵由洗沙谿乘夜進攻超奮勇撲卡受刀矛傷給六品頂帶三年六月隨四川總督勒保攻東鄉白號王三槐股匪於雲陽縣安樂坪克圓覺灘超馘數級受傷四處八月大兵擒獲王三槐殪匪數千超列頭等功尋以勒保檄率鄉勇八百名隨副都統銜前內大臣德楞泰進勦十一月擒巴州白號首逆羅其清其書於方山坪四年殲通江藍號



首逆冉文儔於麻壩寨超俱在事有功五年隨參贊大臣德楞泰由川入陝追剿太平黃號龍紹周股匪於老林賊恃眾迎拒超力戰俘馘多名受傷四處六年殲龍紹周於平利縣之盤龍山七年由陝入楚追剿襄陽黃號樊人傑股匪於竹山縣馬鹿坪偪至平口河賊眾梟水遁超率勇截擊之俘馘二百餘名首逆樊人傑淹斃奏入 賞戴藍翎八年閏二月復由楚入川追剿達州青號餘黨劉學禮於巫山縣賊踞老鴉寨抗拒超偕千總周應龍等以鄉勇二百八十名僞作賊夥入其隊爲內應大兵由鐙盞窩進乘夜內外夾擊賊大潰追殲三百人俘七十人並獲賊目熊富等嗣以首逆劉學禮由大甯縣復竄湖北界屯竹山縣老林超隨參將馬

文斌等追及之偵知劉逆擁百餘匪僱垣口頭冒雨先馳入其巢  
兵勇繼進賊眾潰一人袍服殿後一人顧呼劉元帥速走超知是  
首逆也迅追六七里刺其股劉逆猶力鬪超偕鄉勇胡貫等環擊  
乃踏敵之並顧呼之賊黨魏習獲馬經德楞泰入奏 賞銀百兩  
並 命以千總卽用尋補四川大昌營千總五月按勦餘匪疊有  
斬擒復由川入楚於興山縣白家河擒獲襄陽藍號趙鑑之姪趙  
聰觀等 賞換花翎六月於歸州大江北岸及白石崖方尖山等  
處按勦多名並擒獲賊目傅綱於柳池九年正月以巴州白號苟  
文明餘黨苟朝九擁眾竄匿川陝界老林超隨都司高星文等率  
鄉勇五百名協勦二月賊由平谿河竄藥扒超隨高星文等冒雪

霧夜行林箐間直搗賊巢賊困鬪勢甚鴟張適副將吳廷剛等由西北路齊進賊不能支乃大潰追奔至日連堽路仄冰滑未能仰攻賊亦旋遁四月賊復由打鼓坪竄望觀臺老林其地係川陝界嶺延袤數百里蹊徑險仄馬不能馳超隨副將閻俊烈等率兵勇三千五百名裹糧步行擊之八月升酉陽營守備九月以苟朝九未獲偕守備謝金章按緝於開縣馬家營一帶十月殲賊目魏思述於石堽子先是思述習教謀逆兄子藍翎千總魏忠才發其奸拘眷屬斃於獄思述潛身苟朝九營適忠才偕同隊六人奉檄往撫苟逆思述銜前恨悉被戕至是超知係思述欲生致之以洩忿直前扭擊思述猶以佩刀迎刺超遂捽之於地殲焉奏入 諭曰



守備胡超接出賊匪魏思述係戕害鄉勇軍功魏忠才等之賊被  
刀扎四傷始得就戮實屬可嘉著遇有應升之缺卽行升用十年  
升巫山營都司凱撤抵任十一年陝西甯陝鎮兵叛四川總督勒  
保檄往會剿事平回川又隨剿蓬州匪徒王得先等於瓦石坪十  
五年署重慶鎮標右營都司十六年署中營中軍遊擊尋復署右  
營都司十八年二月隨巡外委劉先進藉端詐贓超以備賞巡兵  
爲名輒自收存追聞有上控之信始退還寢事經總督常明訪聞  
查辦先於軍政案內奏參革職九月河南滑縣教匪李文成等滋  
事 命直隸總督那彥成爲欽差大臣偕陝甘固原提督楊遇春  
剿辦超投效軍營十月單騎入賊壘與數十匪搏戰斬賊目二奪



其旗又截擊於潛縣中市馘數十級並奪獲礮械時賊踞道口四出劫掠超率兵於胡家營三家村等處截殲千餘名進攻道口率馬隊先驅殪十餘匪大兵繼進遂克之追殲四千餘名並擒獲賊目黃興相等又於桃源等處擊殲多名那彥成等上其功以開復原官請 允之十二月進攻滑縣伏地雷火發城陷大兵乘之接戮無算並擒獲首逆徐安國牛亮臣等那彥成等以超屢戰奮勇奏 聞是月補陝西涇州營都司十九年正月以陝西南山木廂匪徒麻大旗等倡亂隨楊遇春進剿行抵胡家堡距賊眾所踞桃花坪僅二十餘里率馬步兵乘夜進比至賊已遁追十餘里馘百餘級偵知賊全股屯秦州柏楊嶺其地近傍老林兩山夾峙賊分

踞山巔大兵復乘夜進比至嶺下天猶未曙賊恃眾下壓被我兵奮擊馘二千餘級勢少卻追天明大兵分隊由左右山梁抄襲超隨楊遇春由中路仰攻見山前賊隊有二人冠服督戰遂偕都司趙起貴等距躍先登殪之賊驚潰大兵乘勝齊進追殲二千七百餘名並俘八百三十餘名訊知山前督戰者麻大旗及賊目劉二也又於老林接獲六百餘名二月龔貴股匪竄隴州聞大兵追勦與向小一股匪合屯東河橋將由階州入川大兵分三路總兵特依順保扼利橋都司劉夢熊截三岔超隨副將何占鼇等由中路乘夜亟進比至東河橋賊猶未遁相持逾時超偕遊擊劉印景等繞左山梁襲之賊驚潰馘五百餘級俘四百餘名追奔至利橋特

依順保迎擊之劉夢熊亦自三岔回擊三路齊攻殲向小一於陣  
誠二百餘級獲龔貴及其妻龍氏並賊目龍維通等三百餘名時  
參將王得勝等殲賊目張占鼈於徐家溝追擊餘匪至先坪老林  
適趙偕署都司孫光烈署守備楊殿元等分路成集腹背夾擊賊  
不能支追奔至石家嘴與副都統銜達斯呼爾岱等遇又合兵奮  
擊賊四百餘級俘三百九十名奪獲旗械無算賊悉平陝甘總督  
長齡等上其功 命以遊擊升用並 賞勁勇巴圖魯名號三月  
補甘肅固原城守營遊擊二十三年署陝西西鳳營參將二十四  
年署秦州營遊擊道光元年四月升甘肅蘭州城守營參將五月  
署陝西循化營參將二年青海野番肆擾抗不回巢起以總督長



齡檄隨總兵馬騰龍等率兵由貢額爾蓋向押馬圖一帶進剿三  
月戰於博洛托亥馘百數十級賊大潰截獲牲畜四千九百有奇  
四月追至烏蘭哈達賊猶踞險抗拒我兵步行仰攻適遊擊萬彪  
等率兵至併力合擊馘九十級俘二十七名獲牲畜四千六百有  
奇復逐北至喇凍雪嶺乘夜襲其帳馘百八十級獲牲畜六千有  
奇尋各路將餘匪剿逐殆盡長齡等以超身先士卒督戰甚力奏  
聞得旨著以副將遇缺卽補先換頂帶三年補甘肅永昌協副  
將經總督那彥成以番務甫竣奏暫畱循化署任籌辦善後事宜  
允之十二月抵永昌任四年駐防西甯察漢托洛亥六年二月署  
鎮海協副將時回部逆裔張格爾復句結安集延布魯特入卡滋



事七月超以欽差大臣署陝甘總督楊遇春檄隨赴軍營十月張  
逆陷喀什噶爾等四城遣其酋伊瞞等糾南北莊回匪三千扼柯  
爾坪以阻進剿之路安集延匪徒復由葉爾羌應援超隨提督楊  
芳進攻之抵和色爾湖距柯爾坪六十餘里賊來襲超等奮力擊  
走之馘三十餘級翌日畱都司孫旺等駐和色爾湖以斷後副護  
軍參領倭靈額等攻南莊超督隊攻北莊賊出二千餘眾迎拒勢  
甚鴟張超下馬持矛身先步戰立刃數人參將存住等繼之短兵  
相接戮匪過半餘向南莊逸適南莊亦被剿逐北兩軍夾擊盡殲  
其眾並戮賊目伊瞞等於陣奪獲牲械無算柯爾坪之路以通揚  
威將軍長齡等上其功 賞加總兵銜七年二月大兵自阿瓦巴

特等回莊三戰三捷進至渾河沿賊眾憑河築土岡列陣以待薄暮潛渡襲我左軍營超等擊走之是夜風猛甚嚮晨全師乘風躍渡入其壘賊驚潰沿途追殲殆盡直逼喀什噶爾城克之張逆先期遁五月四城俱克復以和闐逸匪千餘遁匿色勒庫爾卡倫超偕參將王登科等追至瑪雜馘百餘級俘三十五名復抄新地溝截擊盡殲其眾並戮賊目左霍爾等奏入 命以總兵升用尋復下部優敘十二月補四川重慶鎮總兵以畱營未赴任是月張逆糾馬步五百餘匪仍由開齊山竄阿爾圖什復謀滋事以回眾不附折回喀爾鐵蓋山超偕提督楊芳追及之殲其眾張逆猶擁三十餘騎見官兵逼近棄馬登山超偕都司段永福等亦舍騎而上

躡山巔張逆將自剄超奪其刀擒之並賊目八名餘悉就戮八年  
正月捷 聞 賞加提督銜並騎都尉世職七月入 覲 上以  
超屢著戰功生擒首逆 命在乾清門侍衛上行走並 賞蟒衣  
料袍掛料大小荷包飲至與宴八月繪像紫光閣 御製贊曰雄  
勇超羣名實克稱步戰柯坪殲賊取勝鐵蓋追馳奉將軍令手縛  
逆酋推恩功定是月署直隸古北口提督九月署陝甘固原提督  
十一月補漢中鎮總兵九年升甘肅提督具摺陳謝 諭曰汝其  
善體朕意潔已率下認真整飭營伍斷不可稍存恃功之心或致  
縱佚仍當一力慎勉尋奏抵任又 諭曰整飭營伍訓練士卒汝  
原熟悉然必要行之以誠實持之以久遠無論人材事務不可崇



尙虛文總期功收實效十年八月安集延餘匪尙結浩罕復入卡  
茲擾官兵迎剿被害遂圍喀什噶爾英吉沙爾城並分掠葉爾羌  
之色呼庫勒將取道樹窩子直撲阿克蘇以阻西四城援兵後路  
陝甘總督楊遇春檄超率兵四千馳往協剿超率前隊行抵察巴  
爾楚克亦欲取道樹窩子先解喀什噶爾圍以道整多伏孤軍難  
於深入俟所隸諸鎮兵咸集改由葉爾羌大道迅赴救援十一月  
抵英吉沙爾圍已解沿途接剿餘匪直徧喀什噶爾城賊聞風遁  
圍立解其薩漢莊竄匿千餘匪復分兵三路追剿俘戮殆盡先是  
超抵察巴爾楚克時以所隸諸鎮兵未集欲待其至然後發經欽  
差大臣協辦大學士威勇公長齡以遷延奏劾部議褫職至是相



度機宜以速補遲臺路既清二城之圍亦解超所奏聞屬實 上嘉其有膽有識 恩予免議十二年凱撤回任十三年調陝甘固原提督十四年以甘肅皋蘭縣匪徒鄭曼年糾眾滋事坐失察鑄級畱任十六年十月以前任古北口提督時失察營兵王文魁習教復鐫級畱任十二月入 覲 上垂問陝甘軍務甚悉 命在御前侍衛上行走二十年陝甘總督瑚松額奏陝西漢山山境遼闊界連川楚超籍隸四川前從征南山有年地理民情具悉請 敕往周巡並閱陝西漢中營伍如所請行二十一年二月抵漢中閱操畢乞假就近回川省墓 允之八月英吉利夷船沿海駛擾超遵 旨率陝西兵二千名赴直隸山海關防堵行抵榆次縣以

浙江鎮海縣失守 命超爲參贊大臣偕揚威將軍奕經赴浙剿辦尋復道 諭畱防天津九月偕直隸總督訥爾經額籌畫機宜奏請扼要駐葛沽以爲策應 允之十月授欽差大臣偕 御前大臣郡王僧格林沁等查閱直隸山東沿海形勢並設礮演放各事宜事畢回葛沽營復偕訥爾經額請 賞防兵及陝勇棉衣上如所請並 賜裘一襲二十二年英夷就撫撤防歸伍下部議敘並 賜文綺四端二十五年正月調甘肅提督六月西甯野番滋事署西甯鎮總兵慶和被戕超督兵赴永固進剿以餉運屢被番劫且所轄肅州鎮兵延玩不遵約束經署陝甘總督惠吉奏劾部議褫職 上加恩改畱任八年無過方准開復十一月以所轄

甘涼營馬缺額未經隨時咨報部議鑄三級調用復加恩改畱任  
二十六年五月 上以超辦理番務懈弛 命陝甘總督布彥泰  
查奏尋奏入 諭曰胡超有統領邊疆彈壓番夷之責乃去秋由  
永固進兵之際輒調極遠之漢中官兵故爲延宕以遂其苟安之  
計本年林則徐密咨派兵赴野馬川一帶地方堵截又不能卽行  
調往節次徒事添兵並未辦有成效著交部嚴加議處部復議褫  
職 諭曰胡超著卽革職因念該提督曾經出師著有微勞著仍  
畱騎都尉世職交布彥泰差遣委用以觀後效十月以病乞休  
尤之二十七年布彥泰閱固原甯夏營伍以歷任提鎮操防懈弛  
追論其咎下部議處 上仍畱其世職二十九年 予食半俸是

歲卒子允林湖北鄖陽府知府候選道襲騎都尉世職允權議敘  
都司銜

右 國史館本傳



--	--	--	--	--	--	--	--	--	--

171-604

12

崇福

崇福圖博特氏蒙古正白旗人祖理藩院尙書佛爾卿額自有傳崇福由大員子弟挑補鑾儀衛整儀尉歷升冠軍使道光三年以副將揀發福建嗣經閩浙總督趙慎畛孫爾準先後奏請於福建浙江兩省通融補用 允之六年臺灣淡水廳屬民人與粵人械鬪兼有銅鑼灣粵匪戕害漳泉兵丁首犯就獲孫爾準復檄崇福帶兵渡臺緝捕餘匪事竣以出力保奏 命下部議敘七年補浙江樂清協副將九年崇福以所屬都司蔣廷熊辦事竭蹶不治輿情詳請撤任蔣廷熊又以崇福借貸不還挾私詳撤等情控訐經孫爾準奏將崇福解任研鞫旋即訊明蔣廷熊控訐含混不實業

已革職應毋庸議崇福借銀雖係扣存廉俸內應捐公用之項惟既經扣捐復因借用致滋藉口究有不合應請交部議處十一年署衢州鎮總兵十二年經署閩浙總督魏元烺保奏崇福勤敏明幹曉暢營伍堪勝總兵之任送部引見記名尋授湖南永州鎮總兵十六年湖南新甯縣猺匪藍沅曠聚眾滋事撲武岡州城崇福帶兵堵截逆匪東竄要路馳赴該逆起事之九隴庵及附近各猺峒逐細搜捕擒匪黨七人焚燬賊巢又督同寶慶協副將托精阿拏獲賊目雷通仁等十二人復圍勦新甯縣屬馬股山竄匪擒陳仲得等四十餘人嗣因查明藍沅曠習教謀逆始事在十五年六月經湖廣總督訥爾經額將失於覺察之歷任文武各員奏請

交部議處奉 旨崇福著降一級畱任十七年以軍政造冊遲延下部議處十九年丁母憂回旗二十年 命署理貴州古州鎮總兵二十二年服闋實授二十四年奏言前奉 諭旨以擡槍擡礮爲軍中利器惟貴州地方山嶺崎嶇礮重不可過二十三斤見已遵製二十四斤擡礮三十位十四斤擡槍三十桿分飭弁兵演習湖前在福建剿捕番賊時帶有行營礮位短小輕便而能致遠古州界連楚粵山深林密此礮攜帶得力先經依式製造兩位施放有準見複製二十位並飭各營均將槍礮依式製造古州鎮營額設鳥槍內有嘉慶十四年請製之七百八十一桿其一百桿爲盤絲成造尙精餘皆合瓦舊式兼之年久潮鏽不堪應用見捐廉



製造六百八十一桿悉依盤絲之制庶器械精良冀收利用疏入  
允之三十二年四月以湖南新甯縣會匪李沅發不靖 上命貴州  
巡撫喬用遷調兵協勦崇福馳往湖南邊界堵截分飭弁兵奮力  
攻擊殺斃多匪賊竄回楚粵交界之楊梅巖時三省官軍會集崇  
福偕貴州提督秦鍾英鎮遠鎮總兵秦定三在黎平古州與廣西  
交界之古宜一帶追擊賊走金峰嶺我兵併力兜圍登山勦捕生  
擒首逆李沅發餘黨盡數殲除捷入 諭曰此次逆匪李沅發滋  
事竄至貴州交界地方經該省文武員弁督率兵勇堵勦兼施俾  
逆匪無從分竄得以早就殲除自應量予恩施古州鎮總兵崇福  
著賞戴花翎十二月卒 諭曰貴州古州鎮總兵崇福本年堵勦

楚匪尙屬出力曾經賞戴花翎茲於陞見來京因病出缺加恩著  
照總兵例賜卹任內一切處分悉予開復應得卹典該衙門察例  
具奏尋 賜祭葬予阿揚阿藍翎侍衛

右 國史館本傳



德建

德建初名德保住博爾濟吉特氏蒙古正黃旗人始祖韋徵以隨  
征錦州功順治二年 賞雲騎尉世職德建由拜唐阿於嘉慶十  
七年授藍翎侍衛二十三年補三等待衛二十四年補奏蒙古事  
侍衛道光四年改今名六年升二等待衛襲雲騎尉世職七年兼  
公中佐領九年授四川永甯營參將十年升署維州協副將十二  
年實授十三年調督標中軍副將十四年九月丁母憂百日孝滿  
由旗帶領引 見 命在原衙門二等待衛上行走十六年服闋  
得 旨仍以副將用十七年補山東沂州協副將二十年調膠州  
協副將二十一年沂屬蘭山縣有民婦吳姚氏被竊受傷一案德



建以前在沂州協任內例應回任勒緝巡撫托渾布以海防緊要  
德建已在任年餘請仍調補膠州協副將以資熟手得旨允行  
二十三年舉卓異尋擢河南河北鎮總兵二十六年命來京  
賜召對上以其年力就衰著以原品休致三十年卒子裕昌棟  
發雲南遊擊襲世職

右 國史館本傳

林方標

林方標江蘇銅山人嘉慶十六年中一甲三名武進士授二等待衛二十年期滿外用由兵部帶領引見得旨以遊擊用二十一年以遊擊揀選貴州差委二十四年補松桃協右營遊擊道光六年擢甘肅甘州城守營參將十年八月時安集延逆回句結浩罕入卡滋擾圍喀什噶爾英吉沙爾二城並分掠葉爾羌之色呼庫勒等處提督胡超率兵往剿方標屬焉十一月二城圍解餘匪竄匿卡外胡超檄方標偕副將張國相等帶兵分東西兩路赴白帽朶蘭回子各莊按剿行近木蘇里克莊望其塵測知賊蹤方標督隊進擊賊潰者半餘竄入莊內薄之俘馘甚多其薩漢莊尙有

匿匪千餘越日復分三路進攻賊鳴鼓吹號出拒方標爲左翼鼓  
勇向前大軍併力合擊賊披靡追勦三十餘里馘七百餘級擒五  
百餘名匿匪戮戮殆盡臺站廓清經胡超奏 聞十一年擢瑪納  
斯副將二十二年六月升署巴里坤總兵十月授浙江衢州鎮總  
兵二十四年升署提督尋回任二十八年以所屬署左營遊擊薛  
思齊訛索客商嵐頭貨物扣畱衙署據實揭參經巡撫吳文鎔奏  
入 詔褫思齊職二十九年丁母憂三十年在籍卒

右 國史館本傳

國朝青獻類徵初編卷三百二十七目錄

材武一

洛翰

盧和

張自強

丁遜宗

徐燧

周琬 吳友名

楊祺

錢萬選

占

賈時泰

高成旦 鍾明鑑

鄭斌

江起龍

李世芳

王天錫

盧達

張廷臣 裴爵 胡俊選

楊農正 龍朝選

李國盛 戴國忠

卓爾堪

王宋臣

鄂屯

王鈇

潘安國

王國憲

劉用亮 譚公國



皇朝通志卷三百二十一

王家裕

性德

葉應龍

車果  
曹宏勳

萬崑  
趙琦

國朝書獻類微初編卷三百二十七

通奉大夫前署江西巡撫江西布政使司布政使湘陰李桓輯

材武一

洛翰

高皇帝勗業之初有洛翰者本劉姓中原人以傭至遼初給事於  
建州頗勤儉有勇力 高皇帝賞識拔爲侍衛覺羅龍某叛時陰  
夜懷刃入 高皇帳公覺以手格之四指皆落卒衛 上以出後  
猶能執銳禦敵 高皇帝嘉之倚如左右手卒於起義之前故不得  
與五大臣之列今其裔隸內府聞先恭王言王若霖太史澍曾爲  
公作行狀手書鐫以行世惜未覩其本也

右錄宗室昭棟撰

太祖高皇帝警悟絕倫臨機應變倉卒合度甲申夏四月 上夜寢聞戶外有聲披衣起令匿諸子女佩刀持弓矢潛出戶伏煙突旁伺之時陰晦無所見少頃賊將偈煙突旁忽有電光照見遂以刀背擊之仆呼近侍洛翰縛之洛翰曰何必縛也宜殺之 上念若殺此賊其主必顯與我爲難儻加兵於我我眾寡不敵仍佯詢曰爾非盜牛來耶賊以盜牛應洛翰又曰誑言也實欲害吾主殺便 上曰果盜牛也遂縱之去

右東華錄王先謙編

盧和

盧和潮州靖海所人居惠來縣東郊塗城身長七尺黧面長鬚爲  
邑壯丁順治乙酉邑紳林學賢爲寇攻縣城圍困數月援兵莫至  
內外信息不相通縣令沈惟煌與紳士謀求救夜召和入計事命  
突圍赴郡乞師和曰諾胸藏血書懷二鴿從城南縋出夜暗如墨  
人對面不相見和匍匐膝行十五里至神泉遵海而東從守禦所  
過潮陽入郡至則放鴿爲號夜或遇賊則蹲伏似狗又或似棄尸  
賊竟以此給去書得達如是者二十四次援兵至圍解  
論曰盧和壯士也義士也斃子匹夫能爲國家出力救全城旦夕  
之命厥功偉矣包胥秦廷霽雲斷指亦不過此忠此誠耳人有貴



賤忠誠則一誰敢以壯丁目之

右小傳藍鼎元撰

張自強

將軍名自強秦人少墮綠林爲羣盜喜殺嗜酒鷹眼狼顧蜂腰猿臂遇陣先登人呼爲一根惹年可三十念賊名難以久居解甲歸左良玉良玉時方爲名將節未變會改革游楚總督羅敏爲永州道守備予以順治丁亥分藩永是爲長官戊子奉定南王疏請撫黔張偕行扈從多力氣貌類兇很實乃純謹無他以是年四月十三日抵靖州是日坐馬不病暴死甫發黔陽左肅折識者皆云不祥予不之信遂於是入靖叛帥陳友龍紮二十里外予先是持牒講招徠彼亦陽應因不疑抵公署則聞有偶語若有云友龍反者三大雨如傾盆邏者陟陴見賊營火光熒熒走報予予方熟睡帳

中披衣起將軍亦至牀頭賜夷酒盈腹予目將軍飲乎應聲兩手  
據地一飲而盡闕人報曰事急矣靖斗絕蜂蟻攢三市唯西郭有  
高廠地可作戰場予遂披甲上馬將軍隨馬尾幕賓陶生挽予裾  
止之曰矢石無親一爲所中齋粉矣我但堅壘不出彼且鳥散且  
帥居中軍以城爲蔽勿出便予笑曰生何怯也人苟生之爲見若  
者必死因大開西門接戰見陣馬雲屯鉅鐵施鑽剽邀如燦風朝  
車霆發煙颯氤氳彌漫山谷諸將相視錯愕選蠕莫敢當先張膜  
目奮刀暗鳴霹靂挺身直陷其陣人馬皆辟易落溪澗中賊渠方  
寢兕持虎鮫鞬屬龍揚威高山頂上將軍控黃頰蒲梢揮刃直取  
其元於萬軍之中得牒者曰此友龍頭也賊陣旣亂我軍乘之斬

誠一千七百餘級得馬贏器仗稱是是役也微將軍予不得生還  
矣當是時湖南直指某黷於貨忌余功上章求多於予予解官歸  
將軍落青門數年後復從西粵線伯立功桂柳間坐使酒不爲當  
道所喜究亦不帥亡何將軍遂製蠻鞞舞袖日陳紅友濡首轟飲  
不復以膺仕爲念將軍竟死噫古今善戰不封侯豈直李廣一人  
哉

禹峯曰余時麾下裨將賀進才者初亦黑山種落與張將軍分隊  
出將軍戰北賀戰南箭不虛發洞賊可十餘人爲礮所傷斷其左  
右胛賀猶忍死歸營以門扉舁之隨予行閱數日乃死是亦將軍  
之亞矣



右傳彭而述撰

丁遜宗

丁遜宗湖南黔陽人膂力絕倫順治六年流寇王進才馬進忠竄據羅翁山所在焚掠遜宗簡練鄉勇三百人結寨壘谷屢與賊抗賊遂大至遜宗先據峽巖分百餘人從間道抄賊後夾擊破之斃賊五十餘人墮巖澗死無算賊走又逐之二十里外殲四十餘人由是不敢復窺康熙初峒蠻亂城步大擾遜宗時爲騎士夜襲賊營斬其酋而還以疾歸遺佩刀長四尺子孫至今珍藏之

右傳易變堯撰



徐燧

徐葵垣者名燧字煥然浙江山陰人也父左川通許縣丞葵垣十二歲而孤母張鞠之稍長游學錢塘二十一歲遊京師旅食久居停主人意淺薄稍稍聞媢語遂掉臂去已贅郝有室充戶部雲南司典吏輕財重然諾以俠聞久之妻暨母相繼沒會闖變跳匿至國初則年踰四十矣出供事兵部當順治八年大司馬金公破資格物色人材之可大用者而葵垣與焉未幾運糧督師洪文襄公軍前以軍功加正二品銜大司馬劉公奏除授掌印都司得管福建屯田都司勤於其職踰七年課最調都司江南掌印轄漕屯撫軍郎公器之十六年海警會有司繫民夫百數閉之都司解廩聞



婦女號呼聲晝夜不絕聞而惻然傷之念曰更徭自有挈令奈何  
繫人而牛羊使之察其中有書生在又非其罪將走白中丞遣之  
且行且熟計恐請不得乃以便宜輒開門解其繫大言曰去吾放  
汝於是懽呼聲動地搏額謝盡去乃騎詣中丞府言狀且請罪中  
丞義之弗罪也當是時大江以南嘖嘖稱都閩君長者已而事平  
方上守禦功遽請老歸歸時年六十二子二伯麒伯麟伯麟涕泣  
以狀來告且曰先君居官廉居鄉好行善事請老垂十年而卒卒  
後十餘年猶在淺土貧無以葬也余悲徐生之志故爲之傳  
贊曰見義不爲無勇也士大夫視人危急而次且不前者豈少哉  
夫蹠視一宮而存活人且百數可謂勇矣而官卒亡恙嗟乎是可

以勸天下之爲義者矣

右傳金德嘉撰

--	--	--	--	--	--	--	--	--	--

171-630

周琬 吳友名

周琬字肯衡河南商邱人順治中舉武進士投廣東守備討平老香山諸寇遷萊州都司時萊陽李帽子倡亂琬率師克之後遷潮州鎮游擊屢立戰功尋自免歸又吳友名字輔臣亦商邱人初以從征有功屢遷至參將吳耿之叛友名克捷斬馘無算收復名城十數晉右都督逆平敘功 予世襲拖沙喇哈番以疾乞休

右傳查岐昌撰



東坡志林卷之三十四下

八

楊祺

楊祺字孟樸河南商邱人順治乙未科武進士嫻弓馬悉韜略有  
經畫才授海門衛守備歷升浙江掌印都使司初屯田荒缺祺履  
畝清查力陳督撫如溫台之衝沒湖衛之加增皆得豁免士卒感  
戴適吳逆蠢動大軍會勦軍器缺乏祺奉委監造應期力辦里居  
後喜讀書設家塾多所成就有舉進士者鄉人至今稱之

右傳查岐昌撰

日本書紀卷之六十一

ノ

錢萬選

柘去陳僅百里餘往往結金蘭之契或秦晉締好以故兩邑人士之家世得互相悉宛邱雖多閥閥名族求其派出王公海內仰爲柱石者無如錢氏錢氏聲聞籍籍求其智深勇沈超越塵寰者又無如明威公公嗣子聯科以公誌墓之石乞銘於予予與公家世好非一日甲子歲予仲弟振起旣與聯科同舉於鄉其後昭勇公復以子妻子季弟克讓是予與公家世好非一日而知公家者媼黨中亦惟予爲最芳躋懿躅播傳將來固予責也又何敢以不文辭按狀公諱萬選字一公號野樵武肅王裔爲封昭勇將軍諱象乾公季子幼有大志業儒餼於庠卓犖不羈之聲振饗序人方以



遠大目之公亦以天下爲己任矯矯丰槩羞與時人爲伍所性然也及我朝定鼎之初雲龍競奮士得與於功名之會者多以武略爲務公乃棄儒業就武闈領甲午科鄉薦乙未聯捷成進士且伯仲相繼奮鏖皇路士論榮之歷任江南潁川衛守備兵農錢穀素嫻於衷出其敏斷之才理繁劇如反掌凡盤根錯節他人棘手不前者公以片時決之聞風被澤咸嘖嘖稱頌不衰有以貨嘗公者恬然不爲所動曰吾以盡職卻外物爲居官之要以此撫黎庶卽以此報朝廷分誼所在非云過也及解組歸田日以孝弟訓子孫髦年好學有衛武公之風頗畱意於書法稱精良弄筆如丸不愧右軍胸襟灑灑時彈琴賦詩詠歌先王登其堂者見禮服雍

容圖書滿架塵俗之氣頓消輒歎爲有道不能去如公之經緯具  
備儼然當代典型擬之輕裘緩帶猶未足盡其風軌追古軼今其  
在茲矣娶鄭恭人早卒繼娶張恭人相公成名治家有則淑德昭  
聞於外得內助者公獨盛矣公生於明崇禎年月日卒於康熙年  
月日子五長早亡登科丙午科武舉人捷科庠生聯科甲子科武  
舉人斌科孫十四會孫十一爰爲之銘銘曰  
猗與錢氏中原華胄累世承德克昌厥後運際極隆器歸大受鷹  
揚奮烈墨林競秀允武允文垂聲宇宙子孫千億承天之祐

右墓誌銘竇克勤撰

東洋書院發行所  
東京三丁目

丁

占

國初有驍將阿里瑪者能自握其髮足懸於地又能舉盛京寶勝寺之石獅重踰千斤戰功甚鉅入京後所爲多不法 章皇帝欲置於法恐其難制有巴圖魯占者其勇亞於阿因命其擒之占至阿邸故與之語猝握其指阿怒以手拂占擲於庭外數十武因數之曰汝何等人乃敢與吾鬪勇耶占以 上命告阿笑曰好男兒安惜死爲何須用紿計也因受縛坐車中赴市曹至宣武門阿曰死則死耳余滿洲人終不使漢兒見之誅於門內可也因以足絙城門甕洞閒車不能行行刑者從其語阿延頸受戮其頸脈如鐵刀不能下阿自命占以佩刀割其筋然後伏法亦奇男子也



四庫全書

右錄宗室昭棟撰

賈時泰

賈時泰者蠡縣人少習拳勇性愚直見人所爲不義輒面詬詈鄉里頗憚之生平獨喜擊賊所居縣南鄉南鄉之村四十有二遇有警必率其村之勇敢者俱赴賊逸去遠近反覆蹤跡務盡根株痛斷乃止幽燕俗喜鬪很而蠡博高肅獻諸邑與東魯泰山齊河壤地相接其間椎埋剽劫之徒尤多會世亂所在蜂起蠡之鄉北東西焚掠無虛日獨南鄉以時泰故得無事總督張公聞其名囑邑令某召之屬以擊賊之事時泰固性喜又重以制府命故毅然不辭然猶重與之官止易其名曰鄉長時泰已受任乃椎牛具酒食聚北東西鄉之豪傑而誓之曰自某至某凡村幾屬之某某村之

可屬以事者某任之有事則某與某畢其力非是有罰鄉之中有  
不良教之不率有罰相隱庇罰同凡某與某不善聞於泰泰不善  
聞於官不如約有罰眾皆聽命數年蠡之鄉大治時泰是時以能  
擊賊名於蠡蠡之旁邑有賊不能擊亦相與競請時泰卒能告成  
功焉然當事者每擊賊必遣一劄弁及役捕者與俱時泰負其能  
不肯相讓又性執不融通與諸人意見多不合故雖有功不賞而  
羣盜之歸正者往往得爲官反在左右時時媒糶之於是諸賊聞  
之皆喜相賀更令其徒緝緞其數年行事密以聞某年月日竟捕  
時泰置獄時泰年已老自念生平無他徒以多擊賊得罪不服每  
對簿輒慷慨以首觸地流血聽者亦拘牽文法無所暴白會赦又

有趙士望者亦蠡人甘以身受荼毒得備言時泰生平擊賊狀當事者始心動事得解方時泰置獄未兩月蠡之鄉又大亂至是邑令某重其能將復任之時泰自以擊賊多慮終爲所戕害欲他往避適賊某某犯於南詞引時泰時泰至南待理事白竟爲僧於南終老焉余爲蠡令二年頗知時泰及時泰至南余數見之既悲其志又敬其爲人雖不讀書能知所自守其耿介孤立不諧於流俗亦其性然也其能擊賊功在蠡終不可泯沒故爲之傳俾後世知有賈時泰焉

右傳謝良琦撰





高成旦 鍾明鑑

高成旦葭州人順治中任宜章營參將廣東梅花瘴水賊攻陷栗源堡以數千人從閒道襲宜章成旦先設伏羅家觀隘口而自率兵與戰賊退伏兵起殲其半因進兵復栗源賊偪河爲陳成旦躍馬先渡破之賊猶負箭樓爲固成旦令人縛草一束堆與樓齊縱火焚之賊盡死遂逾艮口進偪萬古金城賊計窮乞降粵寇爲害十餘年至是始平同時有鍾明鑑任九谿衛守備勞來招墾民以時輸歲旱騰雨立應

右傳李元度撰

Vertical text on the right margin, likely a page or section header.

Small vertical text or mark at the bottom right corner.

171-646

鄭斌

鄭斌湖南沅州人順治時官教授十五年隨經略洪承疇恢復沅州改擢本協副將時苗眾尙未歸化易於叛亂斌威惠交濟苗民皆安生樂業

右傳李元度撰



--	--	--	--	--	--	--	--	--	--

江起龍

鎮海將軍汪姓名瑞儀歛橙陽人幼有勇力某祠前石鼓重數百餘斤擊以隻手往返無喘息年二十走四方明季多故乃入戎行以勞績官至裨將思陵末往說永厯起兵逐張李授總兵封伯領左軍都督居月餘窺永厯越越無遠謀舍之去隱居僧寺往往中夜起北向痛哭或拔劍碎几作恨恨聲 大清兵滅賊始喜曰吾恥雪矣遂出更姓名曰江起龍應募蕪采營營將某奇其狀薦爲千夫長大軍定閩粵從軍行閩人掘仙霞關戰久不下會中秋讌軍士皆酣飲將軍獨對月有所思已而喜舉巨觥吸而盡曰仙霞破矣眾駭然問之故曰頻年相持建功何日吾聞師老則懈值茲

令節愈無備也關左僻徑險而捷人所不至予履之熟矣若得敢死數人入爲內應不四鼓關可得也眾頓悟共白主將以達諸帥帥曰善召入酌之酒而遣之將軍與帥約拔寨起聞金聲則進無噪也帥許之既出聯同志得十人輕裝短械緣閒道攀藤葛以達關上盡酣醉敲而臥營中鼙如雷眾啟鑰關關欲舉號將軍急曰止城上礮如列棘彼覺而發之我軍燼矣眾曰然則奈何日反之可使自擊也從之乃舉號我軍馳而進閩人夢中聞金聲大駭倉卒發礮礮反擊蹂其營自相踐蹋死無算我軍乘之關遂得時猶未曙也餘黨聞之潰閩地悉平以次定粵論功擢參戎歷都督僉事鎮海安沿海故多盜外洋入寇尤甚將軍患之練兵拒海上殲

寇幾盡或追捕出洋抵暹羅始還舉以爲常一夕次北墩洋颶風  
作濁浪涌如山舟傾側若簸無由辨去向中軍某請計將軍測諸  
星曰南風盛師旋且利然我歸而寇隨之將無以爲禦非策也見  
危授命職耳惟住碇以聽命焉語未竟大聲起水面黑霧中若巨  
舸挾浪行勢如疾弩然二鏡甚明朗急令舉礮舟敵士卒莫能立  
將軍手然之滅其燈頃閒風掀浪吼天地若旋轉海水沸起如立  
觸桅柁盡折舟遂沈將軍死於海蓋所擊者龍礮適中其目耳時  
康熙五年七月二十二日也將軍旣沒而靈不衰恆駕戰艘建旗  
幟巡綽如故大吏奉命海上多見之疏聞於朝雍正九年  
詔封驍騎將軍諡英佑建廟雷州遶其子孫之才者世給衣巾奉



祀焉人稱鎮海將軍泛海者禱輒應迄今香火不替

右記江紹蓮撰

李世芳

康熙十有三年甲寅春耿藩亂夏五月犯江西有以千戶拒賊父子死封疆督臣以江西第一殉難功入告 特恩賜祭葬 贈昭勇將軍子 贈安遠將軍蔭守備二人者爲鳳山李公某公其冢嗣也諱世芳字蔚文號如民世居江西南昌府奉新縣鄉曰同安里曰鷲岡爲邑著姓生而倜儻嗜書史工擊劍初鳳山公分汎建昌府之南豐公隨侍久歸應文童子試後期或勸就武公故嫺決拾通曉兵書遂以第一人補弟子員己酉鄉試舉武舉人明年會試兵部下第歸復居南豐南豐接壤福建耿寇猝至圍其城勢張甚檄城中降而鳳山公所部不滿百人公率家僮數輩潰圍趨南

昌乞援兵未及發而鳳山公與季子諱名芳者俱戰死督臣董公  
卽以鳳山公職委公隨師赴勦比至涕泣疾鬪敗賊眾圍遽解擒  
其魁四人斬以祭父若弟督臣馳奏鳳山公父子殉難事并上公  
功以廕補公督標中營守備時三藩並反耿尙旋破滅惟吳孽猶  
嘯聚滇黔有旨命董公會勦董公奇公材以公隨征多見諮委  
遇敵輒先登凡二年賊平大小數十戰功加至左都督又帶餘功  
十七次 誥授榮祿大夫 贈三世如公階丁艱歸以事平裁缺  
別補公亦念戎馬苦願得休息顏所居曰放閒有終焉之志撫臣  
安公鎮臣陳公稔知公材略明年交章起公補撫州營城守以陣  
亡卹賞事牽連報罷公怡然曰固吾志也吾數年來出入鋒鏑閒

日凡幾死今全而歸不猶愈乎既事白撫臣商邱宋公將爲公題  
請開復公辭甚力乃已平生博雅能文章既閒居益肆力爲之精  
書法好賓客待人有恩部曲卒伍奉裁汰者卹其寒餓久益不衰  
以某年月日卒得壽幾十有幾公早立疆場息肩於中路風甚高  
厥施未究君子惜之兄弟三人季卽 贈安遠將軍者仲弟與公  
並以難蔭起家仕成都守備公孝友肫篤謝事後馳蜀道視弟會  
仲弟以從征打箭鑪功升東川副將東川僻阻苗夷迂雜難治公  
密佐之民賴以安既仲弟亦倦事轉官遂乞休道遠艱於歸撫臣  
爲請家於蜀公娶王氏 封夫人子二長疇國學生次畝甲午科  
武舉管四川塘務候補守備以後其仲弟女一適諸生陳某疇等



將以某年月日葬公於成都某山公有從子嵩余乙未與武會試  
所得士也畝在京師因嵩識余故來請銘銘曰

士行所宗嚴孝與忠公併而植士藝所處矜文若武公總而力進  
厲其銳退善其藏舒卷孰迹吳蜀路歧氣無不知載銘茲石

右墓誌銘李紱撰

王天錫

王將軍名天錫字曰煇公宣化人也生數歲而孤育於兄天鑑天鑑登進士官副使以文名於時而天錫好扶弓矢習射獵天鑑怒之授以書輒去不肯竟學遂以武起家以武進士任襄城營都司天錫性驍勇治軍一以嚴爲主而又剛直好勝見人在己之右不欲加禮必陵之在己之左雖困窮尤益敬與均其至襄也襄之士卒舊屬總兵高第戲下高第以明之故將降本朝素寬緩故其舊部皆驕悍不可制或三數輩橫於市中少忤輒肆毆詈或羣起而譟襄人苦之兼以承平日久斥堠都廢得月餼則聚而飲博至於弓矢甲冑刀劍鞍馬之屬皆缺壞不治天錫既至慨然嘆曰此

豈國家設兵意哉 朝廷歲以數十萬金錢顧養此豺狼構杙於  
腹心之地邪於是明約束申軍令一切武藝部曲行伍營陳以及  
鳴金擊鼓之類皆親身教之以時操練凡軍器殘缺者馬瘠者武  
藝不嫻者杖無赦又設巡哨軍吏布於街市有橫肆者以軍法嚴  
治之不數月悉變其故當是時兵不忘戰民不知兵而襄之士卒  
遂以紀律勇健稱天錫亦以此名動中原天錫狀貌魁梧膂力絕  
人善騎射嘗曰將兵如掬水稍傾則不可收矣敢縱之邪人以爲  
名言其治軍所戮笞無不當其罪然不明言或以遊戲出之或箕  
倨嫚罵眾辱之人多不堪久之覺悟則皆伏罪不敢仰視每坐武  
帳中軍吏侍立終日雖盛暑汗淋漓下無敢跛倚者天錫雖以嚴

厲聞然其爲人性廉介不妄取予所支軍糧悉給麾下毫無所侵  
漁或士卒有死亡者其餘金陳之廊廡下軍中裁取爲用無入家  
者人亦以此服之其事兄如父或怒有所譙讓必免冠請罪長跽  
至日中不命之起不敢起時晉人張允中少年登制科爲襄令嘗  
與飲輕重不得天錫醉推案起徑批其頰會有解之而去或有僞  
生相過從者天錫則逢迎卻行爲導伏而被席絕無驕人色其謙  
抑自下又如此先是康熙己酉天錫之初治軍也時瀋陽人柯鐸  
爲南汝總兵官亟稱之以爲名將越三年王子方以其治狀入告  
而襄之部下兇悍輩二十餘人者終苦其約束乃迄不奉命且挺  
白刃相向於是一軍大譁鐸遂劾天錫久之獄不成詞僞云受諸



將金致軍變下吏以是坐法去當是時人皆惜天錫無不罵鐸也  
天錫既去士卒感繼至者益追思天錫至尸祝不替云

劉青霞曰天錫雖武人然亦向文學雅重儒術關西李徵君中孚  
父信吾公明末死難於襄康熙庚戌徵君過襄求遺骸不得招魂  
以葬時主予家天錫日往迎候蒲伏稱弟子又資助其葬事徵君  
高其誼卒與交驩而去一時聞者莫弗稱之至其治軍方略雖古  
名將無以加焉予心重其人故爲傳以傳之

右傳劉青霞撰

盧達

盧公諱達字瑞芝破石坪人南唐尙書儻之裔少貧薄不自理游寓江省年五十一賃備糧道姚公署陸陸無與爲名姓康熙十三年叛將楊富餘黨稱白頭兵爲亂大兵駐省城屬辦軍事有功明年募造戰船無應者公列校中前身曰某能節帥由是奇之於是洪東西州郡多陷巡道李公副將吳公並才公爭致麾下十五年用公勦奉新流寇擒之旋從克復上高建昌安義靖安餘干鄱陽六縣乘勝蹶賊於瑞州是役也公功爲盛授千戶長是時洪城艮山民塗而載者數千人悉倚公爲命還止其疆十六年總督董公有撫州之戰授明威將軍尋攻江潯山勦朱天錫復銅鼓營遷昭

武將軍十七年春徇吉安贛州大破賊秋與廣信賊對壘鏖戰凡  
五晝夜克之進取楊一豹擣其巢賊盡江西平公還省下有故旅  
往來客候公曰方賃備時不知君之至此也脫冠見著兜鍪處盡  
秃然公年已老而精力不衰時時爲氣如壯丈夫行者黔滇告警  
命總督某往討之檄公偕又慷慨騰馬脊行矣己未春大軍赴雲  
南五月攻煙溪身先諸將夥斬獲入簡親王部勦紫陽河賊連大  
捷救出被寇四千四百餘人於是破黃茅嶺克靖州復鎮遠衛城  
駐平越府討馬寶防鴨池河謀渡無舟乃命士卒編竹爲筏乘風  
直進賊望見膽落不戰走矣追至黔西而還雲貴初定而馬寶部  
方寇四川公語督帥往偵得其虛實乃捲甲而趨之拔其營隨略

隘口獲輜重器仗無算賊尋滅督帥上公功最乃班師壬戌還江  
西官拜左都督仍帶軍功二等管湖廣施州營遊擊事越五年晉  
階榮祿大夫贈曾祖祖父如公階年七十致仕歸卒年八十一葬  
新建畢家山公起行伍老乃得官出入輾轉於矢石間者近十年  
諸妄大小闕未嘗敗北嗜葢其人豪哉

右傳張望撰





張廷臣

裴鱗  
國忠

楊農正

李國盛

胡俊選

龍朝選

戴

張廷臣本姓陳字啟國湖南澧州人康熙中從征逆藩吳三桂及吐番西藏所向克捷果官湖廣督標副將以老于告歸仍給親丁二人侍養其征吐番也過流沙九百里以羊革囊水飲之月餘一軍歸者僅數十人勞績尤最時湖湘材武著聲績者又有裴鱗字九巖武陵人康熙武進士歷官廣東黃岡副將潔己恤兵有政聲楊農正字夏朔亦武陵人明閣部嗣昌孫也十四補諸生吳逆陷郡索楊氏裔隨父山松避地宛南遂投筆從戎得官大定守備從征紅苗功尤偉入 覲擢遊擊調武陵營李國盛字偉臣桃源人吳逆餘黨未靖國盛以致仕守備充將軍蔡毓榮先鋒先登陷陳

攻下辰龍關破碎其右膝事聞晉遊擊尋以創重卒廕子騰海把總煥章外委胡俊選字舜有興甯人以諸生招撫廣營有功授甯溪衛千戶衛卽藍山縣地也加意撫綏權宜振濟衛人德之龍朝選會同人官柳州營千總致仕歸與妻梁躬運材木築成青龍廟背楊柳三橋行者便之夫婦年皆九十鄉里稱義門戴國忠芷江人紅苗叛攻剽四出巡撫奏請設哨官一員駐大洞坪扼其衝要署曰洞坡哨以國忠勇略檄充哨官國忠簡土兵五十人用奇設伏殺賊甚多苗不敢犯

右傳李元度撰

卓爾堪

卓爾堪字子立漢軍人官前鋒有近青堂集

子立係靖難忠臣諱敬之後嘗輯勝國逸民詩集文武並嫻遠近

爭高其行

國朝詩別裁集

李之芳云乙卯征閩逆卓爾堪爲右軍前鋒摧堅陷陣身被數創

猶居士卒之先

熙朝雅頌集

右詩人徵略張維屏錄





王宋臣

公諱宋臣字柱石南陽淅川人偉骨相呂力冠倫少游荆益雄傑自命順治初滇黔未入版圖公仗策來歸 章皇帝嘉之命從戎郢郢 今上康熙五年滇蜀平江漢底定 上欲楚豫要隘西陵弋陽爲古重鎮晉公都督僉事駐黃州簡練將士角力較藝春秋攻駒阜廢蕃庶暇日指顧勢勝環示將佐紀律先肅什伍無舛罰不旋踵賞無費畱行旅憩於桂桓雞豚放於營壘而尤敬愛士大夫士之賢而貧民之矜寡篤癯者歲時賜給康熙七年鄰鎮叛卒匿大崎山搜牢四出公擒斬渠魁九人撫其餘歸伍歲饑首倡捐振 上聞晉一級十二年冬雲貴叛起江表蝸蟻公鎮靜自處明

年正月大司馬巡撫張公檄守武昌賊黨起陽邏謀以元夜入犯  
公處分既定息鐙火停漏鼓以疑之分哨九門而自擐甲領十數  
騎周巡雉堞竟夜飲湯兩盞而已賊又將乘夜焚漢口以搖武昌  
公偵賊所伏出百騎衝之追殺殆盡五月麻城東山賊起公請於  
巡撫引兵東勦東山平冬十月江右賊出鄱湖陷湖口數縣蘄州  
大震時公精甲盡在武昌而所部多新募餉匱軍容未振知府于  
公備芻糗贈火槍百口遂趨蘄州令守備黑子駐黃梅清江鎮擊  
敗賊船於斷腰會禁軍西上夾攻賊收湖口皇子諸縣上大悅  
命兵部紀錄而公勞瘁病作食少一升和門星隕樞馬夜驚嗚呼  
惜哉康熙十四年二月二十二日也巡撫思公功疏曰據黃州府

知府于成龍報文前來臣不勝驚悼該將力瘁以死幼子伶仃窮途旅櫬應否稍賜存卹下慰忠魂疏上 賜祭葬先是康熙六年覃恩誥封驍騎將軍元配劉氏 封夫人並 封二代考妣如其官蔭一子入監讀書公子麟紱甫六歲居喪成禮今且十齡黃人不忍其歸豫也畱公匱而公與黃岡王氏敘兄弟有年麟紱將長爲黃岡人戊午十月二十九日卜葬縣東還和鄉楊阪之原旣建塋兆旣揜黃腸畏壘桐鄉永思無疆嗚呼哀哉麟紱聘武昌府城守都督僉事李公諱兆捷女幼女二未許聘黃州紳士屬文表墓據事直書庶有備史擇焉

右墓表顧景星撰



國朝三才圖會卷之三十一

三十一

--	--	--	--	--	--	--	--	--	--

# 鄂屯

鄂屯滿洲鑲白旗人姓富察氏世居納殷其伯父夢古慎廓和率所部三百人來歸 太祖高皇帝投爲佐領使統所部既卒子喀爾喀麻仍其職尋獲罪罷以鄂屯代之天聰五年同佐領吳巴海隨副都統蒙阿圖征瓦爾喀進師黑庫倫及額勒約索降其部眾崇德元年授騎都尉世職三年任戶部理事官六年大軍圍明錦州明總督洪承疇率兵赴援我右翼兵擊之於松山失利兩紅旗及鑲藍旗駐營地爲敵所奪鄂屯率其屬三十五人守山巔力戰敗敵得 優賚 世祖章皇帝順治元年隨睿親王多爾袞入山海關同參領珠瑪喇擊敗流賊李自成騎兵追至望都復敗之二

年論功加一雲騎尉三年隨副都統巴山等率兵駐防江甯任協  
領聞巢縣爲賊襲踞卽率兵馳擊復其城六年同提督張大猷勦  
六安州山賊陣斬賊渠張福寰先是江甯設總督漕儲兼理錢法  
戶部侍郎以鄂屯兼任之尋裁仍專任協領三遇 恩詔晉世職  
至一等輕車都尉九年平南將軍金礪以海賊鄭成功侵踞海澄  
縣請增兵進勦部議調江甯駐防兵二百往助鄂屯與理事官額  
赫納烏庫理率之以行至則進攻海澄之東壘賊擊我紅衣礮鄂  
屯三戰皆捷賊乃毀橋拒守鄂屯同烏庫理擊潰其眾先後招降  
賊兵數千平賊寨數十師還敘功加一雲騎尉十六年以老乞休  
康熙十五年五月卒子鄂塞襲職

右 國史館本傳

國史館本傳



THE UNIVERSITY OF CHICAGO LIBRARY

1961

171-676

王絨

余嘗讀晉陶侃傳最其生平蓋多武功焉史言其少時孤貧曾爲縣吏復以呂岳之嫌爲郡小中正人生遇合不誠難乎以侃之才而世儻不見用則亦終老廬江之澣已耳東方生云用之則爲虎不用則爲鼠良可歎也雖然士之負異才者官無論崇卑脫穎自見無不亟展其所長如曰大用而後爲之是乘田委吏不屑道而需次於八州督也余所以有感於王將軍而於功名遇合之際人才消長之間不能不撫膺太息也王將軍諱鉞字德衡浙之仁和人明洪武初信國公湯和募民防海遠祖興隸籍中遂爲臨山衛人五世祖仕隆慶中自海上徙家於杭故復爲仁和人凡數世公

父應第以公官 贈明威將軍娶祁氏浙東方雅族 封恭人側  
室劉氏生子三公其仲年十九而孤家日貧依劉讀書見孫武子  
十三篇又得陳皞梅聖俞之註而悅之遂精其學中順治戊子科  
武舉公之志提桴鼓立軍門橫金躍馬策勳旂常吹長笛於長江  
草露布於盾鼻渠不甚壯顧以數奇授江南大河衛千戶時江南  
漕政行月糧改折困民運官抵通逋糧一石責償倍之公私交蠹  
督漕者條奏其事格於部議而止公以領運入都毅然具本折均  
平一疏剴切上聞得 俞旨運困以蘇嗚呼漕政之敝自明季然  
矣全書所載行月暨羨諸費原以優恤運卒厥後置而不講勢必  
病運誤公而不可抹司漕計者喁喁者也選輓觀望偏指不參疑

蟬儼偕而不敢言卽言之究無當於痛癢相關之故公一微末戎  
弁耳慷慨譙論效杜牧之罪言利害不顧而卒以除漕政之大病  
譬諸以人搔背者時中時否有適有不適至於我自爬搔則舉手  
皆中無所不適公之有裨於國計民生爲何如也蘇松巡按御史  
秦世楨廉公賢能薦於 朝擢定州衛守備繕堞濬壕百廢具舉  
日與衛人士講學日藉諸生文采消我豪氣也未幾以裁缺改上  
元後衛衛爲前孝陵龍江英武三衛故地荒瘠旣久積遺五千金  
有奇公申請蠲除歷八年凡有請於上官不從請之益力輒昂首  
凍身髡髮戟張如蝟毛磔議論蠶涌偏袒大呼不已上官樂軟媚  
善事己者卑疵而前纖趨而言以公元稟銜之遂罷官公奉劉棻



人命重難故鄉因僑寓濟南卜築佛巖趵突泉之側事母教子以終老倪舍人璠詳紀其事今夫天下無用之學莫甚於腐儒平日束書不觀何從曉知治體又輒自矜胸臆好持高節夸毗乘時數斂釣譽一旦膺家國艱鉅之任若畫餅之不濟於饑畫鷁之不適於途鮮有不債轍喪氣者不然則徒手仰屋退縮不前付之無可誰何是無用之腐儒也所當束之高閣者也其不得以武人目公也可知矣公初娶宋恭人總兵宋紀女先二十五年卒繼配朱恭人處士朱崇道女側室顧氏子萃歷城學生海內文章之士所羣目爲秋史是也著二十四泉草堂詩集余與漁洋豹巖兩先生序之女一人適太學生高瑄孫男二人孫女一人以康熙十七年戊

午二月十九日卒後二年庚申渴葬於濟南城西三里之赤霞山下  
萃涕泣句銘余爲之銘曰

國之楨幹世之楷模長戟大劍乃有真儒五尺之矛尋丈之墨其  
光熊熊頑懦斯起令子孝思酸風如輪腹憤軋軋習奇陳陳二十  
年前風流凋謝我作謠辭丁丑之夏

右墓誌銘田雯撰

皇朝通志卷之三十三

三十三

潘安國

潘令君既治長汀三載適通議公訃至今君銜哀迫切見星而奔以襄葬事而先來徵銘讀其狀再三歎曰有是哉起孤生躋廊仕志行道得奉身而退又見厥子以有成也按狀公諱安國字元卿號靜軒先世自中州徙遼陽撫順所高祖文禮起軍功爲指揮使積三世而至公父應德應德死四十日乃生公七歲而母復見背孤苦自立時太祖皇帝初定遼左人士各乘時攀附建立功名公願遜謝不應曰三世一身衣食粗足得保首領見先人地下足矣敢及其他繼世祖皇帝定鼎中原會故人將相多知公者疏其名以上特從關外召公拜藍旗佐領公尙欲請收成命爲新



令不敢辭順治十二年李定國孫可望亂滇黔公從王師征楚十四年鎮長沙十六年海賊出鎮江從大師援江甯出入行間二十載咸著勳勞師旋行 賞 特畀公世職 贈祖父如其官年及艾 國家正嚮用公而公自念未生而孤仕三品 贈三世且世官及而子而孫何所不足乃公者胡爲栖栖糜大官廩食爲也乞休得請康熙己未年五月初十日卒於京其生則明萬厯壬寅八月初八日得年七十有八元配劉氏繼徐氏俱 封淑人子二雲桂卽長汀君次雲程任夸蘭大孫二名世經世以某年某月某日葬於某山之原當公在楚時所下城邑婦女千百彙彙聚道上公不忍哀請於諸將諸將不許公乃力爭於總統親王大將軍所遂

盡得放還歸里遠道不能自將者公又出私財津遣屬所過有司  
謹護使必得抵其家奉 命出師少有收獲人不敢非公不但無  
所取且欲盡他營將卒所收獲者而并解救生全必行其意之得  
爲而後罷是皆人所絕難者嗟夫人生乘時得志可以利澤民生  
而卒垂永譽於無窮者豈在多哉故愛述其行事而重爲之銘銘  
曰  
孰履仁而蹈義兮使男有室而女有家孰難進而易退兮當子結  
綬而父懸車

右墓誌銘黎士宏撰



王國憲 劉用亮 譚公國

王國憲字又永湖南衡山人少從行伍起家初任雲南參將康熙二十二年平定臺灣調北路參將在臺恩威並著軍民之活於臨刃者不可勝計秩滿升文登副將性仁勇所至有聲臺灣府志備詳政績同郡劉用亮字三顧常甯人從兄用楚定楚粵經略洪承疇奏補荔浦知縣尋改漢中守備擢昌平鎮都司毛麓山之捷授漢中副將又譚公國字紫山茶陵州人卓犖有奇氣康熙己未將軍穆占南征被困永興奉簡親王命單騎入營與先鋒分道取衡州王具以聞奉旨褒獎授衡州衛指揮使大兵恢復滇黔後先督糧數十萬源源接濟晉階明威將軍



臣等謹將本朝名臣言行錄卷之三十一

右傳李元度撰

三十一

王家裕

龍巖王公家裕以都閩守常德衛事多惠政軍民信之康熙二十一年夏偶至腹中別門有老漁伺於外進且卻公謂其獻魚也呼之乃前跪曰民前日捕魚荒洲聞呼救聲望之乃一女子縛覆舟上急往解其縛飲以湯徐問之乃曰妾本南甯張氏士人女年十八避亂山谷大兵克滇投獲欲肆辱妾剪髮毀容堅拒獲免猶百計窘苦周防求死不得師旋從馬上縛來及登舟復縛之舟尾次桃源白馬渡風逆舟覆橫浮水面人盡沒妾獨以繫在尾出水上不死流至此三日矣翁若再遲至寒餓死矣今遇翁實再生我旋解身中所餘簪珥見貽民不受女曰既活我盍攜至翁家徐寄信

父母來迎當有厚報民云我非望報但生涯一葉草廬半閒置汝  
其中人必猜報官詰治則汝我皆受累矣女曰翁處既不可抑思  
善良有力之家可轉送收養乎民曰人難深信非畏累卽計財貪  
色儻以爲側室或轉鬻求贏利是我實負汝矣今守常衛王公君  
子也好行其德必能全汝女首肯故民夫婦今同載以來民先詣  
治前不得通因伺於此果得見公亦此女之緣也王公立命家人  
迎至則端潔婉好雖久在兵馬中閨範凝然問之以遭亂故猶未  
字公乃與夫人令女拜爲父母而手持十金出給漁者漁曰公固  
好義民亦非爲利者堅辭不受問其姓名曰民今年七十餘夫婦  
二人並無子女一蓑一笠終老煙波足矣初不望報於後何用知

姓名爲終不肖言歡然而去王公既畜女同己出又數因人寄信其家卒無人至心念女年漸長欲爲擇配會有貴州武舉原籍常衛人周名臣侯者來常祀祖晉謁王公見其少年倜儻卽意屬焉叩之尙未婚及他日再來遂畱飲同坐有趙某者周中表兄也公以意語之趙驚曰此殆天緣矣乃言周於數月前夢授職歸拜香火堂都不見一切神位惟小屏上硃書一天字入內拜其尊屬則見一女子持紅絲侍側飲食甚盛同飲者爲王公玉相與劇醉讀史通至東漢秦嘉妻小傳而寤次日以夢告我等羣相賀謂授官必得上缺授後當兼有締媾之喜豈知先有此遇而我公之姓又適符所夢耶語罷又一友驚呼曰王姓非應在公乃我也我姓固



王字公玉夢中先得之天其令我作合哉蓋此友自岳陽來八雖與久遊亦不知其字公玉周就視公玉貌與夢中無二乃拜求執柯王公欣然報允既定遂擇吉日納聘以女歸臣侯云嗚呼婚嫁故友之子女者古有之矣若不知誰何之女而養之嫁之擇配備禮抑又難焉王公施德於不相知之人張女以死全其身卒得正聘漁人救女於死亡中引見王公而先後無所取皆可以風矣其間因緣際會覆舟以致疆暴之誅被縛反爲全生之賴則皆天也至臣侯感夢而聘公玉應夢爲媒尤其顯著者世之盛也王化行於下一時女子桃夭著詠曾無有婚媾失時之歎況流離軍中矢死全生乎且懷德飭行者咸思致身 朝廷策名竹帛野無遺

賢也今桃源漁子殆亦賢者遭亂而隱於釣輪者與不然何匿名之深耶天能福善禍淫於亂亡困厄之中而不能使世之不亂豈氣數使然天亦弗能違與今叛亂俱平車書混一 聖天子明義行仁此事固宜急爲表章以備採聽獨是漁人深自韜晦使人徒想望高風並不得其姓名而稱之良可惜也夫

右記李念慈撰



## 性德

嗚呼始容若之喪而余哭之慟也今其棄余也數月矣余每一念至未嘗不悲來填膺也嗚呼豈直師友之情乎哉余閱世將老矣從吾遊者亦眾矣如容若之天姿純粹識見高明學問淹通才力強敏殆未有過之者也天不假之年余固抱喪子之痛而聞其喪者識與不識皆哀而出涕也又何以得此於人哉太傅公失其愛子至今每退朝望子舍必哭哭已皇皇焉如冀其復者亦豈尋常父子之情也 至尊每爲太傅勸節哀太傅益悲不自勝余聞過相慰則執余手而泣曰惟君知我子惠邀君言以掩諸幽使我子雖死猶生也余奚忍以不文爲辭顧余之知容若自王子秋榜後



始迄今十三四年耳後容若入侍中 禁廷嚴密其言論梗槩有非外臣所得而知者太傅屬痛悼未能殫述則是余之所得而言者其於容若之生平又不過什之二三而已嗚呼是重可悲也容若姓納蘭氏初名成德後避 東宮嫌名改曰性德年十七補諸生貢入太學余弟立齋爲祭酒深器重之謂余曰司馬公賢子非常人也明年舉順天鄉試余忝主司宴於京兆府偕諸舉人青袍拜堂下舉止閒雅越三日謁余邸舍談經史源委及文體正變老師宿儒有所不及明年會試中式將 廷對患寒疾太傅曰吾子年少其少蒞之於是益肆力經濟之學熟讀通鑑及古人文辭三年而學大成歲丙辰應 殿試名在二甲 賜進士出身閉門埽

軌蕭然若寒素客或詣者輒避匿擁書數千卷彈琴賦詩自娛悅而已未幾太傅入秉鈞容若選授三等侍衛出入扈從服勞惟謹上眷注異於他侍衛久之晉二等尋晉一等上之幸海子沙河西山湯泉及畿輔五臺口外盛京烏喇及登東嶽幸闕里省江南未嘗不從先後賜金牌綵緞上尊御僕袍帽鞍馬弧矢字帖佩刀香扇之屬甚夥是歲萬壽節上親書唐賈至早朝七言律詩賜之月餘令賦乾清門應制詩譯御製松賦皆稱旨於是外廷僉言上知其有文武才非久且遷擢矣嗚呼孰意其七日不汗死邪容若既得疾上使中官侍衛及御醫日數輩駱驛至第診治於是上將出關避暑命以疾增減報日再三疾亟

親處方藥賜之未及進而歿 上爲之震悼中使賜奠卹典有加  
焉容若嘗奉使覘峻龍諸羌其歿後旬日適諸羌輸款 上於行  
在遣宮使拊其几筵哭而告之以其嘗有勞於是役也於此亦足  
知 上所以屬任之者非一日矣嗚呼容若之當官任職其事可  
得而紀者止於是矣余茲以其孝友忠順之性慤勤固結書所不  
能盡之言雖若可髣髴其一二而終莫得而悉爲可惜也容若性  
至孝太傅嘗偶恙侍左右衣不解帶顏色黝黑及愈乃復友愛幼  
弟弟或出必遣親近僮僕護之反必往視以爲常其在 上前進  
反曲折有常度性耐勞苦嚴寒執熱直廬頓次不敢乞休沐自幼  
聰敏讀書過目不忘善爲詩尤工於詞自唐五代以來諸名家詞

皆有選本撰詞韻正略所著側帽集後更名飲水集者皆詞也好  
觀北宋之作不喜南渡諸家而清新秀雋自然超逸海內名爲詞  
者皆歸之嘗請予所藏宋元明人經解鈔本捐資授梓每集爲之  
序他論著尙多其書法摹褚河南臨本襖帖閒出入於黃庭內景  
經當入對 殿廷數千言立就點畫落紙無一筆非古人者薦紳  
以不得上第入詞館爲容若嘆息及被 恩命引而置之珥貂之  
列而後知 上之所以造就之者別有在也容若數歲卽善騎射  
自在環衛益便習發無不中其尾 蹕時珮弓書卷錯雜左右日  
則校獵夜必讀書書聲與他人鼾聲相和閒以意製器多巧僅所  
不能於書畫評鑒最精其料事屢中不肯輕爲人謀謀必竭其肺



臚嘗讀趙松雪自寫照詩有感卽繪小像做其衣冠坐客或期許  
過當弗應也余謂之曰爾何酷類王逸少容若心獨喜所論古時  
人物嘗言王茂弘闐闐闐心術難問婁師德唾面自乾大無廉  
恥其識見多此類閒嘗與之言往聖昔賢修身立行及於民物之  
大端前代興亡理亂所在未嘗不慨然以思讀書至古今家國之  
故憂危明盛持盈守謙格人先正之遺戒有動於中未嘗不形諸  
色也嗚呼豈非大雅之所謂亦世克生者邪而竟至於斯也夫豈  
徒吾黨之不幸哉君之先世有葉赫之地自明初內附中國諱星  
邈達爾漢君始祖也六傳至諱養汲努君高祖考也有子三人第  
三子諱金台什君曾祖考也女弟爲 太祖高皇帝后生 太宗

文皇帝 太祖高皇帝舉大事而葉赫爲明外捍數遣使諭不聽  
因加兵克葉赫金台什死焉卒以舊恩存其世祀其次子卽今太  
傅公之考諱倪迓韓君祖考也君太傅之長子母覺羅氏一品夫  
人配盧氏兩廣總督兵部尙書都察院右副都御史興祖之女  
贈淑人先君卒繼室官氏某官某之女 封淑人男子子二人福  
哥某女子子二人皆幼君生於順治十一年十二月卒於康熙二十  
四年五月年三十有一君所交遊皆一時雋異於世所稱落落難  
合者若無錫嚴繩孫顧貞觀秦松齡宜興陳維崧慈谿姜宸英尤  
所契厚吳江吳兆騫久徙絕塞君聞其才力贖而還之坎軻失職  
之士走京師生館死殯於資財無所計惜以故君之喪哭之者皆

出涕爲哀輓之辭者數十百人多有生平未識面者其於余綢繆篤摯數年之中殆日以余之休戚爲休戚也故余之痛尤深旣爲詩以哭之應太傅之命而又爲之銘其葬蓋未有日也銘曰  
天寶生才蘊崇胚胎將象賢而奕世也而斬與之年謂之何哉使功緒不顯於旂常德澤不究於黎庶豈其有物焉爲之災惟其所樹立亦足以不死矣亦又奚哀

右墓誌銘徐乾學撰

維天篤我勛相之臣神靈和氣萃於厥家常開哲嗣趾美前人自厥初才子罔不世濟若伊之有陟巫之有賢媿於功宗登於策書後之名公卿子發問能益人家國者亦往往開出其或年之有永

有不永斯造物者之不齊雖休光美實顯有令聞足以自壽無窮  
而存亡之繫在於有邦有家則當吾世而尤痛我納蘭君君氏納  
蘭諱成德後改性德字容若惟君世遠有代序嘗據有葉赫之地  
明初內附爲君始祖星遼達爾漢六傳至君高祖諱養汲努女爲  
高皇后生 太宗文皇帝曾祖諱金台什祖諱倪迂韓父今大學  
士宮傅公也母覺羅氏 封一品夫人宮傅公勲高望鉅爲時柱  
石而庭訓以義方君胚胎前光重休襲嘉自少小已傑然見頭角  
喜讀書有堂構志人皆曰宮傅有子年十八九聯舉京兆禮部試  
又三年而當丙辰 廷對勁直切劘累累數千言一時驚歎  
今上知君才欲引以自近以二甲久次選授三等待衛再遷至一等



當是時 上方勵精思治大正於羣僕侍御之臣欲罔非正人以  
旦夕承弼其惟君吉士以重此選也君日侍 上所所 巡幸無  
近遠必從從久不懈益謹上馬馳獵拓弓作霹靂聲無不中或據  
鞍占詩應 詔立就白金文綺中衣佩刀名馬香扇上尊御饌之  
賜相屬也康熙二十一年秋奉使覘峻龍羌道險遠君聞行疾抵  
其界勞苦萬狀卒得其要領還報後峻龍輸款而君以歿 上時  
出關遣宮使拊其几筵哭而告之重憫其勞也君既以敬慎勤密  
當 上意而 上益稔其有文武才且久更明習可屬任嘗 親  
書唐賈至早朝詩賜之又令賦乾清門應制詩譯 御製松賦  
上皆稱善中外咸謂君將不久於宿衛行什以政事以展其中之

所欲施君益自感厲思竭所以報者而不幸遽病病七日遂不起  
時上日遣中官侍衛及御醫問所苦命以其狀日再三報  
親處方藥賜之未及進而絕上震悼遣使賜奠恩卹有加屢  
慰諭宮傅公毋過悲然上彌思之弗置云嗚呼君其竟死矣而  
君之志未一竟也君性至孝未闔明入直必之宮傅夫人所問安  
否歸晚亦如之煖寒之節寢膳之宜日候視以爲常而其志尤在  
於守身不辱保家亢宗不僅以承顏色娛口體爲孝也侍禁闈  
數年進止有常度不失尺寸盛寒暑必自彊不敢輒乞澣沐其從  
行於南海子西苑沙河西山湯泉尤數嘗西登五臺北陟醫無閭  
山出關臨烏喇東南上泰岱過闕里度江淮至姑蘇攬取其山川

風物以自寬廣資博聞而 上有指揮未嘗不在側無幾微毫髮  
過性周防不與外廷一事而於往古治亂政事沿革興壞民情苦  
樂吏治清濁人才風俗盛衰消長之際能指數其所以然而亦不  
敢易言之窺其志豈無意當世者惟其惓惓忠愛之忱蘊蓄其不  
言之積以俟異日之見庸爲我有邦于萬斯年之計而家亦與其  
福也君雖履盛處豐抑然不自多於世無所紛華若戚戚於富貴  
而以貧賤爲可安者身在高門廣廈常有山澤魚鳥之思達官貴  
人相接如平常而結分義輸情愫率單寒羈孤侘僚困鬱守志不  
肯悅俗之士其翕熱趨和者輒謝弗爲通或未一造門而聞聲相  
思必致之乃已以故海內風雅知名士樂得君爲歸藉君以起者

甚眾而吳江吳孝廉兆騫以備才久成絕塞君力贖以還而館之  
愛重如遼海之得幼安與根矩也讀書機速過人輒能舉其要著  
詩若干卷有開天丰格頗好爲詞愛作長短句跌宕流連以寫其  
所難言嘗輯全唐詩選詞韻正略而君有集名側帽飲水者皆詞  
也工書妙得撥鐙法臨摹飛動晚乃篤意於經史且欲窺尋性命  
之學將盡哀輯宋元以來諸儒說經之書以行世其志蓋日進而  
未止也嗟夫君於地則親臣卽他日之世臣也使假之年而充斯  
志也以竟其用譬若登高順風不疾聲速與夫疎迷新進之臣較  
其難易夫豈可同日而語昊天不弔百年之喬木其壞也忽諸斯  
海內之知與不知者無不摧傷而余獨尤爲邦家致惜者也君卒



於康熙乙丑夏五月距其生年三十有一娶盧氏贈淑人兩廣總督尚書興祖之女繼官氏 封淑人某官某之女子二長曰福哥次曰某女二俱幼始君與余同出學士東海先生之門君之學皆從指授先生亟歎其才佳其器識之遠歿而哭之慟既爲文以誌其藏而顧舍人貞觀姜徵君宸英雅善君復狀而表之矣宮傅公以君之嘗道余不置也屬以文其隧上之碑余方悼斯世之失君而非徒哭吾私其敢以荒落辭輒論著君志之大者如此而系之以銘銘曰

鳳背麟角絕世稀渥洼籟雲種權奇家之令器邦之基弱年文史貫珠璣胸羅星斗翼天垂拜獻昌言白玉墀致身端不藉門資雀

弁峩峩吉士宜 帝請厥良汝子爲周盧陞桓中矩規郎曹竊視足  
不移手挽繁弱仰月支錯雜帳帟書與詩奉使絕徼窮羌氏冰雪  
皸痲不宿馳山川隄塞抵掌知卒降其王若鞭笞 帝方用嘉足  
指麾將試以政工允釐歲星執戟亦暫期阿鴻摩天竟長辭正人  
元氣身不訾平生苑結何所思要扶義和浴咸池明良長見唐虞  
時千秋萬世此志齋埋玉黃泉當語誰泰山毫芒一見之琳瑯金  
甕散爲詞我今特書表其微荒郊白煙冢離離獨君不朽徵君碑

右神道碑韓昉撰

按納蘭君所刻宋元明諸  
家經解名通志堂九經解

圖書集成醫部全錄卷三百二十七

四

葉應龍 車果 萬崑 曹宏勳 趙琦

葉應龍字乘六湖南澧州人康熙二十五年由行伍從征夏逆累官福建同安營守備六十年臺灣賊朱一貴叛調充先鋒至卽撲滅歷羅源太湖遊擊雍正六年入 覲 賞賚有加擢澧州營參將晉浙江衢州副將以老致仕時湖湘材武聲績著聞者又有車果邵陽人由武進士官宜都營都司值容美土司作亂官軍攻之久不下果購土人入城說親黨爲內應果由間道趨之遂復其城斬土司以功擢鎮筵遊擊再擢安籠鎮參將署黃草壩遊擊地方僻遠民多散處不習戰築城教練之數年皆成勁旅又建義學教習讀書旋改直隸武清營總督疏留之未幾卒果性誠厚友讓在



領軍討思衝苗獲其酋及男女數千口詣大營或接其功果終不言萬崑字仲一桃源人雍正武進士累官甘州遊擊左遷廬州守備州苦水患崑修閘防之並設局以振尋遷都司乞歸弟岱武進士累官與漢鎮總兵從弟魏亦武進士累官壽春參將曹宏勳字伯猷沅陵人由行伍累官千總雍正八年開闢永綏境宏勳先往諭導諸酋帖服擢龍團守備會黔苗變大軍進剿永綏毗連黔境苗無所窺擾居民安堵宏勳力也擢都司尋卒趙琦芷江人由鎮筄把總擢沅州千總以州地爲楚西上游而西溪又爲州上游苗民叛服靡常亟資控制請增設甘昧一汛雍正六年卽以琦官其地撫馭有方凡五年苗民悅服

右傳李元度撰

宋史李元度傳

七

171-714

171

171-714

國朝耆獻類徵初編卷三百二十八目錄

材武二

祖光璽

鍾寶

殷之榮

和鈞天

洪起元

牛斗

圖丹

汪後來

陳載華

趙永吉

歐陽應召

阮蔡文

劉得紫

張成  
龔捷

陳徵  
吳德光

鄭高  
馬雲驥

康績

傅魁

孫旭

劉秉禮

包成  
田勇

郝賢蔭  
程道明

楊明錦  
張起鳳

袁彪

李壽演

劉景榮

周天相  
韋國英

路建翰



唐朝趙

從子光甲

汪松

段新黃

趙赫紳

李芬

國朝耆獻類徵初編卷三百二十八

通奉大夫前署江西巡撫江西布政使司布政使湘陰李桓輯

材武二

祖光璽

祖氏自我 太宗時知天意方眷 本朝率先歸附及 世祖定

鼎諸旗所稱開 國佐 命之臣無慮數什伯輩而祖氏爲最其

子姓纓黻輝聯累世相望凡奉朝請守官次者甚夥或以文學著

或以武功顯其人率多雄駿磊落不羣之才非僅以世族巨室雄

視海內者也而吾府君又爲最府君官京口三十年從容坐鎮往

往風流雅素有漢祭遵晉杜預之遺風亟爲士大夫所推重然其

志銳欲以功名報國嘗見仲弟蘊玉公調援荆湘慨然語客曰  
吾祖孫父子兄弟世荷殊寵雖捐軀糜踵亦分所應爾顧獨不得  
身與行閒效汗馬搴旗之力以報其如累朝厚恩何每中夜旁皇  
太息左右聞之亦無不感動者然而訖不得竟其志官止於協領  
年止於下壽抑何數奇不偶也悲夫府君諱光璽字白玉先世有  
豫州刺史逖爲東晉中興名臣其別世居甯遠曾王父某某官王  
父某使隸正白旗累功至世襲一等阿達哈哈番又一拖沙喇哈  
番父某亦世襲拜塔喇布勒哈哈番又一拖沙喇哈番 贈至資政  
大夫府君其長子也自幼穎敏甫就外傳卽端坐覽書能默識以  
誦由官學生選授阜平知縣年未弱冠政蹟流傳遠近會王父告

老以嫡孫去官襲世爵非其好也順治十一年遂以一等阿達哈  
哈番又一拖沙喇哈番補授佐領從湖廣數出機宜以裨戎政軍  
中咸器重之越五年補參領佐大將軍率禁旅駐防京口越十有  
一年升協領繼又以 覃恩階資政大夫康熙二十七年某月日  
遘疾卒於任距其生爲天聰三年某月日享年六十配陳夫人禮  
部侍郎阿思尼哈番某公之孫阿達哈哈番某公之女子男維耀  
候選知縣孫男三秉衡秉圭士元皆幼孫女二一在室一適候選  
知縣羅萬象府君材高識朗尤長於理劇阜平地瘠民貧且當南  
北孔道四方多故奉命往來者日夜旁午府君入視文書出治廚  
傳處之裕如一切老猾夙蠹束手不敢爲奸椎埋惡少年亦斂蹟



遁去於是姜瓖之亂甫定餘孽猶竄伏畿輔乘閒竊發邑人數被其害府君聞警立率士兵奮身迎擊嘗有家丁陣歿諸從者洵洵思退府君徑叱騎前搏賊不爲動賊由是畏府君威名相戒勿犯阜平合邑乃得以安吳三桂之爲逆也府君以協領統江南所造戰艦往應荆湘軍興是時江湖閒多盜率皆千百嘯聚與三桂相應和府君道次湖口盜方肆焚劫勢張甚官兵莫敢誰何或勸府君少畱府君奮曰吾雖無征勦責然莫非王事向者以不得在行閒爲憾今見賊不擊可謂忠乎急麾所部卒張帆而進礮聲大震繼以鼓譟湖水俱沸賊遂駭走眾服府君膽略嘗駐防之暇畱意文墨每論古人成敗事得失如身履其時喜結納知名之士間遇

風日道美必偕賓從往遊江山閒擊鮮醜酒笑談不倦儼然一儒  
生也至聞逆藩之變數張目掀髯義形詞色以爲嘗御兵嚴而有  
恩誠諭悍驕拊循老弱三十年之中士民幾不知有兵蓋京口介  
江海素稱東南重地自駐防以來蔽遮三吳俾海中逋逃不敢蹂  
躪內地此固大將軍之功而府君亦與有勞焉居平尤以孝友著  
聞有同產幼弟爲父所鍾愛最後弟病將革府君懼傷父心晨夕  
額天願以己子代弟既天則慟哭於私室搖手戒家人慎勿令父  
知方蘊玉公與府君並時防禦京口昆弟同官一方恩意彌切蘊  
玉公調往荆湘者八年府君爲經理鞍騎甲仗糗糧日用之需饋  
運絕無虛月平居視從子如子視家人上下疏戚凡數千指如骨

肉雅不問生產而喜周人之急凡來告者未嘗藉有無爲解負之  
亦未嘗責報以故交游宗黨悉以府君爲歸雖傾囊倒篋弗惜嗚  
呼信可謂賢也已府君之葬有日其孤介其友宋子聲求用乞銘  
予與祖氏有通門之誼而府君又大有勲績於吳遂不敢用衰老  
辭墓在某縣某鄉某山之原云銘曰

列聖之興肇基遼海迄於  章皇雷埽氣霽挺生元勲在祖有人  
糾糾桓桓爲  國虎臣公則似之克紹前烈允文且武卓哉人傑  
維乃祖乃父鑑於  皇衷俾爾剛爾以勛爾躬曰篤不忘繫忠若  
孝牧民治軍於前有耀來鎮南徐屹然長城輕裘緩帶以儒將名  
匪直才優其德實邁善積於家縣慶可待命也如何阨位與年不

有銘詩孰悉公賢

右墓誌銘汪琬撰



Table with 10 columns and 1 row. The table is mostly empty, with some faint markings in the rightmost column.

--	--	--	--	--	--	--	--	--	--

鍾寶

鍾都督名寶初無字自言生於香山縣淇澳所居朝海幼時游釣在焉因自稱朝海先世耕漁爲生都督不能承其業乃鼓刀而屠繼以海氣故奉文遷界都督失業遂操舟行劫會姚少保爲香山令招降之少保削籍都督糾同撫二十餘輩送之渡嶺時方征反閩者少保投效軍前躬紫琅山有功都督力也少保攝令諸暨分巡溫處都督皆從年餘少保總制閩浙都督亦累戰功晉階一品久之未賞投因歎曰有老母在而徒百戰抱空告身奚益乎是不如反我屠羊之肆遂拂衣竟去少保聞之如失左右手遣牙將齎檄赴香山令縣長吏敦促就道不得已復來而少保已病召入寢

室好言慰留相對泣下已而少保薨都督送其喪歸會稽叩首盤  
前日吾事畢矣歸數年部議以遊擊用論營田功加一等爲連關  
參將秩滿升靖邊協副將所至俱有仁愛聲兵民感之呼鍾佛子  
年六十二卒於官子二

蛻人曰丈夫樹立自有不同未可以屠狗羣盜而少之都督少時  
隱屠肆欣欣然終身矣豈有他志欲用戰功爲領將哉一旦迫而  
爲盜緣此起家位至一品封及四代嗚呼榮矣我昔與都督遊其  
人椎魯少文言亦甚質每云軍中首宜戒淫平生作賊行兵未嘗  
犯此以是礮火繞身不致燒灼肢體嘗見同輩不免此戒對陣卽  
死傷隨之因益自勉並以勉人夫三不朽者立德立功立言今都

料之功如彼都督之言如此不亦有可以傳者在乎

右傳倪蛻撰





殷之榮

殷之榮字肖宇河南商邱人起戎伍滅劉寇有功復平定華山賊  
屢遷至桂林副將奉使交趾封王論功調任浙江水師營副將卒  
於官妻孫氏遇寇被難子士舉由廕生歷官沔陽州同築修吳嶺  
諸隄民戴之爲立殷公隄碑記其事

右傳查岐昌撰



和鈞天

將之閩舟次大埔之三河泊焉千櫓夜集成戒嚴若孤軍之遇大敵者大埔固粵地橫互汀漳開山海交錯桂苻之藪也於時首春刁斗聲深夜不絕鄰舟語刺刺出篷外有曰去年夜泊此我鼙聲自若也惜哉守君有荅曰榜人詛防之過嚴士卒歌撫之良厚惜哉非文臣而起家以武科余方寐作嚙語曰有是哉郭汾陽不以武舉起家耶語未終舟發如鷗鷺散不得問所謂守君者今而後知爲君也按狀君姓和諱鈞天字仙奏先世邯鄲人父諱世奎以督郵從征至楚遂占籍長沙君來時始九歲耳君將種而性明敏端方折節好學善屬文幼應童子試輒冠軍棄而就武年二十有



四僭弟曉天領湖廣丙午鄉薦君有志氣卓犖不羣雅自負能易人所難而素馴謹有所持循然欲得一當以表見於天下試夏官歸父命之曰武科不易得官卽轉漕例不過干夫長不足爲惟事大司馬馳驅王事閱歷多習知棧宜庶幾一遇君卽日治裝北行明年甲寅滇閩亂悻擾急卒踣地士揚臂奮發以僥倖功名之會給事大司馬門踵相接未嘗乏異材而大司馬獨賢君特委任輪蹏跡徧冰天桂海地以專對敏給特著於時不遑將父母者六年而先後出入大司馬門有已貴而分符者君始以當得四品官需次而君恬然也當是時長沙陷南北隔絕丁巳家人聞道歸邯鄲君始得省其父明年趣歸埽母隴會長沙平君亦以家還時麻司

馬勒吉方用兵西粵雅知君賢傳將軍宏烈尤善君特薦辟爭致  
出門下比至軍方互有勝負事無大小君特與聞出計策以佐兵  
事朝少幕府未嘗矜賢勞而以餘力理軍書置侯目視口荅五官  
肆應事無不畢舉以是人人惟恐失君居無幾滇閩平論功行賞  
給告身下至廢吏弱小不勝衣以名聞者官至大將軍秩增至百  
十級君才足有爲因緣事會儼然朝市中一啟口問何求不可君  
顧夷然不以介意君子以是多君之賢過於人遠矣其在粵西凡  
五年始謁選又四年始授大埔守戎時君年已四十有五矣君魁  
梧鬚髮美髯喜豪飲生平無酒過重然諸疏於金錢焚券蠲租無  
虛歲家居孝友其爲人得於庭訓爲多父年已七十彌聞日猶詔

之曰移孝作忠是孝也又曰母教汝無異范希文母也時老僕奉湯藥前指之曰是添壽非吾僕也明總兵官段魁寰其主矣又曰吾生平恤人之孤繼人之世者屢矣何況段君汝異日當爲地語旣出遺言授君君雪涕受命唯謹君居父母憂人皆稱孝而能達待戚里特厚有以非禮加不報比難作且爲解紛若未嘗有夙怨人以是多君之賢爲難能也君守大埔初視營壘壘傲視卒伍伍無人色愀然曰籍其身而耗其食誰實爲之軍吏曰成例奈何曰成例不可去權變不在人乎聚十人而飢疲之甯擇九人而騰飽焉於是乃闕得選兵盡足其糧糈凡老弱可汰者汰之逃亡不補足所耗而止不期年而超距士甲東粵大帥驚喜下其法於諸部

行旅經三河多死所君廉知其故移檄諸邑舟各投符五舟相保  
罪則坐舟至斥堠所驗符發否則焚船杖舟子八年中水陸無拾  
遺者君設施多類此方欲有建白尋病不起死之日無餘財諸孤  
匄貸護喪歸君生癸未八月初七日是爲明崇正十六年也以乙  
亥五月十七日卒於大埔官舍得年五十有三夫人劉氏益陽守  
君諱龍之女生子男二長紹中善化縣庠生次由中業儒女子一  
許配善化縣庠生張圻孫男二長龔次易俱紹中出以某年月日  
葬君於善化縣之某鄉紹中與子友相善也以狀乞銘其稱述又  
有加焉不獲辭爲之銘銘曰

恂恂者儒桓桓其武志趣不凡科名甫數南北受知夏官開府於



馬透迤金魚銅虎一節歷歷身名無補位不酬庸守茲大埔盜是用弭軍是用撫贖彼四方誰乃與伍奔競非今莅官師古漫漫夜臺以風守土

右墓誌銘梁份撰

## 洪起元

洪起元湖北應山人。世祖章皇帝順治二年，英親王阿濟格追  
物流賊李自成至湖廣，起元應募隨征九江，授千總。隸江西總兵  
金聲桓軍，委署都司。平吉安、贛州、南安城邑及甯都之丁田魚骨  
鉤刀背諸賊寨，有功。五年正月，聲桓據南昌叛，其標下副將王得  
仁、劉一鵬等受僞職從逆。起元時署遊擊，駐甯都。聞聲桓叛，率兵  
四百餘疾趨贛州。從巡撫劉武元禦賊，聲桓糾賊數萬犯城。起元  
擊卻之，奪雲梯十有八，賊偪城。三月，數戰敗，乃竄遁。起元同遊擊  
孔國治追蹙之，水濱斬戮及溺死者無算。十月，廣東叛鎮李成棟  
自南雄犯贛州。起元與參將鮑虎出東門奮擊，連破賊營十餘，追

奔至南安獲巨敵數十明年征南大將軍譚泰率禁旅克南昌聲  
桓赴水死得仁一鵬就擒伏誅進克信豐成棟亦溺死其黨僞軍  
門曾同日董芳策踞雩都起元擊走之僞總兵劉治國犯信豐起  
元赴援殲賊數百生擒治國七年土賊彭順慶等踞甯都起元與  
副將高進庫率兵圍城樹雲梯先登斬順慶盡殲其黨巡撫劉武  
元總兵胡有陞疏陳起元戰功請予擢用部議予紀錄實授都司  
仍署南贛遊擊時海賊鄭成功寇掠閩境江西土賊遙應之起元  
連年率兵會勦擒斬賊渠陳其倫林昌李玉庭張勝蕭發祥羅文  
顯何捷明平鎮南大白梅窩羊石等賊巢敘功于紀錄實授遊擊  
聖祖仁皇帝康熙八年擢武昌參將旋調永州十二年改浙江甯

波參將加副將銜十三年逆藩耿精忠踞福建叛温州總兵祖宏  
勳應之賊黨陷黃巖及嶧縣精忠以逆書誘起元從逆起元舉發  
其書提督塞白理爲入奏旋檄起元率兵援剿擊賊於白米堰斬  
級百有二十追敗之蒿壩江復嶧縣城趨陶家堰連破賊營斬僞  
都督邢舜卿僞副將邢汝臣復沿樊江搜剿烏門山斬僞總兵錢  
啟明殪其眾數千諸暨城被賊圍起元赴援大挫賊收降數百人  
會康親王傑書統師駐金華貝子傅喇塔分軍援台州起元率所  
部兵助戰黃瑞山斬賊甚眾僞將軍曾養性自温州犯台州府城  
起元出城拒戰中創仍殺賊數人諸將士踊躍繼進賊竄遁十四  
年敘舉發逆書及軍功加都督僉事銜復晉都督同知先是精忠



甫叛起元遣其子一棟赴湖北輸貲鑄鳥槍募丁百有五十習以  
隨軍所至挫賊塞白理以 聞下部議敘加一級尋擢授嚴州副  
將時賊黨孫肇業吳明初吳鎮馬鵬等肆掠常山開化淳安壽昌  
遂安總督李之芳檄起元率兵三千於遂安開化勦擊屢拔賊巢  
挫賊龍山衛及浪關嶺生擒僞都司楊富身余思徵僞守備楊茂  
獲賊所掠婦女百餘俾歸族屬僞將軍白顯忠踞開化城起元轉  
戰敗賊賊棄城遁復遣兵招降僞副將汪飛龍等十五年九月康  
親王進師福建精忠迎降賊黨猶踞處州温州起元率兵撫勦恢  
復雲和松陽龍泉三城得 旨議敘晉左都督二十一年以疾乞  
休三十五年卒年七十有五

右 國史館本傳

皇上御極之三十年 詔在廷文學之士考遺文述故事昭功臣  
世家賢大夫之業於是湖北貢士洪成鼎以其曾大父都督公狀  
上之有司移史館法當列傳退而以公隧道之碑未立也復走京  
師介其鄉先進在仕籍者徵文於余惟公天稟忠赤不忘喪元職  
殫醜類靖除區宇佐 國家成戡定之業功偉一時伐垂後嗣其  
烏可以無述爰博稽事實著公之大節以信後世公諱起元字瑞  
芝先世由嚴州徙歙縣六世祖託明成化中進士官大理寺少卿  
寄籍北直之盧龍曾祖榮仕嘉靖中進士官汝南畱守卒於官會  
歲荒道梗喪不得歸子大全卜葬湖北應山家焉是爲公大父父

諫仁而好施兩世俱 贈驃騎將軍公自幼善騎射喜談兵崇禎  
末湖北亂公移家避難猝遇賊失父所在直前突入賊隊見父方  
罵賊賊怒臨以刃公大呼殺賊賊愕公卽奪刃殺數賊負父走賊  
環視無敢追者父病中路歿公負骨槩葬先墓旁子身走順治二  
年英親王統師下九江公年二十四應募以遊擊用王旣班師屬  
總兵金聲桓主勦吉安贛州南安甯都諸寇屢有功順治五年聲  
桓反南昌趨贛州初與公同時應募爲營官者共二十四人聲桓  
反其二十三人俱從反公方自甯都還聞變卽率所部四百人疾  
走贛州歸巡撫劉武元而聲桓兵薄城下樹雲梯乘城公首先擊  
卻之出城奪雲梯十八座武元喜勞以金帛與馬而號於眾曰須

議此忠勇好男子也守贛州三月殺賊甚眾會大軍攻南昌急聲  
桓撤兵去公與遊擊孔國治蹙之水斬萬餘人遂復聲桓所陷諸  
府縣其年十月廣東叛將李成棟犯贛州公與參將鮑虎擊卻之  
連破十八壘追至南安獲巨礮數十六年大軍克南昌聲桓中流  
矢溺水死進克信豐成棟亦溺水死僞將會同且踞粵都公攻克  
之其黨董芳策率眾數萬來爭城公大呼超堞下眾從之殺數千  
人芳策遁復援信豐禽僞將二人七年土賊彭賀帶彭順慶等踞  
甯都公與副將高進庫率兵圍之樹雲梯先登斬賀伯順慶殲其  
黨十年敘功授都司署南贛鎮標遊擊十一年會南昌兵勦僞將  
曾成吾符文英等連破鎮南太湖二寨斬首千餘級獲被掠婦女



百二十人還其家十二年道汀州勦大柏斬僞伯陳其倫五月署  
左協副將事十三年勦梅窖峒峒深險僞將曾象吾據之連歲莫  
能破公乘夜率眾縣崖下走閔道數十里得其石穴入縛草爲炬  
投穴中煙騰眾驚起目不得視我師乘之眾亂遂大潰梅窖平其  
年冬汀州妖人反能作霧迷人官兵屢敗公統兵至望見賊營止  
軍見賊旗皆黑下令軍中易黃旗其夜盡易黃旗厥明公先驅入  
賊營我軍大呼從之賊大驚術不及施遂敗走禽斬略盡十六年  
統兵勦僞侯李玉庭明年四月獲玉庭斬首三千級招流民一萬  
餘買穀三千石于之復其業還勦羊石寨斬僞將蕭發祥殲其黨  
康熙四年擢署鄖陽鎮標參將八年授武昌鎮標參將九年調承

州十二年以副將銜署浙江提標中軍參將事駐甯波十三年耿  
精忠踞福建反温州總兵祖宏勦應之陷黃巖及嵎縣公自甯波  
率師往擊賊白米堰斬首百餘追敗之菁壩江復嵎縣趨陶家堰  
連破賊營斬首六百級溺水死者萬餘人復沿樊江追勦烏門山  
斬首千級諸暨城被圍急公赴援大挫賊降賊將十一人眾七百  
餘人會康親王統師駐金華分兵勦台州賊公往援斬賊將八人  
眾千餘人是年敘功加都督僉事銜冬賊將曾養性犯台州公時  
在城中出拒戰中槍傷仍殺賊數人諸將士繼進賊敗走十四年  
擢署嚴州副將先是精忠以逆書誘甯波將士反公以聞至是敘  
功實授副將加都督同知時賊黨肆掠遂安開化閒公率兵援遂

安先後五捷禽斬賊將二十餘人獲被掠婦女百四十人遣還其家十五年賊將白顯忠踞開化貽公書啗以上爵公怒拔刀斫案立械賊使並書送總督軍門卽率兵進戰斬首四千級顯忠遁遂平諸賊寨前後招降賊將三百餘人兵萬二千人撫流民三萬人復其業其年九月康親王進師福建精忠降其黨猶踞處温二州公進兵復雲和松陽龍泉三城敘功加左都督公平居愛養士卒人樂爲之盡每戰輒先進常服赤袍赤鎧赤幘以自異與子一棟合家丁爲一隊皆赤旗號敢死軍將戰以酒酌地曰吾與爾等今當同日死眾應曰諾趣出戰無不一當百戰罷歸呼酒共席地飲曰吾與爾等賀今日生明日戰復然賊每望見赤旗輒驚走故公



大小數十戰常以寡敵眾未嘗敗北在軍中三十八年至二十一年以老病乞歸二十七年武昌兵夏逢龍叛將掠應山公率家丁結營郊外城賴以安遇凶荒及大徭役屢散千金以濟民困鄉人德焉三十五年卒年七十五妻彭氏 贈夫人繼王氏 封夫人再繼許氏子一棟附學生後官臺灣同知孫二國彰福甯知州國寶候選千總曾孫六成鼎其一也以某年月日葬於王字坡祖塋之南銘曰

天命所屬輻輳羣英虎臣仗劍來自南荆桓桓一旅氣蓋韓彭  
霆盤怒百里震驚手決巨海殲彼長鯨斗牛之野榛穢盪平戰袍  
血漬爛其光明酌酒於地生死貞盟累書功績敬告上京滔滔江



漢萬古有聲周之召虎同厥令名

右神道碑彭啟豐撰

牛斗

康熙三十八年 聖祖三次南巡由浙回蘇 駕幸洞庭東山有  
水東民人告菱湖坍田賠糧收紙付巡撫 上問扈蹕守備牛斗  
云太湖廣狹若干奏云八百里 上云何以具區志止稱五百里  
奏云積年風潮衝坍隄岸故今有八百里 上云去了許多地方  
何不奏聞開除糧稅乎奏云非但水東一處卽如烏程之湖漚長  
興之白茅嘴宜興之東塘武進之新村無錫之沙澉口長洲之貢  
湖吳江之七里港處處有之 上云朕不到江南民間疾苦利弊  
焉得而知耶遂 諭令查明奏免康祺敬按 聖祖德量同天六  
十年中如此偏恩豈勝枚數惟牛守備以末弁前驅忽邀 清問

國朝文獻通考卷之三十三  
在他人當已踟躕乖常而乃奏對從容既歷舉夙所諳習之江浙  
水道地形復毅然爲民請命其學識殆出儒臣上矣

右紀聞陳康祺撰

圖丹

國家受天休命長發其祥公姓公族繩繩振振各以別子爲小大宗多有聞人卓雅不羣光於屬籍而重休襲慶穀其後人如我光祿覺羅公其一也公諱圖丹父諱圖魯世襲三等阿達哈哈番公生而器局異凡兒甫九齡喪母夫人馬氏哀毀不自勝善居喪者弗如也後母一子公頗失愛內自傷而色謹甚奉事如不及母所欲輒先之過於其弟也母大感悟兒乃愛我則待之均族人咸嗟其孝及長授佐領職一切辦雅好讀書屢食寒暑弗暫輟也嘗以周原伯以不說學而知其將落鄭七子以賦詩而覘其保家皆公族也可無懼乎亦不廢弋獵尤習射曰古人所游也居父喪泣慕



如孺子葬祭皆以禮悉推家財異母弟以長當襲職度不可辭久  
乃受之尋署參領事益勤慎能舉其官都統才之欲推薦者數矣  
公謝曰幸甚不蒙無狀之責於志畢矣且臣子常分敢言勞乎卽  
堅求解退君子以爲公於讀書真有得云 覃恩誥封光祿大夫  
卒時年五十七夫人郭氏賢明有法度後公卒合葬西山之陽子  
華顯今以學士改右副都御史方拜巡撫陝西之 命公旣自立  
於學教子皆以身示之余與學士同官翰林久習其言論風旨知  
其胷有卷軸遇公事當出使嘗退然不欲先人旣久不遷無幾微  
愠色及屢遷亦不以喜也每言及官吏軍民利病怒然如有憂者  
蓋皆得於公之教今茲之出撫也秦民其有幸乎學士將行來請

曰維先人墓上之辭將有待於子余既因學士以知公而略其居  
家服官行己之大者著之碑而係以銘銘曰

不怨不辰鵬鳩平也不弔不咸脊令鳴也進惟處後退雅欲先有  
簾一卷無悔十年有子始賞惠我西土國之寶臣行勒鼎釜我作  
銘詩用追懿躅白馬青烏藏斯麟角

右神道碑韓菼撰

按圖丹公卒於康熙三十九年



汪後來

鹿岡會試落第黃軍門一見薦之授宣武將軍參軍事嘗黑夜領步卒抵賊穴焚燒九十九岡諸砦清遠龍門草寇悉平中丞法公撫粵拉同巡視邊海置戍握險咸咨訪焉旋以母老歸養後欲覽夷山諸勝因就八閩董統制幕詩學韓孟畫兼子久仲珪之長乾隆丙辰開鴻博科鄂大司馬以鹿岡薦託病堅不出時年已逾六十矣晚歲名日盛四方游宦去粵以不得其書畫爲慚日南諸國主亦航海致幣歲索不輟

右嶺海詩鈔凌揚藻撰

武人以鴻博薦惟番禺汪鹿岡千戎鹿岡聽鼓軍門無事則以詩



自娛有句云夜半詩成攜棗入營門驚道羽書來覺雅歌投壺於  
今尚有替人也

右小崖說詩梁邦俊撰

按汪公一字伯岸康熙壬午武舉  
著有王右丞詩箋杜工部詩註

史鹿岡  
詩集

陳載華

陳君載華字仙掌又字豫中年二十二中武舉不自喜鍵關益力  
刻意爲詩古文瀟灑不同俗輩交蜀人李雪樵而學益進藻翰駕  
一時文士放浪湖陰曠傲自得顧性闊達輕財如土家遂落故人  
官南陽往依之復蕭然以歸貧益甚乃投帥府得洞庭標弁年四  
十有四矣余嘗往候見仙掌七尺昂然鬚下忽生髭數寸晨繫刀  
劍束帶上馬謁大府既食短衣獵山谷閒帶禽三五以還夜燒燭  
陪坐止酒不飲亦不復論詩文縱譚天下形勢關隘西征戎馬事  
指畫掌上對余彎強弓雄傑自喜余笑語曰此固吾十年前之仙  
掌也曩仙掌孱疾一書生葛巾緋袍一卷自隨不識時事歲乙酉

余過汾湖同泛舟菱河閒舉網得雙鱗烹以佐酒嘲余不飲一傾  
盡數盞與余各賦詩一首返棹天微雨余乘屐仙掌跣足負酒椀  
浩歌景象依然而豈馬上之人哉仙掌亦大笑俛首不甯後量移  
千戎忽忽以死家薄田數畝如故終於貧然其生平絕不一日離  
齷自安世之文人武士卓然古今者多有而各專一途如仙掌者  
世人其何以命之與

右傳曹耀珩撰

## 趙永吉

趙氏於吾金鄉爲舊族居縣城西世多隱德至都督公由行伍起家屢立戰功位通顯終於官歸葬於鄉土葬之日無行狀志銘有傳載邑乘歲庚申吾友周君清鑑爲余言曰吾鄉趙都督有曾孫繼齡視履皆病廢且將老深懼其先德缺於表章已伐石磨礮謀樹於阡余爲徵其世牒及敘功事實而以文屬予其母辭蓋距公之葬已有年矣按公諱永吉字長山曾祖曰尙德祖曰秉衡考曰之漢皆以公貴 封贈榮祿大夫左都督公生而奇偉膂力絕人性尤卓犖不羈當康熙戊午閩逆耿精忠叛煽動浙東温台沿海皆告警公隨大軍往征選驍勇二十八人爲先鋒公與焉旣接刃



迅擊之賊披靡於是海澄廈門金門城皆復以功加三等授守備公在戎行恆晝夜擐甲日月累不解矢石如雨亦不顧當其攻漸山也公忽受創戰益力飛馳入賊壘奪其纜而麾之賊大潰我軍遂乘勝逐北連破一十九寨賊首受縛以大捷馳報 仁廟嘉其殊功議加十九等授左都督武臣值承平之日邊陲無事士卒甯謐則弓矢而繫步伐不講而或以資俸或以廢襲累歲可以躋專闡擁重鎮而戰績無聞焉如公之功殆卓卓罕見矣公既以左都督銜管江西南昌營遊擊事丁父憂未及回籍而妖賊袁大相聚眾謀逆撫臣素知公就衰絰中起受任捕賊公偵知賊眾方於深山歃盟酣飲乃約日選師議討倏於是夜自率家丁數人攀藤歷

險采入其阻賊不及覺而渠魁七人已成禽餘眾悉平越歲授饒  
州副將旨征準噶爾督運軍糧調陝西花馬池副將攝總兵官事  
正民立生祠祀之蓋兼多惠政云公卒於康熙四十五年七月初  
六日年六十二歲配吳氏 封一品夫人子二人長錫純例監次  
錫佑例貢孫男七人珽玫璫珩璧曾孫一人繼齡余與清鑑  
感繼齡之孝且誠而不欲沒公之功也故爲文以表其墓墓在城  
某鄉之原

右墓表李嗣撰

171-762

171

171-762

## 歐陽應召

明綱解紐羣盜蠶起生其間者死於兵死於水火於死亡流離中能以孱焉藐焉之身苟延一綫上縣宗祀下啟後昆此非可以人事常理必之者也嗚呼危哉吾於臨桂得一人曰歐君丹臣君諱應召丹臣其字也先世江蘇太倉人考參隸戎籍遷湖廣桂陽千戶遂家焉生四子君其季也伯仲皆持陽庠生叔業耕農君出後包氏包君姑之夫也崇禎末賊亂湖南北恣行殺掠包伏君枯樹根叢以敗葉繫淺於臂曰噲此可活汝本生父遺也且戒曰默兒聲斧於賊矣未幾包氏一門殲焉君出跡之廬舍灰燼矣中路哭賊掠以去時千戶公偕百戶王君映科守信陽王君包氏中表聞



警躍馬同至救無及返信陽信陽亦燹於賊千戶公母鍾氏暨仲  
叔二子闔門二十餘人無一存者惟伯氏子逃衡山得免千戶公  
誓殺賊報讐力絀以憤死王君殯之信陽時君年六歲在賊中三  
年一夕遁去復被掠誘而欲子之不聽官兵過桂陽君晝夜竄入  
營邏卒疑爲奸縛白主帥帥卽王君時以軍功還遊擊驚見哭而  
釋之君乃得生此 本朝定鼎初也無何定南王下廣西王君屬  
麾下挾君行君自此入粵王君無子室黃氏死於難繼以方又繼  
以簡皆蓄君如子王君卒敘平粵功君係恩撫子得披甲隨營康熙  
甲寅吳逆叛君從大帥征雲南賊長沙不掠財不擾民不汚人  
妻女有隱德晚年脫籍戎伍以治生督其子且誠曰吾六歲被掠

十歲依王氏不有王血食斬矣我子孫其世世無忘王氏恩王君  
卒葬君理之王君享祀君延之以示報也娶趙氏前君卒子德峻  
孫烈勳熹杰太學生孫女四人曾孫十四人曾孫女十五人德峻  
之言曰吾父之瀕死者再而卒保其身以起家也爲世所罕聞恐  
混於後來得賢而能文者表之吾死無恨德峻年八十有一克厥  
家善繼其前人杰亦有文學恆就余討論故知君生平最悉杰之  
言曰曾祖諱吾祖被掠時不知也繫枯樹根食淺爲曾祖遺強以  
名焉吾伯祖入衡山時意亦罹於難後吾祖見之長沙相持哭勸  
之歸曰山中人不復與人閒事矣竟莫知其終可悲也君生於崇  
禎十四年二月十二日寅時沒於康熙四十八年六月三十日戊

時享年七十有一葬於花江嶺之陽夫承先緒利後嗣士人之大常也若君者則豈可以人事常理必之哉余非賢而有文者姑徇君子若孫之請而具其崖略以信後人俾伐石而表於其墓

右墓表許朝撰

## 阮蔡文

阮蔡文字子章號鶴石岡之漳浦人父曰魁居下魏鄉以海氛遷徙苦徭重轉之江西生文於南昌寄籍新喻文幼警敏年十一卽能屬文然性剛以膂力自負喜弄刀盾鄰兒皆畏下之子三補新喻諸生以貧甚隨父耕作父購得蠶壤綱目授文讀冬無絮文攜斧斫樹根累百斤者負歸坎地爇而圍之父沒教授村童以養其母二十四登江西庚午賢書數上春官不第畱心經世所至南北山川阨塞險易沿海島澳遊魂窟穴以及東南諸蠻夷情狀利害無不瞭瞭於胸其鄉語楚咻吳越閩廣方言苗獠鴟鳩侏僂之音入其鄉卽與之化肖其聲調口角莫能辨爲何方人也旣落擯無



所用周遊餬口與武人吳郡交相善文族父欽爲爲台州副將拜  
興汀總兵官偕郡往依之文任書記郡爲小校兩家母通往來飽  
飯坐之堂上擊鼓長歌以爲笑樂郡事文母如母郡母亦視文如  
子雖親昆弟無以逾也未幾文以母沒扶櫬挈家還浦時浦令陳  
汝咸率邑人爲講經之會月兩期文攘臂前席高論古今治亂得  
失救時急務同學躋之丙戌後讀書都門己丑被放南還抵三山  
閩撫張伯行邀入黠峰講洛閩之學分纂先儒諸書或勸文離家  
五載宜遊歸文曰正學失傳久矣斯會可多得耶顧吾方謀葬母  
亦當歸耳還至海澄距家不百里芒鞋布襪徧歷山原爲母求葬  
地風餐露宿四閱月得地於陳坑將發紉之前二日乃返舍其明

年漳泉諸郡饑文將有姑蘇之行傾囊以資族人之在下魏者酌親疏計口多寡分給之謂其子曰吾非不念汝曹顧此皆吾祖宗之子孫吾與汝同源其本者也脫二日不舉火非填溝壑甯免散之四方哉時吳郡已爲定海大帥詔截江浙漕米三十萬石由海道入閩分賑文自姑蘇趨如浙偕吳郡分運五萬石揚帆先至漳泉之人賴焉以功晉秩一級壬辰冬十月海賊陳尙義遣其黨赴兵部乞降時陳汝咸爲御史奏請自往招撫薦文與俱詔御史駐錦州賜文帑金衣裘加二級偕千總駱南左其彪等入海遇颶風大作駱南一船飄失不知所往文船折檣幾覆溺數四舟人大恐文怡然曰我等爲朝廷招逋寇靖海疆雖葬魚腹不猶

愈死見女子手耶至登萊易舟蹤跡所在則游奕盡山花鳥閒文  
直上賊艘見尙義開示威信聲情慷慨賊黨有疑貳欲劫文颺去  
者憚文丰裁未能決文陳說利害遂悉眾降由甯波登岸則吳郡  
已爲浙江提督遣官弁護至京師 召見便殿 上問文書生此  
行良苦頗驚怖否文奏言臣仰仗威靈頑梗革心無所怖更問沿  
海事宜條對甚悉議功晉州牧選雲南之陸涼未行改授福建廈  
門水師中營參將則以文材武可大用而大學士李光地亦奏稱  
其猷略故也廈門距家百餘里利弊纖悉無不知通關梁除盜賊  
動合兵民意紅夷市舶故驕橫主者貪其利多爲所玩一日有互  
市者莫賈輕重不相中一船拔刃以譁軍吏惶急不知所爲文單



騎往縛譯榜之爲評其直皆羅拜次日其酋率眾謝承筐多儀免  
冠以獻文大陳武威坐堂皇召之入語以 朝廷威化訶責甚厲  
皆不敢仰視復椎牛置酒饗之庭廡所獻儀物悉遣還由是諸夷  
畏服明年調臺灣北路營參將諸羅令周鍾瑄才名吏治爲海疆  
冠文一見如舊交和衷共濟戢吏卒撫番黎捐金助建學宮城隍  
悉除所轄陋規部伍器甲簡閱整齊躬巡歷沿海增置要害營汛  
北路地方千里半線以上民少番多大肚牛馬吞霄竹塹諸處山  
川奧鬱水土苦惡民堪淡水窮年陰霧罕晴霽硫黃所產毒氣薰  
蒸鄭氏以投罪人庚寅始設淡水防兵及瓜生還歲不能三之一  
巡哨有未至者文決計往部曲皆涕泣強諫文曰不然臺雖彈丸



實閩之安危淡水又臺之鍵鑰也由淡水至福州利風一日可達  
民番錯雜亡命者日多不熟知其里道情形何以控制調度自齋  
帳落具脯糈日或於馬上成詩夜然燭紀所歷地里山溪風候土  
俗爲文以祭戍亡諸將士悽愴激烈聞者感泣山谷諸番具牛羊  
酒食迎餉道旁文悉慰遣無所受召社學番童坐幕下與之語曰  
我汝師也勿懼能背誦四書者旌以銀布爲講解君臣父子之大  
義反覆不倦諸番皆感悅竟以中瘴氣歸而病痞遷福州城守副  
將赴京道劇卒於宿遷年五十文偉軀幹黝面闊口好劇談大笑  
鬢眉俱動讀書忘寢食有時賓朋滿座朗誦高吟或展卷喜動眉  
梢失聲揮淚戟手怒罵嘗曰吾見古人之忠孝節烈恨不起其人

於紙上而拜之跪之也古人之悖逆奸回恨不起其人於紙上而  
烹之磔之也爲文章不假思索對客揮毫數千言立就詩以韓爲  
宗然其志在經濟事業欲以設施見長故著述無多所遺淡水諸  
作南北海道盡山花鳥等記耳平生無畱錢或贈之千金以葬母  
輒盡在官二十有四月未嘗取兵民一粒一絲運米及招撫時所  
過當道以文需次間員爲國宣力慮責斧弗繼輒贈金帛文悉卻  
之曰吾不以 天子之使受人憐也沒後妻孥餽粥不充無一塵  
之宅然素淡泊亦不見爲苦云

論曰阮鶴石全才也粗豪曠爽有湖海之氣望之知爲英雄耳其  
沈幾權變肆應詳密非與共事不可得窺測也使竟其用經濟事

業豈必多讓古人天奪之速則不解其何故矣世所傳造物忌才  
吾始不信悠悠天下人才難得又困苦沮抑之不使展盡底蘊是  
天既不肯多生才生之復不愛惜之則謂之忌也亦宜

右傳藍山元撰

劉得紫

張成

陳徵

鄭高

龔捷

吳德光

馬雲驥

劉得紫字樹公其先直隸文安人有明中葉七世祖指揮均寓居遼陽遂籍焉我朝龍興遼陽首附收入正紅旗得紫伯父清泰總制八閩父朝英以甲午副榜授湖北江夏令卒於官得紫時方十二齡家徒壁立孤苦好讀書尤工騎射康熙四十七年入旗以騎射選引見得錄用由步軍校牛彙章京累遷至侍衛上神武善射百步穿鼓子百發百中願羣臣罕有能及者命得紫得紫惟上意所適視鼓子中邊上下左右命中不差毫釐上大悅自是每射必從明年補石匣守備未幾遷山海關都司復遷汀州鎮右軍遊擊五十九年調臺灣鎮中軍遊擊秋七月抵任訓練



有方子兵字民臺人教且愛之在臺九閱月南路岡山土賊朱一貴倡亂夏四月二十有一日聞報請出師親往勦賊鎮帥弗許遣右軍遊擊周應龍以行越七日兵敗賊陷南路營乘勝直趨攻府得紫偕鎮帥率諸將弁分割春牛埔禦之晦日大戰得勝賊退竿津林五月朔日黎明賊眾漫山寨野分路俱集得紫獨當一面鏖戰中路口須臾兵丁王福舟奔報鎮帥兵敗得紫急殺回春牛埔救應則總兵官歐陽凱水師副將許雲遊擊游崇功戰敗死矣賊四面攻圍得紫猶賈餘勇左衝右突柰眾寡不敵所乘馬爲賊所殺遂被擒引頸受刃賊素重其名不忍殺得紫從容謂之曰吾爲天子命官今日萬不宜有生理但求埋吾帥屍首死亦瞑目賊首

黃日昇嘉其義聽之已復羈學宮朱子祠求死不可得賊與之言  
弗應遣其徒進食弗食餓數日不得死同難漳浦人陳上珍見其  
不食不語日永難卒度貽綱目三卷自卯至酉不釋手賊勸之降  
厲聲曰汝輩要我順從快把刀割了頭去賊相謂曰劉公忠義人  
從其便但戒守者不令出凡良民入省視弗禁得紫猶不食七日  
仍不死把總張文學贊禮生陳時遇揣其不食賊之食親爲煮粥  
勸進得紫泣曰食祿不分憂乘馬不濟難縱賊憐而生我何面目  
見東甯父老是時羣賊不和將吞併諸生林臯劉化鯉等言諸賊  
皆攘雞盜牛椎埋烏合之眾亡可翹足待乃稍稍進粥食延性命  
以待王師賁生黃國英民人鄧世祿楊鼎龍等餽金錢衣服物食

日相繼有不識名舊兵見得紫臥地移一牀與之又有泥水匠贈  
氈褥亦不知其名六月十有六日大師攻克鹿耳門復安平鎮得  
紫聞知大喜然守者益戒嚴十七十九兩日戰鯤身賊復大敗得  
紫陰散賊黨去者半焉越三日守者盡逃得紫因得出遂叩統帥  
軍前請帶罪立功募丁壯百五十人隨師征勦北路二十八日遇  
賊於大穆降得紫奮勇先驅衝殺大敗之所向無不一當百斬賊  
徒無算奪其旗械窮追至鹽水港閏月七日領兵接應溝尾莊鄉  
民圍捕賊首朱一貴等巨魁脅從皆就縛南北二路悉平臺郡士  
民以得紫爲奇也白其事於總統大帥請旌之以勵臣節  
論曰劉得紫可謂從容就義臨大節而不可奪者也岡山之役早

以斯人行當必不至於此悲夫東甯禍殃蓋亦有天定焉士君子  
遭際不同或舍生取義而死或取義求死不可得而生其忠貞一  
耳得紫德容晬盎望而知爲端人正士余東征得覩丰裁愉快不  
能自己於其去也思之深因珥筆而書其事雖然君子愛人以德  
得紫今後或出或處俱不可知當念名節旣成以第一等人物自  
命無使後之遜今則余文藉不朽矣吾友何峯山將還中土此行  
必見得紫以斯言告之

右事錄監鼎元撰

臺灣遭朱一貴之亂全郡陷沒在事武職大小七十餘員或血戰  
捐軀或逃歸澎湖或顛沛賊中馳驅險難行徑不一除陣亡殉難



寸木負勳結請旌奉參逃回澎湖押發軍前效力十六員另案審  
覆尙有坎陷在臺未分黑白如遊擊劉得紫等以下四十一員既  
已奉憲行查不可不逐一確勘情形俾無遺漏者也鎮標中營遊  
擊劉得紫當賊寇狻獷血戰用命及力竭被執抗節不移求埋前  
鎮屍身從容受刃賊亦義而不殺羈禁學宮朱子祠七日水漿不  
入口後聞請賊皆烏合可破乃聽士民勸進粥食延性命以待王  
師被禁五十餘日堅貞不變可謂疾風之勁草板蕩之忠臣應請  
特疏題旌以勵千秋志節而況大兵入臺得紫多募丁壯隨師勦  
平北路大穆降之捷滿尾莊之勞其功亦有足紀者乎鎮標中營  
守備張成力戰被傷爲賊所執中夜自經二次繩斷不得死賊亦

憐之聽兵丁林張保釋匿方賦家中五十餘日大師入臺則二穆降溝尾莊二處與有勞焉北路營千總陳徽把總鄭高則兵敗各帶重傷行遞復能糾合鄉勇攻諸羅於大兵未至之先斬賴元解頭祭羅參將可謂壯矣雖爲翁飛虎江國論所敗仍舊退走入山然及王師北指皆隨大軍撫賊曾賢李德則二弁之無受僞可徵也北路營左哨千總龔捷則自八里岔奉調回營中途遇賊四起遞入北投社鼓舞番眾招集難民爲兵據守殺賊後又協保半線迎師大肚有押運軍需奔走接濟之勞北路營把總吳德光則兵寡戰敗赴淡水營請援隨引兵據守南坎復同援淡水師至半線駐防鎮標右營千總馬雲驥則戰敗棄馬夜行盡伏至十八重溪

與許興吳林朋等糾募鄉勇八百人豎大清旗號據險守隘以待  
援師復隨大軍在大穆降戰勝則三弁之無受僞而有效力可徵  
也海壇鎮標左營把總李信則帶領班兵到臺經於四月二十二  
日換回登舟值賊竊發前鎮檄雷軍前血戰徧體重傷雜在死屍  
之內其妹夫王宋收埋裹去得活大兵入臺三閱月醫治方愈該  
弁無汛守地方之責有冒死血刃之戰其無從賊又不問可知也  
海壇鎮標右營把總陳宋亦帶領班兵到臺戰敗被傷望門投匿  
欲薙髮爲僧因魁偉多髭僧不納避難數家皆有實據鎮標右營  
把總吳益先從周應龍在南路赤山戰傷奔府府陷爲賊所擒迫  
使服官不受幸與中營劉遊擊同禁朱子祠得不辱後隨師在大



穆降殺賊得勝南路營把總張文學身在地方三戰三北爲賊所擒亦與中營劉遊擊同在禁中六日不屈踰牆夜逃往獅子巖爲僧大師入臺集義民四百餘人隨軍效力復召回舊兵四百人巡防搜捕鎮標中營把總周應遂在南路赤山戰傷被擒繫縲牛車於春牛埔陣上遇陳宋救回及府陷往黃蘗寺爲僧在寺中密製大清旗與千總康朝功把總李先春韓勝等謀爲內應事洩奔逃後隨師大穆降擊賊及北路安撫客莊鎮標左營把總李先春戰傷被擒不降獸醫魏本忠保之得釋與黃蘗寺謀內應不果後隨軍大穆降殺賊北路中路皆以奔走效勞臺協水師右營把總韓勝戰敗負傷逃匿潛與黃蘗寺謀內應不果大師復臺率親丁張



紹奔赴紹爲賊追殺勝亦被傷入海中路北路皆隨師奔走效勞  
淡水營俸滿千總何太武先於二月內離營給咨文赴廈因病稽  
遲及府陷削髮爲僧與黃蘗寺謀內應不果及投大師亦有奔馳  
押運之勞北路營把總王有才帶兵守隘爲賊所執縛去水窟頭  
黃趙賴承店中有私釋其縛者縱使行遞匿大排竹民家鎮標中  
營把總王道隆左營把總陳雲南路營把總陳有祥皆戰傷避匿  
民舍及投大師道隆招賊蔡鎮一名與陳雲同在大穆降殺賊有  
祥奔馳南北路獲賊吳亞一名鎮標右營把總李貞先於三月內  
嘔血給假醫治及賊陷府伏枕奄奄至今尙病危不起則諸弁之  
無從賊亦可知也金門鎮標右營千總康朝功帶領班兵到臺戰

敗被傷雜死屍以免及府陷爲賊所擒賂賊兄戴顯得釋入黃蘗寺爲僧與周應遂等謀內應事洩逃匿破樞六日僧寄淵密送飯食得不死或有言其在戴穆轅門服職審無實據而黃蘗內應之謀則其事甚真果有從賊服職何必爲僧卽曰戴穆殺後何非戴穆而潛身破樞與死爲鄰終隨大師在大穆降殺賊得勝則該弁亦確無受僞而有馳驅效力之據者也鎮標左營把總許陞右營把總黃陞賊至先遁並無接戰及大師平寧大穆降之役皆有與焉鎮標右營千總李由戰敗逃散至六月二十八日出投大師或有言其從賊服役而李由堅不招承且云有沈堯丞三元可證則蹤跡未可定也道標把總陳喜或有言其在林曹處辦事而該弁

則供爲林曹所獲僧寂與保之得免則蹤跡未可定也南路營千  
總阮欽據供亦有戰傷亦無從賊且有擒獲賊首顏子京之功但  
據該營隊目姜發蔡昇王國文李春等供稱四月二十七日南路  
營失陷阮欽並無見陣不知去向至顏子京係眾目兵所獲而千  
總在府有無從賊百隊不敢保則阮欽蹤跡未可定也把總李興  
盛爲賊首郭國正所擒據姜發蔡昇王國文李春等供稱四月二  
十九日興盛脅從于國正六月二十三日有同百隊將鄭定瑞首  
級解赴軍前而該弁堅供並未從賊有陳石林堯等保結則蹤跡  
亦未可定也北林營把總葉旺則兵敗潛匿民家聞陳徽鄭高募  
兵攻諸羅出與共事旋又失去及投大師招出賊目陳奏凱一名



但羅參將家人見在首告其從賊則蹤跡亦未可定也臺協水師左營把總涂勳據供分防鹿仔港於五月初三日奉檄調帶兵五十名配船三隻初五夜入鹿耳門到安平鎮始知府陷令各兵密埋軍器紅毛城側散匿民家此說殊不可信賊既陷府五日口岸戒嚴豈容夜舟潛入鹿耳復抵安平且既知賊據無故意登岸埋藏軍器之理安平地方淺狹雞犬難藏安得五十名兵皆有親戚窩匿無人知覺或有言其初五晚舟至隙子被擒在賊首黃日昇處六七日而該弁並不實供求工反拙又亦未可遽定也則李由陳喜阮欽李興盛及葉旺涂勳等六弁應請憲臺親訊定奪南路營千總張世德託故先逃遂回內地至今行提並未到案無從查



三三  
嚴經於詳明臺同千總俸乾事赴藩司取供在案應行司就近勘  
詳另報鎮標中營把總王丑並未見敵接戰於五月初一日齋公  
文赴鹿耳門望見府陷遂奔澎湖復搭得勝鳥商船逸去泉州其  
後隨師效力同入鹿耳安平當與奉參退澎十六員一體擬議在  
周應龍張彥賢之間澎協右營把總吳良在臺修理戰艦偕賊回  
澎經前提督訊解督部院軍前尋病死南路營把總薛雄已經病  
故無庸再議北路營守備劉錫因公赴省領餉臺協左營千總蕭  
方奉差赴廈接餉中營把總李祐赴廈考驗賊亂時皆不在臺均  
應於全臺底定事案内確查功績議敘南路營把總魏明賊亂時  
先已離臺赴考後隨師救援淡水澎協左營千總李耀國在臺修

理戰艦府陷回澎後隨師往援淡水把總陳賢四月內護商到臺  
二十八日奉差赴澎請援奔馳廈省後隨師往援淡水淡水營把  
總湯喬在臺修理戰艦府陷仍回淡水金門鎮標右營千總劉使  
帶領班兵赴淡換回至牛罵汛聞賊陷府仍帶班兵回淡協防均  
應於遵 旨事案内同淡水官兵一體議敘此四十一員中立功  
罪之大槩也除劉錫董方等八員另查功績分報張世德一弁就  
近勘詳另擬薛雄吳良已故無庸更議其餘三十員中從容就義  
臨大節而不可奪當以劉得紫爲第一而聞關險難力圖恢復之  
陳徽鄭高龔捷吳德光馬雲驥等次之李信陳宋張成吳益又次  
之黃蘖之謀事雖不就其志可嘉則周應遂等諸人又次之其餘

或擒或免竄身草澤髮辮完全均無疑議雖內有許陞陳雲李先  
春韓勝等四弁割辮逃生皆由勢窮力竭混跡躲避實非從賊卽  
李由陳喜等數弁蹤跡未明另請覆訊亦未有受賊要職顯然殺  
害官兵芟夷民庶不過畏死貪生覩顏喪節應否從寬從嚴統俟  
憲臺親訊定奪非職等所敢遽議者也

右東征集看語藍鼎元代藍廷珍撰

康績

義士姓康名績字方陸陝西人有文武才而豪於義文辭敏捷遇可哀矜怛焉不能終日見不平怒從中出弗自禁方 國家有事西陲某王督邊事募能效力運糧糗者績慨然應募至半道會歲荒民乏食無以自存績卽盡以所運賑貸而歸白其狀願自償所運也王愕然而重其義軍法當斬乃上狀云績法宜死而心宜生上異而赦之王知其賢而能也畱帳中參機宜事王或過飲以女樂自娛輒諫王改容謝之一日復極飲爲樂績驟踰垣入立王前王悚然績指羣侍飲者曰皆若輩導諛耳持拳縱擊拳之所下筋絕骨折號痛不勝王震懾爲跽乞乃已有縣某奸富暴橫不義素



矣弟死孤幼欲偏其婦嫁而奪之財婦堅不從綱以計將不脫績  
與其儕飲或歎息訊得其實弟故某庠文弱生也績忽不見行途  
中遇乘馬者假之載乘馬者難以不識也績推之奪其馬而馳至  
冶者家不言所以取重斧而去踵暴橫者之門鼓樂喧逐人馬蹂  
雜以彩繒橫縛輿甚固將肩之行績近而呼曰輿中爲某嫂乎內  
聞呼聲亟口喊救不絕碎輿而出之蓬首涕洟冤慘不可名狀暴  
橫者出不意率羣暴奔至績提斧迎擊輒倒眾奔潰婦奪績斧復  
擊暴橫者頭如泥曰毋以死累君也之官績曰吾惡其不義而殺  
之婦曰渠第仆之地耳碎其首塗其腦我也會邑人臚不義者暴  
橫累累上官曰如是猶未足伏其辜耳遂皆貰其罪得不死又某

邑宰貪虐甚民蓄怒久會旱不雨宰弗顧民請於遠方能禱雨之道者至應祈雨降宰怒鞭道者示於市民狂沸宰出績自肩輿中拽出眾叢毆之瓦礫如山而屍爲齋粉大府憤宰之不職爲人眾而又素愛績仁義之士也俱第弗深究而與眾薄其譴云曾他出宿於逆旅見老嫗攜小兒至兒戲仆傷面一少婦出撫其兒批老嫗頰者數績以爲此主母也然兒自仆耳無與老嫗事何不審耶既有告以此乃阿姑者績怒甚氣自頂中燄起直入捽少婦出捶之無算幾死夫自外至惶蹙怒責其大不孝叩首求免至再四久乃得解其義氣之不可犯也如此非矯爲之性使之然也

贊曰但知是非不顧死生豈以示德豈以噉名窮黎蒙活凶暴是

唐王侯共直閭里胥傾嗟嗟義氣橫絕穹濛

右傳葛祖亮撰

傅魁

傅公卓園名魁初李公衛標下兵也少無賴以材武入勇健營涿州大盜李自洪力敵千人匿大邵村牛四家公命卓園往擒卓園請標下李昌明及韓景琦俱公笑曰汝往能擒此賊昌明往非昌明殺賊則賊殺昌明韓景琦往必誤乃公事不信如汝意試之卓園夜至牛村自洪方謀劫冉貢生家未發卓園破門入昌明舞雙鎗先登賊暗中斫之傷大呼仆地卓園繼進門小器無所施棄其戟手招賊陰而曳之小腸出矣賊抱卓園刃其背萬千幸衷甲不死然入膚者寸許卓園繞賊腸於臂至三而賊猶能運刀景琦急來助昏黑不辨捧卓園足以爲賊也而縛焉卓園自念受兩人敵



必敗不得已逆而踐之繩三重皆斷景琦仆出數步外天漸明三人共縛盜獻之轅公大笑曰吾所料何如盜且死願行刑者曰吾爲盜三十年殺人如草菅兵屢捕無敢格鬪今擒我者誰也願一見而死或指卓園盜運日久之歎曰我久當死死於足下值矣我所遺寶刀知足下來哀鳴三日宜贈子佩之我死不悔爲盜悔不知天下之尚有人也

右紀事袁枚撰

孫旭

近讀吳畱村遺藁與轉庵和尚書實有裨於史官故詳載其事和尚俗姓孫名旭餘姚人嘗中順治丁酉武乙科家甚豪富君喜施予鄉人咸感其惠有盜邱甲聚不逞者數百人肆爲閭閻之害邑令不敢撻君慨然曰目覩鄉里受害而不爲之救援非夫也因選強弓利矢命壯丁負糶夜攻其巢咸射殺之獨邱甲潛逃隱恨次骨時海禁森嚴君素慕鄭延平知兵嘗謂人曰今之人豪惟海上鄭公蓋用明太祖獎王保保語邱甲挾蜚語訟諸邑中邑令亦素有嫌隙因誣君通海上置諸獄中君素勇健夜毀桔踰垣出匿某上舍家久之亡走滇南會吳逆叛僞將軍韓大任招致帳下甚爲

賞鑑曰奇男子也會大任屢寇萍鄉爲安親王軍所阻吳逆促其師期大任爽然曰吾竭力以事吳王何相迫若是之急君聞其語大悅曰此丈夫報國時也因說大任曰將軍之事吳王亦至矣爲之闢地攻城戰無不克數月之間招徠數郡未聞有尺素之詞爲之獎譽今一旦偶愆師期卽肆意辱詈儼然以奴隸待之今天下兵戈方始其慢士已如此逮夫大業旣成吾恐君家鐘室之禍復見於今也韓爲之色沮會先良王遣姚制府往招撫大任遲疑未決君復進曰今大清恢復閩越事業已成吳王之敗在於目睫將軍何尙作兒女之態致有失機宜也大任乃從招撫先良王承制表授道銜君慨然曰吾本 朝廷赤子不幸陷於非罪不得已逃

諸賊藪今得返歸鄉井復爲盛世之氓吾志已伸敢以縲囚之軀  
有污章甫之榮也哉因辭職不受久之薙髮爲僧居杭州侶雲庵  
號轉庵和尚年八十餘始逝亦近代奇人也

右錄宗室昭樾撰





劉秉禮 包成 張起鳳 郝賢蔭 楊明錦 袁彪 田勇 程道明

劉秉禮京衛人康熙中任九谿協副將增築營汛開除道路自谿城達石門界崇山峻嶺皆成康衢行旅便之時材武之著績湖湘者又有包成大同人任永定營游擊練兵葺城緝盜賊皆有聲成不知書營中文移使人誦之成輒能審其是否人以爲難後擢紹興參將郝賢蔭甯夏人任永州鎮左營遊擊駐道州雅尚儒術於署後隙地築室數楹捐俸延師訓課諸生及解任州人德之爲立生祠賢蔭固卻之因以爲義塾復置田數十畝歲入租以充膏火楊明錦天津人任衡州協都司值大旱祈禱罔驗舊傳黑龍潭神物所窟宅無敢驚之者明錦冒險深入巖窟取水足傷口瘖幾無

人色甫出潭大雨踵至三日夜乃止歲獲有秋又形家言迴雁峯  
爲火星與郡南門對峙致多火災惟廣植樹木可禳明錦乃督兵  
繞峯種樹越數月青翠鬱然火災漸息郡人至今德之袁颺徐州  
人任九谿衛守備時吳逆甫平民多離散颺作招撫勸農詩以綏  
輯之一時爭來復業田勇鞏昌人任衡州協千總防守桂陽賊劉  
伯通等犯城勇出禦之馬殪易馬以戰斬其渠魁賊大奔遂進平  
鹽江河窮其巢穴賊遂解散知州張知懋於易馬處立亭表之顏  
曰悼駿程道明歛縣人任桂陽營千總防守藍山值山賊竊發道  
明奮勇撲滅數年中無敢犯者民爲立祠東門祀之張起鳳南陽  
人任武岡營千總駐防城步賊李賴子等率眾攻城起鳳單騎突

敵斬賊首賊眾奔潰後以勞卒

右傳李元度撰



四庫全書

卷

李壽演

李公名壽演斌亭其號也先世明永樂中自直隸棗強徙居山東樂安州其後改爲武定 本朝又升爲府遂爲府治惠民縣人自曾祖以上皆以公祖貴 贈光祿大夫祖之芳順治四年進士累官浙閩總督至文華殿大學士兼吏部尙書以與平耿逆功世襲拖沙刺哈番證文襄父鍾麟分巡江南廬鳳道按察司副使有子十二人公其第八也少而穎異未冠補州學生爲文敏贍每試輒前列康熙五十三年 特詔各直省文武諸生許互應鄉試一次公固兼習騎射技勇遂循例入試中式武舉雍正二年成武進士簡授侍衛秩滿補浙江湖州守備歷太湖營遊擊撫標中軍參將

遷協鎮平陽副將署溫州總兵官杭州副將其始至湖州也練卒  
伍簡戎器爲協帥所倚重劇盜汪三數名捕不能得公微服密偵  
禽諸甯波旅次少緩則浮海遠竄矣總督嵇公會筠特疏具題超  
授三階至遊擊蓋異數也太湖有東西兩營其東營別隸江南西  
營隸浙江駐西洞庭山公分防地也襟帶三府盜賊時出沒其閒  
而湖中操漁舟者往往爲賊耳目商旅患之公既視事爲立簿書  
具漁人名數編次字號於船首移府縣互相巡詰盜無所容久逋  
就獲者前後數案伏奸盡發湖境以清官撫標時有奏請裁各營  
火器外委者下督撫議浙撫以問公公曰銃矢皆軍中致遠利器  
故精習鳥槍者例得與騎射一體拔補是亦策厲戎行之一道舊

章不可更也巡撫臆其言卽據以入告焉平陽地接閩中山海交錯公在任以靖盜安民爲己務其馭軍法紀齊肅而能恤其私以故士咸畏而愛之暇日輒於廨中較射爲樂以釋獲之多寡爲賞罰一時弁卒無不爭自奮者總督德公沛閱閩兵至平陽歎其精練曰李公可謂有祖風矣攝帥溫鎮才數月而軍容爲之一變時以比臨淮之代汾陽也公初遘疾會有逋犯李開花者屢緝未獲公以平陽瀕海慮其潛迹島嶼竄入閩境因力疾往來躬自督察病遂革先是文襄公督浙值耿逆之亂綏輯流民奏蠲逋賦有遺愛於浙人公自宿衛外補游升協帥始終未嘗去浙庚申歲杭城有糾眾奪犯之變勢甚詢詢公時署杭協事開誠諭眾應時解散



其爲民信服如此昔狄梁公爲魏州刺史民愛仰之爲立生祠其子景暉復爲州參軍貪暴爲虐魏人因其毀其父祠不復奉若公之濟美於浙兩世重光俾文襄之遺愛久而弗諼是故名臣尤貴有賢子孫也公好學工書講於篆分之法以武科入仕而訓課諸子必以經業爲先武郡稱有家法者首推李氏云子四人本樾監生本楹本棟並舉人本枸歲貢生本棟官德州學正卽論撰行實爲公乞文者也

右事略楊尙撰

劉景榮 周天相 韋國瑛

劉景榮漢軍鑲黃旗人雍正中任湖南提標後營遊擊奉調協勦貴州九股苗奮勇不避矢石斬馘甚多擢永順協副將時以材武著績湖湘者又有周天相綏德人任永定營遊擊辰州匪藪大勦掠人索賄官莫能制天相單騎擒得置之法在任數年盜賊潛蹤夜戶不閉及卒士民哀之韋國瑛江南人任提標右營遊擊從征貴州九股苗歷著勞績乾隆五年城步苗粟賢宇等叛國瑛奉檄征之復有斬馘功

右傳李元度撰



路建翰

路建翰河南甯陵人與兄建屏從子德貴同登雍正庚戌武進士  
初任涼州守備卽護游戎印有能聲旋委領兵駐哈密旣旋歷署  
高古鎮番諸營參將丁內艱歸兄建屏以哭母一慟而絕建翰獨  
任大事能盡禮起復補涼標游擊調甯夏乾隆壬辰會兵勦大金  
川五月抵黨壩協攻康八達建翰冒矢石爲士卒先中重傷卒於  
軍事平論功一等 贈署參將 諭祭葬恤其家

右傳查岐昌撰



圖書集成醫部全錄

卷

唐朝起 從子光甲

唐朝起字騰飛湖南黔陽人乾隆辛酉武科舉人乙丑進士授藍翎侍衛歷任陝西建安堡都司僉書甘肅肅州鎮標左營游擊推授廣西賓州參將題升桂林府義甯副將嘗由肅州任奉檄出征聞關絕域生死不顧所至勞績懋著屢膺卓薦  陛見四次均奉旨優獎方乾隆二十二年委防巴里坤北海沿邊守禦甚嚴賊不敢窺明年正月解托多克三運口糧距二運十日行心念險遠難恃躬自驅策慎芻豆遂與二運同日抵定邊行營駝馬獨無恙將軍某大喜畱運糧至伊犁迤西賀爾果斯等地已轉送厄魯特投誠男婦三百餘名口返巴里坤營旋運闕展軍器鉛藥二十四年

五月委護羊隻往烏魯不齊行經特那果爾檄諭率所部同烏魯  
木齊官兵搜嗎哈沁賊寇於阿岔湖山口得賊蹤窮追七晝夜抵  
戈壁未能訥落擒獲功最趣赴古魯班噶更吉爾馬太一帶三與  
賊戰皆大敗之旋由沙拉海築圍搜捕回營至北山哈布克白塔  
革烏龍癸哈爾莽等處先後俘斬甚夥功上 特諭嘉獎一時有  
智勇兼該之目 誥授武功大夫年四十九以勞瘁卒於義甯任  
所從子光甲字臨軒田武進士累官至黎平參將善飲工詩治軍  
好整以暇有古儒將風時以唐氏世勳稱之蓋朝起曾伯祖仕元  
明季武庠嘗以勦流寇功歷官至銅仁副總兵故也

右傳易變堯撰

汪松

汪參軍松漢軍人少爲參領爲李都統熹所賞識倚如左右手都  
統公被譖公亦罷斥先恭王延爲記室郎中護衛多驕悍不法參  
領於中調護之頗更舊習時傅文忠當位以寬厚博眾譽公獨不  
善其所爲曰爲臺鼎重任不知身任怨勞以濟 國事惟知含垢  
納污以博一時虛譽吾恐日後必有徇庇之夫假公譽以濟其私  
者玩愒之風由此日甚 先朝綦嚴之法必因之廢壞矣後和相  
秉政果以叢脞爲大度以闡宥爲解事風俗因之日偷實自文忠  
公有以啟之也

右錄宗室昭榘撰



171-816

171

段新黃

段君諱新黃四川達州人初官靜海營都司吾鄉錢魯思爲其地書院山長與之交密及予至更介以交於君問其字而茫然無以荅予笑曰禮幼名冠字五十以伯仲焉有官四品年六十而無字者乎因爲字之曰佩金君則大喜樂甚君少孤露未嘗讀書行伍起家以戰功累致通顯雖目不識字而好交文人又能擇其端方正直者而以爲友獨其天性忠孝根於其心發於其事時時流露而不自知其所以然其兩股嘗受創蹣跚而步陰雨尤不良於行則壯從傅忠勇公征金川設伏以誘敵合圍礮石齊舉賊魁大潰而犇君橫槊窮追從騎皆散獨陷入邃谷中賊數十反戈羣攻之

君奮鬪竟鐵厥魁復傷夷其六七人躍而出以是右股被創一左  
股被創五肌膚悉破裂血染紅透袍韉一軍皆驚悚惴服然足雖  
蹙而既老上馬馳驟如飛力挽強弓矢猶貫鐵間常解衣指創痕  
示客而慨嘆曰我一僕魯武夫荷 上恩拔擢至此雖糜骨碎顛  
無悔也一日魯思邀之食座多文儒君方口啜羹忽嗚咽而淚落  
如雨客愕問其所爲君堅不吐且恐獲罪於客再三謝既而訪  
諸其家乃知是日爲君父諱辰故觸念而發君固不知古人私忌  
之不當燕集也嗚呼此其誠篤雖學者何以及哉會考滿遷狼山  
鎮中營遊擊予又遇於京師君白以發疾懼失 歲子爲言其受創  
之由於職方郎史君卓峯卓峯又爲達於大學 上福公及見 上

東跪不能興福公具以對 恩命掖之起仍赴狼山所以憫恤勞  
臣故事所未有也君出爲予感激流涕而道之君生平與士卒同  
甘苦撫循如父子家人而訓練勤無敢有偷惰者皆克盡力而爲  
之用嗟乎古之名將若祭遵雅歌投壺謝彥齊折節下士逡逡有  
儒者風其次則善用武者必求文士以漸漬於詩書禮樂之氣而  
藉以潛消默化其粗暴之容猶之善讀書者亦必取資於猛士虎  
臣以破其拘迂懦腐之習是故文武二途不合則兩相輕既合則  
兩相益然則如君瀟白之性大節凜然宜予與魯思之致深愛於  
君而惓惓不能少釋也是可銘矣君以某年卒於任年六十九子  
某葬君於某鄉之某原銘曰



眞將軍古孝子不讀書天下士閃電駒餓鴟矢立奇功死誰嗣周  
秦膚刻畫似丁蘭木墓沒齒有不敦類含泚土一坏照青史

右墓誌銘徐書受撰

趙赫紳

趙護衛名赫紳其先蒙古人爲余郎儼屬性忠醇先修二命傅先  
恭王凡醫藥飲食皆賴以調護乾隆乙亥春邸中有護衛雙愛者  
出境滋事先人劾之愛因反噬爲奉先人命者而引護衛爲證時  
先人與時相不睦因嗾某尙書欲坐實其事時尙書據高座侍郎  
左右列護衛囚服縲紲入尙書故作怒狀欲護衛引陷先人加以  
三木者再護衛仰天大呼曰如本王知情方隱匿之不暇敢據實  
以入告乎皇天后土實鑒斯情赫紳雖死不敢誣王以求活也尙  
書爲之氣奪時趙方伯菘英爲部郎因進言曰紳已老不可再加  
以刑何不以鞠紳者而鞠愛也尙書語塞不得已引愛鞠之甫加

刑愛卽輸服先人之冤始白而護衛卒以創死

右錄宗室昭榑撰

按禮修親王名崇安禮恭親王名永恩  
爲修王次子卽削王爵後 賞宗人府

主事昭榑父

李芬

李芬者甘肅皋蘭縣人少孤貧無依因入行伍隨定西將軍兆惠  
公平伊犁擢千總爲行營傳宣方大兵之征回部也未抵葉爾羌  
遇賊首霍集占率眾掩至環營積土爲城城高三丈許外濬深壕  
削木爲檜林立壕底賊踞城施礮晝夜巡守我兵無一人能出逾  
月糧且盡公束手坐帳中芬進曰兵飢矣將軍盍急以糧濟公怒  
曰若知無糧而故倡斯言欲盡軍心耶曰軍自有糧不取耳營東  
南土中有三百餘石請遣兵發之公曰掘地無糧汝當軍法從事  
苟使眾知則無所逃罪姑先試之命家僮六十三荷鍤隨去頃之  
二人握米來獻公大奇之促往掘果如其數因問他處有之乎芬



曰西北角尙有二千七百餘石亦如言無豪髮爽眾皆驚歎公詰其故曰以占得也問何日出圍曰既占之矣某日援兵至次日當潰圍出某日大功成將軍當進封公爵已而皆驗及凱旋芬畱烏什上召參贊永貴公還將上馬問芬吾能回京否曰不能曰驗當酬汝白金二鎰不然屬新參贊鞭汝四十無悔也曰此去十日內見羣鳥飛鳴如陣則不可行行必有禍將仍返烏什耳既去九日宿庫車之合塞爾晨出帳有鴉鵲萬餘飛鳴上下駭極不敢前次日聞報則庫車大臣德明爲嗎哈沁所害矣遂馳回烏什督兵進剿久之始歸芬終甘州中營參將既死寄棺蘭州西郊廟中一日見夢於其妻曰速移吾棺否且有厄是夜芬弟夢與嫂符異之

而未果移也既而二人復夢芬來顏色慘迫曰如明日日中不移則無及矣大哭去詰且其弟覓城東北一寺遷焉棺甫停而薩拉爾回賊至蘭州城西焚掠殆盡時正日中也吁亦靈矣哉聞芬在軍中頗好讀書而於騎射不甚措意生平所占靡不奇中或令人拈一物斷之思議百出出人意料以芬之術使乘時得志預謀帷幄雖裂土封可也然芬武人不好武卒登三品階非術何以致此況如芬者其湮沒草野又豈鮮哉青州副都統陽春儉齋與子同官交好述其事甚夥錄一二大者備史官之采焉

右書事趙懷玉撰

按李公隨定西將軍兆惠公征回部霍集占大軍抵葉爾羌城外黑水事在乾隆二

十二  
年冬



國朝詩賦類攷初編卷三百二十九目錄

材武三

陳得功

阮玉堂

李觀 子聖城

常裕綸

宋若士

哈尙德

王大章  
張清

王世傑

劉德

鍾和

從弟岳

邱中玉

萬世通

葉信

王仲

諾爾本

楊光時

龍廷表

西密揚阿 噶辰祿

白雲上

雷震 姜琳

海秀 大五格

唐光茂

鄭朝柱  
何光昌

李世崧



三十三  
三十三

--	--	--	--	--	--	--	--	--	--

國朝耆獻類徵初編卷三百二十九

通奉大夫前署江西巡撫江西布政使司布政使湘陰李桓輯  
材武三

陳得功

乾隆己卯秋原任甘肅靖逆營守備立奇陳公以疾卒於里第其  
孤嗣德杖而泣拜曰不孝孤鍾禍於我先君今葬有日矣敢以墓  
中之刻請余知公深雖無文誼不得辭謹按公諱得功字立奇先  
世南通州人寄籍於松應募充提標後營步戰兵少有大志軀幹  
雖不甚偉而挽十石弓膂力過人每思立功軍前會隨遊擊某出  
塞印馬一切邊徼之山川阨塞莫不周覽而熟識之不數年閒由

本營把總轉陝西神木營千總升授甘肅靖逆營守備終今官此  
公歷任之大凡也 王師征噶爾丹大將軍某檄公爲先鋒領隊  
前往斬獲賊首級甚多大兵繼進遂克奏捷以軍功超擢守備靖  
逆處極邊之地寇不時至公嚴爲之備莫敢犯境一日出巡遇伏  
發賊擁擁而來公率麾下力戰自辰至酉身被數十創卒得脫金  
川蠢動調甘肅兵征勦箐篁蒙密謀者迷道公敢深入冒矢石仰  
攻奪碉樓幾座賊鋒少挫提督任歿於陣而公還其營蓋生平戰  
功歷歷可紀者如此後以乞休歸白龍潭上破屋數椽蒔花種柳  
樂與朋好相過從酒半酣爲子言當年遇敵磨戰解衣磅礴指示  
背上刀瘢箭痕累累可數年雖老而意氣激烈恍如見公躍馬臨

陳時也公起家行伍而於孫吳司馬尉繚子等書類能曉其大略  
居常整飭戎伍撫恤士卒及有事則奮勇爭先屢立功績庶幾希  
蹤千古之名將與公生康熙某年月日卒乾隆二十四年某月日  
配某氏子一嗣德以某年月日葬於某縣某鄉之原銘曰  
公嫻韜略起自戎行戰則必克振威遐荒秋風鱸膾言歸故鄉釋  
戈而杖蔗境徜徉將星奕奕孰閤其光銘詞惟信納於幽堂

右墓誌銘黃達撰



東洋文庫蔵書目録

二

## 阮玉堂

嘉慶元年內閣學士兼禮部侍郎提督浙江學政阮伯元先生將  
爲乃祖遊擊公立石於神道述先德而紀戰功不遠數百里郵行  
狀示其友凌廷堪屬爲之銘廷堪與侍郎交久且厚不敢以卑賤  
不文辭也謹案狀公諱玉堂字履廷號琢庵先世自山陽遷江都  
遂爲江都人曾祖秉謙祖樞良考時衡皆潛德不仕公始占籍儀  
徵舉康熙五十年武鄉試越四年武會試中式殿試三甲分鑲  
藍旗教習五十八年授藍翎侍衛雍正元年遷三等侍衛三年授  
湖北撫標中軍遊擊十年會改撫標中軍缺爲參將時岳威信公  
以大將軍西討準夷奏以軍前某官補其缺未抵任公仍以原官

署參將事是年軍政卓異次年調廣東提標後營遊擊巡撫德齡以公馭士嚴整有律奏畱湖北任得 俞旨乾隆元年參將其至自軍前撫臣遂以公署興國營參將旋改署苗疆九谿營遊擊二年天子命大吏各舉所知史文靖時總督兩湖以公才守兼優應 詔五年五月湖南城步綏甯兩縣苗叛據險焚劫殺傷吏民公奉檄率九谿澧州洞庭常德四營兵隨鎮筸總兵官劉策名往期時賊悉精銳屯三界谿山口公於六月進薄賊寨身先士卒奮勇力戰火槍鐵丸掠耳有聲公吃不爲動遂大敗賊三界谿爲賊要隘公首克之賊勢漸蹙旋攻八樹寨又克之殪賊幾盡而長安鹽井口客寨飛毛坪龍家溪竹林此五寨者地勢尤險絕林箐深

密攀登不易公率兵步行親冒矢石殲其伏兵鼓銳摧堅復於一日中次第攻克誠奇捷也當是時賊已大困而天子慮事權未一復命經略張廣泗總制諸軍甫到知公謀勇冠諸將凡軍事悉委之時南山大箐餘賊尙扼險抗命積木石塞路兵不得進公統眾聲言從大路入以牽綴之夜簡壯士五百人由閒道越嶺騰躍而上誤墜阮傷膝血流至踵裹創進益力撤木石以通徑時賊已覺數千人來拒公命偃旗息鼓於山巔俟之度賊少懈乃鳴礮直下賊眾駭散而大路之兵亦至合擊大破之獲賊所掠巡檢印一及器械糗糒甚夥殘賊僅六七百人遁伏南嶺龔公之威詣營請降公言之經略經略虞其詐未許公力任之詰朝出諭賊賊悉



嚴叩軍門匍匐乞命經略命發大礮擊之以驗誠僞凡三發皆伏地無敢動者其感且畏如此是時各寨並摧破苗皆退保橫坡經略復命遊擊區明李登華偕公往攻橫坡之險如南山公相度形勢從其左抽戈先登眾從之盡覆賊巢前後生擒男婦三千餘人俘至經略欲駢誅公固爭不從乃從容曰執兵抗師之壯夫殺無赦宜宥其婦女及男子十六歲以下者經略雅重公如所請公乃擇其尤黠悍者斬於軍門餘宣布 天子威德並縱遣之苗慶更生咸曰阮將軍活我騷呼之聲振山谷於是賊寨悉平十一年以軍功議敘加等十三年遷河南衛輝營參將十四年被劾罷歸以詩酒自娛泊如也十六年 鑾輅南幸公迎於高旻寺河干甫奏

名 上在舟中顧曰是鄂容安所參者公對曰諾乃 命以都司起用蓋湖南戰績久契 聖衷故也十七年授廣東羅定協都司二十一年遷廣東欽州營遊擊二十四年十月壬辰卒於官年六十有五公幼有志槩好讀書能文章儀表修偉中人僅及其胷挽強貫札弦不再控尤篤於氣誼鄉試爲儀封張清恪所取士清恪以言事爲忌者所中傷落職居揚州忌者陰使人刺之公佩刀搢矢侍其側寢食不離刺者怖不敢發未幾事白清恪感公之義盡以其學授之後公所至威愛並著兵民交頌雖公之天性過人亦未嘗不淵源於此也其他懿行及惠政甚多皆詳行狀不具書書其大者嗚呼人徒知公戰功赫赫照人耳目而不知其宅心之厚

行己之端也徒知侍郎甫逾弱冠即以文章經術受 聖天子特  
 達之知位登清要為學者坊表而不知實公隱德有以致之也世  
 可以知所勸矣娶汪氏 贈淑人繼娶江氏 封淑人子男四長  
 承德次承義次承仁早卒次承信即侍郎父女三皆適士人孫男  
 三長兆麟揚州營外委千總次元即侍郎次亨國學生乾隆二十  
 五年葬於揚州府城北雷塘中壩以兩淑人耐禮也今公以侍郎  
 貴 贈如其官兩淑人亦 贈夫人銘曰

淮水既深淮山既崇靈秀孕毓寶生阮公桓桓阮公敦詩說禮用  
 武起家宿衛 天子以通六藝復曉五兵 天子契焉俾往專城  
 專城於楚躬為士先雅歌投壺步伐不愆洞庭之南苗頑負嶠公



統偏師貔虎載驅攻如鬼神戰若風雨一日五捷親援枹鼓南山  
橫坡高入雲表窮林邃箐不通飛鳥銜枚賈勇聞道出奇奪賊所  
恃賊乃不支生殺之柄閩外是膺草薶禽殲 天子所矜苗曰不  
其唯公遇之苗曰旣其唯公活之脅從罔治孔武且仁位不稱德  
爰啟後人宰木森森豐碑峩峩勒公之勳奕禩不磨

右神道碑銘凌廷堪撰

阮玉堂儀徵人乾隆初任九谿營遊擊大學士史貽直保舉才守  
兼優五年逆苗楊清保等糾合峒苗掠擾至城步綏甯殺傷官兵  
玉堂奉檄隨總兵劉策名進勦駐三界谿苗悉精銳屯三谷玉堂  
身先士卒斃苗甚眾苗奔潰復攻八排寨及南山大箐橫坡諸隘



四庫全書 卷三百二十九  
次第克之十戰皆捷苗黨八百戶退據南嶺乞降總制張廣泗欲  
盡誅之玉堂力保始受降九谿城北有北山豪姓欲據之玉堂請  
於齊撫爲軍民牧馬樵葬地以故軍民尤感德玉堂升任後軍民  
於九谿衛城內建祠祀之數十年無廢

右傳李元度撰

李觀 子聖城

李觀字文瀾號仙舟又號大可山人昆明人乾隆庚辰武舉山人  
早年負文譽戰不捷棄就武仕途偃蹇因操白圭業家益落乃賣  
藥昆明城南問疾不爲勞愈疾不計賞好吟詠子聖城亦中武科  
嘗從征緬棄官隱於畫錢南園檀默齋皆賞之

右滇繫小傳師範撰

--	--	--	--	--	--	--	--	--	--

Handwritten text in vertical column on the right side of the table.

171-842

常裕綸

孝子姓常名裕綸山西徐溝人生四歲孤母戴氏哀鞠子而撫焉家故織嗇無薦歲資母鍼紵以供孝子侍側愉愉然不刻離既長以武舉授鎮海衛千總故事督漕者多風波危以故勿克迎輜駟視饌飲乾隆二十八年孝子畢官事還鎮人見孝子邈日喜色溢眉宇異恆常時誨之乃其母已來未一載母卒孝子雞斯徒跣不納勺飲將大殮攀棺號阿母不止聲盡血涌腸裂而卒越母亡才

三日

論曰禮稱毀不危身又稱五十不毀然皋魚立哭而死孔子與之傳稱胡女敬歸之子子野卒毀也人情其不立以徵魯之喪孝子



年五十矣不爲生孝甘爲死孝彼其心豈不知畱其身以慰乃母  
於地下哉乃情極而禮亡焉非得已也王荆公之論李朝日賢者  
過之朝之賢朝之過也因其過愈見其賢吾於孝子亦然

右傳袁枚撰

宋若士

君諱某字若士號木庵姓宋氏先世自德州遷膠伯祖可久明吏科給事中孔有德圍萊州慟哭上書請兵以解鄉人德之君有大志負文武才性揮霍豪宕自喜不事家人生產髫年時徒步走關外歷邊徼絕境上下諸亭障作書詳所過風土景物隄塞要害灑灑數千言具有條理既投室僑居靈山衛故城前踞小珠山下峰頂號百尺嶄巖險隘 國初爲羣盜盤踞出沒地大兵彈壓擴清毀巢破壘遺跡若若君每登其巔流覽者久之後以轅門效力得試守萊州衛闡府己酉庚戌間西陲連用兵 朝廷選才能破格徵用君躍然曰吾今可一試矣上書帥府請行值西師解嚴報罷

君鬱鬱不自得尋引病歸家居治圃艾山中閉門理家計米鹽瑣屑事皆躬親之奉兄述庵如嚴父朝夕上食必親嘗述庵性卞急一飯訶叱怒詈必數四君敬戒妻孥唯謹乾隆某年月日得年若干以卒于二人長某太學生嗣給事公後次某

伊蔚氏曰君平日究心經世武備諸書剏造軍械妙合古制其守閩萊郡製礮車至今營伍流傳以爲法余自鄆罷歸過君君時已感足疾擁衾談論不減少年時余衰老無所用於世感君奉述庵事不禁爲之嗚咽流涕也

右傳法坤宏代某撰

哈尙德 王大章 王世傑 張浩

哈尙德河間人乾隆中任辰州協副將辰當滇黔孔道每驛置夫長二三人預支公帑令雇夫役應付法至善辰陽驛丞某私變其法裁夫長派民爲夫富者納賄免而貧者就役尙德廉知之以語知縣得復舊制在任勤練卹兵及去七保之民德之咸爲立石士卒建祠以祀時以材武著績湖湘者又有王大章順天人任永順協副將待人信訓士卒以整工詩善畫有儒將風王世傑掖縣人任常德營游擊嚴緝竊盜拊循士卒軍民俱倚重之張浩清苑人任長沙協守備駐防湘潭縣多竊盜浩廉得其渠宥弗罪凡境內賊巢及其黨姓名悉令吐實籍記之遇案發率健卒按名往捕無



得脫者值歲歉倡縣紳捐米千石責糜振饑胥役市僧因緣爲奸  
痛懲之饑民全活無算以擢任去軍民遮道攀留多至泣下

右傳李元度撰

劉德

戊子昌吉之亂先未有萌也屯官以八月十五夜犒諸流人置酒  
山坡男女雜坐屯官醉後偃諸流婦使唱歌遂頃刻激變戕殺屯  
官劫軍裝庫據其城十六日晚報至烏魯木齊大學士溫公促聚  
兵時班兵散在諸屯城中僅一百四十七人然皆百戰勁卒視賊  
蔑如也溫公率之卽行至紅山口守備劉德叩馬曰此去昌吉九  
十里我馳一日至城下是彼逸而我勞彼坐守而我仰攻非百餘  
人所能辦也且此去昌吉皆平原瑪納斯河雖稍闊然處處策馬  
可渡無險可扼所可扼者此山口一線路耳賊得城必不株守其  
勢當卽來公莫如駐兵於此借陡崖遮蔽賊不知多寡俟其至而

掘險下擊是反攻爲守反勞爲逸賊可破也溫公從之及賊將至  
德左執紅旗右執利刃令於眾曰望其塵氣雖不過千人然皆亡  
命之徒必以死鬪亦不易當幸所乘皆屯馬未經戰陣受創必反  
走爾等各擊槍屈一膝跪儻伏而擊馬馬逸則人亂矣又令曰望  
影鳴槍則槍不及賊火藥先盡賊至反無可用爾等視我旗動乃  
許鳴槍敢先鳴者手刃之俄而賊眾槍爭發砰訇動地德曰此皆  
虛發無能爲也迫鉛丸擊前隊一人傷德曰彼槍及我我槍必及  
彼矣舉旗一揮眾槍齊發賊馬果皆橫逸自相衝擊我兵譟而乘  
之賊遂殲焉溫公歎曰劉德狀貌如村翁而臨陣鎮定乃爾參將  
都司徒善應對趨蹌耳故是役以德爲首功然捷報不能縷述曲

折今詳薄之庶不湮沒焉

右筆記紀昀撰



國朝文獻備考卷之三十一

十一

--	--	--	--	--	--	--	--	--	--

鍾和 從弟岳

鍾和字萬育湖南武岡人少而軒爽有英氣叔相能嘗器異之登  
乾隆辛卯武進士授漳州守備升陝西都司調口外越三年權陝  
西鎮標游擊時從弟岳方由侍衛擢左營游擊並有英稱軍中爲  
之語曰鍾氏二龍舉舉兩雄調甘肅大馬營游擊再調庫爾喀喇  
烏蘇營游擊烏蘇西接伊江北毗呼楚爲輪臺迤西要地和內輯  
外攘疆宇枚謚越七年調署烏魯木齊參將二年以父老乞養歸  
岳字靜圃相能長子也相能以州同發廣東權潮州通判兼潮防  
同知勤練有治聲潮民朱阿章叛事連數省相能得其名冊焚之  
全活甚眾岳饒膽略弱冠登武進士由侍衛授陝西撫標中軍參

將克慶開川楚寇變岳督所部隨額勒登保勦賊於鄖西之仙河  
力戰敗之斬六百餘級生擒數十人戰安康火鳳山擒其酋甯學  
成進勦黃柏棚光頭山賊死拒不退岳設伏略嶺敗之擒其酋劉  
天照及餘賊二百餘人戰商州西牛槽興安蓋屋焦家坪斬馘數  
千招騎遠協副將勦賊侯官嶺塘口子賀家壩諸處所向披靡調  
駐浪協副將權涼州鎮總兵以父憂去職服闕補陞慶協副將肇  
慶瀕海業盜岳設方略多所擒斬盜風衰息母憂歸年七十卒

右傳李元度撰

邱中玉

邱中玉字璞齋湖南黔陽人乾隆三十七年出行伍從征金川奮  
勇突陣屢被重創待不死累官至浙江平陽副將

右傳易變堯撰

邱氏家譜載中玉少嬉戲輒令同侶引導傳呼年二十夜渡邑之  
倒水灣舟子見虎躍入船大驚異又工詩有宴月泚園詩爲士林  
傳誦

右筆記周必鳴撰





萬世通

萬世通字敬軒湖南桃源人年十六舉武鄉試補淮安衛千總猶未冠也漕督楊錫紱知其才委勅運河請築鴛鴦壩從之調紹興衛運丁多積疲世通檢舊案知康熙七年征臺灣會甯漕餉十分之三以資兵食後存爲閒款未散給乃白漕督疏請查照原數分別支領浙省二十一幫之運丁咸賴焉遷長淮衛守備值水災不待批答卽開倉振或難之世通曰吾豈惜一身而不拯千萬人生命耶兩淮蝗災上捕乞燒十二策上官爲刊行各屬旋調臨清衛知軍用多私售以致困敝申請發帑代贖以後嚴禁私賣七省屯丁自是得安恆業會王倫反大學士舒赫德來視師所俘多被脅

良民世通力白之全活甚眾子宜官榆次知縣

良民世通力白之全活甚眾子宜官榆次知縣

右傳李元度撰

## 葉信

公諱信字師權號可亭姓葉氏始祖少蘊公登宋紹興何昌言榜進士世居蘇州吳中官左丞立朝有風節載宋名臣言行錄其子程知虔州慕陽都金精青蓮勝遂家焉公中乾隆辛酉科武舉戊辰科武進士以傳臚充御前侍衛除天津都司升廣東右營遊擊轉山東濟南府參將晉臨清州副將乾隆三十九年八月二十九日壽張縣賊匪王倫糾眾叛公聞警報星夜偕臨清牧潛師入四古莊生擒賊匪二十一名九月初三日巡撫檄赴壽張勦賊初四日至東昌府李海務地方郡守遣人告急抵東昌初五日夜聞賊陷堂邑闕臨清鼓三更矣公飛馳回點營中馬箭手兵三百三



十二名巡護新城舊城無倉庫監獄不能兼顧團練鄉勇習戰守  
法斬奸細二名初七日賊眾萬餘人攻新城施邪法官兵槍礮不  
得入公以赤身妓及黑狗血厭破之衝賊隊斬三百餘級賊潰公  
平日慮事周詳與士卒同甘苦故能心齊膽壯以少勝多岳武穆  
王曰人自爲陣此之謂也河東總督上其事奉 旨加總兵銜賊  
造雲梯放大礮攻西門急公設計縋兵雜賊營燒火藥車賊膽落  
二十三日大經略舒公赫德統兵進剿二十五日賊盡殲公巡視  
孤城十五晝夜髀骨盡露不能騎病疴臥木板令士卒昇巡無少  
懈詩曰黽勉從事不敢告勞公其有焉卒於十月十二日時年六  
十有一馳 聞奉 硃批可惜纂載功臣傳臨清東昌至今立廟

祀之若公者可謂以死勤事者也曾祖日昇祖相鶴父向輅俱以公貴 封武功大夫公配彭氏 封夫人公生於康熙五十三年甲午十一月十六日歿則乾隆甲午年也夫人生於康熙甲午年七月十七日歿於乾隆己酉年九月二十六日生子三長宗剛以子繩祖貴 封昭武大夫次宗媚監生季宗璵天女二長適上猶縣舉人方嚴友之子次塲孫五岫生珏瑞瓊珮媚生琦珏卽繩祖字駢玉入山東撫標營以馬兵中山東乾隆庚寅科武舉授廣東肇慶營守備署高州府都司嘉慶元年教匪滋事出師湖北陝西四川等省著勞績曾孫六賢鏡繩祖生賢鏗賢錦賢銓瑞生賢越賢鏞琦生公與夫人卒後靈柩回籍停而未葬者五十餘年學正

熊君駿訓導陳君元煒閩州志至公傳詢及舉人賴君溶清優貢  
生李君楨始悉窀穸未就停厝於學署之側蓋五棺焉熊陳二君  
心怛怛然動問其子孫皆寄籍山東聞之余余曰當急爲之葬掩  
骼埋胔王政之所必及也況公爲不可磨滅之人哉熊君善風水  
道學署後爲公姓獅子山地甚吉苦無葬資熊陳二君解囊爲之  
倡得錢六十貫道光五年十一月初一日葬公與夫人於正穴餘  
棺皆附葬於其旁董其事者公從孫葉殿魁也嗚呼公值賊匪猖  
獗之時奮不顧身率三百餘兵當萬人敵馳驅衝突動中機宜斬  
級捉生燒其要害令賊眾魄喪奔潰保全東昌臨清兩城固於金  
湯使大兵雲集齎粉鯨鯢歿於王事 天子惜之東人祀之勒旌



常光 國史非惟古之名將不克過之實社稷之臣也忠義之氣炳日星而耀河嶽一坏之士直待之五十餘年而始定可慨也夫爲人子孫無異委之於壑卽其族姓親朋亦無有過而問者求如郭少保不問姓名而以錢四百貫助纓服者葬五世之棺范忠宣以麥舟助石曼卿三喪之葬何可得哉古者司徒之職使民五族相救五黨相賙故其時出入相友守望相助疾病相扶持閭胥書其任恤者比之孝友睦婣以爲六行何風之盛歟自古道不敦而好善樂施者不少槩見余高公之臣節而復多諸君子之仗義並表之以爲偷俗勸亦周禮閭胥之志也維時別駕署州事徐君澂助錢十貫州判王君太阿助錢五貫吏目張君俊助錢八貫巡檢



蔣君曾灼助錢四貫職員黃君桂助錢二十貫例書碑陰

右墓表王泉之撰

葉副將信臨清人游至本協副將王倫之變公嘗抱疾與知州秦公震鈞同守臨清州城凡十餘旬賊人嘯聚甚多晝夜圍之公應時堵禦患痢疾勢甚委頽秦公嘗勸其休息公曰吾聞均之死也與其死疾甯死於賊遂帶疾從軍賴大兵雲集其城獲全公卒以勞瘁死 上甚憐之

右錄宗室昭榘撰

王仲

王仲字仲愨河南武解元官隨州營都司曾相遇於楚省邀至勾  
庭藏書所觀其作畫落紙如飛頃刻盡數十紙其寫蘭則花葉豐  
茂不作纖瓊瘦玉其畫菊則大如碗或如盤絕非尋常籬落閒物  
扞寫肖臆縱橫自在真翰墨中精猛之將

右墨香居畫識馮金伯撰

中華民國二十六年一月一日

171-866

諾爾本

諾爾本滿洲正藍旗人姓吳棧格忒由前鋒給藍翎長銜乾隆二十一年赴巴里坤軍營副將軍兆惠遣往鄂拉克相度形勢還言達什策凌等謀叛兆惠遣兵擊敗之二十二年六月參贊大臣富德獲從逆宰桑烏巴什遣諾爾本解送兆惠軍營中途遇賊奮勇勦殺奏入 賜克壽巴圖魯號授三等侍衛賚銀一百兩二十三年三月從兆惠等勦昂可圖於庫隴癸山射獲之六月雅爾哈善圍庫車城霍集占率眾三千餘來援官兵分路迎勦諾爾本偕公袞楚克侍衛齊凌扎卜齊努渾等衝賊右翼自卯至辰大敗賊眾追勦六十餘里至鄂根河口斬獲甚夥賊三百餘逃入蘇巴什山



復偕齊努渾勦戮之得 旨嘉獎下部議敘十月偕總管瑞濟布  
領後隊兵擊敗霍集占於葉爾羌城東二十四年正月兆惠富德  
合兵擊賊黑水諾爾本在事有功 詔獎軍營奮勉效力之員授  
二等待衛二十五年大兵凱旋 命在乾清門行走 賞緞十端  
銀百八十兩給騎都尉加一雲騎尉世職 命圖形紫光閣儒臣  
擬贊曰轉戰朔庭鎧盡蟻蝨射昂可圖組糜尺一拔戟成隊績著  
回中摧堅入險積健爲雄二十七年擢頭等待衛三十二年十一  
月隨明瑞征緬甸擊賊於蠻結令諾爾本往來策應直薄賊營身  
受浮傷得 賞賚明瑞尋遣赴邦亥猛籠沿途多斬獲三十三年  
四月敘功列超等七月署雲貴總督阿里衮奏派帶兵往騰越駐

防旋 命回京三十八年閏三月擢圍場總管仍在乾清門行走  
四十一年九月 賞副都統銜四十二年二月卒

右 國史館本傳



楊光時

吾常州唐荆川先生爲沈希儀敘廣右戰功直牘子長孟堅堂奧而無一語似子長孟堅奇作也江西撫標右營遊擊楊光時官河南時從討教匪以偏裨聽指揮與希儀專制一方戰守奇正得自主者不同故功止臨陣斬俘可紀然觀其處患難及進退之際綽然皆有不昷之道焉使得處希儀之地之時深謀警策未必讓希儀獨絕如荆川所書也於其乞休而歸用周勃灌嬰傳法爲戰功略詒之蓋事勢旣殊文體亦異非避荆川就子長孟堅蹈空同于鱗所尙也

楊光時字中立河南唐縣人乾隆四十五年武鄉試中式旋官河



北鎮標左營把總升右營千總署衛輝府王祿營守備年四十二歲矣 今皇帝嘉慶元年教匪起河南陷新野中立從遊擊揆明戰所將卒斬俘二百人復戰斬五人從巡撫景安戰斬二人從南陽總兵王文雄戰斬三人二年從參將廣福破賊李官橋斬七人破賊都司前斬二人伴四人從參將蔡鼎披內鄉淅川俘三十一人破賊鄧家河斬二人在軍署南陽守備以功加一等時湖北河南教匪次第入陝西陝西教匪亦起王文雄由總兵升固原提督赴陝西中立以河南兵從之在軍升彰德營守備三年將二十五騎探賊遇賊騎斬三人復戰斬二人伴三人合大隊戰整屋焦家鎮陷陣斬十人戰圪子邨賊銳甚圍官軍官軍排火器四面擊破

之斬俘五十人戰尹家衛陷陣斬五人 賜花翎戰渭南厚子鎮  
俘二人戰盤屋板子房斬一人俘一人追賊南鄭黃官嶺斬二人  
戰褒城廉水險陷陣斬十人俘九人戰西鄉兩河口陷陣斬十人  
俘五人戰南鄭鋼廠賊張兩翼來犯伏起陣右澗中銳甚別將  
勇八十八人迎擊澗上破之斬五十人俘七人四年戰西鄉二里  
亞斬持大白旗賊渠一人追斬四人至老鷹崖復斬五人俘二人  
戰分水嶺斬乘馬賊一人戰牛頭山陷陣斬二十人戰鍾家溝斬  
五人俘一人戰褒城瓦子嶺斬二人戰西鄉堰河口斬三人俘一  
人戰南鄭烏亞子斬十人俘一人升陳州營都司五年戴家營賊  
犯周家坎別將於野貓溝迎擊斬二人賊楊開甲掠蕎麥灘合大

隊迎擊於洋縣之三岔庵俘二十七人迎擊賊唐大信於節草瀨賊踰山遁追戰魏家寨破之竟三日夜追戰萬曲灣火石亞山王廟麻柳灣皆破之戴家營賊合高二馬五犯西鄉宛豆坡追戰破之斬五十人凡在軍六年戰河南十一戰陝西二十八奏首虜功數如前其未奏者二十八戰首虜功皆沒無可紀前後進官三賜花翎一自中立至陝西提督令將騎每戰當軍鋒素恤士卒糧乏卽以己貲分之至是糧乏四十餘日不能軍兵臨陣失伍歸河南中立追至南陽令歸伍皆大哭言等死耳願以潰師伏法無一人肯西向者遂跳身還營提督劾之聽勘軍方情賊適大至置陣自山梁馳下眾軍仰禦之忽陣動崩下山不可止賊遂殘提督而



河南巡撫吳熊光具潰師始末入奏 皇上下其事經略額勒登保經略知提督軍情欲中立訐其實中立曰軍主已沒王事矣豈可以一劾嫌使不保令名自脫罪哉對簿七晝夜無異辭經略爲動容盡以中立前後恤士卒狀并戰功上之 皇上免死革花翎并四品頂帶以都司從軍從經略戰西鄉西渡河破之從固原提督慶成戰馬灣土地嶺皆破之別將防茶鎮口賊渡漢從提督迎擊斬俘二百三十人六年旋師河南別將赴湖北鄖陽駐南化七年駐小蓮灘以守禦功復四品頂帶十一年教匪平積年資擢江西撫標右營遊擊中立守職勤事上有禮與同官溫溫然未嘗自言功忽不自得投劾去當事惜之不能留也敬前權官吳城教匪



起上江中立將兵而入赴潮日陰備之過吳城敬至其舟士卒帶  
刀立甚整糗糧甲冑旗纛甚備悉藏舟中無知者敬心異之更一  
年而中立乞休敬適劾官數過從故知之詳如此

右戰功略惲敬撰

## 龍廷表

公諱廷表字立亭先世豫章望族六世祖諱文光以都御史官於蜀遭亂殉節子姓乃卽蓬州而家焉後徙成都遂爲成都人五傳而始顯考諱有璋以軍功注選千總不樂仕宦未任季父有印授鉞漳海羣從由瓊衛而分閩者踵相接也公年十八由兵籍舉武鄉試隸提督岳襲勤公麾下會方討雜谷番公被羽先登戰甚疾乃摧後營千總委辦蘭州馬政及赴西甯郭羅克黃勝關偵察番情皆稱任使主者以爲才乾隆三十六年金川再用兵公從提督董公天弼領土練兵進勦攻克邏格爾宗斬賊魁首五級奪礮卡七座摧前營守備三十八年冬金酋尙阻兵而郭羅克麻蘇滾布

構釁定西將軍阿文成公深憂之以爲我兵方殫力攻金川不容  
復有駢枝生患宜遣幹員諭解之乃以命公公從二騎以往制府  
文公懼夷性獷悍檄松茂道駐松岡以虞變公至出語中其要害  
二酋乃解仇結約明年正月各遣頭目隨公馳謝由是大軍勦賊  
得靖心一力無他顧憂則公之爲也嘗是時兵分三路以進而宜  
喜山梁絨布寨皆阻險而止惟文成公由西路而攻克勒烏圍有  
建瓴之勢然賊以凱里葉橫扼要衝悉力拒守我兵持久不得進  
公密言於文成公曰頓兵經時宜別出奇計聞有開道曰空卡四  
面斗絕賊恃天險備宜少弛可襲而取則出凱里葉之前去賊巢  
不遠矣文成公然之授公千人命相機掩擊乃以甚雨之夜率眾

負兵械援蘿葛以登既抵寨大呼躍入賊出不意惶擾無鬪志頓  
墜崖谷及斬馘者不可勝算平明遂火其寨連奪大礮一小礮三  
十七空卡既破凱里葉賊兵亦蒼黃奔潰乃萃三路之師鼓行而  
前直達噶喇依矣文成公乃曰吾素知龍某勇而善謀此績良不  
小功既上擢瀘州營都司 賜棉甲一副銀五十兩仍 敕兵部  
議敘註冊推升金川既平文成公念新附之地反側可虞孰是能  
任善後之事者度無以踰公卽奏公駐底木達歷四年宣理帖服  
改屯爲營公乃押土司詣熱河 行在朝貢既竣事還蜀乃赴瀘  
州任公以其地外接蠻徼當益兵以戒不虞請增置步卒八十在  
任三年軍民欣戴嗚吠不驚而公自弱冠從戎崎嶇巖谷侵染霧



露年及艾而衰左肱及股槍石傷時發竟以是卒實乾隆四十九年正月八日也年五十有二太恭人吳氏有賢行事舅姑以孝聞公在行閒久以太恭人善持門戶常置家事於不問凡十有一年而後歸歸而見夫庭宇修整田疇墾闢嫁女娶婦亦既抱孫乃喟然興歎曰吾無以酬子惟博此 五花詰以報十餘年苦辛耳初公幼習書史顧家世由武事拓迹遂緣以取功名然非所好也嘗從容謂太恭人曰揚名顯親文與武無二致然惟讀書人能識道理通古今求之於曹介之士殆不易得吾子孫勿復習武也太恭人以是教諸子皆力於學振奮庠序至登賢書而萬育尤才諧襮著廓爾喀之役大府俾襄事軍幕萬育念太恭人年高不欲行太

恭人告之曰汝父誨汝讀書者欲汝識忠孝二字耳服官而驅馳  
執掌忠也戮力戎行紹先人之志事孝也行矣勉之萬育遂以勞  
擢陝西高陵知縣洊升興安知府楚蜀莠民搆亂羣帥逐寇萬育  
鞞刀箠矢無役不從其不敢告勞者皆太恭人教之也太恭人後  
公二十四年嘉慶十二年七月四日卒年七十有五子四人萬紀  
註選州吏目萬齡嘉慶戊午舉人揀選知縣萬甯嘉慶庚申副榜  
廬山縣教諭萬育乾隆己酉拔貢陝西興安府知府女二孫男十  
二曾孫四嘗竊迹公之戰功以爲智勇兼備有古名將風惜乎未  
究其用故不大顯於時又嘗觀於遷固二史其傳衛青霍去病並  
及其校尉裨將今文成公蕩定絕域功烈過衛霍遠甚史家若準

遷固之例如公者固宜附書故縷述其事以告異時載筆者若太  
恭人盡妻道以佐臣道俾公靡室靡家夙夜以從 王事可不謂  
賢乎既以相其夫卽以訓其子由是而公父子爲 國宣力世濟  
其美則又伊古以來爲婦爲母所罕觀者也宜表而揚之以詒來  
禩若夫葬期兆域已具鄧君綸及今相國董公之誌故不備書

右墓表莊斲撰

西密揚阿 噶辰祿

覺羅西密揚阿字文暉滿洲正紅旗人今協鎮杭州兼統領錢塘水師副將工指頭畫山水蒼渾有氣勢雜卉尤佳奇情逸趣信手而得高且園侍郎後一人而已

右墨香居畫識馮金伯撰

噶辰祿

噶辰祿滿洲人官牛彙工畫蠅草泥郭索備極生趣尤精律呂喜古樂操琴鼓瑟雅歌投壺頗有儒將風流

右墨香居畫識馮金伯撰





白雲上

嘉慶十有四年余客遊於揚揚之士大夫方以前遊擊白公政績聞於朝入祀名宦祠蓋公之沒已二十年距公之宦斯土且四十年矣何揚人思公之深也既而私於揚之人知公行事甚悉公諱雲上字凌蒼先世汾陽人曾祖用始占籍河內累世以武功顯父光顯官汝甯守備憲廟時隨大軍征策旺諸部進至星宿海督建城柵積功升富賀營都司以公貴贈如其官富賀公生三子公其仲也生而俊偉有奇氣善讀書自以世授韜略不敢廢乃專意騎射技日進能引數石弓置兩的左右馳射百矢無虛發乾隆十五年舉於鄉明年成進士授藍翎侍衛二十一年出爲平望

營都司平望近接其區多支港大澤姦宄駕舟出沒爲商民患舟  
皆銳首長身運楫如飛公邏得卽毀之先後破獲七十餘案時桂  
林陳文恭公方撫蘇數稱公賢倚如左右手歷署江陰常州遊擊  
皆有聲三十年擢揚州遊擊兵卒素窳惰生事公教誡約束營制  
以肅又於馬神廟設義塾令兵士子弟讀書其中後循循漸知禮  
讓校場舊在新城民稠地狹制府高文定公始移蜀岡之陽公植  
柳萬株以庠士卒驛堠營堡皆令插柳夏蔭行旅冬備采樵人享  
其利揚郡屋宇鱗比風日晴烈易致火舊製有太平桶水礮諸禦  
火兵士演放久疏臨事手棘公至猝演試扶不如法者日置馬  
二伺火發卽飛騎救不待報嘗曰火必有路審向背候風色擇要

害撲之餘可自止體趨捷升屋如履平地拉木摧牆無不應手滅  
奸民劉長有者屢縱火思掠財物公捕得之置之法自是火患遂  
稀揚民數十萬戶恃葦薪以炊每束定價三十三文葦艘自瓜洲  
入城多爲吏胥婪索輒減束取直以應之公謂小民多一束薪卽  
可供一炊用禁加派覈偷減商民兩利城西壤接泗州山地無溝  
洫常苦旱去城七里有龍神祠甚湫隘公徒步虔禱七日夜大雨  
如注乃增構而新之後以地遠移廟甘泉山實自公始也四十年  
擢金山參將揚人泣而送者數十里四十四年又遷漕標中軍副  
將時漕帥長白鄂公毓公皆久知公名交重公方以總兵薦而公  
已以疾力求去無不稱惜者公所至視士卒如其子弟所以愛養



教督無不至內行潔未嘗妄取與在揚時嘗以救火有巨室擔錢數萬犒兵者公卻之曰此例行後或有事兵將視貧富爲緩急矣人咸謂公能持大體善詰盜撻伏如神淮關公廨嘗被盜訊者逮監督家人雜鞫之制府檄公會勘公詢知盜皆邳徐語音白制府盡釋繫者曰願假百日當以真盜報徼服至蕭碭聞於市中見淮關銀密偵之果得盜首時銅山竊案久未獲亦賴公得正賊事聞 上嘉之 詔送部引 見垂問甚悉公既引疾去官因就醫於揚揚人無少長皆親暱公一日疾微作遽卒於行館或見公輿從甚都阿殿出城闔以公之行事如此其歿而爲神亦事所宜有也嗚呼揚州東南劇郡數十年來官之至於斯者固不乏人而民

所惓惓乃獨在公非其有人人之深者而何以至是 今天子既  
俞眾請俾公祠於此邦其子守清將歸葬於沁水祖塋因來乞誌  
墓卽撰次所聞以紀諸石公生於雍正二年六月十九日卒於乾  
隆五十五年二月初一日年六十有七元配韓夫人先公五十年  
卒葬於先塋之次繼配張夫人其儉有禮後公十年卒子二長卽  
守清兩淮鹽運司知事次守廉乾隆癸丑進士今官安徽石埭知  
縣皆能守遺訓以節操自勵公之澤吾知其久而未艾也銘曰  
字而愛之公澤貽尸而祝之民所思公歸其居兮惟億萬年永固  
茲

右墓誌銘姚文田撰

公姓白氏諱雲上字凌蒼號秋齋本籍山西汾陽曾祖用始遷河南之懷慶遂爲河內人累世以武功起家父光顯雍正間隨征策旺諸部落直至星宿海歷危險者七年官汝甯守備推升富賀營都司三世皆以公貴 贈如其官光顯公生丈夫子三公其仲也生而器宇俊偉喜讀書以韜鈴世業不敢墮其家聲調弓縱騎無閒寒暑嘗冬夜較射倦甚預貯水於旁猛淬臂指寒氣激烈灑然警醒由是藝日進乾隆庚午舉本省鄉試明年成進士以藍翎侍衛供直丙子出爲江南平望營都司癸未聞父訃循例請假歸葬假滿還任連攝江陰常州遊擊事隨升揚州遊擊以常州失察邪教鐫二階部已銓人矣制府高公晉專奏畱之 上素悉公才復



公任而移置選者洵異數也乙未升金山參將己亥 特授清標  
中軍副將預保總兵以疾去公之初任平望也天下承平武臣多  
習於文吏之雍容不復以猛奮爲志公慨然謂致力以安百姓正  
吾武臣事也故歷官以治盜爲急務一切利民事無大小皆竭心  
力爲之平望爲吳江浙錯壤緝捕爲難具區尤爲奸藪公  
親歷山坳港汊爲圖說識之前後獲盜七十餘案汛內肅然江陰  
多黠賊奸捕句引放縱視爲囊橐公召諸捕慰勞之問所獲賊數  
捕具以對公默識之一夕忽叩捕門問賊安在愕不能荅痛懲之  
刻日盡獲由是斂跡夏旱飛蝗集境公持竹立醕日中督兵役徧  
闕深坑夜然束草於旁蝗爭投火光墮坑中滿從而壓燒之是歲



竟不爲災在揚州惠政尤多予來客揚時公已遷揚之士大夫下  
及販豎皆能舉其名津津樂道其救火催薪二事尤在人口揚城  
民居稠密火患滋甚故事火具及太平桶十二門水礮無不詳備  
然大半朽敗生疏公一一脩整出不意演放不如法者鞭之臨事  
鮮慮遽之患每救火不待報瞻望煙光駭馬至火所周旋詳審嘗  
云火必有路相其嚮背風色先所急則易集事體素趨捷乘屋如  
履平兵丁踴躍隨之勢若飛隼所至摧牆拉壁應時皆滅奸民剝  
長有者因風縱火肆意劫掠公當場手禽之已首伏矣文吏持之  
不下當其時公勢孤危不動聲色嚴鞠盡晝夜卒論實如法人稱  
快焉有巨室遭火救之翌日擔錢數萬酬兵公曰此風一開兵丁

必視貧富爲緩急矣力卻之人皆服公能持大體揚數十萬戶皆藉洲蘆供爨自江至城東定價爲三十三錢然多偷減之弊公申明輕重定數毋許解大爲小又慮利民而病商也凡吏胥婪索難發無遺民便而商亦不因或積雨柴船不時至親詣江干督之今柴束不及曩時之半復實以枯泥敗葦遇陰雨則溼煙眯日場之遠燼又常缺乏居奇屢爲民患然後嘆公之德澤及人大也甲午淮安大水哀鴻徧野公時襄振事先期載餅以哺全活甚衆淮關公解被盜訊者咸疑內啓逮監督家丁雜治制府檄公協勘詢知盜皆徐州及山東口音白制府盡釋所繫自限百日緝獲乃改裝周行豐沛蕭碭閒見有以淮關銀市易者鉤距陰誦遂得董松山

李鳳臺一真盜無他株連復於本案外得銅山積賊李二及他竊甚夥人驚爲神事平送部引見上深賞之垂問訪擊事甚悉任漕標時前後漕帥鄂公寶毓公奇皆倚重之公勤於公事冒犯霜露年未老而鬢鬢皆白至是以衰病乞休漕帥不得已上聞然深惜焉畱揚州就醫優游者六七年庚戌春以微疾卒於行館年六十有七公持己潔廉無矯飾嗜好泊然不與文吏相媿嬰亦不侵其官孳孳矻矻無媿公事而後已一生致力以安民者不可枚舉大率類此雖歷官未出江蘇省一步而大江南北識與不識咸心維而口誦之皆稱爲白將軍云

論曰公之養病揚州也時騎款段隨兩蒼頭從容街市聞子每途



遇之旁人曰此前遊擊將軍白公也見其面方微頰白鬚彪彪然英氣逼人後復邂逅郡博李晉生同年齋風度凝重言論侃侃多持正洵乎其爲儒將也最後與兩公子遊聞公之行事與所得於人考合夫望九原而思隨會過大梁而想夷門異代之思有餘慕焉予乃得並世而親見之至今尙畱心目豈非厚幸與

右傳張雲璈撰

白副戎名雲上河南人由侍衛授都司洊權常州營遊擊公正無私馭兵嚴而有恩自奉甚菲尤耐勞苦寒夜步行巡查徧歷郊野遇盜賊身先士卒訪緝必獲姦宄聞風遠去闔境安枕遇火災則短衣芒屨一躍登屋眾咸鼓勇撲救得免延燒升揚州遊擊揚州



商殷富官斯土者多與往還通弔慶白公獨一槩謝絕暑冷如冰其緝盜救災則如常郡時值淮關盜劫庫銀巨萬年餘徧緝無蹤制軍素知公長於捕盜因特奏委辦公齋檄至關相視並攜庫銀二錠爲驗遂改裝爲賣繭客潛行旁郡至徐州屬邑入一村店宿焉聞母女二人語乃郡中胥魁外宅近寄銀至欲置衣物公次早攜繭至門母女出視喜其價廉出銀售之回寓省視與庫銀無異遂細訪胥魁居止市駿馬健驟作販客徑至徐州過胥魁門見而悅之議價交錢客曰吾輕裝難攜非白金不可胥魁出銀交易皆淮關庫銀也公出卽赴府署見守示檄並告之守立捕胥至跪階下舉頭見公知事已敗露乃自承盜首供黨與數人皆出不意

立捕獲伏法事上 聞嘉獎擢漕標副將記名以總兵用後以年  
逾六旬告病歸僑寓維揚數年卒夫白公武將也迄今三十餘年  
矣而兵民商賈咸頌不衰又況有司牧之責而才守兼優者耶惟  
魯豈無良惟在深入其心斯沒世難忘而穆然足千古也

右傳金捧闔撰

古之政典自將軍至於伍長皆取備於六鄉之吏平日則治其夫  
家井牧飲射讀法之事有故則投之兵而掌其徵令於事無不當  
爲故思信在人周知閭閻之疾苦而所至有功兵農分而文武異  
其用武臣雖存心利物而勢有所不得爲故功蓋天下而不見以  
得民心夫事不越職而道濟於生人此公之所以不可及也公以

侍衛歷官揚州營遊擊以恤以練士氣既作政肅人馴罔或羣飲  
譁於市者凡利民之事若迫於身宣德達情政無回隱追胥糾暴  
人告其心他吏或耽逸非度畏公清直輒逡巡斂迹雖臧獲婦子  
莫不尸而祝之灑然如出一口而公之德政尤在救火城市窮鄉  
燄一發則匹馬如風萬人辟易而至騰蹕火中燎及鬚眉指揮水  
龍應手而滅是以自公至而火不爲菑夫兵猶火也先王以火政  
昭顯天地之光明化腥臊而救時疾其利庶矣燎原之勢不可嚮  
邇於是乎以生人之道殺人兵者凶器聖人作之以威不軌於是  
乎以殺人之道生人周以司燿隸夏官而掌行火之政令天生五  
材而並用之蓋以兵火爲官聯而公能舉其職者也比之攻城野

戰勦民命以爲名者其功爲大詩曰凡民有喪匍匐救之豈非仁人之利哉蟄居發策每攬古賢人治績和風甘雨成物樂生恨不生及其時謳詠其行事況在下風敢忘休烈公白氏名雲上河內人頌曰

猿臂頎頎渥丹其顏駿馬錦衣赫如神人吮創分甘卽之也溫謔  
譔出出灼我頭頎朱旗四麾煙銷煤息熒惑風師鳴暗卻立原土  
不焦萬瓦猶赤擊鼓剗羊醜醜有憚作此好歌以紀文石

右頌汪中撰





雷震 姜琳

雷君名震字繼賢華亭人父某字明懷國子監生君生而英爽偉  
軀幹膂力絕人能生啖鳥獸肉一食盡斗米數日不食亦不餓年  
二十三中乾隆四十八年武舉以漕標千總投效松江提督標下  
借補劉河營把總時海盜滋事有閩賊黃姓者肆掠於福建浙江  
諸海島糾合黨與連數百艘劫商船貨取其半還其半給之以旗  
縱之歸他盜見其旗不復劫又拘人島中索銀以贖過期不贖卽  
殺之勢張甚官兵莫敢誰何江浙諸商大受其困賊踞島嶼出沒  
無定島中有馬蹟山賊之巢窟其近松江者曰大洋山小洋山大  
洋山石多水惡山無草木小洋山形勢與馬蹟略似前有奇峯轟

立如屏中通一港舟藏山坳四面皆岡巒旋繞其上有泉味淡可飲官兵駐防於此乾隆乙卯秋九月君奉制府檄與上海右營把總姜琳同入海載棉衣給戍卒禦寒是時參將楊天相獲海盜甚多制府目爲誣良議以大辟並劾提臣陳大用自大用罷去當事者詭稱海盜遠颺諸營弁巡海不得擅持兵械止許備汛卒數名木棍數桿君負膽略奮袂直前語姜琳曰我與若去殺賊爲楊參將雪憤不勝則爲忠義鬼琳曰諾皆白衣冠祭祖墓與家人訣煉慨登舟不反顧及出口颶風大作舟掀巨浪中不移時近小洋山賊船得順風船如駛馬直逼官船琳與賊鬪死之君執木棍掠數賊落水賊刃環集隨手卽落頃之羣賊蜂擁一賊躍入舵尾從倉

後出持巨斧斫君左肩君奪其斧殺之而君傷重肩背盡裂自投於海而死年三十有五事 聞 詔賜祭葬銀入祀昭忠祠世襲雲騎尉 國史附傳嗚呼人莫不有一死而泰山鴻毛相去懸絕君不過千夫長耳烈槩若此非所謂重於泰山者與君娶某氏子一載興襲雲騎尉候補守備以某年月日爲衣冠墓於某阡招魂而葬君禮也君之兄子瑩余之同寮述君死難事甚詳屬余爲文鐫諸石

右墓表盛大士撰





海秀大五格

海參領秀滿洲人爲褚庫巴圖魯裔幼患痘左鼻壅塞人多嬉笑  
參領恥之伺其母出日以佩刀刺鼻孔血涔涔下卒通其竅乃已  
時方七歲其父歎曰此何異符生之刺目也洊至正紅旗參領以  
廉能稱時和相建議以官廢馬散兵丁飼養會八旗大僚議人皆  
應言如響公獨曰 國家所以不惜數百萬金錢以爲芻牧資者  
良以天閑重務備緩急之用也今若散給兵丁雖稍濟其生計儻  
一旦用之則恐侵冒者眾徒以繁刑害眾無以濟實政也和岸然  
曰汝是何醒寤官乃敢抗乃公議耶卒如和議後 今上習知其  
弊復 命立廠飼養所糜繕葺之費不貲而公卒已數年矣玉闔峰

侍郎保文士也夙與公善嘗曰使八旗參領皆如海某安有疲玩之兵卒哉將薦於朝而公力辭卒以勞瘵終論者惜之

定制選八旗勇士之精練者爲角抵之戲名善撲營凡大燕享皆呈其技或與外藩部角抵者爭較優劣勝者賜茶繒以旌之

純皇帝最喜其技其中最著名者爲大五格海秀皆上所能呼名氏有自士卒拔至大員者蓋以其勇鷲有素也和相當軸時令巡捕營將士亦選是技其後文遠皋甯任金吾時以其賤卒不宜近上前因奏罷之人稱其識大體云

右錄宗室昭棟撰

唐光茂 鄭朝柱 李世崧 何光昂

唐光茂字文燦湖南武陵人以把總征金川有功累擢廣州協副將署韶州鎮總兵會兵民互闢光茂隨欽差鞠之持平無左右袒時論稱之湖湘材武聲績尤著者時又有鄭朝柱鳳凰廳人父恂直隸游擊朝柱以行伍任貴州守備乾隆六十年大塘寨苗石柳鄧叛朝柱隨督師協勦有功洊擢游擊 賞花翎尋晉副將子國鴻處州鎮總兵殉海疆竹山門李世崧字光國桃源人乾隆時二甲武進士授二等待衛出爲甯都營參將地多水災世崧爲民貸官穀並設粥以振其不能償者悉代償焉民祠祀之何光昂字旭亭湘潭人丰儀秀整善詩工書畫中乾隆武進士官東昌衛守備



K320.49

326

文苑地... 卷...

時衛無轄兵值王倫叛窺東昌光昇於衛地掘得古礮五鉛子數  
百斤賊至發礮轟之賊不敢犯調泗州衛遷碾伯營都司以疾歸

右傳李元度撰

171-908



21101000160792